

တမန်တော်

တမန်တော်လေရဲ့ လောက်ဆောန်ရှင်း

နိဒါန်း

တမန်တော်လေရဲ့ လောက်ဆောန်ရှင်း ကျမ်းဟာ သင်းတော်ရဲ့ စဉ်းကြောင်းရာဖြစ်ဘီး သင်းတော်ဟာ ယေရုရှလင်မြို့ဟုနေ ယုဒပြည်၊ ရှုမာရီဒေသ၊ အယ်ဘီးဟာ မုလေဂီးဆောင်းထိဟို့ ဖယ်မျိုး ပုလုံနွံဟားလေ့မယ် ဆိုဘီး ယေရုရှဟု ကောန်းဂန်ဘောင်ဟို့ တတ်ကြွခန်မာ သူ့ရဲ့ တမန်တော်လေဟို့ ပြောဟားလေဟယ် (၁.၈)။ လုကာရေးဟားဟူ ဒန်းကောန်းကျမ်းဟို့ ရေးဟားဟူလူဟာ အယ်ကျမ်းဟို့လည်း ရေးဟားဟယ်။ သူဟာ ဆရာဝန်တယော့-က်ဖြစ်ဘီး မှန်ဟူကြောင်းရာတခုဟို့ မှတ်တမ်းတန်ဟို့ ရရာတိုင်းဂရုစိုက်ဟားလေဟယ်။ သူဟာ သူ့ရဲ့ ဒန်းကောန်းကျမ်းန တမန်တော်လေရဲ့ လောက်ဆောန်ရှင်းကျမ်း နှေ့စောန်လောင်းမာ ဟေလသလူမျိုး တယော့-က်ဖြစ်ဟူ သော်ဖိလုဟို့ လိမူဟားလေဟယ်။ အယ်ဘေမဲ့ အယ်ကျမ်းလေဟာ ဟေလသလူမျိုးန ယုဒလူမျိုး နှေ့မျိုးလောင်းပါဝမ်ဟူ ခရစ်ယာန် ဖွဲ့စည်းလေတွပ်လည်း ရည်ရွယ်ဟားရှင်းဖြစ်နိုင်ဟယ် (၁.၁)။

တမန်တော်လေရဲ့ လောက်ဆောန်ရှင်းကျမ်းဟာ ယေရု

မိုးဘီးန ၆၀-၆၄ ခုနှစ်ကြားမှာ ရေးဟူးဇာ ဖြစ်နိုင်ဟယ်
 ဖြားဖြစ်ကြောင့်နူးဆိုဟာ ပေါလုဟာ ထောင့်ဟုနေ လွတ်
 ခန်မာ အယ်ကျမ်းဟို့ နိုဂေါင်းချောက်ဟူးဟယ်။ လုကာ
 ဟာလည်း တမန်တော် ပေါလုနတူးဒု ခရီးသွားလေဟယ်။
 အယ်ကြောန့် တမန်တော်လေရဲ့ လောက်ဆောန်ရှင်းကျ
 မ်းဟာ အနုတိအုတ်မြို့မှာ ရေးဟူးဇာ ဖြစ်နိုင်ဟယ်။
 တမန်တော်လေရဲ့ လောက်ဆောန်ရှင်းကျမ်းဟာ လုကာ
 ဒန်းကောန်းကျမ်းရဲ့ ခန်းဆစ်ဖြစ်ဘီး ယေရှု ကောန်းဂန်
 ဘောင်ဟို့ တတ်ကြွဟူးဇာန နိဒါန်းပျိုးဟူးဟယ်။ လုကာ
 ရဲ့ ရည်ရွယ်ချစ်န ရေးသားဟာ သူရဲ့ဒန်းကောန်းကျမ်းန
 တူညီလေဟယ်။ သူဟာ တိုးပွားလာဟူ ခရစ်ယာန်လေ ခံ
 ယူဟူးမျိုးဘဲ သော်ဖိလုဟို့လည်း ခံယူဟို့တွပ် လိုရှိဟ
 ယ်။ အယ်ကြောန့် သူဟာ ယေရှုသတ်တော်စဉ်ရဲ့ တိကုလ
 ဟူ မှတ်တမ်းန ခရစ်ယာန်ဖွဲ့စည်း ပုလုံန့်ဟူးရှင်းဟို့ ရေး
 ဟူးလေဟယ်။

တမန်တော်လေရဲ့ လောက်ဆောန်ရှင်းကျမ်းဟု ကနဦး
 သင်းတော်ရဲ့ ပေါင်သတ်သေန အယ်သင်းတော်မျိုးဘဲ
 ယေရှုနှိုက် ဆောင်းထိ ယောင်ကြည်ရှင်းဟို့ တုယူဟို့
 နို့လေတွပ် ပြင်ဆင်ပေးဟူးဟယ်။ တမန်တော်လေရဲ့
 ပေါင်သတ်သေလေဟာ တခြားလူလေနားဟို့ ဒန်းကော
 န်း ပုလုံန့်ဟူးအောန် သန်ရှင်းဟူဝိညာဉ်တော်ရဲ့ တဂိုးဟို့
 ဖယ်မျိုးအားကိုးဟယ် ဆိုဇာဟို့ နို့လေဟို့ ပြသနေဟယ်။

ကြောင်းရာ ကျဉ်းချောက်

- ၁။ ပထမဆောင်းနေ့ သန့်ရှင်းဟူသောတော်ဟော တ
 မှတ်တော်လေးထပ်တို့ ဆင်းကြွလာဘီး သင်းတော် ကီး
 လာဟို့ စတန်လာဟူကြောင်း (၁.၁—၈.၁)
- ၂။ သင်းတော်ဟော နှိစစ်ခံရဘီး ယေရုရှလင်မြို့ဟုနေ
 ဝီးဟို့ ပုလုံနို့ဟို့ စတန်လာဟူကြောင်း (၈.၂—၁၂.၂၃)
- ၃။ အယ်ဘီးန ပေါလုဟော သူရဲ့ပထမ သာသနာခရီးဟို့
 သွားဟူကြောင်း (၁၂.၂၄—၁၄.၂၈)
- ၄။ တရားလွတ်တော်ဟော ယောင်ကြည်သူ လူသစ်လေ
 ရဲ့ လိုအပ်ချစ်ဟို့ ဆောင်းဖြတ်ဟို့ ယေရုရှလင်မာ တို့
 ဂေဟူကြောင်း (၁၅.၁—၃၅)
- ၅။ ပေါလုဟော သူရဲ့ ဒုတိယ သာသနာခရီးဟို့ သွားဟူ
 ကြောင်း (၁၅.၃၆—၁၈.၂၂)
- ၆။ သူဟော တတိယ သာသနာခရီးဟို့ သွားဟူကြောင်း
 (၁၈.၂၃—၂၀.၃၈)
- ၇။ ပေါလုဟော ယေရုရှလင်မြို့မာ ဖမ်းခံရဟူကြောင်း
 (၂၁.၁—၂၆.၃၂)
- ၈။ နှော့-က်ဆောင်းမာ သူဟော ရောမမြို့ဟို့ ပို့ခံရဟူ
 ကြောင်း (၂၇.၁—၂၈.၃၁)

¹ ရှစ်ရဟူ သော်ဖိလု၊

ယေရှုဟော မှတ်တော်ဆောက်ရှင်းန သွန်သန်ရှင်းလေဟို့ စ
 လောက်ဟူခိုဟုနေ၊

² ကောန်းဂန်ဘောင်ဟို့ တတ်ကြွဟူးဟူနေထိ လောက်ဆောန်ဟူးဇာလေ ဂူလောင်းဟို့ ပထမစာစောန်မာကျွန်တော်ရေးဟူးဟယ်။ ကိုယ်တော်ဟာ ကောန်းဂန်ဘောင်ဟို့ တတ်ကြွဟူးခန်မာ ဝီးကော့-က်ဟူးဟူ တမန်တော်လေဟို့ သန်ရှင်းဟူဝိညာဉ်တော်ရဲ့ တဂိုးန မိန်တော်မူဟူးဟယ်။

³ ကိုယ်တော်ဟာ သေခံဘီးန ရစ်လေးဆယ် လောင်းလောင်း ခီဘောင်ဂီး ကိုယ်ထန်ရှားပြဘီး မိမိသတ်ရှင်ကြောန်းဟို့ ခိုင်လောင်ဟူ သတ်သေပြလေဟယ်။ တမန်တော်လေဟာ ကိုယ်တော်ဟို့ မြင်ရဂေ့ဘီး ကိုယ်တော်ဟုလည်း သူးနို့ဟို့ ဘုရားသခင်ရဲ့ နိုင်ငံတော်ကြောန်းဟို့ ပြောပြလေဟယ်။

⁴ သူးနို့လေဟာ စုလာဂေ့ဟူ ခီမာ * ကိုယ်တော်ဟ “ယေရုရှလင်မြို့ဟုနေ ထွပ်ဟူးဂေ့ဘဲန ငါ့ဖရဲ့ ဂဒိဟို့ စောန်နေဂေ့။ ငါဟာ အယ်ဂဒိကြောန်းဟို့ နန်းနို့ဟို့ ပြောပြဟူးပီးဘိ။

⁵ ယောဟန်ဟာ ရေန ဗတုတိဇ်ပေးဟယ်။ အယ်ဘေမဲ့နန်းနို့ဟာ ရစ်နဲနဲ ကြာဘီးဟာ သန်ရှင်းဟူဝိညာဉ်တော်န ဗတုတိဇ်ဟို့ ခံရဂေ့လေမယ်” ဆိုဘီး ပြောလေဟယ်။

ယေရှုဟာ ကောန်းဂန်ဘောင်ဟို့ တတ်ကြွဟူးဟူ

1:4 ၁.၄ လု ၂၄.၄၉ * 1:4 ၁.၄ သူးနို့လေဟာ စုလာဂေ့ဟူ ခီမာ၊ အယ်မျိုးမူဘဲနေဟာ ကိုယ်တော်ဟာ သူးနို့နုတူးဒူ ရှိနေဒူးမာ၊ အယ်မျိုးမူဘဲနေဟာ ကိုယ်တော်ဟာ သူးနို့နုတူးဒူ စားနေဒူးမာ။ 1:5 ၁.၅ မ ၃.၁၁: မာ ၁.၈: လု ၃.၁၆: ယော ၁.၃၃

ကြောန်း

(မဿဲ ၁၆.၁၉-၂၀; လုကာ ၂၄.၅၀-၅၃)

⁶ တမန်တော်လေဟာ စုလာဟူ ခီမာ ကိုယ်တော့်ဟို့ “သခင်၊ ကိုယ်တော်ဟု အယ်ခီမာ ဣသရေလ လူမျိုးတွပ် နိုင်ငံဟို့ ပုလန်ပေးဟို့လော” ဆိုဘီး မေးဂေဟယ်။

⁷ ယေရှုဟု “ငါ့ဖရဲ့ ခွမ့်အာဏာန စီရင်ဟူးဟူ နေ့ရစ်ခီ လေဟို့ နန်းနို့ဟာ သိခွမ့် မေ့ဟု။

⁸ အယ်ဘေမဲ့ နန်းနို့ထတ်ဟို့ သန်ရှင်းဟူဝိညာဉ်တော် ကြွလာဟူ ခီမာ နန်းနို့ဟာ တဂိုးဟို့ ရဂေလေ့မယ်။ အယ် ဘီးမှ နန်းနို့ဟာ ယေရုရှလင်မြို့၊ ယုဒနယ်န ရှုမာရိနယ် တနယ်လောင်းဟုနေ မုလေဂီးဆောင်းထိ ငါ့ရဲ့ သတ်သေ လေ ဖြစ်ဂေလေ့မယ်” ဆိုဘီး သူးနို့ဟို့ မိန့်တော်မူလေဟယ်။

⁹ အယ်မျိုး ပြောဘီးန သူးနို့လေဟာ ကေ့နေဒူးမာ ကိုယ် တော်ဟာ ကောန်းဂန်ဘောင်ဟို့ ယူဆောန်ခံရလေဟယ်။ အယ်ဘီးမှ မိုးတီဟာ ကိုယ်တော့်ဟို့ သူးနို့ရဲ့ မျစ်စိရှေ့ဟု နေ ဖောင်းဟူးလေဟယ်။

¹⁰ ကိုယ်တော် တတ်ကြွဟူးဇာဟို့ သူးနို့လေဟာ ကော န်းဂန်ဟို့ စေ့စေ့ကေ့နေဂေဟယ်။ အယ်ခီမာ ဝတ်ဖုလူ စင်ကြယ်န လူနွေယော့-က်ဟာ ရောက်တရစ် သူးနို့ရဲ့ နား မာ ရပ်နေဘီး

11 အယ်လူလေဟာ “ဂါလိလဲနယ်သားလေ၊ နန်းနို့ဟု
 ဖြားဖြစ်ကြောနဲ့ ရပ်ဘီးဟာ ကောန်းဂန်ဟို့ ကေ့နေဂေ
 နူး။ နန်းနို့နားဟုနေ ကောန်းဂန်ဘောင်ဟို့ တတ်ကြွဟားဟူ
 အယ်ယေရှုဟာ ကောန်းဂန်ဟို့ တတ်ကြွဟားဇာဟို့ နန်းနို့
 မြင်ရမျိုးဘဲ ပုလန်ဘီး ကြွလာလေ့မယ်” ဆိုဘီး ပြောဂေ
 ဟယ်။

ယုဒနေရာမာ စားထိုးခံရဟူလူကြောန်း
 (မသဲ ၂၇.၃-၁၀)

12 အယ်ဘီးန တမန်တော်လေဟာ သံလွင် ဆိုဘီး ခေါ်
 ဟူ တောန်ဟုနေဘီး ယေရုရှလင်မြို့ဟို့ ပုလန်ဟားဂေဟု
 ယ်။ အယ်တောန်ဟာ ယေရုရှလင်မြို့န မိုင်ဝပ်လော့-က်
 ဘဲ ဝီးဟယ်။

13 သူးနို့လေဟာ မြို့ထဲဟို့ ဝမ်ဘီးဟာ သူးနို့လေ တဲနေ
 ဟူ အီရဲ့ ထတ်ခန်းဟို့ သွားဂေဟယ်။ အယ်လူလေဟ ပေ
 တရု၊ ယောဟန်၊ ယာကုပ်၊ အနုဒြေ၊ ဖိလိပု၊ သောမ၊ ဗာ
 သောလမဲ၊ မသဲ၊ အာလဖဲရဲ့သားယာကုပ်၊ မျိုးရှစ်ပေါက်
 ကို ရှိမန်န ယာကုပ်ရဲ့သား ယုဒလေဖြစ်ဟယ်။

14 သူးနို့ဟာ မီးမဂီးလေ၊ ယေရှုရဲ့မိ မာရိန ကိုယ်တော်
 ရဲ့ ညီလေဟာ ခါဘီးခါ စုဝီးဘီး ဆုတောင်းဂေဟယ်။

15 ရစ်နဲနဲ ကြာဘီးန ၁၂၀ လော့-က်ရှိဟူ ညီကိုလေဟာ
 စည်းဝေးနေဟူ ခီမာ ပေတရုဟာ အယ်လူအောက် လယ်
 နှိုက် စကားပြောဟို့တွပ် ထဘီးဟာ။

16 “ညီကို မောန့်နှမလေ၊ ယေရှုဟို ဖမ်းဟူ လူလေဟို လမ်းပြပေးမား ယုဒရှုကာရုတ်ကြောင်းဟို သန့်ရှင်းဟူ ဝိညာဉ်တော်ဟု ဒါဝိဒအားဖြင့် ကြိုတန်ဘီး ပြောဟွားဟူ ကျမ်းစာဟာ ပုလဲဇောင်ရမယ်။

17 ယုဒဟာ မှုတော်ဆောန် တယော့-က်နေန ဝီး ကော့-က်ခံရဟူ လူဖြစ်ဘီး နို့လေရဲ့ ဖွဲ့ဝင်လည်း ဖြစ်ဟု ယ်။”

18 သူဟာ တရားဘဲဟူ မှုကြောန့် ရဟူကပ်န လယ်ဂွပ်ဟို ဝယ်ဘီးန အယ်လယ်ဂွပ်မာ လဲကလဘီး သေဟွားလေဟု ယ်။ သူဟာ ဗိုက်ပေါ့-က်ဟွားဘီး သူ့အူလေလည်း ထွပ် ကလလေဟုယ်။

19 ယေရှုလင်မြို့မာ နေဟူလူလေဟာ အယ်ကြောင်း ဟို ကြားဟွားဂေဘီး အယ်လယ်ဂွပ်ဟို သူးနို့စကားန “အ ကေလဒမ” ဆိုဘီး ခေါ်ဂေဟုယ်။ “သွီးမှလေ” ဆိုဘီး ဓိ ပါယ်ရဟုယ်။

20 “ဆာလံကျမ်းမာ
“သုရဲ့ အီဟာ လူလေတိဆိဟူ နေရာဖြစ်ပါစေ။
အယ်အီမာ ဖယ်လူလည်း နေရစေန’
ဆိုဘီး ရေးဟွားဟုယ်။”

“အယ်လူရဲ့ ရာထူးဟိုလည်း တခြားတယော့-က်ဟု ယူပါ စေ။

21 “အယ်ကြောန့် သခင်ယေရှုဟာ နို့လေနားမာ ဝမ်ထွပ် သွားလာဟူ တခီလောင်း

22 ယောဟန်ရဲ့ ဗတုတိဇိတရားဟို့ ဟောဟူ ခိဟုစဘီး† နို့လေနားဟုနေ ခွာဟားဘီး ထတ်ဟို့ ဆောန်ယူဟားရှင်း ဟို့ ခံတော်မူဟူ နေရစ်ထိ နို့လေန လိုက်ပါသူလေထဲဟု ယော့က်ယော့က်ဟာ အယ်သခင် ထမြော့-က်ရှင်းကြော န်းဟို့ နို့လေနတူးဒု သတ်သေခံဟူလူ ဖြစ်ရမယ်” ဆိုဘီး ပြောလေဟယ်။

23 အယ်ကြောန် သူးနို့လေဟာ ယုတုတု ဆိုဘီး ခေါ်ဟူ ဗာရှဗ (ခေါ်) ယောသပ်န မသိလေ နှော့ယော့-က်ဟို့ ဆို ပြုဂေဟယ်။

24 အယ်ဘီးန တဗွဲတော်လေဟာ ဝီးကော့-က်ဇာဟို့ လောက်ဟို့တွပ် “သခင်၊ ကိုယ်တော်ဟာ လူလေရဲ့ စိန် လောင်းဟို့ သိဟားဟူကြောန် ဆုတောင်းဂေဇာဟု

25 ယုဒဟာ သူန ထိုက်တန်ဟူ နေရာဟို့ သွားဟို့ တွပ် ထွပ်ဟားဟူကြောန် ယုဒနေရာမာ တမန်တော်ဖြစ် န မှုတော်ဆောန်ဟို့တွပ် အယ်လူ နှော့ယော့-က်ထဲဟု ကိုယ်တော် ဝီးကော့-က်ဟားဟူ လူဟို့ ပြတော်မူပါ” ဆို ဘီး ဖြစ်ဟယ်။

26 အယ်ဘီးန အယ်လူ နှော့ယော့-က်တွပ် မဲလိဆွဲဘီး ဝီးကော့-က်ဂေဟူ ခီမာ မသိဟာ တမန်တော် ဆယ့်တ ပါးနတူးဒု တမန်တော်ဖြစ် ဝီးကော့-က်ခံရလေ့ဟယ်။

2

† 1:22 ၁.၂၂ ယောဟန်ရဲ့ ဗတ္တိဇိတရားဟို့ ဟောဟူ ခိဟုစဘီး၊ အယ်မျိုးမှုဘဲနေဟာ ယောဟန်ဟာ ကိုယ်တော်ဟို့ ဗတ္တိဇိပေးဟယ်။

သန်ရှင်းဟူဝိညာဉ်တော် ဆင်းလာကြောန်း

¹ ပင်တေကုတုတေပွဲနေ့ ရော့-က်လာဟူ ခီမာ ယောင်ကြည်သူလေ ဂူလောင်းဟာ တနေရာထဲမာ စုနေဂေဟယ်။

² အယ်ခီမာ လေပြင်းမှောန်ဒိုင်းသံမျိုး ကောန်းဂန်ဟုနေရောက်တရစ် ပေါ်လာဘီးန သူးနို့လေ ထိုင်နေဟူ အိတအိလောင်းဟို့ ပုလဲဟူးလေဟယ်။

³ အယ်ဘီးန သူးနို့ဟာ ဖြာထွပ်နေဟူ မီးလျာလေမျိုးဟို့ မြင်ရဂေဘီး သူးနို့ထတ်မာ ရှိနေဂေဟယ်။

⁴ သူးနို့ ဂူလောင်းဟာ သန်ရှင်းဟူဝိညာဉ်တော်န ပုလဲနေဘီး ဝိညာဉ်တော်ဟု သူးနို့လေ ပြောနိုင်ဟူတိုင်း တခြားဘာသာစကားလေန စဘီးဟာ ပြောဂေဟယ်။

⁵ အယ်ကာလမာ ကောန်းဂန်အော့-က် တိုင်းပြည်သီးသီးဟု ဘုရားသခင်ဟို့ ကြော့-က်ဂေဟူ ယုဒလူမျိုးလေဟာ ယေရုရှလင်မြို့မာ တဲနေဂေဟယ်။

⁶ အယ်သံဟို့ ကြားရဟူ ခီမာ လူအောက်ဂီးဟာ စုလာဂေဟယ်။ တမဲ့တော်လေ ပြောဟူဇာဟို့ သူးနို့ အားလောင်းဟု သူးနို့ ဘာသာစကားန ကြားရဂေဟူကြောန် အံ့ဩဟူးဂေဟယ်။

⁷ သူးနို့ဟာ အံ့ဩနေဘီး “အယ်မျိုး ပြောနေဂေဟူ လူလေဟာ ဂါလိလဲနယ်သားလေမား!

⁸ အယ် ဆို ဟာ နို့လေ ဂူလောင်းဟာ နို့လေ ရဲ့ ဘာသာစကားတိုင်း ကြားရဂေဟူ ဖယ်မျိုးနူး။

⁹ နို့လေဟာ ပါသိပြည်၊ မေဒိပြည်၊ ဧလံပြည်၊ မေသော

ပေါတာမိပြည်၊ ယုဒပြည်၊ ကပ္ပပဒေါကိပြည်၊ ပုနုတုပြည်၊ အာရှိပြည်၊

10 ဖြူဂိပြည်၊ ပံဖုလိပြည်၊ အဲဂုတုတုပြည်၊ ကုရေနေ မြို့နီး လိဗုနယ်ဟု ဖြစ်ဟုယ်။ တချို့ဟု ရောမမြို့ဟုနေ ရော့-က်လာဟူ

11 ယုဒလူမျိုးလေန ယုဒဘာသာဟို့ ပုလောန်းလဲလာ ဂေဟူ လူမျိုးခြားလေ ဖြစ်ဂေဟုယ်။ နို့လေ တချို့ဟု က ရေတေကျွန်းသားန အာရပ်ပြည်သားလေ ဖြစ်ဂေဟုယ်။ အယ်ဘေမဲ့ အယ်လူလေဟာ ဘုရားသခင်ရဲ့ အံ့ဩဘွယ်မှု တော်ဟို့ နို့လေရဲ့ ဘာသာစကားန ပြောဇာဟို့ နို့လေ ကြား ရဂေဟုယ်” ဆိုဘီး ပြောဂေဟုယ်။

12 သူးနို့လေဟု အံ့ဩတွေဝေဟွားဘီး “အယ်မူဇာဟု ဖယ်မျိုးနူး” ဆိုဘီး ရှင်းရှင်းပြောနေဂေဟုယ်။

13 အယ်ဘေမဲ့ တခြားလူလေဟု “အယ်လူလေဟာ ရစ် မောနေဂေဟုယ်” ဆိုဘီး ရယ်ဇာဂေဟုယ်။

ပေတရုရဲ့ တရားစကားကြော်နီး

14 အယ်ဘီးန ပေတရုဟာ တမန်တော် တဆယ့်တပါး န တူးဒူရပ်ဘီး ကုလယ်ဟူသံန “ယုဒမျိုးသားလေန ယေ ရှုရှလင်မြို့မာ နေဟူလူလေ အယ်မူဇာဟို့ နန်းနို့ဟို့ ပြော ပြမယ်။ ငါ့စကားဟို့ နားထောန်ဂေ။

15 အယ်လူလေဟာ နန်းနို့ထန်နေမျိုး ယစ်မောနေဇာ မူ ဟု။ ခုမှ မိုးလန်းကိုးနာရီဘဲ ရှိသေးဟုယ်။

16 အယ်မူဇာဟာ ပရောဖက်ယောလ ဟောဟူးဇာ ဖြစ်ဟယ်။ အယ်ပရောဖက်ဟ”

17 “ဘုရားသခင်ဟု မိန့်တော်မူဟယ်။ ငါဟာ နှော့-က်ဆောင်း နေ့ရစ်လေမာ လူလေထတ်ဟို့ ငါ့ရဲ့ ဝိညာဉ်တော်ဟို့ လောန်းခွလမယ်။
နန်းနို့ရဲ့ သားမီးလေဟာ ငါ့ရဲ့ တရားတော်ဟို့ ပရောဖက်ဉာဏ်န ဟောပြောဂေ့လေ့မယ်။

လူငယ်လေဟာ ရှုပါရောင်လေဟို့ မြင်ရဂေ့လေ့မယ်။
ဖိုးသန်ဂီးလေဟာ အိမတ်လေဟို့ မတ်ဂေ့လေ့မယ်။

18 ငါ့ရဲ့ စေခံ ယော့-က်ကျားလေန မီးမလေထတ်ဟို့ ငါ့ရဲ့ ဝိညာဉ်တော်ဟို့ လောန်းခွလမယ်။
အယ်ဘီးဟာ သူးနို့ဟု ပရောဖက်ပြုဂေ့လေ့မယ်။

19 ထတ်ကောန်းဂန်မာ နိမိတ်လတ်ခဏာလေန
အော့-က်ရပ် မုလေဂီးထတ်မာ
သွီး၊ မီးလျှံ၊ မီးခိုးလောင်းန အံ့ဩဘွယ်လေဟို့ ငါပြမယ်။

20 သခင်ဘုရား ရဲ့ အံ့ဩဘွယ် ထူးမြတ်ဟူ နေ့ရော့-က်လာခန်မာ နေဟာ မှောန်မိုက်ဟူးဘီးလဟုလည်း သွီးမျိုးဘဲ နီဟူးလေ့မယ်။”

21 “အယ်ခီမာ ဘုရားသခင်ရဲ့ နာမတော်ဟို့ အော်ခေါ်ဂေ့ဟူ လူတိုင်းဟာ ကယ်တန်ရှင်းဟို့ ခံရဂေ့လေ့မယ်။”

22 “ဣသရေလမျိုးသားလေ၊ အယ်စကားလေဟို့ နားထောန်ဂေ့! ဘုရားသခင်ဟာ နာဇရက်မြို့သား ယေရှု

အားဖြင့် အံ့ဩဘွယ်လေန နိမိတ်လတ်ခဏာလေဟို့ ပြတော်မူဟယ်။ ကိုယ်တော်ဟာ ဘုရားသခင်ရဲ့ ခွမ်အာဏာန ပုလဲဝဟူလူဖြစ်ဟယ် ဆိုဇာဟို့ ထန်းထန်ရှားရှားဟာ သတ်သေပြဟားဟယ်။ အယ်မူဇာဟာ နန်းနို့ရှေ့မာ ဖြစ်ဟားဟူကြောန့် နန်းနို့ ကိုယ်တိုင် သိရဂေဟယ်။

23 ဘုရားသခင်ဟာ သူရဲ့ ကြံစည်တော်တိုင်း ယေရှုဟို့ နန်းနို့ လတ်ထဲဟို့ အပ်လိုက်ဟယ်။ နန်းနို့ဟု ကိုယ်တော့်ဟို့ အဓမ္မလူလေလတ်န ကားစင်တန်ဘီး သတ်ဂေဟယ်။

24 အယ်ဘေမဲ့ ဘုရားသခင်ဟု ကိုယ်တော့်ဟို့ သေရှင်းတဂိုးဟုနေ လွတ်မြော-က်စေဘီး ထမြော-က်စေလေဟယ်။ ဖြားဖြစ်ကြောန့်နူးဆိုဟာ သေမန်းဟာ ကိုယ်တော့်ဟို့ မြဲဒမ်း ခယ်နှောန်ဟားဟို့ ဖြစ်နိုင်ဟု။

25 ဒါဝိဒ်ဟု ကိုယ်တော်ကြောန်းဟို့။”

“ငါဟာ သခင်ဘုရားဟို့ မြဲဒမ်း မြင်ရဟယ်။

ကိုယ်တော်ဟာ ငါ့ညာဖတ်မာ ရှိနေဟူကြောန့် ငါမာ တောင်လောက်ဇာ မေ့ဟု။

26 အယ်ကြောန့် ငါ့စိန်လောင်းဟာ ရွှင်လန်းနေဘီး

ငါ့ရဲ့ နှောက်ဟာ ဝန်းသာရှင်းန ပုလဲနေဟယ်။

ငါ့ရဲ့ ကိုယ်ခနုဓာဟာ မျှော်လင့်ရှင်းထဲမာ ငြိသတ်နေမယ်။

27 ဖြားဖြစ်ကြောန့်နူးဆိုဟာ ကိုယ်တော်ဟာ

ကျွန်တော်ဟို့ မရဏာနိုင်ငံမာ ပစ်ဟားဟို့ မူဟု။

ကိုယ်တော်ရဲ့ သန့်ရှင်းဟူ လူလေဟို့
သန့်ခဲလိုင်းထဲမှာ ပေါက်ပျစ်စေဟို့ မူဟူ။

28 ကိုယ်တော်ဟု ကျွန်တော်ဟို့ သတ်ရှင်ဟူလမ်းလေဟို့
ပြပေးဟယ်။

ကိုယ်တော်ဟု ကျွန်တော့်ဟို့ ကိုယ်တော်ရဲ့ မျစ်
မော့-က်တော်ထဲမှာ ဝန်းသာဇာန ပုလဲစေလေ
မယ်” ဆိုဘီး ပြောဟယ်။

29 “ညီကိုလေ၊ နို့လေရဲ့ ဘိုးဘေး ဒါဝိဒ်မန်းဂီးကြောင်း
ဟို့ နန်းနို့ဟို့ ငါ ရှင်းရှင်းလန်းလန်းဟူး ပြောရှင်ဟယ်။ သူ
ဟာ သေလွန်ဘီး သဂြိုဟ်ဇာဟို့ ခံရဟယ်။ သူ့ရဲ့ သန့်ခဲ
လိုင်းဟာ အယ်နေထိ နို့လေနတူးဒူ ရှိသေးဟယ်။

30 သူဟာ ပရောဖက်ဖြစ်ဘီး သူ့ရဲ့ သားမှလေးတ
ယော့-က်ဟို့ သူ့ရဲ့ ပလ္လင်ထတ်မှာ ထိုင်စေမယ် ဆိုဘီး
ဘုရားသခင်ဟု သူ့ဟို့ သစ်စာပြုဘီး ဂဒိပေးဟူးကြော
န်းဟို့ သိဟူးဟယ်။

31 နောင်ခါမှာ ဘုရားသခင်ဟု ဖယ်မျိုးလောက်မယ် ဆို
ဇာဟို့ သိဟူကြောန့်” မေရှိယရဲ့ ထမြော့-က်ရှင်းကြောင်း
ဟို့

“ကိုယ်တော့်ဟို့ မရဏာနိုင်ငံမှာ ပစ်ဟူးဟူ။

သူ့ရဲ့ ခနုဇာဟို့ သန့်ခဲလိုင်းထဲမှာ ပေါက်ပျစ်စေဟို့ မူ
ဟူ” ဆိုဘီး ကြိုတန်ပြောဟူးဟယ်။

32 ဘုရားသခင်ဟု အယ်ယေရှုဟို့ သေရာဟုနေ ထ
မြော့-က်စေတော်မူဟယ်။ နို့လေ ဂူလောင်းဟာ အယ်ဖြစ်

ပျစ်ရဲ့ သတ်သေဖြစ်ပေဟယ်။

³³ ကိုယ်တော်ဟာ ဘုရားသခင်ရဲ့ ညာဖတ်မာ ချီးမြှင့်အခံ
ဘီးန ဂဒိပေးဟူးတိုင်း သန့်ရှင်းဟူဝိညာဉ်တော်ဟို့ ဖနား
ဟုနေ ခံယူလေဟယ်။ ခု နန်းနို့လေ တို့မြင်ဘီး ကြားသိ
ပေဟူ ဝိညာဉ်တော်ဟို့ နို့လေထတ်ဟို့ လောင်းခုလလေဟ
ယ်။

³⁴ ဒါဝိဒ်ဟာ ကောင်းဂန်ဘောင်ဟို့ တတ်ဟူးဇာ မူဟု။
အယ်ဘေမဲ့ သူဟု၊

“ထာဝရဘုရားဟု ငါ့သခင်ဟို့

³⁵ နန်ရဲ့ ရန်သူလေဟို့ နန်ရဲ့ ခေတန်ခေါင်ဖြစ် ငါထားဟူး
ခီထိ
ငါ့ရဲ့ ညာဖတ်မာ ထိုင်နေပါ ဆိုဘီး မိန့်တော်မူဟူးဟု
ယ်’ ဆိုဘီး ပြောလေဟယ်။”

³⁶ “အယ်ကြောန့် က္လသရေလလူမျိုး ဂူလောင်းဟာ မေ
ရှိယဖြစ်နရော၊ သခင်ဖြစ်နရော ဘုရားသခင် ခန့်ဟူးဟူ
သူဟို့ နန်းနို့ ကားစင်တန်လိုက်ပေဟူ ယေရှုဘွဲ့ဖြစ်ဟယ်
ဆိုဇာဟို့ သေးသေချားချာဟူး သိမှတ်ဟူးပေ” ဆိုဘီး
လူအောက်ဂီးဟို့ ဟောလေဟယ်။

³⁷ လူလေဟာ အယ်စကားဟို့ ကြားပေဟူ ခီမာ ရရာ
တိုင်း စိသောက ဖြစ်ဟူးပေဘီး ပေတရုန တခြားတမန်
တော်လေဟို့ “ညီကိုလေ၊ နို့လေဟု ဖယ်မျိုးလောက်ရဟို့
နူး” ဆိုဘီး မေးပေဟယ်။

³⁸ ပေတရုဟု “နန်းနို့ ပြစ်လေဟို့ ခွမ့်လွှတ်ပေးဇာခံရ
ဟို့တွပ် နောက်ဒရေဘီး ယေရှုခရစ်တော်ရဲ့ နာမန နန်းနို့

ယော့-က်စီတိုင်း ဗတုတိဇ်ဟိုခံဂေ။ အယ်ဆိုဟာ နန်းနို့ဟာ ဆုလတ်ဆောန်ဖြစ် သန်ရှင်းဟူဝိညာဉ်တော်ဟို ရဲဂေလေ့ မယ်။

39 ဖြားဖြစ်ကြောန်နူးဆိုဟာ ဘုရားသခင်ရဲ့ ဂဒိတော် ဟာ နန်းနို့ တွပ်ရော၊ နန်းနို့ သားမီးလေတွပ်ရော၊ ဝီးမာရို နေဟူ လူလေတွပ်ရော ဖြစ်ဟယ်။ တနည်းအားဖြင့်ဆိုဟာ နို့လေရဲ့ ဘုရားသခင်ခေါ်ဟားခံရဟူ လူလေ ဂူလောင်း တွပ်လည်း ဖြစ်ဟယ်” ဆိုဘီး သူးနို့ဟို ပြောလေဟယ်။

40 ပေတရဟာ တခြားစကားဘောင်းဇောင်နလည်း တောင်းဗန်းဘီး “နန်းနို့ ကိုယ်တိုင် အယ်ဆိုးညစ်ဟူ လူ လေထတ်ဟို ရှေ့-က်လာမယ့် ပြစ်ဒန်ဟုနေ ကန်းလွတ် စေဂေ” ဆိုဘီး သူးနို့ဟို တိုက်တွန်းလေဟယ်။

41 လူလေဘောင်ဂီးဟု သူရဲ့ တရားစကားဟို ယောင် ကြည်ဂေဘီး ဗတုတိဇ်ခံဂေဟယ်။ အယ်နေ့မာ လူလေ ဟာ ၃,၀၀၀ လော့-က် တိုးပွားဟားလေဟယ်။

42 အယ်လူလေဟာ တမန်တော်လေရဲ့ သွန်သန်ဇာဟို ခံ ယူဂေဘီး၊ မုဟိုဖွဲဂေဘီး၊ မိတ်သဟာယ ဖွဲဂေဘီးဟာ ဆု တောင်းဇာလေနဘဲ့ ခီဟို ကူစေဂေဟယ်။

ယောင်ကြည်သူလေရဲ့ သတ်ရှင်ရှင်းကြောန်း

43 တမန်တော်လေဟာ အံ့ဩဘွယ်ရာလေန နိမိတ်လတ် ခဏာလေဟို ပြဂေဟူကြောန် လူတိုင်းဟာ ကြော့-က်လန် နေဂေဟယ်။

44 ယောင်ကြည်သူလေဟာ တစုဒဲနေဂေဘီးဟာ သူးနို့ရဲ့ အောက်စာလေဟို ယော့-က်နယော့-က် ဝီမျှဂေဟယ်။

45 သူးနို့ရဲ့ အောက်စာလေန ပိုင်ဆိုင်ဇာလေဟို ရောန်းဂေဘီးဟာ လိုအပ်ဟူ လူလေဟို ပေးဂေဟယ်။

46 သူးနို့ဟာ နေ့တိုင်း ဗိမာန်တော်မာ စုနေဂေဟယ်။ သူးနို့ရဲ့ အီလေမာလည်း မဟိုဖဲဂေဘီး စေဒနာစိန် ဝန်းသာ အားရ စားဇာလေဟို ဝီမျှဘီး စားဂေဟယ်။

47 သူးနို့ဟာ ဘုရားသခင်ဟို ချီးမွမ်းဘီး လူလေရှေ့မာလည်း မျှစ်နှာသာ ရဂေဟယ်။ သခင်ဘုရားဟုလည်း ကယ်တန်ရှင်း ခံရဟူလူလေဟို နေ့တိုင်း တိုးပွားစေဟယ်။

3

ခေသန်ဘဲဟူ ဒေါန်းဇာဟို ကျန်းမာစေကြောင်း

1 တနေ့မာ ပေတရုန် ယောဟန်လေဟာ ဆုတောင်းခံဖြစ်ဟူ နေဒန်ဇာ သောင်းနာရီမာ ဗိမာန်တော်ဟို သွားဂေဟယ်။

2 မွီးဂဒဲဟု ခေသန်ဘဲဟူ လူတယော့-က်ဟာ တင့်တယ်ဆိုဘီး ခေါ်ဟူ ခွဗော့-က်ဝမာ ရှိနေဟယ်။ ဗိမာန်တော်ဟို လာဂေဟူ လူလေနားဟု ကပ်တောင်းဟိုတွပ် အယ်လူဟို နေ့တိုင်း ထမ်းလာဂေဘီး ခွဗော့-က်ဝမာ ခုလဟူးဂေဟယ်။

3 အယ်လူဟာ ပေတရုန ယောဟန်လေ ဗိမာန်တော်ထဲ
ဟို့ ဝမ်ဟို့လောက်နေဇာဟို့ မြင်ဟူ ခီမာ တခုခုပေးဟို့တွပ်
တောန်းလျှော့-က်လေဟယ်။

4 သူးနို့ဟာ အယ်လူဟို့ စေ့စေ့ကော့လေဟယ်။ အယ်ဘီး
န ပေတရုန ယောဟန်ဟ “နို့လေဟို့ ကော့!” ဆိုဘီး ပြော
လေဟယ်။

5 အယ်ကြောန့် အယ်လူဟာ သူးနို့နားဟ တခုခုရမယ်
ဆို ထန်ဘီး သူးနို့ဟို့ ကော့လေဟယ်။

6 အယ်ဘေမဲ့ ပေတရုဟ “ငါ့မာ ရွှေလည်း မေ့ဟူ။ ငွေ
လည်း မေ့ဟူ။ အယ်ဘေမဲ့ ငါ့မာ ရှိဟူဇာဟို့ နန့်ဟို့ပေး
မယ်။ နာဇရက်မြို့သား ယေရှုခရစ်တော်ရဲ့ နာမန ထဘီး
လမ်းရှော့-က်!” ဆိုဘီး ပြောလေဟယ်။

7 အယ်ဘီးန သူးရဲ့ ညာဖတ်လတ်ဟို့ ဆွဲဒန်လေဟယ်။
ရှစ်ရှင်းဘဲ အယ်လူရဲ့ ခေဒေါ့-က်န ခေမျှစ်စိလေဟာ
သန်မာလာဘီး

8 သူဟ ထူဘီး၊ ထရပ်ဘီးဟာ စဘီးဟာ လမ်းရှော့-က်
လေဟယ်။ အယ်ဘီးန သူဟ ခူပေါ့-က်ဘီး၊ ဘုရားသခင်
ဟို့ ချီးမွမ်းဘီး သူးနို့နတူးဒူး ဗိမာန်တော်ထဲဟို့ ဝမ်ဟူး
ဟယ်။

9 အယ်နေရာမာ ရှိနေဟူ လူလေဟ လမ်းရှော့-က်ဘီး
ဘုရားသခင်ဟို့ ချီးမွမ်းနေဟူ အယ်လူဟို့ မြင်ဟူးဟူ ခီ
မာ

10 အယ်လူဟာ ဗိမာန်တော်ရဲ့ တင့်တယ်ခွဗော့-က်မာ
ထိုင်နေဟူ ဒေါန်းဇားဖြစ်ဟယ် ဆိုဇာဟို့ မှတ်မိဟူးဟူ ခီ

မာ သူးနို့ ဂူလောင်းဟာ အယ်လူမာ ဖြစ်ဟူးဇာလေဟို့
အံ့ဩဘီး တွေဝေဟူးဂေဟယ်။

ဗိမာန်တော်ထဲမာ ပေတရုရဲ့ တရားစကားကြောန်း

¹¹ အယ်လူဟာ ပေတရုန ယောဟန်လေဟို့ ပိုက်နေဒူး
မာ လူလေဟု အံ့ဩဘီးဟာ ရှောလမုန်ရဲ့ မုခ်ဦးဆောက်နား
မာ ရှိနေဟူ သူးနို့နားဟို့ ပုလေးလာဂေဟယ်။

¹² ပေတရုဟာ လူလေဟို့ မြင်ဟူ ခီမာ “ဣသရေလူမျိုး
လေ၊ ဖြားဖြစ်ကြောန့် နန်းနို့ အံ့ဩနေဂေဟယ်နူး။ ဖြားဖြစ်
ကြောန့် နို့လေဟို့ စိုက်ကေ့နေဂေနူး။ နို့လေရဲ့ တဂိုး၊ နို့လေ
ရဲ့ သီလန အယ်လူဟို့ လမ်းရှော-က်နိုင်အောက် လောက်
ပေးဟယ် ဆိုဘီး နန်းနို့ ထန်နေဂေဇာလော။

¹³ အာဗြဟံ၊ ဣဇာက်၊ ယာကုပ်ရဲ့ ဘုရားသခင်၊ နို့လေ
ဘိုးဘေးလေရဲ့ ဘုရားသခင်ဟာ သူးရဲ့ စေခံယေရှုဟို့
ဖောင်းသရေတော်ထန်ရှားစေဟယ်။ ပိလတ်ဟာ အယ်သ
ခင်ဟို့ လွတ်ပေးဟို့တွပ် ဆောင်းဖြတ်ဟယ်။ အယ်ဘေမဲ့
လည်း နန်းနို့ဟာ အယ်သခင်ဟို့ အာဏာပိုင်လေဟို့ အပ်
ဘီး ပိလတ်ရဲ့ ရှေ့မာ ငြင်းပယ်ဂေဟယ်။

¹⁴ နန်းနို့ဟု သန်ရှင်းဖြောင့်မတ်ဟူ သခင်ဟို့ ငြင်းပယ်
ဂေဘီး လူသတ်မားဟို့ လွတ်ပေးဟို့တွပ် တောန်းဆိုဂေဟ
ယ်။

¹⁵ နန်းနို့ဟာ သတ်ပေးပိုင်ဟူ သူဟို့ သတ်ဂေဟယ်။
အယ်ဘေမဲ့ ဘုရားသခင်ဟာ အယ်သခင်ဟို့ သေရှင်း

ဟုနေ ထမြော့-က်စေဟယ်။ နို့လေဟာ အယ်ဖြစ်ပျစ်ရဲ့ သတ်သေလေ ဖြစ်ဂေဟယ်။

16 အယ်သခင်ရဲ့ နာမတော်တဂိုးန အယ်ခေသန်ဘဲဟူ လူဟာ သန်စွမ်းလာဟယ်။ အယ်သခင်ရဲ့ နာမတော်ဟို့ ယောင်ကြည်လိုက်ဟူန ခု နန်းနို့လေ တွံမြင်ရဂေဟူ မှာ ရာ လေ ဖြစ်လာဟယ်။ နန်းနို့လေဟု မြင်ရတိုင်းဘဲ ယေရှု ဟို့ ယောင်ကြည်ရှင်းဟုဘဲ အယ်လူဟို့ ကျန်းမာလာစေဟယ်။”

17 “ညီကိုလေ၊ ခု နန်းနို့ဟာ နန်းနို့လေရဲ့ ခေါင်းဆောင် မျိုးဘဲ ကိုယ်လောက်ဇာဟို့ ကိုယ်သိဘဲန လောက်ဂေ ကြောန်းဟို့ ငါသိဟယ်။

18 အယ်ဘေမဲ့ ခရစ်တော်ဟာ သေခံရဟို့ကြောန်းဟို့ ပ ရောဖက်လေ ဂူလောင်းဟို့ ဘုရားသခင်ဟု ပျာဒိတ်ပေး ဟားဟယ်။ အယ်မျိုး ဖြစ်လာဇာဟု အယ်ပျာဒိတ်တော် ဟို့ ပုလဲဇောင်ဟို့တွပ် ဖြစ်ဟယ်။

19 အယ်ကြောန့် ဘုရားသခင်ဟာ နန်းနို့ ပြစ်လေဟို့ လွတ်ပေးနိုင်ဟို့တွပ်ကြောန့် နောက်ဒရဘီး ပုလောင်းလဲဂေ။ အယ်မျိုးလောက်မယ် ဆိုဟာ၊

20 ဘုရားသခင်နားဟုနေ ဝိညာဉ်ခွန်အား ရော့-က်လာ ဘီး နန်းနို့တွပ် ဝီးကော့-က်ဟားဟူ မေရှိယဖြစ်ဟူ ယေရှု ဟို့ နန်းနို့နားဟို့ စေလွတ်လေ့မယ်။

21 ရှေးရှေးဟု သန်ရှင်းဟူ ပရောဖက်လေဟုတဆင့် ပေး လိုက်ဟူ ဘုရားသခင်ရဲ့ ပျာဒိတ်တော်နညီ ဂူလောင်းဟို့

သစ်ပုလောန်းလဲဟူးဟူ ကာလရော-က်ခန်ထိ အယ်သခင်ဟာ ကောန်းဂန်ဘောင်မာ ရှိနေမယ်။

22 အယ်ကြောန့် မောရှေဟာ ‘နန်းနို့ရဲ့ ဘုရားသခင် ထာဝရဘုရားဟာ ငါ့ဟို့ စေလွှတ်မျိုးဘွဲ့* ပရောဖက်တပါးဟို့ နန်းနို့နားဟို့ လွှတ်လေ့မယ်။ အယ်သခင်ဟာ နန်းနို့ရဲ့ ညီကိုလေထဲဟု ဖြစ်လေ့မယ်။ အယ်သခင် ပြောဇာလေ ဂူလောင်းဟို့ နန်းနို့ဟာ နားထောန်ရဂေလေ့မယ်။

23 အယ်ပရောဖက်ရဲ့ စကားဟို့ နားထောန်ဘွဲ့ဟူ လူတိုင်းဟာ ဘုရားသခင်ရဲ့ လူမျိုးတော်ဟုနေ ဖယ်ရှားဘီး ဖျစ်ဆီးခံရလေ့မယ်’ ဆိုဘီး ပြောဟယ်။

24 ရှုမွေလဟုနေစဘီး ဗျာဒိတ်တော်အားဖြင့် ဟောပြောဂေဟူ တခြားပရောဖက်လေဟု အယ်နေရစ်လေမာ ဖြစ်ပျစ်မယ့် ကြောန်းရာလေဟို့ ကြေညာဂေဟယ်။

25 ပရောဖက်လေအားဖြင့် ဘုရားသခင်ပေးဟူ ဂဒိတော်လေဟာ နန်းနို့တွပ် ဖြစ်ဟယ်။ နန်းနို့ ဘိုးဘေးလေနဘုရားသခင် လောက်ဟူးဟူ ပဋိညာဉ်ဟုလည်း နန်းနို့တွပ် ဖြစ်ဟယ်။ ဘုရားသခင်ဟု အာဗြဟံဟို့ ‘နန်ရဲ့ မှလေးမှလစ်လေအားဖြင့် လောကသားလေဟာ ကောန်းဂျီးမင်္ဂလာဟို့ ခံစားရလေ့မယ်’ ဆိုဘီး ပြောလေဟယ်။

26 အယ်ကြောန့် နန်းနို့ဟာ ကောန်းဘဲဟူဇာလေဟို့ စွန့်ပစ်ဘီး ကောန်းဂျီးခံစားရဟို့တွပ် ဘုရားသခင်ဟာ သူ့ရဲ့ စေခံဟို့ နန်းနို့နားဟို့ စေလွှတ်လိုက်ဟယ်” ဆိုဘီး ပြော

* 3:22 ၃.၂၂ ငါ့ဟို့ စေလွှတ်မျိုးဘွဲ့၊ အယ်မျိုးမှုဘဲနေဟာ ငါ့မျိုးဘွဲ့။

လေဟယ်။

4

တရားလွှတ်တော်မှာ ပေတရုန် ယောဟန်လေဟို စစ်ဆေးဂေဟူကြောန်း

¹ ပေတရုန် ယောဟန်လေဟာ လူလေဟို ဟောပြောနေဂေခီမာ ယဇ်ပုရောဟိတ်လေ၊* ဗိမာန်တော်ဟို စောန်နေဟူတပ်မှူးန ဇဒွါကဲလေဟာ ရော့-က်လာဂေဟယ်။

² ယေရူဟု သေရာဟုနေ ထမြော့-က်ဟားဘီ ဆိုဘီး တမန်တော်လေဟာ သတ်သေပြဘီး ဟောပြောဟူကြောန် ဇဒွါကဲလေဟု စီဆိုးဂေဟယ်။

³ အယ်ကြောန် သူးနို့လေဟာ တမန်တော်လေဟို ဖမ်းဂေဘီး ညဉ့်ခန်းဇာဖြစ်ဟားကြောန် နော့-က်တနေထိ ထောန်ထဲမာ ထားဟားဂေဟယ်။

⁴ အယ်ဘေမဲ့ တရားစကားဟို ကြားဂေဟူ လူဘောင်ဂီးဟု ကိုယ်တော့်ဟို ယောင်ကြည်ဂေဟယ်။ ယောင်ကြည်လာဟူ လူလေဟု ၅,၀၀၀ လော့-က် တိုးပွားလာဂေဟယ်။

⁵ နော့-က်တနေ ရော့-က်ဟူ ခီမာ ယုဒခေါင်းဆောန်လေ၊ လူဂီးလေန ကျမ်းတတ်ဆရာလေဟာ ယေရုရှလင် မြို့မာ စုဂေဟယ်။

* **4:1 ၄.၁** ယဇ်ပုရောဟိတ်လေ၊ တချို့ မူရင်းလတ်ရေးမူလမာ ယဇ်ပုရောဟိတ်ဂီးလေ၊ ဆိုဘီး ပါရှိဟယ်။

6 ယဇ်ပုရောဟိတ်မန်း အနုနတ်န သူ့ရဲ့ မိသားစုဖြစ်ဟူ ကယာဖ၊ ယောဟန်၊ အာလေဇန္ဒြေလူလေန တို့ဂေဟ ယ်။

7 အယ်လူလေဟာ သူးနို့ရှေ့မှာ တမန်တော်နေ့ပါးဟို့ ရပ်ခိုင်းဘီး “နန်းနို့ဟ ဖယ်လူရဲ့ တဂိုး၊ ဖယ်လူရဲ့ နာမန အယ်မူလေဟို့ ဖယ်မျိုး လောက်ဂေနှူး” ဆိုဘီး မေးဂေဟ ယ်။

8 သန်ရှင်းဟူဝိညာဉ်တော်န ပုလဲဝနေဟူ ပေတရဟာ “လူလေရဲ့ ခေါင်းဆောင်လေန လူဂီးလေ၊

9 ခေသန်ဘဲဟူ လူတယော့-က်ဟို့ ကျိုးပြုကြောင်းန သူ ဟာ ကျန်းမာဟူးဇာန ပတ်သတ်ဘီး ခုန့်လေဟ စစ်ဆေး ခံရမယ် ဆိုဟာ၊

10 နာဇရက်မြို့သား ယေရှုခရစ်တော်ရဲ့ နာမတော်တဂိုး န အယ်လူဟာ ခေသန်လာဘီး ခုနန်းနို့ရှေ့မှာ ရပ်နေဇာဟို့ နန်းနို့န တူးဒူ ကုသရေလလူမျိုးလေ သိမှတ်ဂေပါ။ အယ် သခင်ဟို့ နန်းနို့ဟ ကားစင်တန်ဘေမဲ့ ဘုရားသခင်ဟ သေ ရာဟုနေ ထမြော့-က်စေလေဟယ်။”

11 “ယေရှုဟ ‘တိုက်ဟို့ ဆော့-က်ဟူ ခီမာ နန်းနို့ ပယ်ဟူး ဟူကလော့-က်ဟာ
ရေးကီးဆောင်းကလော့-က် ဖြစ်လာဟယ်’ ဆိုဘီး
ကျမ်းစာဟ ပြောဟူးဟယ်။

12 အယ်သခင်တပါးဘဲ ကယ်တန်နိုင်ဟယ်။ ကောင်းဂန် အော့-က်ဟ လောကမာ အယ်သခင်နာမဟုနေ လွဲဘီး နို့

လေဟို့ ဖယ်လူလည်း ကယ်တန်နိုင်ဟဲ့” ဆိုဘီး သူးနို့ဟို့ ပြောလေဟယ်။

13 ပေတရုန ယောဟန်လေဟာ ပညာတတ်လေမှုဘဲန သာမန်လူလေဖြစ်ဘီး ရဲရင့်နေဇာဟို့ တရားလွှတ်တော် ဖွဲ့ဝမ်လေဟဲ့ မြင်ဂေဟူ ခီမာ ရရာတိုင်း အံ့ဩနေဂေဟယ်။ အယ်လူနွေ ယော့-က်ဟာ ယေရှုရဲ့ လောက်ဖော်ဆောန် ဖတ်လေဖြစ်ဇာဟို့ ဒိပြုမိဂေဟယ်။

14 အယ်ဘေမဲ့ ရောဂါပျော့-က်ဟားဟူ လူဟာ တမန်တော်လေန တူးဒူ ရပ်နေဇာဟို့ မြင်ဟူ ခီမာ သူးနို့ဟာ ဖယ်မျိုးလည်း ပြောနိုင်ဂေဟဲ့။

15 တမန်တော်လေဟို့ တရားလွှတ်တော်ထဲဟဲ့နေ ထွပ်ခိုင်းဘီးဟာ သူးနို့ရှင်းရှင်း စဘီးဟာ တိုင်ဗန်ဂေဟယ်။

16 သူးနို့လေဟာ “နို့လေဟာ အယ်လူလေဟို့ ဖယ်မျိုးလောက်ရဟို့နူး။ သူးနို့အားဖြင့် ထူးခြားဟူ နိမိတ်လတ်ခဏာ ဖြစ်ဟားဇာဟို့ ယေရုရှလင်မြို့ဟဲ့ လူတိုင်းဟဲ့ သိဂေဟယ်။ နို့လေဟာ ငြင်းနိုင်ဂေဟဲ့။

17 အယ်ဘေမဲ့ အယ်ဒန်းဟာ လူလေထဲမာ ပုလုံနို့ဘဲနေအောန် ယေရှုရဲ့ နာမတော်ဟို့ မှီပြုဘီး နော့-က်ထပ် ဖယ်လူဟို့လဲ ဟောပြောဘဲနေဟို့တွပ် အယ်လူနွေ ယော့-က်ဟို့ ဒိပေးဂေမယ်” ဆိုဘီး ပြောဂေဟယ်။

18 အယ်ဘီးန တမန်တော်လေဟို့ ပုလန်ခေါ်ဘီးဟာ ယေရှုရဲ့ နာမတော်ဟို့ မှီပြုဘီး နော့-က်ထပ် လောင်းဝ ဟောပြောဘဲနေဟို့တွပ် မိန့်ပေးလိုက်ဂေဟယ်။

19 ပေတရုန် ယောဟန်လေဟာ “နို့လေဟာ ဘုရားသခင်ရဲ့ စကားဟို့ နားထောန်ဇာထတ် နန်းနို့ရဲ့ စကားဟို့ နားထောန်ဇာဟာ ဘုရားသခင်ရဲ့ ရှေ့မာ မှန်ဟယ်၊ မှားဟယ် ဆိုဇာဟို့ နန်းနို့ ကိုယ်တိုင်ဘဲ ဆောင်းဖြတ်ပေးဂေ့ပါ။

20 နို့လေကိုယ်တိုင် ကြားရ၊ ဗြင်ရဇာလေဟို့ ဟောပြောဘဲန နေနိုင်ဟ” ဆိုဘီး ပုလန်ပြောလိုက်ဂေ့ဟယ်။

21 အယ်ကြောန့် တရားလွှတ်တော် ဖွဲ့ဝမ်လေဟာ သူးနို့ဟို့ ပုလန်ဘီးဟာ သေးသေချားချာဟား ဒိပေးဘီးန ထွပ်ခိုင်းလိုက်ဂေ့ဟယ်။ လူလေဟာ ဖြစ်ပျစ်ဟူ ဇာလေတွပ် ဘုရားသခင်ရဲ့ ဖောင်းသရေတော်ဟို့ ချီးမွမ်းနေဂေ့ဟူကြောန့် တမန်တော်လေဟို့ ဖြားပြစ်ဒန်လည်း စီရင်နိုင်ဂေ့ဟူ။

22 အံ့ဩဘွယ်ကောင်းအောက် ရောဂါပျော့-က်ဟားဟူ လူဟာ သတ်လေးဆယ်ကျော်လော့-က် ရှိဟယ်။

ရဲရင့်လာဟို့တွပ် ယောင်ကြည်သူလေဟာ ဆုတောင်းပေးကြောင်း

23 ပေတရုန် ယောဟန်လေဟာ လွတ်မြော့-က်လာဂေ့ဟူ ခီမာ သူးနို့ လူလေနားဟို့ ပုလန်ဟားဘီးန ယဇ်ပုရောဟိတ်ဂီးန သတ်ကီးဝါဂီးလေ ပြောလိုက်ဇာလေဟို့ ပုလန်ဘီး ပြောဂေ့ဟယ်။

24 အယ်ကြောန့်ဟို့ ကြားရဂေ့ဟူ ခီမာ အယ်လူလေဟာ တူးဒူ ဆုတောင်းဂေ့ဟယ်။ “စိုးရဟူသခင်၊ ကိုယ်တော်ဟ

ကောင်းဂန်န မှလေဂီး၊ ပန်လယ်န ရှိမျှဂူလောင်းဟိုလည်း
ဖန်ဆင်းဟူ ဘုရားသခင် ဖြစ်ဟယ်!

²⁵ ကိုယ်တော်ဟာ သန့်ရှင်းဟူ ဝိညာဉ်တော်အားဖြင့်
ကိုယ်တော်ရဲ့ စေခံ၊ ကျွန်တော့်လေ ဘိုးဘေး ဒါဝိဒ်ဟုနေ
တဆင်၊”

“လူမျိုးခြားလေဟာ ဖြားဖြစ်ကြောန့် ရောင်းရင်းဆန်ခတ်
ဖြစ်နေဂေ့နူး”

လူမျိုးဘောင်းဇောင်ဟာ ဖြားဖြစ်ကြောန့် ကျိုးမွေဘဲ
န ကြံစည်ဂေ့နူး။

²⁶ လောကရဲ့ မန်းဂီးလေန အောက်ချောက်မားလေဟာ
ဘုရားသခင်ဟို ပေါင်ကန်ဟို့တွပ် ပြင်ဆင်ဂေ့ဟု
ယ်။

ဘုရားသခင်န ကိုယ်တော်ရဲ့
မေရှိယဟို့ ဆန့်ကျင်ဟို့တွပ် စုဂေ့ဟယ်၊

ဆိုဘီး မိန်တော်မူဟားဟယ်။

²⁷ မှန်တိုင်း ဆိုဟာ ဟေရုဒ် န ပုနုတိ ပိလတ်လေ
ဟာ လူမျိုးခြားလေ၊ ဣသရေလလူမျိုးလေန တူးဒူ
ကိုယ်တော်ရဲ့ သန့်ရှင်းဟူစေခံ၊ ကိုယ်တော်ဘိသိပေးဟူ
ယေရှုဟို့ ဆန့်ကျင်ဟို့တွပ် အယ်မြို့ထဲမာ စုဂေ့ဟယ်။

²⁸ အယ်မျိုး စုဂေ့ဇာဟာ ကိုယ်တော်ရဲ့ တဂိုးတော်န လို
တော်ရ ခွဲခန့်ဟားဇာလေဟို့ ဖြစ်ပျစ်ဟို့တွပ် ဖြစ်ဟယ်။

²⁹ သခင်၊ ခု အယ်လူလေရဲ့ ချီးခြော-က်ဟူဇာဟို့ မှတ်

ဟူးပေးပါ။ ကိုယ်တော်ရဲ့ စေခံလေဟို့ ကိုယ်တော်ရဲ့ တရားတော်ဟို့ ရဲရဲရင့်ရင့်ဟူး ဟောဟို့ခွဲမ့် ပေးတော်မူပါ။

³⁰ လူလေရဲ့ ရောဂါလေဟို့ ပျော့-က်စေဟို့တွပ် ကိုယ်တော်ရဲ့ လတ်တော်ဟို့ ဆန့်တော်မူပါ။ ကိုယ်တော်ရဲ့ သန့်ရှင်းဟူစေခံ ယေရှုရဲ့ နာမတော်န နိမိတ်လတ်ခဏာန အံ့ဩဘွယ်ရာလေဟို့ လောက်တော်မူပါ။

³¹ အယ်မျိုး ဆုတောင်းဂေဘီးခီမာ သူးနို့ စည်းဝေးနေရာဟာ လှောက်လာဟယ်။ သူးနို့ ဂူလောင်းဟာ သန့်ရှင်းဟူဝိညာဉ်တော်န ပုလဲဝဘီး ဘုရားသခင်ရဲ့ တရားတော်ဟို့ ရဲရဲရင့်ရင့်ဟူး ဟောပြောဂေဟယ်။

ယောင်ကြည်သူလေဟာ သူးနို့ အောက်စာလေဟို့ မျှဝီဂေဟူကြောန်း

³² ယောင်ကြည်သူလေဟာ စိနှလောင်း တလောင်းတဝဒဲ ဖြစ်ဂေဟူကြောန်း ဖယ်လူလဲ ကိုယ့်ရဲ့ အောက်စာဟို့ ကိုယ်ပိုင်ဟယ် ဆိုဘီး ပြောဂေဟာ။ သူးနို့မာ ရှိနေဟူအောက်စာလေ ဂူလောင်းဟို့ ပိုင်ဂေဟယ် ဆိုဘီး ကြေညာဟူးဂေဟယ်။

³³ တမန်တော်လေဟာ သခင်ယေရှုခရစ်တော်ရဲ့ ရှင်ပုလန်ထမြော့-က်ရှင်းကြောန်းဟို့ ကီးမားဟူ တဂိုးန သတ်သေခံဂေဟယ်။ ဘုရားသခင်ရဲ့ ကျေးဇူးတော်ဟာ ကီးမား

ဟူ တဂိုးန သူးနို့ ဂူလောင်းထဲမာ လောက်လောက်လေဟူ
ယံ။

³⁴ လယ်လေ၊ အီလေ ပိုင်ဂေဟူ လူလေဟာ သူး
နို့ အောက်စာလေဟို့ ရောင်းခလဘီး၊ ရဟူကပ်လေဟို့
ယူလာဘီးဟာ တမန်တော်လေဟို့ ပေးဂေဟယ်။

³⁵ အယ်ဘီးန တမန်တော်လေဟာ လိုအပ်ဟူ လူလေဟို့
လိုက်ဝီပေးဂေဟယ်။

³⁶ ယောသပ် ဆိုဘီး ခေါ်ဟူ လူတယော့-က်ရှိဟယ်။ သူ
ဟို့ တမန်တော်လေဟာ ဗာနဗ ဆိုဘီး ခေါ်ဂေဟယ်။ ဗာန
ဗရဲ့ ဓိပါယ်ဟာ အားပေးကူညီဟူလူ ဆိုဘီး ခေါ်ဟယ်။ သူ
ဟာ ကုရေနနယ်သား လေဝိမျိုးနွယ် ဖြစ်ဟယ်။

³⁷ သူပိုင်ဟူ လယ်ဝှပ်ဟို့ ရောင်းဘီးဟာ ရဟူကပ်ဟို့
ယူလာဘီးန တမန်တော်လေဟို့ ပေးလေဟယ်။

5

အာနန်န ရှဖီရေကြောင်း

¹ အာနန်နာမယ်ရှိဟူ လူတယော့-က်ဟာ သူရဲ့မယား ရှာ
ဖိရေနတူးဒ သူးနို့ ပိုင်ဟူမလေဟို့ ရောင်းဂေဟယ်။

² အယ်ဘီးန အာနန်ဟာ ရောင်းရဟူ ကပ်တဝပ်ဟို့ သူရဲ့
မယားန ဘောတူဘီးဟာ သူးနို့တွပ် ဖယ်ဟားဘီးဟာ ကျ
န်ဟူကပ်လေဟို့ဘဲ တမန်တော်လေဟို့ ပေးလေဟယ်။

³ ပေတရူဟာ “အာနန်၊ နန်ဟာ လယ်ဟို့ရောင်းရဟူ ကပ်
တဝပ်ဟို့ နန်းနို့တွပ် ဖယ်ဟားဘီး ဖြားဖြစ်ကြောန့် သန်ရှ

င်းဟူဝိညာဉ်တော်ကို လှည့်ဇေးနူး။ ဖြားဖြစ်ကြောန့် စာတန်ဟို နန်းနို့ စိန်လောင်းကို အောက်စိုးခွမ်းပေးနူး။

⁴ နန်ဟာ အယ်လယ်ကို ရောင်းခန့်ဒူးဟု နန်းနို့ပိုင်ဟယ် မဟာလော။ ရောင်းလိုက်ဘီး နော-က်မာလည်း အယ်ကပ်လေဟို နန်ပိုင်ဟယ် မဟာလော။ ဖြားဖြစ်ကြောန့် စိန်လောင်းထဲမာ အယ်မျိုး ကြံစည်ဂေ့နူး။ နန်ဟာ လူလေဟိုဘဲ လှည့်ဇေးဇာ မဟာ။ ဘုရားသခင်ဟိုလည်း လှည့်ဇေးဟယ်” ဆိုဘီး ပြောဟယ်။

⁵ အယ်စကားကို ကြားန အာနန်ဟု လဲကုလဘီး သေဟွားဟယ်။ အယ်ကြောင်းကို ကြားဂေ့ဟူလူလေဟာ ရရာတိုင်း ကြော့-က်လန်ဂေ့ဟယ်။

⁶ လူငယ်လေဟာ လာဘီးဟာ အာနန်ရဲ့ လောင်းကို ဝတ်နပတ်ဘီး ပုလန်ဟို ယူဟွားဘီး သံဂြိုဟ်ဂေ့ဟယ်။

⁷ သောင်းနာရီလော့-က် ကြာဘီးန အာနန်ရဲ့ မယားဟု ဖြစ်ပျစ်ဟွားဟူဇာလေဟို သိဘဲန ရော့-က်လာဟယ်။

⁸ ပေတရုဟု “နန်းနို့ဟာ လယ်ကို အယ်မျှနဘဲ ရောင်းလော” ဆိုဘီး မေးလေဟယ်။

အယ်မီးမဟု “ဟုတ်ဟယ်။ အယ်မျှနဘဲ ရောင်းဟယ်” ဆိုဘီး ဖြေလေဟယ်။

⁹ ပေတရုဟု “သခင်ဘုရားရဲ့ ဝိညာဉ်တော်ကို သွီးတိုးစမ်းဟို့တွပ် ဖြားဖြစ်ကြောန့် နန်းနို့ဟာ ဘောတူဂေ့နူး။ ကေ့ကေ့၊ နန့်ယော့-က်ကျားဟို သံဂြိုဟ်ဘီး ပုလန်လာဟူလူလေဟာ ခွဗော့-က်မာ ရှိနေဂေ့ဟယ်။ သူးနို့ဟာ နန့်ဟို

လည်း သယ်ဟားလေ့မယ်!” ဆိုဘီး ပြောဟယ်။

¹⁰ ရှစ်ရှင်းဘွဲ့ အယ်မီးမဟာ ပေတရုရဲ့ ခေရင်းမာ လဲကုလဘီးဟာ သေဟားဟယ်။ လူငယ်လေဟု ရော့-က်လာဂေဟူ ခီမာ အယ်မီးမဟာ သေနဇာဟုံ တွံဟားဟူကြောန့် အယ်မီးမရဲ့ လောန်းဟုံ ယူဟားဘီးန သူယော့-က်ကျားနားမာ သဂြိုဟ်လိုက်ဂေဟယ်။

¹¹ သင်းတော်တခုလောင်းန အယ်ကြောင်းဟုံ ကြားဂေဟူ လူလေဟာ ရရာတိုင်း ကြော့-က်လန်ဂေဟယ်။

နိမိတ်လတ်ခဏာလေန အံ့သြဘွယ်ရာလေကြောန်း

¹² တမန်တော်လေဟာ လူလေရှေ့မာ အံ့သြဘွယ်ရာလေန နိမိတ်လတ်ခဏာလေဟုံ ပြဂေဟယ်။ ယောင်ကြည်သူလေဟာ ရှောလမုန်ရဲ့ မုခ်ဦးဆောက်မာ စုနေဂေဟယ်။

¹³ လူလေဟာ သူးနို့ဟုံ ချီးကျူးဂေဘေမဲ့ ဖယ်လူလည်း သူးနို့ဟုံ ပေါင်းသင်းရဲဂေဟယ်။

¹⁴ အယ်ဘေမဲ့ သခင်ဘုရားဟုံ ယောင်ကြည်ဟူယော့-က်ကျားလေန မီးမလေဟာ ဘောင်ဂီးဖြစ်လာဟယ်။

¹⁵ လူလေဟု နေကောင်းဘွဲ့ဟူ လူလေဟုံ ခေါ်လာဂေဟယ်။ ပေတရု ဖြတ်ရှော့-က်ဟူ ခီမာ သူရဲ့ရီဟာ လူနာလေထတ်ဟုံ ကုလဟုံတွပ် လူနာလေဟုံ အိယာလေ၊ ထမ်းစင်လေန သယ်လာဂေဘီး လမ်းမထတ်မာ ခုလဟားဂေဟယ်။

16 ယေရုရှလင်မြို့ ပတ်ပတ်လယ်ဟု မြို့လေဟု လူလေဟာ ဖျားနေဟူလူလေ၊ နတ်ဆိုးဝမ်းပူးနေဟူ လူလေဟို ခေါ်လာဂေ့ဟယ်။ အယ်လူနာလေ ဂူလောင်းဟာ ရောဂါ ပျော့-က်ဟားဂေ့ဟယ်။

တမန်တော်လေဟို ညဉ့်ဗန်း နှိစစ်ဂေ့ကြောန်း

17 အယ်ခီမာ ယဇ်ပုရောဟိတ်မန်းန သူရဲ့ နှော့-က်လိုက် လေဖြစ်ဟူ ဇဒ္ဒါကံ ဂိုဏ်းဝမ်လေဟာ တမန်တော်လေဟို ရရာတိုင်း နာလိုဝန်တိုစိ ရှိလာဂေ့ဟူကြောန် သူးနှိလေဟို ရေးယူဟိုတွပ် ဆောင်းဖြတ်ဂေ့ဟယ်။

18 သူးနှိဟာ တမန်တော်လေဟို ဖမ်းဘီးဟာ ပြည်သူ ကျဉ်းထောန်ထဲမာ ထားဟားဂေ့ဟယ်။

19 အယ်ဘေမဲ့ အယ်ညဉ့်မာ သခင်ဘုရားရဲ့ ကောန်းဂန် တမန်တပါးဟာ ထောန်ခွဗော့-က်လေဟို ဖွဲ့မ့်ဘီး တမန် တော်လေဟို ခေါ်ထုဘီး၊

20 “သွားဘီး ဗိမာန်တော်ထဲမာရပ်ဘီး အယ်သတ်ရှင် ရှင်းန ဆိုင်ဟူဇာလေ ဂူလောင်းဟို လူလေဟို ဟောပြော ဂေ့ပါ” ဆိုဘီး သူးနှိဟို ပြောဟယ်။

21 တမန်တော်လေဟာ ကောန်းဂန်တမန်ရဲ့ စကားဟို နားထောန်ဘီး မိုးလန်းစောစောမာ ဗိမာန်တော်ထဲဟို ဝမ် ဘီးဟာ ဟောပြောဂေ့ဟယ်။

ယဇ်ပုရောဟိတ်မန်းန သူပေါင်းဖော်လေဟာ ဣသရေ လလူမျိုး သတ်ကီးဟူလူလေ ဂူလောင်းဟို တရား လွတ်တော်စည်းဝေးမာ စုလာဟို ခေါ်ဂေ့ဟယ်။ အယ်ဘီးန

တမန်တော်လေဟို ခေါ်ဆောင်လာဟို့တွပ် စောင့်တပ်သား
လေဟို့ ကျဉ်းထောင့်ဟို့ စေလွှတ်လိုက်ဂေဟယ်။

22 ရာရှိလေဟာ ရော့-က်ဟားဟူ ခီမာ တမန်တော်လေ
ဟို့ တွံဂေဟမ်း။ အယ်ကြောန် သူးနို့ဟာ တရားလွှတ်တော်
ဟို့ ပုလန်လာဘီး၊

23 “ကျွန်တော့်ဟားလေဟာ ထောင့်ဟို့ ရော့-က်ဟားခီ
မာ သေးသေချားချာ ပိဟားဘီး စောင့်တပ်သားလေဟာ
လည်း ခွဗော့-က်လေမာ ရပ်နေဇာဟို့ တွံဂေဟယ်။ အယ်
ဘေမဲ့ ခွဗော့-က်လေဟို့ ဖွမ်လိုက်ဟူ ခီမာ ထဲမာ ဖယ်လူ
ဟို့လည်း တွံဂေဟယ်။” ဆိုဘီး စီရင်ခံဂေဟယ်။

24 အယ်စကားဟို့ ကြားဟူ ခီမာ မိမာန်တော်စောင့်
တပ်မူးန ယဇ်ပုရောဟိတ်ဂီးလေဟာ တမန်တော်လေမာ
ဖြစ်ပျစ်ဟားဇာဟို့ အံ့ဩဟားဂေဟယ်။

25 အယ်ခီမာ လူတယော့-က်ဟာ ရော့-က်လာဘီး “နား
ထောင့်ဂေ! ကျဉ်းခလဟားဟူ လူလေဟာ မိမာန်တော်ထဲ
မာ ရပ်ဘီး လူလေဟို့ သွန်သန်နေဂေဟယ်။” ဆိုဘီး ပြော
လေဟယ်။

26 အယ်ကြောန် ရာရှိဟာ သူလူလေနသွားဘီး တမန်
တော်လေဟို့ ပုလန်ခေါ်လာဂေဟယ်။ အယ်ဘေမဲ့လည်း
သူးနို့ဟို့ လူလေဟာ ကုလော့-က်ခဲနပစ် ဇာဟို့ စိုးရိမ်ဟူ
ကြောန် တမန်တော်လေဟို့ နိုင်ထတ်စီးနန်း လောက်ဂေ
ဟယ်။

27 တမန်တော်လေဟို့ ခေါ်လာဘီးန တရားလွှတ်တော်

ရှေ့မှာ ရပ်ခိုင်းလိုက်ဟုယ်။ ယဇ်ပုရောဟိတ်မန်းဟာ တမန်တော်လေဟို့ စစ်ဆေးဂေဟုယ်။

28 သူးနို့ဟာ “အယ်လူရဲ့နာမဟို့ ဟောပြောဘဲနေဟို့တွပ် နန်းနို့ဟို့ တင်းတင်းကျပ်ကျပ်ဟား မိန့်ပေးဟားဟုယ်! အယ်ဘေမဲ့ နန်းနို့ဟာ ယေရုရှလင်တမြို့လောင်း နန်းနို့ လေရဲ့ သွန်သန်ဇာလေဟို့ ပုလုံနို့စေဘီး အယ်လူရဲ့ သွီး ဟို့လည်း နို့လေထတ်ဟို့ ကုလစေဟို့တွပ် ကြံစည်ဂေဟုယ်။” ဆိုဘီး တမန်တော်လေဟို့ ပြောဂေဟုယ်။

29 ပေတရုန တမန်တော်လေဟာ “နို့လေဟာ လူရဲ့ စကား ထတ် ဘုရားသခင်ရဲ့ စကားဟို့ နားထောန်ရမယ်။

30 နို့လေ ဘိုးဘေလေရဲ့ ဘုရားသခင်ဟာ လတ်ဝါးကပ် တိုင်မာ နန်းနို့ သတ်လိုက်ဟူ ယေရုဟို့ ထမြော့-က်စေဟုယ်။

31 ကုသရေလလူမျိုးလေဟာ နောန်ဒရဘီး သူးနို့ ပြစ် လေဟို့ ဖြေလွှတ်ပေးဟို့တွပ် ဘုရားသခင်ဟာ အယ်သခင်ဟို့ သူရဲ့ ညာဖတ်မာ ထားဟားဘီးဟာ ခေါင်းဆောန်န ကယ်တန်ရှင်းဖြစ် ချီးမြှော့-က်တော်မူလေဟုယ်။

32 အယ်မူဇာလေတွပ် နို့လေဟာ သတ်သေလေ ဖြစ်ဂေဟုယ်။ ဘုရားသခင်ရဲ့ စကားဟို့ နာခံဟူလူလေဟို့ ပေး တော်မူဟူ သန်ရှင်းဟူဝိညာဉ်တော်ဟုလည်း သတ်သေ ဖြစ်ဟုယ်” ဆိုဘီး ပြောဂေဟုယ်။

33 တရားလွှတ်တော် ဖွဲ့ဝင်လေဟာ အယ်စကားဟို့ ကြား ဂေဟူ ခီမာ ရရာတိုင်း ဒေါသထွပ်ဂေဘီး တမန်တော်လေ

ဟို့ သေဒန် ပေးရှင်ဂေဟယ်။

34 အယ်ခီမာ လူလေဟို့ ရရာတိုင်း ရိုသေလေးစားရ
ဟူ၊ ကျမ်းတတ်ဆရာဖြစ်ဟူ၊ ဂါမလေလ နာမယ်ရှိဟူ
ဖာရိုရှဲတယော့-က်ဟု တရားလွတ်တော်မာ ထရပ်ဘီးဟု
တမန်တော်လေဟို့ ပုလန်ဟို့ ရှစ်ဟား ခေါ်ထုဟားဟို့ မိန်
ပေးလိုက်ဘီးန

35 “ဣသရေလလူမျိုးလေ၊ အယ်လူလေဟို့ ဖယ်မျိုး
လောက်မယ် ဆိုဇာဟို့ ဒိန် ဆင်ခြင်ဂေပါ။

36 တဒီးဟု သုဒနာမယ်ရှိဟူ လူတယော့-က်ဟု
ပေါ်လာဘီး သူ့ကိုယ်သူ ရေးပါရာရော့-က်ဟူ လူဖြစ်ဟု
ယ် ဆိုဟူကြောန် သူ့နော့-က်ဟို့လိုက်ဟူ သူလေဟု ၄၀၀
လော့-က်ရှိလာဟယ်။ အယ်ဘေမဲ့ သူသတ်ခံရဘီးန သူ
ဟို့ယောင်ကြည်ဟူလေဟု ဖုလဲဖုလဲစင်ဖြစ်ဟားဘီး သူ
ရဲ့လောက်ရှားမှုလည်း ပျော့-က်ကွယ်ဟားဟယ်။

37 အယ်ဘီးန သန်းဂေါန်စာရင်းကော့-က်ဟူ ခီမာ ဂါ
လိလဲနယ်သား ယုဒဟု ပေါ်လာဘီး လူလေဟု သူ့ဟို့
အားကိုးလာအောန် စည်းရောင်းလေဟယ်။ သူလည်းဘဲ
သတ်ခံရဘီးန သူ့ဟို့ ကိုးစားဟူ လူလေဟု ဖုလဲဖုလဲစင်
ဖြစ်ဟားဂေဟယ်။

38 ခုကိစမာလည်း နန်းနို့ဟို့ ငါပြောမယ်။ အယ်လူလေ
ဟို့ ရေးယူဂေန။ သူးနို့ဇာသူးနို့ နေပါစေ! သူးနို့ ကြံစည်
ဘီး လောက်ဟူဇာဟု လူဟုဖြစ်လာဟယ် ဆိုဟု အယ်
ကိစဟု ပျစ်ရလေ့မယ်။

39 အယ်ဘေမဲ့ ဘုရားသခင်ဟုနေ ဖြစ်လာဟူ ကြံစည်
ဆိုဟာ အယ်လူလေဟို နန်းနို့ တားဆီးနိုင်ဟူ။ နှော-က်ဘီး
ဘုရားသခင်ဟို ဆန်ကျင်မျိုးဘဲ ဖြစ်ဟူးနိုင်ဟယ်!” ဆို
ဘီး ပြောဟယ်။

ယုဒ တရားလွှတ်တော်ဟာ ဂါမလျေလရဲ့ ကြံဉာဏ်ဟို
နားထောန်ဂေ့လေဟယ်။

40 သူးနို့ဟု တမန်တော်လေဟို ခေါ်ဘီး ကီဒန်ပေးဘီး
န “ယေရှုနာမဟို မှီပြုဘီး ဟောပြောဇာဟို နှော-က်တခါ
လောက်န” ဆိုဘီး မိန့်ပေးဘီး လွှတ်လိုက်ဂေ့ဟယ်။

41 တမန်တော်လေဟာ ယေရှုရဲ့ နာမတော်တွပ် ရှစ်ကွဲ
ခံရဟူဇာဟာ ထိုက်တန်ဟယ် ဆိုဘီး ဘုရားသခင်သတ်
မှတ်ဟူးကြောန့် ဝန်းသာအားရန တရားလွှတ်တော်ဟုနေ
ထွပ်ဟူးဂေ့ဟယ်။

42 အယ်ဘီးန သူးနို့ဟာ နေ့တိုင်း ဗိမာန်တော်မာရော၊ လူ
လေရဲ့ အီမာရော ယေရှုဟာ မေရီယဖြစ်ဟူကြောင်း ဒန်း
ကောန်းဟို ဆစ်ဘီးဟာ ဟောပြောဂေ့ဟယ်။

6

လောက်ဖော်ဆောန်ဖတ် ခွန်နစ်ယော့-က်ကြောင်း

1 အယ်နေရစ်လေမာ တဗွဲတော်လေဟာ ဘောင်ဂီး
ဖြစ်လာဘီး ဟေလသစကားပြောဟူ ယုဒလူလေန *
ဒေသခံ ယုဒလူလေဟာ ရန်ဖြစ်ဂေ့ဟယ်။ ဟေလသ

* **6:1 6.၁** ဟေလသစကားန ဟေလသယဉ်ကျေးမှုလေရဲ့ လွှမ်းမိုးဇာခံရဟူ
ယုဒလူမျိုးလေ။

စကားပြောဟူ ယုဒလူလေဟု သူးနှိရဲ့ မောက်ဆိုးမလေ
ဟို့ ကူညီဘဲထားဟူးဟယ် ဆိုဘီး ယုဒလူလေဟို့ ပြစ်တ
န်ဂေဟယ်။

² အယ်ကြောန့် တမန်တော် ဆယ့်နှေပါးဟာ တမဲ့တော်
လေဟို့ ခေါ်ဘီးန “နှိလေဟာ ဘုရားသခင်ရဲ့ စကားတော်
ဟို့ ဟောပြောဘဲန ဗွဲမာစေခံနေမယ် ဆိုဟာ ကောင်းဟု။

³ ညီကို မောန်နှမလေ၊ နန်းနှိထဲမာ သန်ရှင်းဟူဝိညာဉ်
တော်နရော၊ ဉာဏ်ပညာနရော ပုလဲဝဘီးဟာ အသရေရှိဟူ
လူ ခွန်နစ်ယော့-က်ဟို့ ဝီးဂေပါ။ နှိလေဟာ အယ်လူလေ
ဟို့ အယ်တာဝန်တွပ် ခန့်ဟူးဟို့တွပ် ထော့-က်ခံမယ်။

⁴ နှိလေဟု ဆုတောင်းဇာ၊ တရားဟောဇာလေဟို့
လောက်ဆော်ဇာနဘဲ ခီဟို့ကူစေမယ်” ဆိုဘီး ပြောဟု
ယ်။

⁵ တမန်တော်လေရဲ့ကြံဟို့ တမဲ့တော်လေဟု ကြိုက်ဂေ
ဟယ်။ အယ်ကြောန့် သူးနှိဟာ ယောင်ကြည်ရှင်းနရော၊
သန်ရှင်းဟူဝိညာဉ်တော်နရော ပုလဲဝဟူ သတေဖန်န ဖိလိ
ပုပု၊ ပြောခေါ်၊ နိကနော်၊ တိမုန်၊ ပါမေနန ယုဒဘာသာဟို့
ပုလောန်းလဲလာဟူ အနုတိအုတ်မြို့သား နိကောလလေဟို့
ဝီးကော့-က်ဂေဟယ်။

⁶ သူးနှိဟာ အယ်လူလေဟို့ တမန်တော်လေရှေဟို့ သွား
ခိုင်းလိုက်ဂေဟယ်။ အယ်ဘီးန တမန်တော်လေဟာ ဆု
တောင်းဘီးန သူးနှိထတ်မာ လတ်ဟို့တန်ဂေဟယ်။

⁷ ဘုရားသခင်ရဲ့ စကားတော်ဟာ ဆစ်ဘီး ပုလဲန့်ဟူး

ဟုယ်။ ယေရုရှလင်မြို့မှာ တမဲ့တော်လေရဲ့ ရေတွပ်ဟာ ရုရာတိုင်းတိုးပွားလာဟုယ်။ ယဇ်ပုရောဟိတ်လေ ဘောင် ဂီးလည်း ဒန်းကောန်းဟို့ ယောင်ကြည်ဘီး လတ်ခံလာဂေ ဟုယ်။

သတေဖန်ဟို့ ဖမ်းဂေကြောန်း

⁸ သတေဖန်ဟာ ဘုရားသခင်ရဲ့ ကျေးဇူးတော်နရော၊ တဂိုးတော်နရော ပုလဲဝဘီး ရုရာတိုင်းကီးဟူ အံ့ဩဘွယ် လေန နိမိတ်လတ်ခဏာလေဟို့ လူလေရှေ့မှာ ပြလေဟုယ်။

⁹ အယ်ခီမာ ကုရေနေန အာလေဇနုဒြိယမြို့ဟု ယုဒလူ လေန လွတ်လပ်ဟူလူလေ[†]ရဲ့ ဝါလယ်ဇရပ်ရဲ့ ဖွဲ့ဝမ်တချို့ ဟာ သူ့ဟို့ ပြဿနာရှာဂေဟုယ်။ အယ်လူလေနတူးဒူ ကံ လိကံပြည်န အရှိပြည်ဟု ယုဒလူတချို့ဟာ သတေဖန်န စဘီးဂြင်းဂေဟုယ်။

¹⁰ အယ်ဘေမဲ့ သတေဖန်ဟာ ဝိညာဉ်တော်ပေးဟူးဟူ ဉာဏ်ပညာန ပြောဟူ ခီမာ အယ်လူလေဟာ သူ့ဟို့ ချေပ နိုင်ဂေဟု။

¹¹ အယ်ကြောန် သူးနို့ဟာ လူလေဟို့ “အယ်လူဟာ မော ရှေ့ဟို့ရော၊ ဘုရားသခင်ဟို့ရော စော်ကားဘီး ပြောနေဇာ ဟို့ နို့လေကြားဟုယ်” ဆိုဘီး ပြောဟို့တွပ် လာဘ်ထိုးဂေ ဟုယ်။

[†] 6:9 **၆.၉ လွတ်လပ်ဟူလူလေ၊** အယ်လူလေဟာ ကျန်ဖြစ်ဖူးဟူ ယုဒလူလေ ဖြစ်ဂေဟုယ်။ အယ်ဘေမဲ့ သူးနို့ဟို့ ဝယ်ဘီးဟာ လွတ်လပ်ခွမ်းပေးလိုက်ဟုယ်။

12 အယ် မျိုး ဘဲ သူး နို့ ဟာ သတ် ကီး ဝါ ဂီး လေ၊ ကျမ်းတတ်ဆရာလေန လူထုဟို့ နှိုးဆော်ပေးဂေဟယ်။ အယ်လူလေဟာ သတေဖန်ဟို့ ဖမ်းဘီးဟာ တရားလွတ်တော်ဟို့ ခေါ်ဟားဂေဟယ်။

13 အယ်ဘီးန သူးနို့ဟာ မှန်ဘဲဟူ သတ်သေလေဟို့ ခေါ်လာဂေဟယ်။ သတ်သေခံဟူလူလေဟ “အယ်လူဟာ သန်ရှင်းဟူမိမာန်တော်န မောရှေရဲ့ ပညတ်တရားဟို့ ဆန့်ကျင်ဘီးဟာ မြဲဒမ်းပြောဂေဟယ်။

14 နာဇရက်မြို့သား ယေရှုဟာ မိမာန်တော်ဟို့ ဖြိုခွလဘီး ကျွန်တော့်ဟားလေဟို့ မောရှေပေးဟားဟူ ထောင်းဒန်းစဉ်လာလေဟို့ ပုလောန်းလဲစေမယ် ဆိုဘီး အယ်လူပြောနေဇာဟို့ ကျွန်တော့်ဟားလေ ကြားဂေဟယ်” ဆိုဘီး ထွပ်ဆိုဂေဟယ်။

15 တရားလွတ်တော်မာ ထိုင်နေဂေဟူ လူလေ ဂူလောင်းဟာ သတေဖန်ဟို့ စေ့စေ့ကေ့ဟူ ခီမာ သူ့မျစ်နာဟာ ကောန်းဂန်တမန်ရဲ့ မျစ်နာမျိုး ဖြစ်နေဟယ် ဆိုဇာဟို့ တွဲမြင်ဂေဟယ်။

7

သတေဖန်ရဲ့ ပြောကြားချစ်

1 အယ်ခီမာ ယဇ်ပုရောဟိတ်မန်းဟ “အယ်စွပ်စွဲချစ်ဟာ မှန်ဘဲလော” ဆိုဘီး သတေဖန်ဟို့ မေးဟယ်။

2 သတေဖန်ဟု “ညီကိုလေန ဖလေ၊ ငါ့စကားဟို့ နားထောန်ဂေ့ပါ။ နို့လေရဲ့ဖ အာမြဟံဟာ ခါရန်မြို့မာ နေဟို့တွပ် သွားခန်မာ မေသောပေါတာမိပြည်မာ ရှိနေဒူးမာ ဘုရားသခင်ရဲ့ ဖောင်းသရေတော်ဟာ သူနားမာ ပေါ်လာဘီး

3 ဘုရားသခင်ဟု ‘နန်ရဲ့ ပြည်န နန်ရဲ့ မိသားစုဟို့ ထားရစ်ဘီးဟာ ငါပြဟူ ပြည်ဟို့ သွားပါ’ ဆိုဘီး သူဟို့ မိန့်တော်မူလေဟယ်။

4 အယ်ကြောန့် အာမြဟံဟာ ခါလဒဲပြည်ဟုနေ ထွပ်လာဘီး ခါရန်မြို့မာ နေဟို့တွပ် သွားလေဟယ်။ သူ့ဖ သေဟားဘီးန အယ်မြို့ဟုနေ ခု နန်းနို့ နေဟူပြည်ဟို့ ဘုရားသခင်ဟု ပုလောန်းခိုင်းလိုက်ဟယ်။

5 အယ်ဘီးန ဘုရားသခင်ဟာ အာမြဟံဟို့ အယ်ပြည်မာ ခေခလဟို့ နေရာဟို့မျှ ပေးဟု။ အယ်ဘောမဲ့ သူကိုယ်တိုင်န သူရဲ့ သားမှလေးလေဟို့ အယ်ပြည်ဟို့ ပိုင်ပေးမယ် ဆိုဘီး ဂဒိပေးလေဟယ်။ ဘုရားသခင်ဟာ အယ်မျိုး ဂဒိပေးဟူ ခီဒူးဟု အာမြဟံမာ သားမီးလေ မေ့သေးဟု။

6 ဘုရားသခင်ဟု အာမြဟံဟို့ ‘နန်ရဲ့ မှလေးမှလစ်လေဟာ နိုင်ငံရပ်ခြားမာ နေရဂေ့လေ့မယ်။ အယ်နိုင်ငံဟု လူလေဟာ သူးနို့ဟို့ ကျွန်ခံစေဘီးဟာ နှစ်ပေါန်း ၄၀၀ လောင်းလောင်း ညှဉ်းဆဲဇာဟို့ ခံရဂေ့လေ့မယ်။

7 အယ်ဘောမဲ့ ဘုရားသခင်ဟာ သူးနို့ဟို့ ကျွန်ခံခိုင်းဟူ လူလေဟို့လည်း ငါစီရင်မယ်။ အယ်ဘီးန နန်ရဲ့ သားမှ

လေးလေဟာ အယ်ပြည်ဟုနေ လွတ်မြော-က်ဂေဘီးဟာ အယ်နေရာမာ ငါ့ဟို့ ကိုးကွယ်ဘီး ဝတ်ပြုဂေလေမယ်' ဆိုဘီး ပြောလေဟယ်။

⁸ အယ်ဘီးန ဘုရားသခင်ဟာ ရေဖျားလီးဇာနဆိုင်ဟူ ပဉ္စညာဉ်ဟို့လည်း အာမြဟံဟို့ ပေးလေဟယ်။ အယ်ကြောန့် အာမြဟံဟာ ဣဇာက်ဟို့ မိုးဘီးန ရှစ်ရစ်မြော-က်နေမာ ရေဖျားလီးပေးဟယ်။ ဣဇာက်ဟာ သူ့သားယာကုပ်၊ ယာကုပ်ဟာ လူမျိုးဆယ့်နှေ့မျိုးရဲ့ ဘိုးဘေးလေဖြစ်ဟူ သူ့သား ဆယ့်နှေ့ယော့-က်ဟို့လည်း ရေဖျားလီးပေးလေဟယ်။

⁹ “ယာကုပ်ရဲ့ သားလေဟာ သူးနို့ညီ ယောသပ်ဟို့ နာလိုဘဲကြောန့် အဲဂုတုတုပြည်မာ ကျွန်ခံဟို့တွပ် ရောင်းလိုက်ဂေဟယ်။ အယ်ဘေမဲ့ ဘုရားသခင်ဟာ သူ့နတူးဒူ ရှိနေဟူကြောန့်၊

¹⁰ သူ့ရဲ့ ဒေါက်ခဆင်းရဲလေ ထဲဟုနေဘီး ကယ်တန်လိုက်ဟယ်။ ဘုရားသခင်ဟာ ယောသပ်ဟို့ အဲဂုတုတုပြည်ရဲ့ ဖာရောမန်းဂီးရှေ့မာ မျစ်နှာသာရစေဟယ်။ သူ့ဟို့လည်း ဉာဏ်ပညာပေးလေဟယ်။ ဖာရောမန်းဂီးဟာ သူ့ဟို့ အဲဂုတုတုပြည်န သူ့ရဲ့ နန်းတော်တခုလောင်းဟို့ အောက်ချောက်မားဖြစ် သူ့ဟို့ ခန့်ဟူးလေဟယ်။

¹¹ အဲဂုတုတုပြည်န ခါနန်ပြည်လေမာ စာခေါင်းဗားဘေး ရှေ့-က်လာဟူ ခီမာ လူလေဟု ရရာတိုင်း ဒေါက်ခရှေ့-က်ဂေဟယ်။ နို့လေရဲ့ ဘိုးဘေးလေမာလည်း စား

ဇာမ္မော့ဂေဟုမ်း။

12 အယ်ဘောမဲ့ အဲဂုတ္တုတုပြည်မာ စားဇာလေရှိနေဟယ်
ဆိုဇာဟို ယာကုပ်ကြားရခီမာ သူ့ရဲ့ သားလေဟို အယ်ပြ
ည်ဟို ပထမခါ လွတ်လိုက်ဂေဟယ်။

13 သူးနို့ဟာ ဒုတိယခါ ရော့-က်လာဂေဟူ ခီမာ ယော
သပ်ဟာ သူ့ညီကိုလေဟို သူဟာ ဖယ်လူဖြစ်ဟယ် ဆိုဇာ
ဟို ပြောပြလိုက်ဟယ်။ ဖာရောဟာ ယောသပ်ရဲ့ မိသားစု
ကြောန်းဟို သိဟူးဟယ်။

14 အယ်ကြောန့် ယောသပ်ဟာ သူ့ဖ ယာကုပ်နတူးဒု ခွန်
နစ်ဆယ်ငါးယော့-က်ရှိဟူ မိသားစုလောင်းဟို အဲဂုတ္တု
တုပြည်ဟို ခေါ်လိုက်ဟယ်။

15 အယ်ကြောန့် ယာကုပ်ဟာ အဲဂုတ္တုတုပြည်ဟို သွားဟ
ယ်။ အယ်ပြည်မာဘဲ သူ့န သူ့သားလေဟာ သေဟူးဂေ
ဟယ်။

16 သူးနို့ရဲ့ လောင်းလေဟို ရှေ့ခင်မြို့ဟို ယူဆောန်ဟူး
ဘီးဟာ အာဗြဟံဝယ်ဟူးရစ်ဟူ သန်းခုလိုင်းမာ သံ
ဂြိုဟ်ဂေဟယ်။ အယ်သန်းခုလိုင်းဟု ဟာမော်ရဲ့ သားလေ
နားဟု ကပ်န ဝယ်ဟူးဟယ်။

17 “ဘုရားသခင်ဟာ အာဗြဟံဟို ပေးဟူးဟူ ဂဒိတော်
ဟို ပုလဲဇောင်ဟိုတွပ် ခီနီးလာဟူ ခီမာ အဲဂုတ္တုတုပြည်မာ
ဣသရေလ လူလေဟို လူဦးရေတိုးပွားစေဟယ်။

18 အယ်ခီမာ အဲဂုတ္တုတုပြည်မာ ယောသပ်ဟို သိဘဲဟူ
မန်းဂီးတပါး ပေါ်လာဟယ်။

19 အယ်မန်းဂီးဟာ နို့လေရဲ့ ဘိုးဘေးလေဟို လှည့်ဇား ဘီး သူးနို့ဟို နှိစစ်ဂေဟယ်။ သူးနို့ရဲ့ သားဂန်းဟားလေဟို လည်း သေစေဟို့တွပ် အီပုလန်မာ ပစ်ဟားခိုင်းဟယ်။

20 အယ်ခီကာလမာ မောရှေဟာ မွီးလာဟယ်။ မောရှေ ဟာ ဘုရားသခင်ရှေမာ ရရာတိုင်း နားလူဘွယ်ကောင်း ဟူ သားဂန်းဟား ဖြစ်ဟယ်။ သူ့မိသားစုရဲ့ သောင်းလ လောင်းလောင်း စောန့်ရှေး-က်ဇာဟို ခံရဘီး၊

21 သူဟာ အီပုလန်မာ ပစ်ဟားခံရဟူ ခီမာ ဖာရောမန်း ဂီးရဲ့ သမီးတော်ဟု သူ့ဟို သားနေန မွီးဇားလေဟယ်။

22 မောရှေဟာ အဲဂုတုတုလူလေရဲ့ တတ်ပညာ ဂူ လောင်း သန်ဟားဘီး နှလောင်းရည်၊ လတ်ရောင်းရည် လေန ပုလဲဇောင်ဟူလူ ဖြစ်ဟယ်။”

23 “သူဟာ သတ်လေးဆယ်ပုလဲဟူ ခီမာ သူ့ညီကိုလေ ဖြစ်ဟူ ကုသရေလ လူလေနားဟို သွားလည်ဟို့တွပ် စိ ဆောင်းဖြတ်လိုက်ဟယ်။

24 ကုသရေလလူ တယော့-က်ဟို အဲဂုတုတုလူ တ ယော့-က်ဟု ညှဉ်းဆဲနေဇာဟို မြင်ဟူ ခီမာ သူ့လူဖတ် ဟုနေ ဝမ်ကူညီဘီး အဲဂုတုတုလူဟို သတ်လိုက်ဘီးဟာ ဂလဲစားချေလေဟယ်။

25 မောရှေဟာ သူ့ရဲ့ ညီကို မောန်နှမလေဟို ကယ်တန် ဟို့တွပ် သူးနို့ဟို ဘုရားသခင်ဟု လွှတ်လိုက်ဟယ် ဆိုဇာ ဟို သူးနို့လေဟု နားလည်ဂေလေမယ် ဆိုဘီး ထန်ဟားဟု ယ်။ အယ်ဘေမဲ့ အယ်လူလေဟာ နားလည်ဂေဟု။

26 နှော့-က်တနေ့မာ ဣသရေလလူ နှော့ယော့-က်ဟာ ရန်ဖြစ်နေဂေဇာဟို မြင်ဟူ ခီမာ မောရှေဟာ ‘နန်းနို့ဟာ ညီ ကိုရှင်းဖြစ်ဘီးဟာ ပြားဖြစ်ကြောန့် ရန်ဖြစ်နေဂေ့နူး’ ဆို ဘီး သူးနို့ဟို မေးဘီး ရန်ငြီးဟိုတွပ် ကြိုးစားလေဟယ်။

27 အယ်ဘေမဲ့ နိုင်ကျင့်နေဟူလူဟာ မောရှေဟို ဘေး ဟိုတွန်းလိုက်ဘီးန ‘နို့လေဟို တရားစီရင်ဟိုတွပ် အောက် ချောက်မားဖြစ် နန့်ဟို ဖယ်သူဟ ခန့်ဟားနူး။

28 နတ်ကီးဒူးဟာ အဲဂုတုတုလူ တယော့-က်ဟို သတ်မျိုး ငါ့ဟိုလည်း သတ်ဟို့လော’ ဆိုဘီး မေးဟယ်။

29 မောရှေဟာ အယ်စကားဟို ကြားဟူ ခီမာ အဲဂုတုတု ပြည်ဟုနေ ထွပ်ပလေးဟားဘီး မိဒျန်ပြည်မာ နေလေဟယ်။ အယ်ပြည်မာ သားနှော့ယော့-က်ဟို ရလေဟယ်။

30 “နှစ်လေးဆယ် ကြာဘီးန သိနာတောန်နားဟာ ကန္တာရ ထဲမာ မီးလောန်နေဟူ ချောင်ထဲမာ ကောန်းဂန်တမန် တ ပါးဟာ မောရှေဟို ကိုယ်ထန်ရှားပြလေဟယ်။

31 အယ်မူဇာဟို မြင်ဟူ ခီမာ မောရှေဟာ ရရာတိုင်း အံ့ဩဘီးန ရှင်းရှင်းလန်းလန်းဟား မြင်ရဟို့တွပ် နီးနား ဟို တိုးဟားဟယ်။ အယ်ဘေမဲ့ ဘုရားသခင်ဟ

32 ‘ငါဟာ နန်းနို့ ဘိုးဘေးလေရဲ့ ဘုရားသခင်၊ အာဗြ ဟံ၊ ဣဇက်၊ ယာကုပ်ရဲ့ ဘုရားသခင် ဖြစ်ဟယ်’ ဆိုဘီး သံတော်ဟို ကြားရဟူကြောန့် မောရှေဟာ ကြော့-က်လန် တူလောက်ဟားဘီး ကေ့ဟို့ရဲဘဲ ဖြစ်ဟားဟယ်။

33 ဘုရားသခင်ဟ ‘နန် ခေနန်းဟားဟူ နေရာဟာ သန်ရှ

င်းဟူမလေ ဖြစ်ဟုယ်။ နန့်ခေန်ဟို့ ခလွတ်လိုက်။

³⁴ အဲဂုတ္တုတုပြည်မာ ငါလူမျိုးလေဟို့ နှိစစ်ခံနေရဇာဟို့ ငါမြင်ရဟုယ်။ သူးနို့ရဲ့ ညည်းတွားသံလေဟို့ ငါကြားရဟုယ်။ သူးနို့ဟို့ ကယ်တန်ဟို့တွပ် ငါဆင်းလာဘီ။ အယ်ကြောန့် ခုလာဟုယ်။ နန့်ဟို့ အဲဂုတ္တုတုပြည်ဟို့ ငါလွတ်မယ် ဆိုဘီး မောရှေဟို့ မိန့်တော်မူလေဟုယ်။”

³⁵ “မောရှေဟော ကုသရေလလူမျိုးလေရဲ့ ပစ်ပယ်ခံရဟူလူ ဖြစ်ဟုယ်။ အယ်ဘီးဟော ‘နို့လေဟို့ တရားစီရင်ဟို့တွပ် အောက်ချောက်မားဖြစ် နန့်ဟို့ ဖယ်သူဟု ခန့်ဟားနူး’ ဆိုဘီး အယ်လူလေရဲ့ မေးဇာဟို့လည်း ခံရဟုယ်။ အယ်ဘေမဲ့ သူဟော ကုသရေလ လူမျိုးလေဟို့ အောက်ချောက်ဟို့တွပ် မီးတော့-က်နေဟူ ချောင်ထဲမာ ထန်ရှားဟူ ကောန်းဂန်တမန် တပါးရဲ့ ကူညီန ကုသရေလလူမျိုးလေ လွတ်မြော့-က်ဟို့တွပ် ဘုရားသခင် လွတ်လိုက်ဟူလူ ဖြစ်ဟုယ်။

³⁶ သူဟော အဲဂုတ္တုတုပြည်န ပန်လယ်နီမာရော၊ နှစ်လေးဆယ် လောင်းလောင်း တောကန္တာရထဲမာရော အံ့ဩဘွယ်ရာန နိမိတ်လတ်ခဏာလေဟို့ ပြဘီး ကုသရေလ လူမျိုးလေဟို့ အဲဂုတ္တုတုပြည်ဟုနေ ခေါ်ဆောန်လာဟူ လူဖြစ်ဟုယ်။

³⁷ အယ်မောရှေဟော ကုသရေလ လူမျိုးလေဟို့ ‘နန်းနို့ရဲ့ ညီကိုလေထဲမာ ငါနတူဟူ ပရောဖက်တပါးဟို့ ဘုရားသခင်ဟော နန်းနို့တွပ် ပေါ်ခိုင်းလေ့မယ်’ ဆိုဘီး ပြောဟူလူ ဖြစ်ဟုယ်။

38 သူဟာ တောကန္တာရမာ စုနေဟူ ကုသရေလ လူမျိုးလေနရော၊ နို့လေ ဘိုးဘေးလေနရော၊ သိနာတောန်ထတ်မာ သူ့ဟို စကားပြောဟူ ကောန်းဂန်တမန်နရော တူးဒရိုနေဟူလူ ဖြစ်ဟယ်။ နို့လေဟို ပြောဟိုတွပ် ဘုရားသခင်နားဟုနေ သတ်ရှင်စေဟူ တရားတော်ဟို ရလာဟူလူလည်း ဖြစ်ဟယ်။”

39 “အယ်ဘေမဲ့ နို့လေရဲ့ ဘိုးဘေးလေဟာ သူ့စကားဟို နားထောန်ဂေဟ။ သူ့ဟို ငြင်းပယ်ဘီးဟာ သူးနို့ရဲ့ စိန်လောင်းဟု အဲဂုတုတုပြည်ဟို ပုလန်ရှင်ဂေဟယ်။

40 သူးနို့ဟာ ‘နို့လေရှေ့ဟု ကြွဟားမယ် ဘုရားလေဟို နို့လေတွပ် လောက်ပေးပါ။ နို့လေဟို အဲဂုတုတုပြည်ဟုနေ ခေါ်ဆောန်လာဟူ အယ်မောရှေ့ဟု ဖယ်မျိုးဖြစ်ဟားဟယ် ဆိုဇာ နို့လေသိဂေဟ’ ဆိုဘီး အာရန်ဟို ပြောဂေဟယ်။

41 အယ်ဘီးန သူးနို့ဟာ နွားသားဂန်းဟား ရောက်ထုဟို လောက်ဘီးဟာ သူးနို့လတ်န လောက်ဟားဟူရောက်ထုဟို ယဇ်ပူဇော်ဘီးဟာ စားမွဲသော-က်မွဲ လောက်ဂေဟယ်။

42 အယ်ကြောန် ဘုရားသခင်ဟာ သူးနို့ဟို မျစ်နှာလွဲဘီးဟာ ကောန်းဂန်ကြယ်တာရာလေဟို ကိုးကွယ်ဂေဟိုတွပ် စွန်ပစ်ဟားလိုက်ဟယ်။ ပရောဖက်ကျမ်းမာ”

“‘ကုသရေလ လူမျိုးလေ၊ နန်းနို့ဟာ တောကန္တာရမာ နှစ်လေးဆယ် လောင်းလောင်း ယဇ်ကောန်လေဟို ပူဇော်ဟိုတွပ် ငါနားဟို ယူလာဖူးဘဲ့လော။

43 နန်းနို့ဟာ မောလုပ်ရဲ့ တဲန
နန်းနို့ရဲ့ ဘုရား ရှင်ဖန်ရဲ့ ကြယ်လေဟို့ သယ်လာဂေ
ဟယ်။

အယ်ဇာလေဟာ နန်းနို့ ကိုးကွယ်ဟို့တွပ် လောက်ဟားဟူ
ရောက်ထုလေ ဖြစ်ဂေဟယ်။

အယ်ကြောန့် နန်းနို့ဟို့ ဗာဗုလုန်မြို့ဟို့ ကျော်ဘီးဟာ
ခေါ်ဆောန်ဟားမယ်' ဆိုဘီး ရေးဟားတိုင်းဘဲ ဖြစ်
လာဟယ်။”

44 “နို့လေရဲ့ ဘိုးဘေးလေတွပ် တောကန္တာရမာ သတ်
သေခံဟူ တဲတော် ရှိဟယ်။ မောရှေဟို့ ဘုရားသခင်ပြဟား
ဟူ ပေါင်ဇံတိုင်း သတ်သေခံဟူ တဲတော်ဟို့ ဆော့-က်ဂေ
ဟယ်။

45 နို့လေရဲ့ ဘိုးဘေးလေဟာ သူးနို့ရဲ့ ဖလေနားဟုနေ
အယ်တဲတော်ဟို့ မွေဆစ်ခံဘီးဟာ ဘုရားသခင် နှန်ထုဟူ
လူမျိုးလေရဲ့ ပြည်ဟို့ ယောရှုနတူးဒူ ချီတတ်ဘီးဟာ သီး
ပိုက်ဂေဟူ ခီမာ အယ်တဲတော်ဟို့ သယ်ဟားဂေဟယ်။
အယ်တဲတော်ဟု ဒါဝိဒ်မန်းဂီး လတ်ထတ်ထိ ရှိနေဟယ်။

46 ဒါဝိဒ်ဟာ ဘုရားသခင်ရှေ့မာ မျစ်နာသာရဟူလူ ဖြစ်
ဟယ်။ အယ်ဘီးဟာ ယာကုပ်ရဲ့ ဘုရား * ကိန်းဝပ်ဘီး
နေဟူ ဗိမာန်တော်ဟို့ ဆော့-က်ရဟို့တွပ် ဘုရားသခင်ဟို့
တောန်းရှော့-က်ဟယ်။

* 7:46 ၇:၄၆ ယာကုပ်ရဲ့ ဘုရား၊ တချို့ မူရင်းလတ်ရေးမူလမာ
ဣသရေလလူလေ၊ ဆိုဘီး ပါရှိဟယ်။

47 အယ်ဘေမဲ့ ဘုရားသခင်ရဲ့ ဗိမာန်တော်ဟို့ ဆော့-က် ခွမ်ရဟူ လူဟု ရှောလမုန်မန်းဂီး ဖြစ်လေဟယ်။”

48 “အယ်ဘေမဲ့ ဖြစ်ဆောင်းဖြစ်ဟူ ဘုရားသခင်ဟာ လူလတ်န ဆော့-က်ဟားဟူ အီမာ ကျိန်းဝပ်ဟု ဆိုဘီး ပ ရောဖက်ဟုပြောဟယ်။”

49 ဘုရားသခင်ဟု “ကောန်းဂန်ဘောင်ဟာ ငါ့ရဲ့ ပလွင်ဖြ ဖ်ဟယ်။

မုလေဂီးဟာ ငါ့ရဲ့ ခေတန်ခေါင် ဖြစ်ဟယ်။

နန်းနို့ဟာ ပြားအီမျိုး ငါ့တွပ် ဆော့-က်ဂေဟို့နူး။

ငါကျိန်းဝပ်နေဟူ နေရာဟာ ဖယ်မာနူး။

50 ငါကိုယ်တိုင်ဘဲ အယ်ဇာလေဟို့

ဖန်ဆင်းဇာ မူဟုလော့”

ဆိုဘီး မိန့်တော်မူလေဟယ်။

51 “နန်းနို့ဟာ ရရာတိုင်း ခေါန်းမာဂေဟယ်! နန်းနို့ စိ နှလောင်းဟာ ဘုရားသခင်ရဲ့ တရားတော်ဟို့ ကြားရဟို့ တွပ် နားပန်းဂေဟယ်! နန်းနို့ဟာ နန်းနို့ ဘိုးဘေးလေမျိုး ဘဲ သန်ရှင်းဟူဝိညာဉ်တော်ဟို့ မြဲဒမ်းဆန်ကျင်ဂေဟယ်။

52 နန်းနို့ ဘိုးဘေးလေ ညှဉ်းဆဲဖူးဘဲဟူ ပရောဖက်လေ ရှိဘဲလော။ သူးနို့ဟာ ဘုရားသခင်ရဲ့ ဖြောန်မတ်ဟူစေခံ ကြွလာမယ့် ကြောန်းဟို့ ကြိုတန်ဘီးဟောဂေဟူ ပရော ဖက်လေဟို့ သတ်ပစ်ဂေဟယ်။ ခုလည်း နန်းနို့ဟာ အယ် သခင်ဟို့ သတ်လိုက်ဂေဟယ်။

53 နန်းနို့လေဟာ ကောန်းဂန်တမန်လေဟုနေ တဆင့် ပေးလိုက်ဟူ ပညတ်တော်ဟို့ ရဘေမဲ့ အယ်ပညတ်တော် ဟို့ လိုက်နာဂေဟု” ဆိုဘီး သတေဖန်ဟု ပြောလေဟယ်။

သတေဖန်ဟို့ ကုလော့-က်ခဲန ပစ်ဂေကြောင်း

54 ယုဒတရားလွတ်တော် ဖွဲ့ဝမ်လေဟာ အယ်စကားဟို့ ကြားရဟူ ခီမာ ရရာတိုင်း ဒေါသထွပ်ဘီးဟာ အံကုလိနေ ဂေဟယ်။

55 သတေဖန်ဟာ သန်ရှင်းဟူဝိညာဉ်တော်န ပုလဲဝဘီး ကောန်းဂန်ဟို့ ကေ့လိုက်ဟူ ခီမာ ဘုရားသခင်ရဲ့ ဖောင်း သရေတော်န ဘုရားသခင်ရဲ့ ညာဖတ်မာ ယေရှုရပ်နေဇာ ဟို့ မြင်နေရဟယ်။

56 သတေဖန်ဟု “ငါဟာ ကောန်းဂန်ပွမ်နေဇာန လူရဲ့ သားဟာ ဘုရားသခင်ရဲ့ ညာဖတ်မာ ရပ်နေဇာဟို့ ငါမြင်ရ ဟယ်” ဆိုဘီး ပြောဟယ်။

57 အယ်လူလေဟာ သံကုလယ်ဂီး အော်ဘီးဟာ သူးနို့ ရဲ့ နားလေဟို့ လတ်န ပိဟွားဘီးဟာ သတေဖန်နားဟို့ တ ရှိထိုး ပုလေးလာဂေဘီးဟာ၊

58 သူဟို့ မြို့ပုလန်ဟို့ ဆွဲထုဘီးန ကုလော့-က်ခဲန ပစ် ဂေဟယ်။ သံသတ်သေလေဟာ သူးနို့ အန်းဂီလေဟို့ ရှော လုနာမယ်ရှိဟူ လူငယ် တယော့-က်နားမာ ထားရစ်ဂေဟု ယ်။

59 သူ့နှို့ဟာ ကုလော့-က်ခဲန ပစ်နေဟူ ခီမာ သတေဖန်ဟာ “သခင်ယေရှု၊ ကျွန်တော့်ရဲ့ ဝိညာဉ်ဟို့ လတ်ခံတော်မူပါ” ဆိုဘီး ဆုတောင်းဟယ်။

60 သူဟာ ဒူးထော့-က်ဘီးဟာ “သခင်ဘုရား၊ သူ့နှို့ရဲ့ ပြစ်ဟို့ ခွမ်လွတ်ပေးပါ ဆိုဘီး သံကုလယ်ဂီး အော်ဘီးန သေဟားလေဟယ်။”

8

1 ရှောလုဟာ သတေဖန် သတ်ခံရဟူ မူမာ သတ်သေ ဖြစ်ဟယ်။

ရှောလုဟာ သင်းတော်ဟို့ ညှဉ်းဆဲဟူကြောင်း

အယ်နေမာဘဲ ယေရုရှလင်မြို့ဟု သင်းတော်မာ ပြင်းထန်ဟူ ညှဉ်းဆဲဇာလေဟာ စဘီး ဖြစ်လာဟယ်။ အယ်ကြောန့် တမန်တော်လေဟုလွဲဘီး ယောင်ကြည်သူလေ ဂူလောင်းဟာ ယုဒပြည်န ရှမာရိပြည်လေဟို့ ထွပ်ပုလေးဂေဟယ်။

2 ဘုရားတရားဟို့ ရိုသေဟူ လူတချို့ဟာ သတေဖန်ဟို့ သဂြိုဟ်ဘီး သူတုပ် ရရာတိုင်း ငိုဂေဟယ်။

3 အယ်ဘေမဲ့ ရှောလုဟာ အီဘီးအီ ဝမ်ဘီးဟာ ယောင်ကြည်သူ ယော့-က်ကျားလေန မီးမလေဟို့ ဆွဲထုဘီး ထောန်ထဲမာ ခုလဟားဘီး သင်းတော်ဟို့ ဖျစ်ဆီးဟို့တုပ် ကြိုးစားနေဟယ်။

ရှုမာရိပြည်မှာ ဒန်းကောင်းဟောပြောကြောင်း

^၄ ဖုလဲဖုလဲစင် ဖြစ်ဟူးဟူ ယောင်ကြည်သူလေဟာ နေရာတိုင်းဟို့ သွားဘီးဟာ ဒန်းကောင်းဟို့ ဟောပြောဂေဟယ်။

^၅ ဖိလိပ္ပဟာ ရှုမာရိပြည်ရဲ့ ဓိကမြို့တော်*ဟို့ သွားဘီး ခရစ်တော်ကြောင်းဟို့ ဟောပြောဟယ်။

^၆ လူလေဟာ ဖိလိပ္ပပြဟူ နိမိတ်လတ်ခဏာလေဟို့ ပြင်ဟူ ခီမာ သူရဲ့ တရားစကားဟို့ အာရောင်စိုက်ဘီး နားထောန်ဂေဟယ်။

^၇ နတ်ဆိုးစွဲနေဟူ လူလေဘောင်ဂီးထဲဟုနေ နတ်ဆိုးလေဟာ သံကုလယ်ဂီးန အော်ဘီးဟာ ထွပ်ဟူးဂေဟယ်။ လေဖြတ်ဟူလူ၊ ခေလတ်သန်ဘဲဟူ လူလေဟာ ရောဂါပျော့-က်ဟူးဂေဟယ်။

^၈ အယ်ကြောန် အယ်မြို့မာ ရရာတိုင်း ဝန်းသာဟူးဂေဟယ်။

^၉ အယ်မြို့မာ ရှိမုန် နာမယ်ရှိဟူလူ တယော့-က်ရှိဟယ်။ သူဟာ သူရဲ့ နတ်ဝိဇ္ဇာပညာန ရှုမာရိ လူမျိုးလေဟို့ အံ့ဩစေဘီး သူ့ကိုယ်သူ ထူးမြတ်ဟူလူ ဖြစ်ဟယ် ဆိုဘီး ဝါကြွေးလေဟယ်။

^{၁၀} အယ်မြို့မာရှိဟူ လူတန်းစားလေ ဂူလောင်းဟာ သူ့ဟို့ အာရောင်စိုက်ဘီး “အယ်လူဟာ ဘုရားသခင်ရဲ့ ‘မဟာတဂိုးတော်’ ဖြစ်ဟယ်” ဆိုဘီး ပြောဂေဟယ်။

* ၈:၅ ၈.၅ ဓိကမြို့တော်၊ တချို့ မူရင်းလတ်ရေးမူလေမာ မြို့တမြို့၊ ဆိုဘီး ပါရှိဟယ်။

11 သူးနို့ဟာ ရှိမုန်ဟို့ အာရောင်စိုက်နေဇာဟု သူဟာ ခီ ကြာဂီး နတ်ဝိဇ္ဇာပညာန အံ့ဩစေဟူကြောန့် ဖြစ်ဟယ်။

12 အယ်ဘေမဲ့ ဘုရားသခင်ရဲ့ နိုင်ငံတော်ကြောန်းန ယေရှုခရစ်တော်ကြောန်း ဒန်းကောန်းဟို့ ဖိလိပ္ပဟု ဟော ဟူ ခီမာ အယ်လူလေဟာ ယောင်ကြည်လာဂေဘီးဟာ ယော့-က်ကျားလေရော မီးမလေပါ ဗတုတိဇ်ဟို့ ခံဂေဟု ယ်။

13 ရှိမုန် ကိုယ်တိုင်လည်း ယောင်ကြည်ဘီး ဗတုတိဇ်ဟို့ ခံဘီးန ဖိလိပ္ပနားမာ နေနေဟယ်။ သူဟာ ကီးမားဟူ အံ့ ဩဘွယ်လေန နိမိတ်လတ်ခဏာလေဟို့ ဗြင်ရဟူ ခီမာ အံ့ဩနေဟယ်။

14 ရှမာရိပြည်သားလေဟာ ဘုရားသခင်ရဲ့ စကားတော် ဟို့ ခံယူဂေဟယ် ဆိုဇာဟို့ ယေရုရှလင်မြို့မာရှိဟူ တမန် တော်လေ ကြားရဟူ ခီမာ ပေတရုန ယောဟန်လေဟို့ သူး နို့နားဟို့ လွတ်လိုက်ဂေဟယ်။

15 တမန်တော်နေ့ပါးဟာ ရော့-က်လာဟူ ခီမာ သန်ရှင်း ဟူဝိညာဉ်တော်ဟို့ ယောင်ကြည်သူ လူသစ်လေ လတ်ခံရ ရှိဟို့ ဆိုဘီး သူးနို့တွပ် ဆုတောင်းဂေဟယ်။

16 ပြားဖြစ်ကြောန်းန့ဆိုဟာ သူးနို့လေဟာ သခင်ယေရှု နာမတော်နိုက် ဗတုတိဇ်ဟို့ ခံယောင်မျှဘဲ့ ရှိသေးဘီး သန် ရှင်းဟူဝိညာဉ်တော်ဟာ အယ်လူလေထဲဟု ဖယ်လူထတ် မာလည်း ရော့-က်လာသေးဟု။

17 အယ်ဘီးန ပေတရုန ယောဟန်လေဟာ သူးနို့ထတ်

ဟို့ လတ်တန်ဂေဟူ ခီမာ သူးနို့ဟာ သန်ရှင်းဟူဝိညာဉ်
တော်ဟို့ ခံရဂေဟယ်။

18 တမန်တော်လေ လတ်တန်ဟူ ခီမာ သန်ရှင်းဟူ
ဝိညာဉ်တော်ဟို့ အယ်ယောင်ကြည်သူလေ ရရှိဟားဟယ်
ဆိုဇာဟို့ ရှိမုန်ဟု မြင်ဟားဟူကြောန့် ကပ်ဟို့ ယူလာဘီး
ဟာ၊

19 “ကျွန်တော် လတ်တန်လိုက်ဟူ လူတိုင်းဟာ သန်ရှင်း
ဟူဝိညာဉ်တော်ဟို့ ရဟို့တွပ် တဂိုးအာဏာဟို့ ကျွန်တော်
ဟို့လည်း ပေးပါ” ဆိုဘီး တောန်းလိုက်ဟယ်။

20 ပေတရဟု “နန်ဟာ ဘုရားသခင်ရဲ့ ဆုကျေးဇူးဟို့
ကပ်န ဝယ်နိုင်ဟယ် ဆိုဘီး ထန်မှတ်ဟူကြောန့် နန်ရဲ့ က
ပ်ဟာ နန်နတူးဒူ ပျစ်စီးပါစေ။

21 ဘုရားသခင်ရှေ့မာ နန်ရဲ့ စိန်လောင်းဟာ ပြောန့်ဘဲ
ဟူကြောန့် နို့လေရဲ့ လောက်ထဲမာ ပါဝမ်ခွမ် မေ့ဟု။ နန်ဝီ
စုလည်း မေ့ဟု။

22 အယ်မျိုး ဆိုးညစ်ဟူ ကြံစည်ဟို့ နောန်ဒရဘီး အယ်
မျိုးစိန်လောင်းထဲမာ ကြံစည်မိဟူဇာဟို့ ပြစ်လွတ်ခံရဟို့
တွပ် သခင်ဘုရားနားမာ ဆုတောင်းပါ။

23 ဖြားဖြစ်ကြောန့်နူးဆိုဟာ နန်ဟာ ရိုးသားဘဲဟူစိန် ပ
လဲနောဘီးဟာ ပြစ်ရဲ့ ချောက်နှောန်ဇာထဲမာ ရှိနေဇာဟို့ ငါ
မြင်ဟယ်” ဆိုဘီး ပြောဟယ်။

24 ရှိမုန်ဟု “သင်ပြောနေဇာလေ တခုလည်းဖြစ်ဘဲဟို့
တွပ် သခင်ဘုရားဟို့ ကျွန်တော်တွပ် ဆုတောင်းပေးဂေ

ပါ” ဆိုဘီး တောင်းဗန်လေဟယ်။

25 ပေတရုန် ယောဟန်လေဟာ သခင်ဘုရားရဲ့ စကား
တော်ဟို့ သတ်သေခံဘီးဟာ ဟောပြောဘီးန ယေရုရှလင်
မြို့ဟို့ ပုလန်ဟားဂေဟယ်။ ပုလန်ခရီးမာ သူးနို့ဟာ ရှမာ
ရိဝါလေမာ ဒန်းကောင်းဟို့ ဟောပြောဂေဟယ်။

ဖိလိပုပုန အဲသယောပိ ရာရှိကြောင်း

26 ဘုရားသခင်ရဲ့ ကောင်းဂန်တမန်ဟာ ဖိလိပုပုဟို့ “နန်
ဟာ ထဘီးဟာ ယေရုရှလင်မြို့ဟုနေ ဂါဇမြို့ဟို့ သွားဟူ
လမ်းတိုင်း တောန်ဖတ်†ဟို့ သွားလိုက်” ဆိုဘီး ပြောလိုက်
ဟယ်။ ခုခီမာ အယ်လမ်းဟို့ သောင်းဂေဟမ်း။‡

27 အယ်ကြောနို့ ဖိလိပုပုဟာ ထဘီးဟာ သွားလေဟ
ယ်။ အယ်ဘီးန အဲသယောပိပြည်ဟု မိဖုရား ကနဒက်ရဲ့
မူးမတ်ဂီးဖြစ်ဘီး မိဖုရားရဲ့ ဘဏ္ဍာလေ ဂူလောင်းဟို့ စီမံ
ခန့်ခွဲရဟူ အဲသယောပိပြည်သား တယော့-က်ဟာ ယေ
ရုရှလင်မြို့ဟို့ လာရော့-က် ဝတ်ပြုကိုးကွယ်ဘီး

28 ပုလန်လမ်းမာ သူရဲ့ မြင်းရထားထတ်မာ ထိုင်ဘီး ပ
ရောဖက် ဟေရှာယရဲ့ ကျမ်းစာဟို့ ဖတ်နေဟယ်။

29 ဝိညာဉ်တော်ဟာ ဖိလိပုပုဟို့ “အယ်မြင်းလှည်းနားဟို့
သွားလိုက်” ဆိုဘီး ပြောဟယ်။

† 8:26 ၈.၂၆ တောန်ဖတ်၊ အယ်မျိုးမူဘဲနေဟာ မွန်းဒဲ့။ ‡ 8:26 ၈.၂၆
ခုခီမာ အယ်လမ်းဟို့ သောင်းဂေဟမ်း၊ အယ်မျိုးမူဘဲနေဟာ အယ်လမ်းဟာ
ကန္တာရလမ်းဖြစ်ဟယ်။

30 ဖိလိပ္ပုလည်း ပုလေးဟူးဘီးဟာ ပရောဖက်ဟောရာ ယကျမ်းကို အယ်လူဟာ ဖတ်နေဇာကို ကြားဟူ ခီမာ “နန် ဖတ်နေဇာကို နားလည်ဘဲ့လော” ဆိုဘီး မေးလိုက်ဟယ်။

31 အယ်ရာရီဟာ “ရှင်းပြပေးမယ့်လူ မွေ့ဘဲန ဖယ်မျိုး နားလည်တို့နဲ့” ဆိုဘီး ပုလန်ဖြေလေဟယ်။ သူဟာ ဖိလိပ္ပုကို မြင်းလှည်းထတ်ကို တတ်ခိုင်းဘီးဟာ သူ့နတူးဒ ထိုင်တို့တွပ် တိုက်တွန်းလိုက်ဟယ်။

32 အယ်လူဖတ်နေဟူ ကျမ်းချစ်ဟု “သတ်ခံရတို့တွပ် ဆွဲခေါ်ဟူးဟူ သိုးမျိုးဘဲ့ သူတို့ ယူ ဆောန်ဟူးဂေဟယ်။

မိုးညှပ်မားရှေ့မာ သိုးသားဂန်းဟူးဟာ
သူ့နောက်ကို ပိဟူးမျိုး သူဟာ သူ့နောက်ကို ဖွမ့်ဘဲ
နေဟယ်။

33 သူဟာ ရှောက်ခလဇာကို ခံရဘီး
တရားမျှတမှုတွပ် ငြင်းပယ်ခံရဟယ်။
အယ်လောကဟာ သူ့သတ်ကို ရောက်သီးဟူးကြောန့်
ဖယ်လူလည်း သူ့ရဲ့ သားမုလေးလေကြောန်းကို ပြော
ပြနိုင် ဂေဟု”
ဆိုဘီး ပြောဟယ်။

34 အယ်ရာရီဟာ “နန်တို့ မေးအူးမယ်။ ပရောဖက်ဟာ
ဖယ်လူရဲ့ ကြောန်းကို ပြောနေနဲ့။ သူ့ကိုယ်သူ ပြောနေဇာ
လော။ တခြားလူ တယော့-က် ကြောန်းလော” ဆိုဘီး ဖိ
လိပ္ပုကို မေးဟယ်။

35 ဖိလိပ္ပုဟာ အယ်ကျမ်းပိုင်နဘဲ စပြုဘီးဟာ ယေရှု ကြောန်း ဒန်းကောန်းဟို့ ပြောလေဟယ်။

36 သူးနို့ဟာ ဆစ်ဘီးဟာ ခရီးသွားနေဂေဟူ ခီမာ ရေရှိဟူနေရာဟို့ ရော့-က်ဟားဂေဘီး အယ်ရာရှိဟု “အယ်နေရာမာရေရှိဟယ်။ ကျွန်တော် ဗတုတိဇံခံဟို့တွပ် တားဆီးမယ့် ဇာလေရှိလော” ဆိုဘီး ပြောဟယ်။

37 §

38 ရာရှိဟာ မြင်းလှည်းဟို့ ရပ်ခိုင်းလိုက်ဟယ်။ အယ် ဘီးန သူးနို့ နှေ့ယော့-က်ဟာ ရေထဲဟို့ ဆင်းဟားဂေဘီး ဟာ ဖိလိပ္ပုဟာ ရာရှိဟို့ ဗတုတိဇံပေးလိုက်ဟယ်။

39 သူဟာ ရေထဲဟု ထလာဟူ ခီမာ ဘုရားသခင်ရဲ့ ဝိညာဉ်တော်ဟာ ဖိလိပ္ပုဟို့ တခြားနေရာဟို့ ယူဆောန် ဟားလေဟယ်။ ရာရှိဟာ ဖိလိပ္ပုဟို့ ရော့-က်ထပ် တွံရ ဟုမ်း။ သူဟာ ဝန်းသာရှင်းပုလဲန ခရီးဆစ်ဟားလေဟယ်။

40 ဖိလိပ္ပုဟာ အာဇုတ်မြို့ဟို့ ရော့-က်ရှိနေဇာဟို့ သိရ ဟယ်။ အယ်ဘီးန ကဲသရီမြို့ဟို့ ရော့-က်ဒဲထံ မြို့တိုင်း မာ ဒန်းကောန်းဟို့ ဟောပြောလေဟယ်။

9

ရှောလု ပုလောန်းလဲဟူကြောန်း

(တမန်တော် ၂၂.၆-၁၆; ၂၆.၁၂-၁၈)

§ 8:37 ၈.၃၇ တချို့ မူရင်းလတ်ရေးမူလေမာ ခန်းငယ် ၃၇ ဟို့၊ ဖိလိပ္ပုဟု သူဟို့ “နန်ဟာ စိန်လောင်းန ယောင်ကြည်မယ် ဆိုဟာ နှစ်ရှင်းခံနိုင်ဟယ်။” ဆိုဘီး ပြောဟယ်။ သူဟု “ငါလောက်မယ်၊ ဘုရားသခင်ရဲ့ သားတော် ယေရှုခရစ်ဟို့ ငါယောင်ကြည်ဟယ်။” ဆိုဘီး ထပ်ပေါင်းထဲဟားဟယ်။

1 အယ်ဒီမာ ရှောလုဟာ သခင်ဘုရားရဲ့ တမဲ့တော် လေဟို့ သတ်ဟို့တွပ် ချီးခြွေ-က်နေဟယ်။ သူဟာ ယဇ်ပုရောဟိတ်မန်း နားဟို့ သွားဘီးဟာ။

2 သခင်ဘုရားရဲ့ လမ်း စဉ် ဟို့ လိုက် ရှော-က် ဟူ ယော-က်ကျားန မီးမလေဟို့တို့မယ် ဆိုဟာ အယ်လူလေ ဟို့ ဖမ်းဘီးဟာ ယေရုရှလင်မြို့ဟို့ ခေါ်လာနိုင်ဟို့တွပ် ဒ မာသက်မြို့မာရှိဟူ ဝါလယ်ဇရပ်လေဟို့ မှာစာလေဟို့ ရေး ပေးဟို့တွပ် တောန်းရှော-က်လေဟယ်။

3 ရှောလုဟာ ဒမာသက်မြို့နားဟို့ ရှော-က်ခါနီးမာ ကောန်းဂန်ဟုနေ လန်းရောက်တခုဟာ သူပတ်လည်မာ ရောက်တရစ် ထွန်းတော့-က်လာဟယ်။

4 သူဟာ မုလေဂီးထတ်ဟို့ လဲကုလဘီးန “ရှောလု၊ ရှော လု နန်ဟာ ပြားဖြစ်ကြောန့် ငါ့ဟို့ ညဉ်းဆဲနူး” ဆိုဘီး သူ ဟို့ မေးနေဟူ သံဟို့ ကြားရဟယ်။

5 ရှောလုဟု “သခင်၊ ကိုယ်တော်ဟု ဖယ်သူနူး” ဆိုဘီး မေးလျှော့-က်လိုက်ဟယ်။ သံတော်ဟု “ငါဟာ နန်ညဉ်းဆဲ နေဟူ ယေရှုဘဲဖြစ်ဟယ်။”

6 “အယ်ဘေမဲ့ ထဘီးဟာ မြို့ထဲဟို့ သွားလိုက်။ အယ် နေရာမာ နန်လောက်ရဟို့ ဇာလေဟို့ ငါပြောပြမယ်” ဆို ဘီး မိန့်တော်မူလေဟယ်။

7 ရှောလုနတူးဒ ခရီးသွားနေဂေဟူ လူလေဟာ အယ် သံဟို့ ကြားရဘေမဲ့ ဖယ်လူဟို့လည်း မြင်ရဘဲဟူကြောန့် တွေဝေဘီးဟာ ရပ်နေဂေဟယ်။

⁸ ရှောလုဟာ မုလေဂီးဟုထဘီးန မျစ်စိဟို့ ဖွမ်လိုက်ဟူ ခီမာ ဖြားလည်း မြင်ရဟမ်း။ အယ်ကြောန့် အယ်လူလေ ဟာ သူလတ်ဟို့ ဆွဲဘီးဟာ ဒမာသက်မြို့ထဲဟို့ ခေါ်ဆော န်ဟားဂေဟယ်။

⁹ သူဟာ သောင်းရစ်လောင်းလောင်း မျစ်ကန်းဖြစ်ဟား ဘီး ဖြားဇာလည်း စားသော့-က်ဘဲန နေလေဟယ်။

¹⁰ ဒမာသက်မြို့မာ အာနနို နာမယ်ရှိဟူ တမဲ့တော် တ ယော့-က်ရှိဟယ်။ ရှူပါရောင်ထဲမာ သခင်ဘုရားဟု အာန နိုဟို့ “အာနနို!” ဆိုဘီး ခေါ်လိုက်ဟယ်။

အာနနိုဟု “ကျွန်တော်ရှိပါဟယ်။ သခင်ဘုရား” ဆိုဘီး ပုလန်ဖြေလိုက်ဟယ်။

¹¹ သခင်ဘုရားဟု “နန်ထဘီး လမ်းဖြောန့် နာမယ်ရှိဟူ လမ်းဟို့သွားလိုက်။ တာရှူမြို့သား ရှောလု နာမယ်ရှိဟူ လူဟို့ ယုဒရဲ့အီမာ မေးလိုက်ပါ။ သူဟာ ဆုတောင်းနေဟ ယ်။

¹² သူဟာ မျစ်စိ ပုလန်မြင်ရဟို့တွပ် အာနနို နာမယ်ရှိဟူ လူ လာဘီးဟာ သူထတ်မာ လတ်လာတန်ဇာဟို့ ရှူပါရောင် ထဲမာ မြင်ဟားပီးဘီ” ဆိုဘီး မိန့်တော်မူလေဟယ်။

¹³ အာနနိုဟု “သခင်ဘုရား၊ အယ်လူဟာ ယေရုရှလင် မြို့မာရှိဟူ ကိုယ်တော်ရဲ့ သန်ရှင်းဟူ လူလေဟို့ ဖယ်မျှ လော့-က် ဒေါက်ခပေးဟယ် ဆိုဇာ လူလေဘောင်ဂီးနား ဟုနေ ကျွန်တော်ကြားရဟယ်။

14 ကိုယ်တော်နာမတို့ ဆုတောင်းဟူ လူလေရှိမျှတို့ ဖမ်းတို့တွပ် ယဇ်ပုရောဟိတ်ဂီးလေရဲ့ ခွမ်အာဏာန ဒမာသက်မြို့တို့ လာဟူလူဖြစ်ဟယ်” ဆိုဘီး ရှော့-က်လိုက်ဟယ်။

15 သခင်ဘုရားဟု “သွားလိုက်။ အယ်လူတို့ လူမျိုးခြားလေ၊ မန်းဂီးလေန ကုသရေလလူမျိုးလေတို့ ငါ့နာမတို့ ကြေညာတို့တွပ် ငါဝီးကော့-က်ဟွားဟယ်။

16 ငါ့ရဲ့ နာမတော်ကြောန့် သူခံရမယ့် ဆင်းရဲဒေါက်ခကြောင်းတို့ သူတို့ ငါကိုယ်တိုင် ဖော်ပြမယ်” ဆိုဘီး ပြောလေဟယ်။

17 အယ်ကြောန့် အာနနိဟာ ရှော့လူရှိဟူအီတို့ သွားဘီး ရှော့လူထတ်မာ လတ်တို့တန်ဘီးန “ညီရှော့လူ၊ နန့်မျစ်စိပုလန်မြင်တို့တွပ်ရော၊ သန့်ရှင်းဟူဝိညာဉ်တော်န ပုလဲဝတို့တွပ်ရော လမ်းမာနန့်တို့ ထန်ရှားပြဟူ သခင်ယေရှုဟာ ငါတို့ နန့်နားတို့ လွတ်လိုက်ဟယ်” ဆိုဘီး ပြောဟယ်။

18 ရှစ်ရှင်းဘဲ့ ရှော့လူရဲ့ မျစ်စိဟုနေ ငါးကြေးလေဟာ ကွာကုလမျိုးဖြစ်ဘီးဟာ မျစ်စိပုလန်မြင်ဟွားဟယ်။ သူဟာ ထဘီးန ဗတုတိဇံခံလေဟယ်။

19 သူဟာ စားဇာစားဘီးန ခွန်အား ပုလဲလာလေဟယ်။

ဒမာသက်မြို့မာ ရှော့လူ ဟောပြောကြောန့်

ရှော့လူဟာ ဒမာသက်မြို့မာ တမဲ့တော်လေန ရစ်နဲနဲ ကြာအောန်နေလေဟယ်။

²⁰ ရှစ်ရှင်းဘုံ ဝါလယ်ဇရပ်လေဟို့ သွားဘီးဟာ ယေရှုဟာ ဘုရားသခင်ရဲ့ သားတော်ဖြစ်ဟယ် ဆိုဇာဟို့ စဘီးဟာ ဟောပြောဟယ်။

²¹ သူ့စကားဟို့ ကြားဟူလူလေဟာ အံ့ဩဂေဘီးဟာ “အယ်လူဟာ ယေရှုရှလင်မြို့မာ ယေရှုဟို့ ကိုးကွယ်ဟူလူလေဟို့ သတ်ဟူလူ မှဟူလော။ သူဟာ အယ်လူလေဟို့ ဖမ်းဘီးဟာ ယဇ်ပုရောဟိတ်ဂီးလေနားဟို့ ပို့ဟူလူ မှဟူလော” ဆိုဘီး မေးဂေဟယ်။

²² အယ်ဘေမဲ့ ရှောလုရဲ့ ဟောပြောချစ်ဟာ တဂိုးန ပိုဘီး ဟာ ပုလဲဇောင်လာဘီး သခင်ယေရှုဟာ မေရှိယဖြစ်ဟယ် ဆိုဇာဟို့ သတ်သေပြဘီး ဟောပြောဟူကြောနဲ့ ဒမာသက်မြို့မာနေဟူ ယုဒလူမျိုးလေဟာ ပုလန်ဘီးချေပဟို့ နိုင်ဂေဟယ်။

²³ ရစ်လေကြာဟားဘီးန ရှောလုဟို့ သတ်ဟို့တွပ် ယုဒလူမျိုးလေဟာ ကြံစည်ဂေဟယ်။

²⁴ အယ်ဘေမဲ့ သူးနို့ရဲ့ စီစဉ်လေဟို့ ရှောလုဟာ သိဟားဟယ်။ သူးနို့ဟာ ရှောလုဟို့ သတ်ဟို့တွပ် နေ့ရော၊ ညဉ့်ရော မြို့ရဲ့ ခွဗော့-က်နားမာ စောန့်နေဂေဟယ်။

²⁵ ရှောလုရဲ့ တမဲ့လေဟာ ညဉ့်ခန်းဇာမာ သူ့ဟို့ယူဘီးန တောန်းထဲဟို့ ထဲဘီးဟာ မြို့ရိုးထတ်ဟုနေ ရှောဒုလဂေဟယ်။

ယေရှုလင်မြို့ဟို့ ရှောလု ပုလန်ဘီးဟာ ရှော-က်လာ
ကြောန်း

²⁶ သူဟာ ယေရှုလင်မြို့ဟို့ ရှော-က်လာဟူ ခီမာ တ
ဗွဲလေန ပေါန်းဟို့တွပ် ကြိုးစားဟယ်။ အယ်ဘေမဲ့ သူဟာ
တဗွဲတော်တယော့-က် ဖြစ်ဟယ် ဆိုဇာဟို့ သူးနို့လေဟာ
ယောင်ကြည်ဘဲကြောန် သူဟို့ ကြော့-က်နေဂေဟယ်။

²⁷ အယ်ဘီးန ဗာနဗဟာ သူဟို့ ကူညီဘီး တမန်တော်
လေနားဟို့ ခေါ်လာဟယ်။ ရှောလုဟာ လမ်းမာ သခင်ဘု
ရားဟို့ မြင်ရဟူဇာလေရော၊ ဒမာသက်မြို့မာ ယေရှုရဲ့
နာမန ဖယ်မျှထိ ရဲရဲရင့်ရင့်ဟား ဟောဇာလေဟို့ရော သူ
ဟု သူးနို့ဟို့ ရှင်းပြလေဟယ်။

²⁸ ရှောလုဟာ တမန်တော်လေနတူးဒု နေဘီး ယေရှု
လင်မြို့ဟို့ နှံ့အောန်သွားဘီးဟာ သခင်ဘုရားရဲ့ နာမ
တော်ဟို့ ရဲရဲရင့်ရင့်ဟား ဟောပြောဟယ်။

²⁹ သူဟာ ဟောလသစကားပြောဟူ ယုဒလေန ဆွေးနွီး
ပြောဆိုဂေဟယ်။ အယ်ဘေမဲ့ အယ်လူလေဟာ သူဟို့ သ
တ်ဟို့တွပ် ကြံစည်ဂေဟယ်။

³⁰ အယ်ဒန်းဟို့ ညီကိုလေဟု ကြားရဟူ ခီမာ သူဟို့ ကဲ
သရိမြို့ဟို့ ခေါ်ဆောန်ဟားဘီး တာရှုမြို့ဟို့ ပို့ဂေဟယ်။

³¹ အယ်ကြောန် ယုဒပြည်၊ ဂါလိလဲပြည်န ရှမာရိပြည်
နေရာနဲ့မာရှိဟူ သင်းတော်ဟာ ငြိသတ်ဟူ ကာလဟို့ ရ
ဂေဟယ်။ သင်းတော်ဟာ သခင်ဘုရားဟို့ ကြော့-က်ရွံ့
ရိုသေဇာန သတ်ရှင်ဘီး သန်ရှင်းဟူဝိညာဉ်တော်ရဲ့ ကူညီ

ရှင်းကြောနဲ့ ခိုင်ခန့်မြဲမြံဟောင်းဘီး သင်းသားလေ ဘောင်ဂီး
ဖြစ်လာဟယ်။

ပေတရုဟာ လုဒဒမြို့နဲ့ ယုပုပေမြို့ဟို့ ရော့-က်ဟား
ကြောန်း

³² ပေတရုဟာ နေရာတိုင်းဟို့ သွားဘီး လုဒဒမြို့မာရှိ
ဟူ ဘုရားသခင်ရဲ့ သန့်ရှင်းသူလေးနားဟို့ ရော့-က်ဟားဟ
ယ်။

³³ အယ်မြို့မာ လေဖြတ်ဘီးဟာ ရှစ်နှစ်လောင်းလောင်း
အိယာထဲမာ လဲနေဟူ အဲနေနာမယ်ခေါ်ဟူ လူတယော့-က်
ဟို့ တွဲဟားဟယ်။

³⁴ ပေတရုဟာ “အဲနေ၊ ယေရှုခရစ်တော်ဟာ နန့်ဟို့
ကျန်းမာစေဘိ။ ထဘီးဟာ အိယာဟို့ ကော့-က်လိုက်” ဆို
ဘီး သူဟို့ ပြောလိုက်ဟယ်။ အဲနေဟာ ရှစ်ရှင်းဘွဲ ထလို
က်ဟယ်။

³⁵ လုဒဒမြို့နဲ့ ရှာရန်မြို့မာနေဟူ လူလေ ဂူလောင်းဟာ
အဲနေဟို့ မြင်ဘီး သခင်ဘုရားဖတ်ဟို့ ပုလောန်းလဲလာဂေ
ဟယ်။

³⁶ ယုပုပေမြို့မာ တဗိသနာမယ်ရှိဟူ တမဲ့တော်မ တ
ယော့-က်ရှိဟယ်။ သူနာမယ်ဟာ ဟေလသစကားန ဆိုဟာ
“ဒေါကာ” ဖြစ်ဘီး “သမင်” ဆိုဘီး ဓိပါယ်ရဟယ်။ သူဟာ
မြဲဒမ်း ကောန်းဇာဟို့ လောက်ဘီး ဆင်းရဲသားလေဟို့ ကူ
ညီဟယ်။

37 အယ်ခီမာ သူဟာ ဖျားဘီး သေဟူးလေဟယ်။ သူ့ လောန်းဟို့ ရေချိုးပေးဂေဘီးဟာ အီထတ်ခန်းမာ ထား ဟူးဂေဟယ်။

38 လုဒဒမြို့န ယုပပေမြို့ဟာ ရရာတိုင်း ဝီးဘဲကြော န် လုဒဒမြို့မာ ပေတရုရိုနေဇာဟို့ တမဲ့တော်လေကြား ဟူ ခီမာ “ကျွန်တော့်ဟူးလေနားဟို့ မြန်းမြန်ဟူးလာပါ” ဆိုဘီး လူနွေယော့-က်ဟို့ ပေတရုရိုနားဟို့ လွတ်လိုက်ဘီး တောင်းဗန်ဂေဟယ်။

39 အယ်ကြောန် ပေတရုဟာ အယ်လူနွေယော့-က်န လို က်ဟူးဟယ်။ သူရော့-က်ဟူ ခီမာ လူလေဟာ သူ့ဟို့ အီ ထတ်ခန်းဟို့ ခေါ်ဟူးဂေဟယ်။ မောက်ဆိုးမလေဟာ ပေ တရုနားမာ လာငိုဘီးဟာ ဒေါကာသေခန်ဒူးဟု ချောက် ဟူးဟူ အန်းဂီလေန ဝတ်ရောင်လေဟို့ ပြဂေဟယ်။

40 ပေတရုဟာ အယ်လူလေဟို့ ခန်းပုလန်ဟို့ ထွပ်ခိုင်း ဘီးဟာ ဒူးထော့-က် ဆုတောင်းလိုက်ဟယ်။ အယ်ဘီးန လောန်းဖတ်ဟို့ လှည့်ဘီးဟာ “တမံသ ထလိုက်” ဆိုဘီး ပြောလိုက်ဟယ်။ ဒေါကာဟာ မျစ်စိပွမ့်ဘီးန ပေတရုဟို့ မြင်ဟူ ခီမာ ထထိုင်လိုက်ဟယ်။

41 ပေတရုဟာ လတ်ဟို့ ကမ်းပေးဘီးန အယ်မီးမဟို့ ဆွဲ ထူလိုက်ဟယ်။ အယ်ဘီးန သန်ရှင်းသူလေန မောက်ဆိုးမ လေဟို့ ခေါ်ဘီးဟာ သတ်ရှင်နေဟူ ဒေါကာဟို့ ပေးလိုက် ဟယ်။

42 အယ်ဒန်းဟို့ ယုပပေမြို့ တမြို့လောင်း ကြားရဟူ ခီ

မာ လူလေဘောင်ဂီးဟု သခင်ဘုရားဟို့ ယောင်ကြည်ဂေဟယ်။

⁴³ ပေတရူဟာ ယုပုပေမြို့မာနေဟူ၊ ရှိမုန် နာမယ်ရှိဟူ သရေလောက်မားန ခိကြာဂီးနေလေဟယ်။

10

ပေတရူန ကော်နေလိကြောင်း

¹ ကဲသရိမြို့မာ ကော်နေလိ နာမယ်ရှိဟူ လူတယော့-က် ရှိဟယ်။ သူဟာ “ဣတလိတပ်” ခေါ်ဟူတပ်ဟု တပ်မှူးတယော့-က်ဖြစ်ဟယ်။

² သူဟာ ဘာသာရေးသမား တယော့-က်ဖြစ်ဘီး သူန သူမိသားတစုလောင်းဟာ ဘုရားသခင်ဟို့ ကိုးကွယ်ဂေဟယ်။ သူဟာ ဆင်းရဲဟူ ယုဒလူမျိုးလေဟို့ ရစ်ရစ်ရောရော ဟား လှူတတ်ဟယ်။ သူဟာ ဘုရားသခင်ဟို့ ခိမုန်မုန် ဆုတောင်းဟယ်။

³ နေဒန် သောင်းနာရီလော့-က်မာ ဘုရားသခင်ရဲ့ ကောန်းဂန်တမန်တပါးဟာ သူနားဟို့ လာဘီးဟာ “ကော်နေလိ” ဆိုဘီး ခေါ်လိုက်ဇာဟို့ ရှုပါရောင်ထဲမာ ထန်းထန်ရှားရှား ဟား ဗြင်ရဟယ်။

⁴ သူဟာ ကြော့-က်ကြော့-က်န အယ်ကောန်းဂန်တမန်ဟို့ စိုက်ကော့ဘီးန “သခင်၊ ဖြားကိစရှိနူး” ဆိုဘီး မေးလိုက်ဟယ်။

အယ်ကောန်းဂန်တမန်ဟု “နန့်ဆုတောင်းသံန စွန့်ကြဲပေးကမ်းဇာလေဟို့ ဘုရားသခင်ဟု နှစ်သက်လေဟယ်။

⁵ ခု ယုပုပေမြို့ဟို့ လူလေဟို့ လွတ်ဘီးဟာ ပေတရု နာမယ်ရှိဟူ ရှိမုန်ဟို့ သွားခေါ်လာ။

⁶ သူဟာ သရေလောက်မား ရှိမုန်အီမာ ရှိနေဟယ်။ အယ်အီဟု ပန်လယ်ကမ်းနားမာရှိဟယ်” ဆိုဘီး ပြောဟယ်။

⁷ အယ်ကောန်းဂန်တမန်ဟာ ထွပ်ဟားဟူ ခီမာ ကော်နေလိဟာ သူ့ရဲ့ စေခံနွေယော့-က်န ဘုရားတရားကိုင်းရှိုင်းဟူ စစ်သားတယော့-က်ဟို့လည်း ခေါ်လေဟယ်။

⁸ သူဟာ သူးနို့ဟို့ ကြောန်းရာလေဟို့ ပြောပြဘီးဟာ ယုပုပေမြို့ဟို့ လွတ်လိုက်ဟယ်။

⁹ နော့-က်တနေမာ အယ်လူလေဟာ ခရီးသွားဂေ့ဘီး န ယုပုပေမြို့နားဟို့ ရော့-က်ဟားဂေ့ဟယ်။ မွန်းဒဲခီမာ ပေတရုဟာ ဆုတောင်းဟို့တွပ် အီးခေါန်မိုးထတ်ဟို့ တတ်ဟားဟယ်။

¹⁰ သူဟာ ရရာတိုင်း မိုက်ဆာလာဘီး တခုခုစားရှင်လာဟယ်။ စားဇာလေဟို့ ပြင်ဆင်နေဒူးမာ သူဟာ ရူပါရောင်ဟို့ မြင်ရလေဟယ်။

¹¹ သူဟာ ကောန်းဂန် ပွမ့်ဟားဘီးဟာ ဒေါ့-က်လေး ဒေါ့-က်န ချောက်ဟားဟူ ပိစဂီးတခုန တူဟူဇာဟာ မှလေဂီးထတ်ဟို့ နိကုလလာဇာဟို့ မြင်ရဟယ်။

¹² အယ်မူဇာထဲမာ မှလေဂီးထတ်မာရှိဟူ ခေလေးရှောန်းလိဆန်လေ၊ တွားဘီးသွားဟူ လိဆန်လေန ကောန်းဂန်ဟု ငှတ်လေပါဟယ်။

13 အယ်ဘီးန “ပေတရု၊ ထဘီး သတ်စားလိုက်” ဆိုဘီး ငါ့ဟို့ ပြောဟူသံဟို့လည်း ငါကြားရဟယ်။

14 ပေတရုဟု “သခင်၊ ဖယ်မျိုးလည်း ဖြစ်နိုင်ဟု၊ ဖြားဖြစ်ကြောနဲ့နဲ့ဆိုဟု၊ ကျွန်တော်ဟု၊ ညစ်ညူးဇာန သန်ရှင်းဘဲဟူဇာဟို့ ဖယ်ဒူးဟုလည်း စားဖူးဟု” ဆိုဘီး လျှော့-က်လိုက်ဟယ်။

15 သံတော်ဟု “ဘုရားသခင်ဟု သန်ရှင်းဟယ် ဆိုဇာဟို့ ညစ်ညူးဟယ် ဆိုဘီး ပြောန” ဆိုဘီး ဒုတိယခါ မိန့်တော် မူလေဟယ်။

16 အယ်မျိုး သောင်းခါဖြစ်ဘီးန ရှစ်ရှင်းဘဲ အယ်ပိစဟို့ ကောန်းဂန်ထံဟို့ ပုလန်ဘီးဟု ဆွဲဒန်လိုက်ဟယ်။

17 ပေတရုဟု အယ်ရူပါရောင်ရဲ့ ဓိပါယ်ဟို့ စဉ်းစားနေ ဒူးမာ ကော်နေလိ လွတ်လိုက်ဟူ လူလေဟု ရှိမုန်ရဲ့ အီဟို့ ရှာတို့ဟူးဘီး အီခွဗော့-က်ရှေ့မာ ရပ်နေဂေဟယ်။

18 အယ်လူလေဟု “ပေတရုနာမယ်ရှိဟူ ရှိမုန်ဟု အယ် အီမာရှိလော” ဆိုဘီး အော်ဘီးဟု မေးဂေဟယ်။

19 ပေတရုဟု ရူပါရောင်ကြောန်းဟို့ စဉ်းစားနေဒူးမာ ဝိညာဉ်တော်ဟု “လူသောင်းယော့-က်*ဟု နန်းဟို့ ရှာနေ ဂေဟယ်။

20 သူးနို့လေဟို့ ငါဘဲ လွတ်လိုက်ဟူကြောနဲ့ ထဘီးဆင်းဟူးလိုက်။ သံသယမေ့ဘဲန သူးနို့န လိုက်ဟူးလိုက်”

* 10:19 ၁၀.၁၉ သောင်းယော့-က်၊ တချို့ မူရင်းလတ်ရေးမူလေမာ တချို့၊ ဆိုဘီး ပါရှိဟယ်။ မူရင်းလတ်ရေးမူတခုမာ နေ့ယော့-က်၊ ဆိုဘီး ပါရှိဟယ်။

ဆိုဘီး ပြောဟယ်။

21 ပေတရုဟာ အယ်လူလေနားဟို့ ဆင်းဟွားဘီးဟာ “နန်းနို့ ရှာနေဟူလူဟာ ငါဘဲဖြစ်ဟယ်။ ဖြားဖြစ်ကြောန့် နန်းနို့ ရော့-က်လာဂေ့နူး” ဆိုဘီး မေးဟယ်။

22 အယ်လူလေဟ “ဖြောန့်မတ်ဘီး ဘုရားသခင်ဟို့ ကြော့-က်ဟူ၊ ယုဒလူမျိုးလေရဲ့ ချီးကျူးဘီး လေးစားခံ ရဟူ တပ်မှူးကော်နေလိဟာ လွတ်လိုက်ဟယ်။ သင့်ဟို့ ဖိ ခေါ်ဘီး သင့်ရဲ့စကားဟို့ နားထောန်ရမယ် ဆိုဘီး သန်ရှင် ဟူ ကောန်းဂန်တမန်တပါးရဲ့ စကားတော်ဟို့ လတ်ခံရ ရှိဟယ်” ဆိုဘီး ပုလန်ဖြေဂေ့ဟယ်။

23 ပေတရုဟာ အယ်လူလေဟို့ အီထဲဟို့ ခေါ်ဖိဘီးဟာ တည်းခိုစေလေဟယ်။

နတ်ကီးတိုင်န သူဟာ အယ်လူလေန တူးဒ ထွပ်ဟွားဘီး ဟာ ယုပုပေမြို့ဟာ ယောင်ကြည်သူ ညီကိုတချို့လည်း သူ နတူးဒ လိုက်ဟွားဂေ့ဟယ်။

24 နော့-က်နေမာ ပေတရုဟာ ကဲသရိမြို့ဟို့ ရော့-က် ဟွားဟယ်။ အယ်မြို့မာ ကော်နေလိဟာ သူခေါ်ဖိဟွားဟူ ဆွေမျိုးလေန ရင်းနှီးဟူ မိဆွေလေန တူးဒ သူဟို့စောန်နေ ဂေ့ဟယ်။

25 ပေတရု ဝမ်လာဟူ ခီမာ ကော်နေလိဟာ ကြိုဆိုဘီး ဟာ သူရဲ့ ခေရင်းမာ ပျပ်ဝပ်လိုက်ဟယ်။

26 ပေတရုဟာ သူဟို့ ဆွဲဒန်ဘီး “ထဒန်၊ ငါကိုယ်တိုင် လည်း လူဘဲဖြစ်ဟယ်” ဆိုဘီး ကော်နေလိဟို့ ပြောလိုက်

ဟုယ်။

²⁷ ပေတရုဟာ ကော်နေလိန စကားပြောရင်း အိထဲဟို့ ဝမ်ဟူးဟူ ခီမာ လူလေဘောင်ဂီး စုနေဇာဟို့ တို့လေဟုယ်။

²⁸ အယ် လူလေဟို့ ပေတရုဟ “ယုဒလူလေဟာ လူမျိုးခြားလေန ပေါန်းဖော်ဟို့န သူးနိနားဟို့ အီးဒုလယ် သွားဟို့တွပ် ဘာသာတရားဟု ခွမ်ပြုဟု ဆိုဇာဟို့ နန်းနိ ကိုယ်တိုင်လည်း ကောင်းကောင်း သိဂေဟုယ်။ အယ်ဘေ မဲ့ ဖယ်လူဟို့မျှ ညစ်ညူးဟူလူ၊ စင်ကြယ်ဘဲဟူလူ ဆိုဘီး ခေါ်ဘဲနေဟို့တွပ် ဘုရားသခင်ဟာ ငါ့ဟို့ ဖော်ပြတော်မူဟုယ်။

²⁹ အယ်ကြောန့် ငါ့ဟို့ နန်းနိ ခေါ်ဖီဟူ ခီမာ ငါဟာ ငြင်း ဆိုဘဲန လိုက်လာဟုယ်။ ဖြားဖြစ်ကြောန့် ငါ့ဟို့ ခေါ်ဖီရနူး” ဆိုဘီး မေးလေဟုယ်။

³⁰ ကော်နေလိဟ “ပီးဟူးဟူ သောင်းရစ်လော့-က်ဒူး ဟု နေဒန်သောင်းနာရီမာ ကျွန်တော်ဟာ အီမာ ဆုတောင်း နေဟုယ်။† အယ်ခီမာ တော့-က်ပြောန်နေဟူဝတ်န လူတယော့-က်ဟာ ကျွန်တော့်ရှေ့မာ ရော့-က်တရစ်ရပ်ဘီး

³¹ ‘ကော်နေလိ၊ နန့်ဆုတောင်းသံဟို့ ဘုရားသခင်ဟု ကြားဟုယ်။ နန့် စွန့်ကြဲပေးကမ်းဟူ ဇာလေဟို့လည်း သိဟုယ်။

³² အယ်ကြောန့် ယုပုပေမြို့ဟို့ လူလွတ်ဘီးဟာ ပေ

† 10:30 ၁၀.၃၀ ဆုတောင်းနေဟုယ်၊ တချို့ မူရင်းလတ်ရေးမူလမာ စာရှောင်ဘီး ဆုတောင်းနေဟုယ်၊ ဆိုဘီး ပါရှိဟုယ်။

တရု နာမယ်ရှိဟူ ရှိမုန်ဟို့ ခေါ်ဖိလိုက်။ သူဟာ ပန်လယ် ကမ်းနားမာရှိဟူ သရေလောက်မား ရှိမုန်အီမာ ရှိနေဟယ်’ ဆိုဘီး ပြောဟယ်။

³³ အယ်ကြောန့် ကျွန်တော်ဟာ ရှစ်ရှင်းဘဲ သင့်နား ဟို့ လူလွတ်လိုက်ဟယ်။ သင်ကြွလာဇာတွပ် ကျေးဇူးတ န်ဟယ်။ သင့်ဟို့ သခင်ဘုရား ပြောဟားဟူ စကားလေ ဟို့ ကြားရဟို့တွပ် ကျွန်တော့်လေဟာ ဘုရားသခင်ရှေ့မာ ဆင်သင့်ဖြစ်နေဂေဟယ်” ဆိုဘီး ပြောဟယ်။

ပေတရုရဲ့ ဟောပြောဇာကြောန်း

³⁴ အယ်ဘီးန ပေတရုဟ “ဘုရားသခင်ဟာ မှန်တိုင်းဘဲ မျစ်နာလိုက်ဟု ဆိုဇာဟို့ ခု ငါဟာ နားလည်ဟားဘီ။

³⁵ ဘုရားသခင်ဟို့ ကြော့-က်ဘီး ပြောန့်မတ်ဟူ လူမျိုး တိုင်းဟို့ဘဲ လတ်ခံဟယ်။

³⁶ ဘုရားသခင်ဟာ ဂူလောင်းရဲ့ သခင်ဖြစ်ဟူ ယေရှု ခရစ်တော်အားဖြင့် ငြိသတ်ဇာနဆိုင်ဟူ ဒန်းကောန်းဟို့ ကူ သရေလလူမျိုးလေဟို့ ဟောဟို့တွပ် စေလွှတ်လိုက်ဟယ် ဆိုဇာဟို့ နန်းနို့ သိဂေဟယ်။

³⁷ ဗတုတိဇံတရားဟို့ ယောဟန်ဟောပြောဘီးန ဂါလိ လဲပြည်ဟုနေ စဘီးဟာ ယုဒပြည် တရှော့-က်လောင်းမာ ကီးမားဟူ ဖြစ်ပျစ်ဟို့ နန်းနို့ သိဂေဟယ်။

³⁸ ဘုရားသခင်ဟာ နာဇရက်မြို့သား ယေရှုဟို့ သန့် ရှင်းဟူဝိညာဉ်တော်န တဂိုးတော်လေ ကိုယ်တော်ထတ် ဟို့ ဖယ်မျိုးလောင်းခလဟားဟယ် ဆိုဇာဟို့ နန်းနို့ သိ

ဂေဟယ်။ ဘုရားသခင်ဟာ ကိုယ်တော်နတူးဒူ ရှိဟူကြော
နဲ့ ကိုယ်တော်ဟာ နေရာတိုင်းဟို့ သွားဘီးဟာ ကောန်းဇာ
လေ လောက်ဆောန်ဘီး မာရ်နတ်ရဲ့ တဂိုးအော့-က်မာရှိ
ဟူ လူလေ ဂူလောင်းဟို့ ကျန်းမာစေဟယ်။

39 နို့လေဟာ ယေရုရှလင်မြို့န ယုဒပြည်မာ ကိုယ်တော်
လောက်ဟူဇာ ဂူလောင်းရဲ့ သတ်သေလေဖြစ်ဂေဟယ်။
အယ်ဘီးန လူလေဟာ ကိုယ်တော်ဟို့ လတ်ဝါးကပ်တိုင်
မာ ခိဆွဲဘီး သတ်လိုက်ဂေဟယ်။

40 အယ်ဘေမဲ့ သောင်းရစ်ကြာဘီးန ဘုရားသခင်ဟာ
ကိုယ်တော်ဟို့ သေရာဟုနေ ထမြော့-က်စေဘီးဟာ ကိုယ်
ထန်ရှားပြဟယ်။

41 အယ်ဘေမဲ့ လူတိုင်းဟာ ကိုယ်တော်ဟို့ မြင်ရဂေ
ဇာ မူဟု။ သိသတ်သေလေဖြစ်န ဘုရားသခင်ဟု ကြိုတန်
ဘီး ဝီးကော့-က်ဟားဟူ၊ သေရာဟုနေ ထမြော့-က်ဘီးန
ကိုယ်တော်နတူးဒူ စားသောက်ဂေဟူ နို့လေမျှဘဲ မြင်ရဂေ
ဟယ်။

42 ကိုယ်တော်ဟု လူလေဟို့ ဒန်းကောန်း ဟောပြောဟို့
တွပ်န ကိုယ်တော်ဟာ သတ်ရှင်နေဟူလူလေန သေဟား
ဟူလူလေဟို့ တရားစီရင်ဟူ သခင်ဖြစ် ဘုရားသခင်ခန့်
ဟားဟယ် ဆိုဇာဟို့ သတ်သေခံဟို့တွပ် နို့လေဟို့ မိန့်မှာ
ဟားဟယ်။

43 ကိုယ်တော်ဟို့ ယောင်ကြည်ဟူ လူတိုင်းဟာ
ကိုယ်တော်ရဲ့ နာမတော်အားဖြင့် ပြစ်လွှတ်ခံရလေမယ် ဆို

ဘီး ကိုယ်တော်ကြောန်းဟို့ ပရောဖက်လေဟု သတ်သေခံ
ဟူးဟယ်” ဆိုဘီး ပြောလေဟယ်။

လူမျိုးခြားလေဟာ သန်ရှင်းဟူဝိညာဉ်တော်ဟို့ လတ်
ခံဟူကြောန်း

⁴⁴ အယ်စကားဟို့ ပေတရုဟု ပြောနေဒူးမာ သန်ရှင်းဟူ
ဝိညာဉ်တော်ဟာ တရားစကားဟို့ နားထောန်နေဂေဟူ လူ
လေထတ်ဟို့ ဆင်းလာဟယ်။

⁴⁵ ပေတရုနတူးဒူး လိုက်လာဟူ ရေဖျားလှီးဟူးဟူ
ယောင်ကြည်သူ ယုဒလူမျိုးလေဟာ သန်ရှင်းဟူဝိညာဉ်
တော်ရဲ့ လတ်ဆောန်ဟို့ လူမျိုးခြားလေထတ်ဟို့လည်း
သွန်းလောင်းဟူကြောန် ရရာတိုင်း အံ့ဩဂေဟယ်။

⁴⁶ ဖြားဖြစ်ကြောန်နူးဆိုဟာ လူမျိုးခြားလေဟာ ထူးဆ
န်းဟူ ဘာသာစကားလေဟို့ ပြောနေဂေဇာန ဘုရားသခင်
ရဲ့ ဂေါင်တော်ဟို့ ချီးမွမ်းဂေဇာဟို့ ကြားရဂေဟယ်။ အယ်
ကြောန် ပေတရုဟု၊

⁴⁷ “အယ်လူလေဟာ နို့လေမျိုးဘဲ သန်ရှင်းဟူဝိညာဉ်
တော်ဟို့ ခံရဂေဟယ်။ အယ်ကြောန် သူးနို့ဟို့ ရေနဗတုတိ
ဇံဟို့ ခံယူဘနေအောန် ဖယ်လူဟု တားနိုင်ဟို့နူး” ဆိုဘီး
ပြောဟယ်။

⁴⁸ အယ်ကြောန် ပေတရုဟာ သူးနို့ဟို့ ယေရှုခရစ်တော်
ရဲ့ နာမတော်မာ ဗတုတိဇံခံဟို့တွပ် မိန့်ပေးလိုက်ဟယ်။
အယ်ဘီးန ပေတရုဟို့ သူးနို့လေနတူးဒူး ရစ်နဲနဲဟို့တွပ်
တောင်းလျှော့-က်ဂေဟယ်။

11

ယေရုရှလင်မြို့ဟု သင်းတော်ဟို့ ပေတရုရဲ့ စီရင်ခံစာ
ကြောန်း

¹ လူမျိုးခြားလေဟု ဘုရားသခင်ရဲ့ စကားတော်ဟို့
လတ်ခံရရှိဂေဟယ် ဆိုဇာဟို့ ယုဒပြည် နေရာနဲ့မာ ရှိနေ
ဟူ တမန်တော်လေန ယောင်ကြည်သူ ညီကိုလေဟု ကြား
ရဂေဟယ်။

² ယေရုရှလင်မြို့ဟို့ ပေတရု ရော့-က်ဟူ ခီမာ ရေဖျား
လီးဟူးဟူ ယောင်ကြည်သူ ညီကိုလေဟု သံသယဖြစ်ဟူ
ကြောန်း

³ “နန်ဟာ ရေဖျားလီးဘဲဟူ လူမျိုးခြားလေရဲ့ အီဟို့ ဝမ်
ဘီးဟာ သူးနို့န တူးဒု စားသော့-က်နေမား” ဆိုဘီး သူဟို့
ပြောဂေဟယ်။

⁴ အယ်ကြောန့် ပေတရုဟာ ကြောန်းရာတခုလောင်းဟို့
စဟုနေဆောင်းထိ ပြောပြလိုက်ဟယ်။

⁵ ပေတရုဟု “ငါဟာ ယုပုပေမြို့မာ ဆုတောင်းနေဒူးမာ
ရှုပါရောင်ဟို့ မြင်ရဟယ်။ ဒေါ့-က်လေးဒေါ့-က်န ချော
က်ဟူးဟူ ပီစဂီးတခုန တူဟူဇာဟာ ကောင်းဂန်ဟုနေ နိ
ကုလလာဘီး ငါနားဟို့ ရော့-က်လာဇာဟို့လည်း ငါမြင်ဟု
ယ်။

⁶ ငါဟာ အယ်မူဇာထဲဟို့ သေးသေချားချာဟူး ကေလို
က်ဟူ ခီမာ ခေလေးရှောန်းလိဆန်လေ၊ မုလေဂီးမာနေဟူ

သားရဲလေ၊ တွားဘီးသွားဟူ လိဆန်လေန ကောင်းဂန်ဟု
ငှတ်လေဟို ဖြင်ရဟယ်။

⁷ အယ်ဘီးန ‘ပေတရ၊ ထဘီး သတ်စားလိုက်’ ဆိုဘီး
ငါ့ဟို ပြောဟူသံဟို ငါကြားရဟယ်။

⁸ အယ်ဘေမဲ့ ငါဟု ‘သခင်၊ ဖယ်မျိုးလည်း ဖြစ်နိုင်ဟူ။
ကျွန်တော်ဟာ ညစ်ညူးဇာန သန်ရှင်းဘဲဟူဇာဟို ဖယ်ဒူး
ဟုလည်း စားဖူးဟု’ ဆိုဘီး ပုလန်လျှော့-က်လိုက်ဟယ်။

⁹ ကောင်းဂန်ဟုနေ သံတော်ဟု ‘ဘုရားသခင်ဟု သန်ရှ
င်းဟယ် ဆိုဇာဟို ညစ်ညူးဟယ် ဆိုဘီး ပြောန’ ဆိုဘီး
ဒုတိယခါ မိန့်တော်မူဟယ်။

¹⁰ အယ်မျိုး သောင်းခါဖြစ်ဘီးန အယ်ဇာတခုလောင်း
ဟို ကောင်းဂန်ထဲဟို ပုလန်ဘီး ဆွဲဒန်လိုက်ဟယ်။

¹¹ ရှစ်ဟူးကြာဘီးန ကဲသရီမြို့ဟုနေဘီး ငါ့နားဟို
လွှတ်လိုက်ဟူ လူသောင်းယော့-က်ဟု ငါတည်းနေဟူ* အီ
ဟို ရော့-က်လာဟယ်။

¹² ဝိညာဉ်တော်ဟု သံသယမေ့ဘဲန အယ်လူလေန တူး
ဒူ လိုက်ဟူးဟို့တွပ် ငါ့ဟို ပြောဟယ်။ ယုပုပေမြို့ဟု ညီ
ကိုခြော့-က်ယော့-က်လည်း ငါ့နတူးဒူ လိုက်ဂေ့ဟယ်။ နို့
လေဂူလောင်းဟာ ကော်နေလိရဲ့ အီထဲဟို ဝမ်ဂေ့ဟယ်။

¹³ ကော်နေလိဟု သူ့အီမာ ကောင်းဂန်တမန်တပါးဟု
ရပ်ဘီးဟာ ‘ပေတရ နာမယ်ရှိဟူ ရှိမန်ဟို ခေါ်ဟို့တွပ် ယု
ပုပေမြို့ဟို ယော့-က်ယော့-က်ဟို လွှတ်လိုက်။

* **11:11 သ.သ** ငါတည်းနေဟူ၊ တချို့ မူရင်းလတ်ရေးမူလမာ
နို့လေတည်းနေဟူ၊ ဆိုဘီး ပါရှိဟယ်။

14 အယ်လူဟာ နန့်န နန့်မိသားစု ဂူလောင်းဟို့ ကယ်တန် ခံရမယ့် တရားစကားဟို့ ပြောလေ့မယ်’ ဆိုဘီး နို့လေဟို့ ပြောဟယ်။

15 အယ်ဘီးန ငါဟာ စဘီးပြောဟူ ခီမာ သန့်ရှင်းဟူ ဝိညာဉ်တော်ဟာ ရင်းရင်ဒူးဟု နို့လေထတ်ဟို့ ဆင်းလာ မျိုးဘွဲ့ အယ်လူလေထတ်ဟို့လည်း ဆင်းလာဟယ်။

16 အယ်ခီမာ ‘ယောဟန်ဟာ ရေန ဗတုတံဇိပေးဟယ်။ အယ်ဘေမဲ့ နန့်နို့ဟာ သန့်ရှင်းဟူဝိညာဉ်တော်န ဗတုတံ ဇိခံရဂေလေ့မယ်’ ဆိုဘီး သခင်ဘုရား မိန့်တော်မူဟူးဇာ ဟို့ ငါဟာ ပုလန်ဒီရဟူးဟယ်။

17 ဘုရားသခင်ဟာ သခင်ယေရှုခရစ်တော်ဟို့ ယောင် ကြည်ဟူ နို့လေဟို့ ပေးဟူမျိုးဘွဲ့ အယ်လူမျိုးခြားလေဟို့ လည်း တူညီဟူ လတ်ဆောန်ဟို့ ပေးဟယ် ဆိုဇာ ထန်ရှား နေဟယ်။ အယ်ဆိုဟာ ငါဟာ ဖယ်မျိုးလူ ဖြစ်ဟူကြောန် ဘုရားသခင်ဟို့ တားနိုင်ဟို့နူး!” ဆိုဘီး ပြောဟယ်။

18 အယ်စကားဟို့ ကြားရဟူ ခီမာ အယ်လူလေဟာ ပြစ် တန်ဂေဟမ်း။ အယ်ဘီးန ဘုရားသခင်ဟို့ ချီးမွမ်းဂေဘီး “အယ်ဆိုဟာ ဘုရားသခင်ဟာ သတ်ရှင်ဟို့တွပ် ပို့ဆောန် ဟူ နောန်ဒတရားဟို့ လူမျိုးခြားလေဟို့လည်း ပေးတော်မူ ဘိ။”

အနုတိအုတ်မြို့ဟု သင်းတော်ကြောန်

19 ယောင်ကြည်သူလေဟာ သတေဖန်သတ်ခံရဟူ ခီမာ ဖြစ်လာဟူ ညဉ်းဆဲမှုကြောန့် နေရာတိုင်းဟို့ ကွဲဟွားဂေ့ဟယ်။ တချို့ လူလေဟာ ဖိနိတ်ပြည်၊ ကုပရုကျွန်း၊ အနုတိအုတ်မြို့ထိ ရော့-က်ဟွားဂေ့ဟယ်။ သူးနို့ဟာ ဘုရားသခင်ရဲ့ စကားတော်ဟို့ ယုဒလူမျိုးလေဟို့ဘွဲ ဟောပြောဂေ့ဟယ်။

20 သူးနို့ထဲမာ ကုပရုကျွန်းန ကုရေနေနယ်ဟု ယောင်ကြည်သူလေ တချို့ပါဟယ်။ သူးနို့ဟာ အနုတိအုတ်မြို့ဟို့ သွားဘီးဟာ လူမျိုးခြားလေ[†]ဟို့ သခင်ယေရှုရဲ့ ကြောန့်ဖြစ်ဟူ ဒန်းကောန်းဟို့ ဟောပြောဂေ့ဟယ်။

21 သူးနို့ဟာ သခင်ဘုရားရဲ့ တဂိုးတော်ဟို့ ခံရဂေ့ကြောန့် လူလေဘောင်ဂီးဟု ယောင်ကြည်ဘီးဟာ သခင်ဘုရားဖတ်ဟို့ ပုလောန်းလဲလာဂေ့ဟယ်။

22 အယ်ဒန်းဟို့ ယေရုရှလင်မြို့မာရှိဟူ သင်းတော်ဟု ကြားရဟူ ခီမာ ဗာနဗဟို့ အနုတိအုတ်မြို့ဟို့ လွတ်လိုက်ဟယ်။

23 သူဟာ အယ်မြို့ဟို့ ရော့-က်ဟူ ခီမာ လူလေဟာ ဘုရားသခင်ရဲ့ ကျေးဇူးတော်ဟို့ မြင်ရဟူ ခီမာ ရရာတိုင်း ဝန်းသာဘီးဟာ သခင်ဘုရားဟို့ စိန်လောင်းကြွင်းမဲ့ ယောင်ကြည်ဘီး သစ်စာစောန့်ဂေ့ဟို့တွပ် တိုက်တွန်းလေဟယ်။

11:19 ၁၁.၁၉ တ ၈.၁-၄ † 11:20 ၁၁.၂၀ လူမျိုးခြားလေ၊ တချို့ မူရင်းလတ်ရေးမူလေမာ ဟေလသစကားပြောဟူ ယုဒလူမျိုး၊ အယ်မျိုးမှဘွဲနေဟာ ဟေလသစကားပြောဟူ လူလေ၊ ဆိုဘီး ပါရှိဟယ်။

24 ဗာနဗဟာ သူတော်ကောင်းဖြစ်ဘီး သန့်ရှင်းဟူ
ဝိညာဉ်တော်နရော၊ ယောင်ကြည်ရှင်းနရော ပုလဲဝနေဟု
ယ်။ အယ်ကြောန့် လူလေဘောင်ဂီးဟာ သခင်ဘုရားဖတ်
ဟို့ ပုလောန်းလဲလာဂေဟယ်။

25 အယ်ဘီးန ဗာနဗဟာ ရှောလုဟို့ ရှာဟို့တွပ် တာရှုမြို့
ဟို့ သွားလိုက်ဟယ်။

26 သူဟို့ တို့ဟူ ခီမာ အနုတိအုတ်မြို့ဟို့ ခေါ်လာဟယ်။
သူနို့ နှေ့ယော့-က်ဟာ တနှစ်လောင်းလောင်း သင်းတော်
မာ စုဝေးဂေဘီးဟာ လူလေဟို့ သွန်သန်ဟယ်။ တမဲ့တော်
လေဟာ ပထမဦးဆောင်း ခရစ်ယာန် ဆိုဘီး ခေါ်ခဲရဟူနေ
ရာဟာ အနုတိအုတ်မြို့မာ ဖြစ်ဟယ်။

27 အယ်ခီမာ ပရောဖက်တချို့ဟာ ယေရုရှလင်မြို့ဟု
နေ အနုတိအုတ်မြို့ဟို့ လာဂေဟယ်။

28 အယ်လူလေထဲဟု အာဂဗု နာမယ်ရှိဟူ လူတ
ယော့-က်ဟာ ထဘီးဟာ တကမ္ဘာလောင်းမာ ငတ်မွတ်
ခေါန်းပါးဘေး ရှော့-က်လာလေ့မယ် ဆိုဘီး ဝိညာဉ်တော်
အားဖြင့် ကြိုတန်ဘီး ဟောပြောလေဟယ်။ အယ်မူဇာဟာ
မန်းဂီး ကလောဒီ လတ်ထတ်မာ ငတ်မွတ်ခေါန်းပါးဘေး
ကုလရှော့-က်လာဟယ်။

29 တမဲ့တော်လေဟာ သူနို့ တတ်နိုင်မျှတိုင်းဘဲ ယုဒ
ပြည်မာရှိနေဟူ ညီကို မောန်နှမလေဟို့ ကူညီဟို့တွပ်
ဆောင်းဖြတ်ဂေဟယ်။

³⁰ အယ်မျိုး ဆောင်းဖြတ်ဂေဘီးန ကပ်လေဟို ဗာနဗ
န ရှောလုလေအားဖြင့် ယေရုရှလင်မြို့မရှိဟူ သင်းတော်
လူဂီးလေနားဟို ပို့ပေးဂေဟယ်။

12

ညဉ်းဆဲဇာလေ ထပ်တိုးလာဟူကြောန်း

¹ အယ်ခီကာလမာ ဟေရုဒ်မန်းဂီး*ဟာ သင်းတော်ဝမ်
တချို့ဟို စဘီးဟာ ညဉ်းဆဲဟိုတွပ် ကြံစည်လေဟယ်။

² သူဟာ ယောဟန်ရဲ့ နောက် ယာကုပ်ဟို ထားန သတ်
လိုက်ဟယ်။

³ အယ်မူဇာဟို ယုဒလူမျိုးလေဟ နှစ်သက်ဂေဟယ်။
အယ်ကြောန့် သူဟာ ပေတရုဟိုလည်း ဖမ်းဟူးလေဟ
ယ်။ အယ်မူဇာဟာ တဆေးမွေဘွဲ့ဟူ မုပွဲတော်ခီမာ ဖြစ်
ဟူးဟယ်။

⁴ ဟေရုဒ်ဟာ ပေတရုဟို ဖမ်းဘီးန စစ်သားလေး
ယော-က်စီပါဟူ တပ်စုလေးစုရဲ့ လတ်ထဲဟို အပ်ဘီးဟာ
ကျဉ်းခုလဟူးဟယ်။ ပသခါပွဲပီးဟူးဘီးန သူဟို ယုဒ
လူမျိုးလေရဲ့ ရှေ့မာ စစ်ဆေးဘီးဟာ စီရင်ဟိုတွပ် ကြံစ
ည်ဟူးဟယ်။

⁵ အယ်ကြောန့် ပေတရုဟာ ထောန်ထဲမာ ကျဉ်းခုလခံရ
ဟယ်။ အယ်ခီမာ သင်းတော်ဟု သင်းသားလေဟာ ပေတ

* 12:1 ၁၂.၁ ဟေရုဒ်မန်းဂီး၊ ပါလတိုန (ပါလက်စတိုင်း) ရဲ့ ခေါင်းဆောင်
ပထမ ဟေရုဒ်အဂြိုဟန်းဂီး။

ရူတွပ် စိပါလတ်ပါန ဘုရားသခင်ဟို့ ဆုတောင်းနေဂေဟယ်။

ကျဉ်းထောန်ထဲဟုနေ ပေတရု လွတ်လာဟူကြောင်း

⁶ ဟေရုဒ်ဟာ ပေတရုဟို့ လူလေရှေဟို့ ခေါ်လာဘီး စစ်ဆေးဟူ နေ့ရော့-က်ခန် ညဉ့်ခန်းဇာမာ ပေတရုဟာ စစ်သားနေ့ယော့-က်ကြားမာ အိမ့်နေဟယ်။ သူဟို့ သံကြိုး နှေ့ပန်န ခယ်ဟူးဟယ်။ ထောန်ခွဗော့-က်ရှေ့မာလည်း စောန်တပ်သားလေဟာ စောန်နေဂေဟယ်။

⁷ ဘုရားသခင်ရဲ့ ကောင်းဂန်တမန်ဟာ ရော့-က်တရစ် ပေါ်လာဘီးဟာ ချောက်ခန်းထဲမာ လန်းဟူးလေဟယ်။ ကောင်းဂန်တမန်ဟာ သူရဲ့ခေါင်းဟို့ လောက်ဘီးဟာ “မြန်းမြန်ဟူးထလိုက်!” ဆိုဘီး နိုးဟယ်။ ရှစ်ရှင်းဘဲ ခယ်ဟူးဟူ သံကြိုးလေဟာ ပေတရုရဲ့ လတ်ဟုနေ ကလွတ်ဟူးလေဟယ်။

⁸ အယ်ဘီးန ကောင်းဂန်တမန်ဟ “နန်ရဲ့ ခါးဗတ်ဟို့ ပတ်ဘီးဟာ ခေနပ်ဟို့ စီးလိုက်” ဆိုဘီး ပြောလိုက်ဟယ်။ ပေတရုဟာ ပြောဟူတိုင်း လောက်လိုက်ဟယ်။ ကောင်းဂန်တမန်ဟ “ဝတ်လောင်ဟို့ ချောင်ဘီးဟာ ငါနတူးဒူလိုက်” ဆိုဘီး ပြောလိုက်ဟယ်။

⁹ ပေတရုဟာ ချောက်ခန်းဟုနေထွပ်ဘီး သူ့နော့-က်ဟို့ လိုက်ဟူးလေဟယ်။ သူဟာ ကောင်းဂန်တမန် လောက်ဟူဇာလေဟို့ မှန်ဖြစ်ဟယ် ဆိုဇာ သိဟယ်။ ရူပါရောင်ဟို့ မြင်နေဟယ် ဆိုဘီး ထန်နေဟယ်။

10 သူ့နှို့ဟာ စောင့်လေ့လှတော့ နေရာနေ့ ခုတို့ ကျော်ဘီးဟာ ထောင့်ထဲဟုထွပ်ဟူ သံခွဗော့-က်နားဟို ရော့-က်ဟားဂေ့ဟယ်။ အယ်ခွဗော့-က်ဟာ သူလိုလို ပွ မ်နေဟူကြောန် သူ့နှို့ ထွပ်ဟားဘီးဟာ လမ်းတိုင်းသွားလို က်ဂေ့ဟယ်။ အယ်ဘီးန ကောန်းဂန်တမန်ဟာ ပေတရုနား ဟုနေ ရော့-က်တရစ် ထွပ်ဟားလေဟယ်။

11 ပေတရုဟာ ပုလန်ဘီး ဒိရလာဟူ ခီမာ “သခင်ဘုရား ဟာ သူရဲ့ ကောန်းဂန်တမန်ဟို လွတ်ဘီးဟာ ငါ့ဟို ဟေရု ဒ်ရဲ့ လတ်ထဲဟုရော၊ ယုဒလူမျိုးလေရဲ့ လတ်ထဲဟို ငါ့ဟို ရော့-က်စေဘဲဟိုတွပ် မျှော်နေဟူဘေးဟုနေ ကယ်တန်ရှ င်းဟို ခု ငါစစ်မှန်သိဟားဘီ ဆိုဘီး ပြောဟယ်။”

12 အယ်မျိုးသိဟူ ခီမာ သူဟာ မာကု ဆိုဘီး ခေါ်ဟူ ယောဟန်ရဲ့ မိမိ မာရီအီဟို သွားဟယ်။ အယ်အီမာ လူလေ ဘောင်ဂီးဟု စုဘီးဟာ ဆုတောင်းနေဂေ့ဟယ်။

13 ပေတရုဟာ အီခွဗော့-က်ဟို ခေါ့-က်လိုက်ဟူ ခီမာ ရောဒေနာမယ်ရှိဟူ၊ စေခံ မီးမဂန်းဟားဟာ ခွဗော့-က်ဖွမ် ဟို လာဟယ်။

14 သူဟာ ပေတရုသံဟို မှတ်မိဟူကြောန် ရုရာတိုင်း ဝန်း သာဘီးဟာ ခွဗော့-က်ဟို ဖွမ်ဘဲန အီထဲဟို ပုလေးဟား ဘီး ပေတရု ပုလန်မာရော့-က်နေဟယ် ဆိုဘီး လူလေဟို ပြောဟယ်။

15 အယ်လူလေဟု “နန်ဟာ ရူးနေမား” ဆိုဘီး ပြော ဟယ်။ အယ်ဘေမဲ့ မီးမဂန်းဟားဟာ သူပြောနေဇာဟာ

မှန်းမှန်ကန်းကန် ဖြစ်နေဟူကြောင့် သေးသေချားချာဟွား ပြောဟူ ခီမာ သူးနို့ဟာ “ပေတရုရဲ့ ကောင်းဂန်တမန် ဖြစ် လေ့မယ်” ဆိုဘီး ပြောဂေဟယ်။

16 ပေတရုဟာ ခွဗော့-က်ဟို့ ဆစ်ဘီးဟာ ခေါ့-က်နေ ဟူ ခီမာ သူးနို့ဟာ ခွဗော့-က်ဟို့ ဖွမ်လိုက်ဂေဟူကြောင့် ပေတရုဟို့ မြင်ဟွားဘီး အံ့ဩဟွားဂေဟယ်။

17 ပေတရုဟာ တိတိဟွား နေဂေဟို့တွပ် လတ်နချစ်ပြ ဘီးဟာ သခင်ဘုရားဟာ သူဟို့ ထောန်ထဲဟု ဖယ်မျိုးခေါ် ထုလာဟယ် ဆိုဇာဟို့ ပြောပြဟယ်။ အယ်ဘီးန “အယ် ကြောန်းဟို့ ယာကုပ်န တခြားညီကို မောန်နှမ လေဟို့ လည်း ပြောပြဂေပါ” ဆိုဘီး တခြားနေရာဟို့ ထွပ်ဟွား လိုက်ဟယ်။

18 မိုးလန်းလာဟူ ခီမာ “ပေတရုဟု ဖယ်မာနူး” ဆိုဘီး စောန်တပ်သားလေဟာ ရရာတိုင်း ကြော့-က်နေဂေဟယ်။

19 ဟေရုဒ်မန်းဂီးဟာ ပေတရုဟို့ ရှာခိုင်းဟူ ခီမာ တွံဘဲ ကြော့နဲ့ စောန်တပ်သားလေဟို့ စစ်ဆေးဘီးန သေဒန်ပေး ဟို့တွပ် မိန့်ခွလလိုက်ဟယ်။

အယ်ဘီးန ဟေရုဒ်မန်းဂီးဟာ ယုဒပြည်ဟုနေ ထွပ်ဟွား ဘီးဟာ ကဲသရီမြို့ထဲမာ ရှစ်ဟွားနေနေဟယ်။

ဟေရုဒ်မန်းဂီး သေဟွားဟူကြောန်း

20 ဟေရုဒ်မန်းဂီးဟာ တုရုမြို့သားလေန ဇိဒုန်မြို့သား လေဟို့ ရရာတိုင်း ဒေါသထွပ်ဟူကြော့နဲ့ အယ်မြို့သား လေဟာ စည်းရောင်းဘီးဟာ မန်းဂီးနားဟို့ ရော့-က်လာ

ဂေဟုယ်။ နန်းတော်အောက် ဗလတုတုရဲ့ ကူညီဟို့ ယူ
 ဂေဘီး ဟေရုဒ်မန်းဂီးနားဟို့ ဝမ်ဘီးဟာ ငြိသတ်ဟို့တွပ်
 စကားကမ်းလှမ်းဂေဟုယ်။ ဖြားဖြစ်ကြောနဲ့ဆိုဟာ သူး
 နို့ပြည်ဟာ ဟေရုဒ်မန်းဂီးရဲ့ ပြည်ဟို့ မှီခိုစားသော-က်နေ
 ရဟုယ်။

21 ဟေရုဒ်ဟာ ချီးချစ်ဟွားဟူနေမာ မန်းဂီးအန်းဂီလေ
 ဟို့ ဝတ်ဘီးဟာ ရာဇပလ္လင်ထတ်မာ ထိုင်ဘီးဟာ လူလေ
 ဟို့ မိန့်ခွန်းပြောဟုယ်။

22 အယ်လူလေဟု “အယ်သံဟာ လူရဲ့သံ မူဟု။
 ဘုရားသခင်ရဲ့ သံတော်ဖြစ်ဟုယ်” ဆိုဘီး ကြွေးကြော်ဂေ
 ဟုယ်။

23 အယ်ခီမာ မန်းဂီးဟာ ဘုရားသခင်ရဲ့ ဂေါင်တော်ဟို့
 ချီးမွမ်းဘဲကြောနဲ့ ရှစ်ရှင်းဘဲ ဘုရားသခင်ရဲ့ ကောင်းဂန်
 တမန်ဟာ သူ့ဟို့ ဒန်ခတ်လိုက်ဟူကြောနဲ့ သူဟာ ပိုးလေ
 စားခံရဘီး သေဟွားလေဟုယ်။

24 အယ်ခီမာ ဘုရားသခင်ရဲ့ စကားတော်ဟာ နေရာတို
 င်းဟို့ ပုလုံနဲ့ဟွားဘီးဟာ ယောင်ကြည်သူလေဟာ တိုးပွား
 လာဟုယ်။

ဗာနဗန ရှောလုဟို့ ဝီးကော့-က်ဘီး လွတ်လိုက်ဟူ
 ကြောန်း

25 ဗာနဗန ရှောလုလေဟာ သူးနို့ မူကိစဟို့ လောက်ဂေ
 ဘီးန မာကု ဆိုဘီး ခေါ်ဟူ ယောဟန်ဟို့ သူးနို့နတူးဒူ ခေါ်

ဘီးဟာ ယေရုရှလင်မြို့ဟုနေ† ပုလန်လာဂေဟယ်။

13

¹ အနုတိအုတ်မြို့ဟု သင်းတော်မာ ပရောဖက်လေန ဆရာလေရှိဟယ်။ အယ်လူလေဟာ ဗာနဗ၊ နိဂါ ဆိုဘီး ခေါ်ဟူ ရှုမောင်၊ ကုရေနနယ်သား လက်၊ စော်ဘွားဟေရု ဒ်*ရဲ့ ငယ်လျင်းဖြစ်ဖူးဟူ မာနန်ရှောလုဟားလေ ဖြစ်ဂေဟယ်။

² အယ်လူလေဟာ သခင်ဘုရားရဲ့ မှုတော်ဟို့ လောက်ဆောန်ဘီး စာရှောန်နေဂေဒူးမာ သန့်ရှင်းဟူဝိညာဉ်တော်ဟု သူးနို့ဟို့ “ရှောလုန ဗာနဗလေဟို့ ငါ့မှုဟို့ ဆောန်ဟို့တွပ် သီးသန့် ဝီးကော့-က်ဟားဂေ” ဆိုဘီး ပြောဟယ်။

³ သူးနို့ဟာ စာရှောန်ဆုတောင်းဘီးန ဗာနဗန ရှောလုလေရဲ့ ခေါင်းထတ်မာ သူးနို့လတ်ဟို့ တန်ဂေဟယ်။ အယ်ဘီးန သူးနို့ဟို့ မှုတော်ဆောန်ဟို့တွပ် လွှတ်လိုက်ဂေဟယ်။

ကုပရုကျွန်းမာ မှုတော်ဆောန်ဟူကြောင်း

⁴ ဗာနဗန ရှောလုလေဟာ သန့်ရှင်းဟူဝိညာဉ်တော် လွှတ်လိုက်တိုင်းဘဲ သေလက်မြို့ဟုနေ ကုပရုကျွန်းဟို့ သန်းဖောန သွားဂေဟယ်။

⁵ သူးနို့ဟာ ရှာလမ်မြို့ဟို့ ရော့-က်ဟူ ဒီမာ ယုဒလူမျိုးလေရဲ့ ဝါလယ်ဇရပ်လေမာ ဘုရားသခင်ရဲ့ စကားတော်

† 12:25 ၁၂.၂၅ ဟုနေ၊ တချို့ မူရင်းလတ်ရေးမူလေမာ ဟို့၊ ဆိုဘီး ပါရှိဟယ်။ * 13:1 ၁၃.၁ ဟေရုဒ်၊ ဂါလိလဲပြည်ရဲ့ အောက်ချောက်မား

ဟေရုဒ်အန္တီပ (ရှု လု ၃.၁)။

ဟို့ ဟောပြောဂေဟယ်။ မာကု ဆိုဘီး ခေါ်ဟူ ယောဟန်ဟာ သူးနို့လေရဲ့ လတ်ထော့-က်နေန ကူညီပေးဟို့တွပ် ခေါ်ဟားဂေဟယ်။

⁶ သူးနို့ဟာ အယ်ကျွန်းဟို့ ဖြတ်ဟားဘီးဟာ ပါဖုမြို့ထိ သွားဂေဟယ်။ အယ်မြို့မာ ယုဒလူမျိုး ပရောဖက်တုယောန်ဖြစ်ဟူ နတ်ဝိဇ္ဇာတယော့-က်ဟို့ တွံဂေဟယ်။ သူ့နာမယ်ဟ ဗာယေရူ ဖြစ်ဟယ်။

⁷ သူဟာ မြို့ဝန်မန်း သေရဂိပေါလုရဲ့ မိဆွေဖြစ်ဟယ်။ အယ်မြို့ဝန်မန်းဟာ ဒိပညာရှိဟူ လူတယော့-က်ဖြစ်ဟယ်။ သူဟာ ဘုရားသခင်ရဲ့ စကားတော်ဟို့ ကြားရှင်ဟူ ကြောန့် ဗာနဗန ရှောလုဟို့ ဖိခေါ်လိုက်ဟယ်။

⁸ အယ်ဘေမဲ့ ဟေလသဘာသာနု ဧလုမနာမယ်ရှိဟူ နတ်ဝိဇ္ဇာတယော့-က်ဟာ မြို့ဝန်မန်းဟို့ ယောင်ကြည်ရှင်းဟုနေ လွဲစေဟို့တွပ် ဗာနဗန ရှောလုလေဟို့ တားလေဟယ်။

⁹ အယ်ခီမာ ပေါလု ဆိုဘီး ခေါ်ဟူ ရှောလုဟာ သန်ရှင်းဟူဝိညာဉ်တော်န ပုလဲဝဘီး နတ်ဝိဇ္ဇာသမားဟို့ စိုက်ကေဘီးန၊

¹⁰ “နန်ဟာ မာရ်နတ်ရဲ့သား! လှည့်ဇားလီညာသူ၊ မှန်တရားရဲ့ ရန်သူ၊ နန်ဟာ ဘုရားသခင်ရဲ့ ပြောန့်မတ်ဟူလမ်းဟို့ ဖျစ်ဆီးဘဲန နေနိုင်ဟုလော။

¹¹ ခုဘဲ ဘုရားသခင်ရဲ့ လတ်တော်ဟာ နန့်ထတ်မာ ကုလလာဘီးဟာ မျစ်စိကန်းလေ့မယ်။ နန်ဟာ နေဟို့ ကြာဂီး

မြင်ရဟ့်ဟ့် မူဟု” ဆိုဘီး ပြောဟယ်။

ရှစ်ရှင်းဘဲ ဧလုမဟာ မျစ်စိကန်းဟူးဘီးဟာ လောင်း
ဝ မှော်မိုက် ဖြစ်ဟူးကြောန့် သူလတ်ဟ့် ဆွဲဘီး လမ်းပြ
ပေးဟူလူဟ့် စမ်းတဝါးဝါး ရှာနေရဟယ်။

¹² မြို့ဝန်မန်းဟာ အယ်ဖြစ်ပျစ်ဇာဟ့် မြင်ဟူ ခီမာ
ယောင်ကြည်လာဟယ်။ သူဟာ သခင်ဘုရားရဲ့ တရား
တော်ဟ့် ကြားရခီမာလည်း အံ့သြနေဟယ်။

ပိသိဒိပြည် အနုတိအုတ်မြို့မာ မူတော်ဆောန်ဟူကြော
နိုး

¹³ ပေါလုန သူပေါင်းဖော်လေဟာ ပါဖုမြို့ဟုနေ သန်း
ဖောနသွားဘီးန ပံဖုလိပြည် ပေရဂေမြို့ဟ့် ရော-က်ဟူး
ဂေဟယ်။ အယ်နေရာမာ မာကု ဆိုဘီး ခေါ်ဟူ ယောဟန်
ဟာ သူးနို့န လမ်းခွဲဘီးဟာ ယေရုရှလင်မြို့ဟ့် ပုလန်ဟူး
ဟယ်။

¹⁴ သူးနို့ဟာ ပေရဂေမြို့ဟု ထွပ်ဟူးဘီးဟာ ပိသိဒိ
ပြည် အနုတိအုတ်မြို့ဟ့် ရော-က်ဟူးဘီး ဒန်းနေမာ ဝါ
လယ်ဇရပ်ဟ့် ဝမ်ဘီး ထိုင်နေဂေဟယ်။

¹⁵ ပညတ်ကျမ်းန ပရောဖက်ကျမ်းလေဟ့် ဖတ်ဟူ ခီမာ
ဝါလယ်ဇရပ် တာဝန်ခံလေဟာ သူးနို့ဟ့် “ညီကိုလေ၊ အယ်
လူလေဟ့် တိုက်တွန်းအားပေးဟူစကား ပြောမယ် ဆိုဟာ
ပြောဂေပါ” ဆိုဘီး ကြောင်းကြားဂေဟယ်။

¹⁶ ပေါလုဟာ ထဘီးဟာ လတ်နပြလိုက်ဘီးန

“ဣသရေလလူမျိုးလေ ဘုရားသခင်ဟို ကိုးကွယ်ဟူ လူမျိုးခြားလေ ငါ့စကားဟို နားထောင့်ဂေပါ။

17 ဣသရေလလူမျိုးလေရဲ့ ဘုရားသခင်ဟာ နို့လေရဲ့ ဘိုးဘေးလေဟာ အဲဂုတ္တုပြည်မှာ ဧည့်သည်ဖြစ်နေ နေ ဟူ ခီမာ သူးနို့ဟို ဝီးကော့-က်ဘီးဟာ လူမျိုးဂီး ဖြစ်စေ ဟယ်။ အားကီးဟူ တဂိုးတော်န အယ်ပြည်ဟုနေ ထုဆော န်ဟားဟူ ခီမာ

18 တောကန္တာရမှာ နှစ်လေးဆယ်လောင်းလောင်း သူ ဟာ သီးခံဟယ်။†

19 အယ်ဘီးန ခါနန်ပြည်မှာနေဟူ လူမျိုးခွန်နစ်မျိုးဟို ဖျစ်ဆီးဘီးဟာ အယ်ပြည်ဟို သူ့လူမျိုးလေဟို ပိုင်ပေးလို က်ဟယ်။

20 အယ်မူဇာလေဟာ နှစ်ပေါင်းလေးရာငါးဆယ် နီးပါး ကြာဟားဟယ်။”

“အယ်ဘီးန‡ ပရောဖက်ရှုမွေလခီထိ တရားသူဂီးလေ ဟို ပေါ်လာစေဟယ်။

21 သူးနို့ဟာ မန်းဂီးတပါးဟို တောန်းဂေဟူကြောန် ဘုရားသခင်ဟာ ကိရှရဲ့သား ဗ်ယာမိန်မျိုးနွယ်ဖြစ်ဟူ ရှောလုဟို နှစ်လေးဆယ်လောင်းလောင်း အောက်ချောက် ဟို့တွပ် သူးနို့ဟို ပေးလိုက်ဟယ်။

† 13:18 ၁၃.၁၈ သူဟာ သီးခံဟယ်၊ တချို့ မူရင်းလတ်ရေးမူလေမာ သူဟာ ပြုစုစောင့်ရှောက်ပေးဟယ်၊ ဆိုဘီး ပါရှိဟယ်။ ‡ 13:20 ၁၃.၂၀ အယ်ဘီးန၊ အယ်မျိုးမူဘဲနေဟာ နော့-က်ထပ် နှစ်ပေါင်း ၄၅၀ ကြာဟယ်၊ ဆိုဘီး ပါရှိဟယ်။

22 အယ်ဘီးန ဘုရားသခင်ဟာ ရှောလုဟို့ ဖယ်ဘီးဟာ ဒါဝိဒ်ဟို့ က္လသရေလရဲ့ မန်းဂီးဖြစ်န ချီးမြှော-က်လိုက်ဟယ်။ ဘုရားသခင်ဟာ ‘ငါ လောက်ခိုင်းဟားဇာလေဟို့ လောက်ဟို့တွပ် ငါ့ရဲ့ စိတ်နတို့ဟူ ယေရဲ့ရဲ့သား ဒါဝိဒ်ဟို့ ငါတို့ဟားဘီ’ ဆိုဘီး ဒါဝိဒ်န ပတ်သတ်ဇာလေဟို့ သတ်သေခံလိုက်ဟယ်။

23 ဘုရားသခင်ဟာ သူ့ရဲ့ ဂဒိတော်တိုင်း က္လသရေလလူမျိုးလေတွပ် ကယ်တန်ရှင်ယေရှုဟို့ အယ်ဒါဝိဒ်ရဲ့ သားမှလေးလေထဲမာ ပေါ်လာစေဟယ်။

24 ယေရှုဟာ မှုတော်မြတ်ဟို့ လောက်ခန်မာ ယောဟန်ဟာ က္လသရေလလူမျိုးလေဟို့ နောဒ်ဒရဘီး ဗတုတိဇိခံဂေပါ ဆိုဘီး ဟောဟယ်။

25 သူလောက်ရဟူ မှုတော်မြတ် ပီးဆောင်းခါနီးမာ ယောဟန်ဟာ ‘နန်းနို့ဟ ငါ့ဟို့ ဖယ်လူ ဆိုဘီး ထန်ဂေနူး။ ငါဟာ နန်းနို့ စောန်နေဟူသခင် မှုဟူ။ အယ်သခင်ဟာ ငါ့နော-က်မာ ပေါ်လာလေ့မယ်။ ငါဟာ အယ်သခင်ရဲ့ ခေန်ကြိုးဟို့ ဖြေဟို့ဟို့မှ ထိုက်ဟ့’ ဆိုဘီး ပြောဟယ်။”

26 “အာမြဟံရဲ့ သားမှလေးလေဖြစ်ဟူ ငါ့ညီကိုလေန ဘုရားသခင်ဟို့ ကိုးကွယ်ဟူ လူမျိုးခြားလေ၊ ကယ်တန်ရှင်းဆိုင်ဟူ အယ်မှတရားတော်ဟို့ နို့လေနားဟို့ ပေးပို့လိုက်ဟယ်။

27 ယေရှုရှလင်မြို့သားလေန သူးနို့ခေါန်းဆောန်လေဟု

အယ်သခင်ဟာ ကယ်တန်ရှင် ဖြစ်ဟုယ် ဆိုဇာဟို့ နားလည်ဂေဟု။ ဒန်းနေတိုင်း သူးနို့ဖတ်ဂေဟူ ပရောဖက်လေရဲ့ စကားလေဟို့လည်း နားလည်ဂေဟု။ အယ်ဘေမဲ့ သူးနို့လေဟာ ပရောဖက်လေရဲ့ စကားတိုင်း ပုလဲဇောင်ဟို့တွပ် အယ်သခင်ဟို့ ပြစ်ဒန်စီရင်ဂေဟုယ်။

28 အယ်မျိုး သေဒန်စီရင်ဟို့ ပြစ်တခုလည်း သူးနို့လေ တို့ဘေမဲ့လည်း ကိုယ်တော်ဟို့ သေဒန်ပေးဟို့တွပ် ပိလတ်မန်းဟို့ တောန်းဆိုဂေဟုယ်။

29 သူးနို့ဟာ အယ်သခင်နု ပတ်သတ်ဘီး ကျမ်းစာထဲမာ ပြောဟူးဇာလေဟို့ လောက်ဂေဘီးနု အယ်သခင်ရဲ့ တမဲ့တော်လေဟာ လတ်ဝါးကပ်တိုင်ဟုနေ ခုလဘီး သန်းခုလိုင်းဂူမာ သံဂြိုဟ်ဂေဟုယ်။

30 အယ်ဘေမဲ့ ဘုရားသခင်ဟာ အယ်သခင်ဟို့ သေရာဟုနေ ထမြော့-က်စေဟုယ်။

31 အယ်ဘီးနု အယ်သခင်ဟာ ရင်းရင်ဒူးဟု သူးနုတူးဒူ ဂါလိလဲပြည်ဟုနေ ယေရုရှလင်မြို့ဟို့ လိုက်ပါလာဂေဟူ လူလေဟို့ ရစ်ပေါန်းကြာဂီး ကိုယ်ထန်ရှားပြဟုယ်။ သူးနို့ဟု ခုခီမာ ဣသရေလလူမျိုးလေဟို့ ကိုယ်တော်ကြောင်းဟို့ သတ်သေခံနေဂေဟုယ်။

32 နို့လေလည်း ဘိုးဘေးလေဟို့ ပေးဟူးဟူ၊ ဂဒိတော်နုဆိုင်ဟူ၊ ကောင်းမြတ်ဟူ ဒန်းကောင်းဟို့ နန်းနို့လေဟို့

13:28 ၁၃.၂၈ မ ၂၇.၂၂,၂၃ မာ ၁၅.၁၃,၁၄ လု ၂၃.၂၁-၂၃ ယော ၁၉.၁၅

13:29 ၁၃.၂၉ မ ၂၇.၅၇-၆၁ မာ ၁၅.၄၂-၄၇ လု ၂၃.၅၀-၅၆ ယော ၁၉.၃၈-၄၂ 13:31 ၁၃.၃၁ တ ၁.၃

ဟောပြောနေဟယ်။

³³ ဘုရားသခင်ဟာ ယေရှု့ကို ထမြော့-က်စေဘီး ဘိုးဘေးလေရဲ့ သားမီးလေဖြစ်နေဟူ နို့လေတွပ် အယ်ဂဒိတော်လေဟို့ ပုလဲဇောင်စေတော့မူဘီ။ ဆာလံကျမ်းဒုတိယခန်းမာ၊”

“နန်ဟာ ငါ့သားဖြစ်ဟယ်။

အယ်နေဘဲ့ နန်ဟို့ သားရာဟို့ ငါပေးဘီ’ ဆိုဘီး ရေးဟူးတိုင်းဘဲ့ ဖြစ်ဟယ်။”

³⁴ “သန်းခဲလိုင်းထဲမာ ပေါက်ပျစ်ဘဲန သေရာဟုနေ ထမြော့-က်ဟူကြောင်းဟို့ ဘုရားသခင်ဟု၊”

“ဒါဝိဒ်ဟို့လည်း ကောင်းဂျီးပေးဟို့တွပ် ဂဒိပြုဟူးတိုင်းဘဲ့ နန်းဟို့လည်း သန်ရှင်းမြင့်မြတ်ဘီး သေချာဟူကောင်းဂျီးဟို့ ပေးမယ်’ ဆိုဘီး ပြောဟယ်။”

³⁵ “တခြားကျမ်းပိုဒ်မာ၊

‘ကိုယ်တော်ဟာ သန်ရှင်းဟူ စေခံဟို့

သန်းခဲလိုင်းထဲမာ ပေါက်ပျစ်စေဟို့ မူဟု’ ဆိုဘီး ပြောဟူးဟယ်။”

³⁶ “ဒါဝိဒ်ဟာ သူသတ်ရှင်နေဒူးဟု ဘုရားသခင်ရဲ့ ကြံစည်ရှိဟူတိုင်း လိုက်ရှော့-က်ဘီးန သေဟူးဘီးဟာ ဘိုးဘေးလေရဲ့ သန်းခဲလိုင်းထဲမာ သဂြိုဟ်ခံရဟယ်။ သူ့ရဲ့ခနုဓာဟာ သန်းခဲလိုင်းထဲမာ ပေါက်ပျစ်ဟူးဟယ်။

37 အယ်ဘေမဲ့ ဘုရားသခင် ထမြော့-က်စေလိုက်ဟူ သခင်ရဲ့ခန့်စာဟာ ပေါက်ပျစ်ဟာ။

38 အယ်ကြောန့် ညီကိုလေ၊ အယ်သခင်အားဖြင့် ပြစ်လေ ခွမ့်လွတ်ရှင်းကြောန်းဟို့ နန်းနို့လေဟို့ ဟောပြောနေဇာဟို့ ရော၊ ယောင်ကြည်ဟူ လူတိုင်းဟာ ကိုယ်တော်အားဖြင့် မောရှေရဲ့ ပညတ်တရားအားဖြင့် ဖြောန့်မတ်ဟယ် ဆိုဘီး သိမှတ်ပြုရှင်း ခံရနိုင်ဘဲဟူရာလေ ဂူလောင်းဟုနေ လွတ် ဘီး၊

39 အယ်သခင်အားဖြင့် ဖြောန့်မတ်ဟယ် ဆိုဘီး သိမှတ် ပြုရှင်း ခံရဇာဟို့ရော နန်းနို့ သိမှတ်ဂေ။

40 ပရောဖက်ကျမ်းလေမာ ငါ မိန့်တော်မူဟွားဇာဟို့ ထီမဲ့ မြင်ဟူသူလေ နားထောန်ဂေ။”

41 ““ ထီလေးဇားမားလေ၊ ကေ့ရှူဂေ! အံ့ဩဟွားဘီး သေ ပါလေစေ!

အယ်နေ့ ငါလောက်နေဟူဇာလေဟို့ ယော့-က်ယော့-က် ဟု ရှင်းပြဘေမဲ့လည်း

နန်းနို့ဟာ ယောင်ကြည်ဟို့ မူဟု’

ဆိုဘီး ဖော်ပြဟွားဟယ်။ အယ်မျိုး ဖော်ပြဟွားတိုင်း ဖြစ်ဟို့တွပ် ဒီထားဂေပါ။”

ဆိုဘီး ဟောလေဟယ်။

42 ဝါလယ်ဇရပ်ဟုနေ ပေါလုန ဗာနဗလေဟာ ထွပ်လာ ဟူ ခီမာ လူလေဟု သူးနို့ဟို့ နော့-က်ပတ်ဒန်းနေ့မာ အယ်

ကြောန်းလေဟို့ နှော-က်တခါ ဟောပြောဟို့တွပ် တောန်း ဗန်ဂေဟယ်။

43 ဝါလယ်ဇရပ်မာ လူစုကွဲဟူးဟူ ခီမာ ယုဒလူမျိုး လေန ဘုရားသခင်ဟို့ ကိုးကွယ်ဘီး ယုဒဘာသာဝမ်ဖြစ် လာဟူ လူလေဟာ ပေါလုန ဗာနဗလေရဲ့ နှော-က်ဟို့ လိုက်ဟူးဂေဟယ်။ တမန်တော်လေဟာ အယ်လူလေဟို့ ဘုရားသခင်ရဲ့ ကျေးဇူးတော်န ဆစ်ဘီးဟာ သတ်ရှင်ဟို့ တွပ် စည်းရောင်းဂေဟယ်။

44 နှော-က်ပတ်ဒန်းနေမာ သခင်ဘုရားရဲ့ စကားတော် ဟို့ ကြားရဟို့တွပ် တမြို့လောင်းနီးပါး ရှော-က်လာဂေဟယ်။

45 ယုဒလူမျိုးလေဟာ လူအောက်ဂီးဟို့ မြင်ဟူ ခီမာ နာလိုဘဲကြောန် ပေါလုဟောပြောဟူ စကားလေဟို့ ကဲ့ရဲ့ ဘီးဟာ ပြောဂေဟယ်။

46 အယ်ဘေမဲ့ ပေါလုန ဗာနဗလေဟာ “နို့လေဟာ ဘုရားသခင်ရဲ့ စကားတော်ဟို့ နန်းနို့ဟို့ ပထမဆောင်း ဟောရဟယ်။ အယ်ဘေမဲ့ နန်းနို့ဟာ အယ်မူတရားတော် ဟို့ ပယ်ဘီးဟာ ကိုယ့်ကိုယ်ကိုယ် ထာဝရသတ်န ထိုက်တန်ဟု ဆိုဘီး စီရင်ဂေဟူကြောန် နို့လေဟာ နန်းနို့နားဟုနေ ထွပ်ဟူးဘီးဟာ လူမျိုးခြားလေနားဟို့ သွားမယ်။

47 ဘုရားသခင်ဟု”

“ကယ်တန်ရှင်းကျေးဇူးဟို့ တကမ္ဘာလောင်းဟို့ ရှော-က် စေဟို့တွပ်န နန်းနို့လေဟို့

လူမျိုးခြားလေတွပ် လန်းရောန်ဖြစ်စေဟို့ ငါခန့်ဟွား
ဟယ်၊
ဆိုဘီး နို့လေဟို့ မိန့်မှာဟွားဟယ်” ဆိုဘီး ပိုဘီး ရဲရဲရင့်ရင့်
ဟွား ဟောပြောလေဟယ်။

⁴⁸ လူမျိုးခြားလေဟာ အယ်မျိုး ကြားရဟူ ခီမာ ဝန်း
သာဘီးဟာ သခင်ဘုရားရဲ့ စကားတော်ဟို့ ချီးမွမ်းဂေ
ဟယ်။ ထာဝရသတ်တွပ် ဝီးကော့-က်ခံရဟူ လူလေဟာ
ယောင်ကြည်သူလေ ဖြစ်လာဂေဟယ်။

⁴⁹ သခင်ဘုရားရဲ့ တရားတော်ဟာ တနယ်လောင်းဟို့ ပု
လုံနို့ဟွားလေဟယ်။

⁵⁰ အယ်ဘေမဲ့ ယုဒလူမျိုးလေဟာ ဘုရားသခင်ဟို့ ကိုး
ကွယ်ဟူ ထတ်တန်းလွှာမီးမလေန မြို့ရဲ့ မျစ်နှာဖောင်း
လေဟို့ တိုက်တွန်းဘီးဟာ ပေါလုန ဗာနဗလေဟို့ ညှဉ်းဆဲ
ဟို့တွပ် စဘီးနှိုးဆော်လေဟယ်။ သူးနို့ဟာ အယ်လူနွေ
ယော့-က်ဟို့ သူးနို့ နယ်ဟုနေ နှန်ထုလိုက်ဂေဟယ်။

⁵¹ အယ်ခီမာ ပေါလုန ဗာနဗလေဟာ သူးနို့ဟို့ ဒီပေးဟို့
တွပ် ခေဖွားဟု မုလေမုဟို့ ခါခလဘီးဟာ ဣကောနိမြို့
ဟို့ ထွပ်ဟွားဂေဟယ်။

⁵² အနုတိအုတ်မြို့ဟု တမဲ့တော်လေဟာ ဝန်းသာဘီး
ဟာ သန်ရှင်းဟူဝိညာဉ်တော်န ပုလုံဝနေဂေဟယ်။

14

ဣကောနိမြို့မာ မူတော်မြတ်ကြောင်း

¹ လူကောနိမြို့မလည်း ပေါလုန ဗာနဗဟာ ယုဒလူမျိုးလေရဲ့ ဝါလယ်ဇရပ်ဟို့ ဝမ်ဘီးဟာ ဟောပြောဟူ ခီမာ ယုဒလူမျိုးလေန လူမျိုးခြားလေဟာ ဘောင်ဂီး ယောင်ကြည်ဂေဟယ်။

² အယ်ဘေမဲ့ ယောင်ကြည်ဘဲ့ဟူ ယုဒလူမျိုးလေဟာ လူမျိုးခြား ညီကိုလေဟို့ နာလိုဘဲစိ ဖြစ်လာဟို့တွပ် ဆွပေးဂေဟယ်။

³ ပေါလုန ဗာနဗလေဟာ အယ်ဒေသမာ ကြားကြာဟား နေဘီးဟာ သခင်ဘုရားရဲ့ကြောန်းဟို့ ရဲရဲရင့်ရင့်ဟား ဟောပြောဂေဟယ်။ ကိုယ်တော်ဟာ အယ်လူလေဟောပြောဟူ ကျေးဇူးတော်တရားဟာ မှန်ကန်ဟယ် ဆိုဇာဟို့ သတ်သေပြဟို့တွပ် သူးနို့လေဟို့ အံ့ဩဘွယ်ရာလေန နိမိတ်လတ်ခဏာလေဟို့ ပြနိုင်ဟို့ တဂိုးဟို့ ပေးဟယ်။

⁴ မြို့သူမြို့သားလေဟာ နှေ့စုကွဲဟားဂေဟယ်။ တစုဟာ ယုဒလူမျိုးလေဖတ်ဟို့ ပါဟားဘီး နှော့-က်တစုဟာ တမန်တော်လေဖတ်ဟို့ ပါဟားဂေဟယ်။

⁵ ရာရှိလေ၊ ယုဒလူမျိုးလေန လူမျိုးခြား တချို့လေဟာ တမန်တော်လေဟို့ ညှဉ်းဆဲဘီး ကုလော့-က်ခဲနပစ်ဟို့တွပ် ဆောင်းဖြတ်ဂေဟယ်။

⁶ အယ်ကြောန်းဟို့ တမန်တော်လေဟာ ကြားရဟူ ခီမာ လူကောနိပြည်ထဲဟာ လုတုတရမြို့၊ ဒေရဗေမြို့န နီးနားဟာဒေသဟို့ ထွပ်ပုလေးဟားဂေဘီး၊

⁷ အယ်နေရာမာ သူးနို့ဟာ ဒန်းကောန်းဟို့ ဟောပြောဂေ

ဟုယ်။

လုတုတရမြို့န ဒေရဗေမြို့မာ မူတော်ဆောန်ဟူကြော
နိုး

⁸ လုတုတရမြို့မာ မွီးဂဒဲဟု ဒေသန်ဘဲကြောန့် လောင်း
ဝ လမ်းရှော-က်နိုင်ဘဲဟူ လူတယော့-က်ရှိဟယ်။

⁹ သူဟာ အယ်နေရာမာ ထိုင်ဘီး ပေါလုရဲစကားဟို နား
ထောန်နေဟယ်။ ပေါလုဟာ သူဟို စိစိကေ့လိုက်ဟူကြော
န့် ကျန်းမာနိုင်ဟူ ယောင်ကြည်ရှင်းရှိဟယ် ဆိုဇာဟို မြင်
ဟူ ခီမာ

¹⁰ “ထဘီးဟာ မတ်တတ်ရပ်လိုက်” ဆိုဘီး သံကုလယ်
ဂီးန အော်လိုက်ဟယ်။ အယ်လူဟာ ထခူဘီးဟာ စဘီးလ
မ်းရှော-က်လေဟယ်။

¹¹ လူအောက်ဂီးဟာ ပေါလုလောက်ဟူဇာလေဟို မြ
င်ဟူ ခီမာ “နတ်ဘုရားလေဟာ လူယောန်ဆောန်ဘီးဟာ
နို့လေနားဟို လာဟယ်!” ဆိုဘီး သူးနို့ဟာ လုကောနိ
ဘာသာစကားန စဘီးဟာ အော်ပြောဂေ့ဟယ်။

¹² သူးနို့ဟာ ဗာနဗဟို ဇုသ ဆိုဘီး ခေါ်ဂေ့ဟယ်။ ပေါ
လုဟာ ဦးဆောန်ဟောပြောသူ ဖြစ်ဟူကြောန့် ဟေရမေ
ဆိုဘီး ခေါ်ဂေ့ဟယ်။

¹³ ဇုသရဲ့ နတ်ဘုရားဗိမာန်ဟာ မြို့ပုလန်မာရှိဟူကြော
န့် အယ်နတ်ဘုရားရဲ့ ယဇ်ပုရောဟိတ်ဟာ နွားလားလေန
ပန်းဂေါင်းလေဟို မြို့ခွဗော့-က်ဝဟို ယူလာဂေ့ဟယ်။ သူ

နတူးဒု လူအောက်ဂီးလည်း တမန်တော်လေဟို ပူဇော်ရှင်
ဂေဟယ်။

14 အယ်ဘေမဲ့ တမန်တော်ဗာနဗန ပေါလုလေဟု အယ်
ကြောန်းဟို ကြားရဂေဟု ခီမာ သူးနို့ရဲ့ အန်းဂီလေဟို ဆု
ဖုလဲ့ဘီးဟာ လူလေကြားထဲဟို ပုလေးလာဘီးဟာ

15 “နန်းနို့ဟာ ပြားဖြစ်ကြောန့် အယ်မျိုးလောက်ဂေနှူး။
နို့လေဟု နန်းနို့မျိုးဘဲ သာမန်လူလေဖြစ်ဂေဟယ်။ နန်းနို့
ဟာ အယ်မျိုး ကျိုးမွေဘဲဟု ဇာလေဟို ပစ်လွပ်ဂေဘီးဟာ
သတ်ရှင်ဟု ဘုရားသခင်ဖတ်ဟို ပုလန်လာဟိုတွပ် နန်းနို့
ဟို ဒန်းကောန်းပြောဟိုတွပ် ရော့-က်လာဟယ်။ သတ်ရှင်
ဟု ဘုရားသခင်ဟာ ကောန်းဂန်န မုလေဂီး၊ ပန်လယ်န ရှိ
မျှူလောင်းဟိုလည်း ဖန်ဆင်းဟူးဟယ်။

16 ရင်းရင်ဒူးဟု ဆိုဟာ ကိုယ်တော်ဟာ လူလေ ဂူလော
င်းဟို သူးနို့ရဲ့ လမ်းစဉ်တိုင်း ရော့-က်လှမ်းဟို ခွမ့်ပေး
ဟူးဟယ်။

17 အယ်ဘေမဲ့ ကောန်းဇာလေ လောက်ရှင်းအားဖြင့်
ကိုယ်တော် ရှိဟယ် ဆိုဇာဟို သတ်သေထော့-က်ထားလေ
န လူလေဟို မြဲဒမ်း ပြဟယ်။ ကိုယ်တော်ဟာ ကောန်းဂန်
ဟုနေ မိုးဝါစေဘီးဟာ သီးနို့လေဟို ဖြစ်စေဟယ်။ နန်းနို့
ဟို စားဇာလေဟို ပေးဘီး နန်းနို့ရဲ့စိဟို ရှင်လန်းစေဟယ်”
ဆိုဘီး အော်ဘီးပြောဟယ်။

18 တမန်တော်လေဟာ အယ်မျိုးပြောဘေမဲ့လည်း
ပူဇော်ဆစ်သဟိုတွပ် လောက်နေဟု လူလေဟို ခတ်ခတ်ခဲ

ခဲ တားနေရဟယ်။

19 အနုတိအုတ်မြို့န ကူကောနိမြို့ဟုနေ ရော့-က်လာ
ဂေ့ဟူ ယုဒလူတချို့ဟာ သူးနှိဖတ်ဟို့ ပါအောန် စည်းရော
င်းဂေ့ဟယ်။ အယ်ဘီးန ပေါလုဟို့ ကုလော့-က်ခဲန ပစ်ဘီး
ဟာ သေဟားဘီ ဆိုဘီး ထန်ဘီးဟာ မြို့ပုလန်ဟို့ ဆွဲထု
ဂေ့ဟယ်။

20 အယ်ဘောမဲ့ သူနားဟို့ တမဲ့တော်လေဟာ စုလာဂေ့ဟူ
ခီမာ ပေါလုဟာ မြို့ထဲဟို့ ပုလန်ဝမ်ဟားဟယ်။ နော့-က်
တနေ့မာ ပေါလုန ဗာနဗဟာ ဒေရဗေမြို့ဟို့ ထွပ်ဟားဂေ့
ဟယ်။

ရှုရိပြည် အနုတိအုတ်မြို့ဟို့ ပုလန်လာကြောင်း

21 ပေါလုန ဗာနဗလေဟာ ဒေရဗေမြို့မာ ဒန်းကောန်း
ဟို့ ဟောပြောဂေ့ဟူ ခီမာ လူဘောင်ဂီးဟာ တမဲ့တော်ဖြစ်
လာဂေ့ဟယ်။ အယ်ဘီးန လူတုတရမြို့၊ ကူကောနိမြို့န ပိ
သိဒိပြည် အနုတိအုတ်မြို့ဟို့ ပုလန်ဂေ့ဟယ်။

22 တမဲ့တော်လေဟို့ ခိုင်ခန့်စေဘီး သူးနှိလေရဲ့ ယောင်
ကြည်ရှင်းစိဟို့ ခိုင်မြဲဟို့တွပ် တိုက်တွန်းဂေ့ဟယ်။ သူးနှိ
ဟာ “နှိလေဟာ ဘုရားသခင်ရဲ့ နိုင်ငံတော်ဟို့ ဝမ်ဟို့တွပ်
ဒေါက်ခဆင်းရဲ့ ဘောင်ဂီး ခံရလေ့မယ်” ဆိုဘီး သွန်သန်
ဂေ့ဟယ်။

23 ပေါလုန ဗာနဗလေဟာ သင်းတော်လေမာ လူဂီး
လေဟို့ ခန့်ဟားဂေ့ဟယ်။ စာရှောန်ဆုတောင်းဘီးန သူး

နို့ယောင်ကြည်ဂေဟူ သခင်ဘုရားနားဟို့ သူးနို့လေဟို့ အပ်ပေးလိုက်ဟယ်။

²⁴ ပေါလုန ဗာနဗဟာ ပိသိဒိပြည်ဟို့ ဖြတ်ဘီးန ပံဖုလိ ပြည်ဟို့ ရော့-က်ဟူးဂေဟယ်။

²⁵ သူးနို့ဟာ ပေရဂေမြို့မာ တရားဟို့ ဟောဂေဟယ်။ အယ်ဘီးန အတ္တလိမြို့ဟို့ သွားဘီးဟာ၊

²⁶ အနုတိအုတ်မြို့ဟို့ သန်းဖောန သွားဂေဟယ်။ အယ် မြို့ဟာ ခုသူးနို့ရဲ့ မှုတော်လောက်ငန်း ပီးဟူးဟူကြောန့် ဘုရားသခင်ရဲ့ ကျေးဇူးတော်ထဲဟို့ အပ်ဘီးဟာ လွတ်လို က်ဟူမြို့ ဖြစ်ဟယ်။

²⁷ အနုတိအုတ်မြို့ဟို့ ရော့-က်ဟူ ခီမာ သူးနို့ဟာ သင်း တော်မာ စုခိုင်းဘီးဟာ သူးနို့ဟို့ ဘုရားသခင်ဟု သတ်သေ ထူဟူးဇာလေန လူမျိုးခြားလေ ယောင်ကြည်လာဟို့တွပ် ကိုယ်တော်ဟာ ယောင်ကြည်ရှင်း ခွဗော့-က်ဟို့ ဖွမ်ပေးဟူ ကြောန်းလေဟို့ ပုလန်ပြောပြဂေဟယ်။

²⁸ အယ်ဘီးန သူးနို့ဟာ တမဲ့တော်လေနတူးဒူ ကြာဂီး နေဟယ်။

15

ယေရုရှလင်မြို့ဟု စည်းဝေးကြောန်း

¹ လူတချို့ဟာ ယုဒပြည်ဟုနေ အနုတိအုတ်မြို့ဟို့ သွား ဘီးဟာ ညီကို မောန်နှမလေဟို့ “နန်းနို့ဟာ မောရှေရဲ့ ပညတ်တရားတိုင်း ရေဖျားလီးဇာဟို့ ခံဟုဆိုဟာ ကယ် တန်ရှင်းရနိုင်ဟု” ဆိုဘီး သွန်သန်ဂေဟယ်။

² ပေါလုန ဗာနဗလေဟာ အယ်လူလေန ပြင်းပြင်းထန်းထန်းဟူး ဂြင်းခူဂေဟယ်။ အယ်ကြောန့် ပေါလု၊ ဗာနဗန ယောင်ကြည်သူတချို့ဟို့ အယ်ပြဿနာ ဆွေးနွီးဟို့တွပ် ယေရုရှလင်မြို့ဟု တမန်တော်လေန သင်းလူဂီးလေနားဟို့ စေလွှတ်ဟို့တွပ် ဆောင်းဖြတ်လိုက်ဂေဟယ်။

³ သူးနို့ဟာ သင်းတော်ရဲ့ ပို့ဆောက်ပေးရှင်းအားဖြင့် ဖိနိတ်ပြည်န ရှမာရိပြည်လေဟို့ ဖြတ်သွားနေဟူ ခီမာလူမျိုးခြားလေဟာ ဘုရားသခင်ဖတ်ဟို့ ပုလောန်းလဲလာဂေကြောန်းဟို့ ပြောပြဂေဟူကြောန့် ညီကိုလေဟာ ရရာတိုင်း ဝန်းသာဂေဟယ်။

⁴ သူးနို့လေဟာ ယေရုရှလင်မြို့ဟို့ ရော့-က်ဟူးဂေဟူ ခီမာ သင်းတော်၊ တမန်တော်လေန သင်းလူဂီးလေဟု သူးနို့ဟို့ ကြိုဆိုဂေဟယ်။ သူးနို့ဟို့ ဘုရားသခင်ဟု ဖယ်မျှလော့-က် သောင်းပြဟယ် ဆိုဇာဟို့ ဂူလောင်းဟို့ ပုလန်ပြောပြဂေဟယ်။

⁵ အယ်ဘေမဲ့ ဖာရိရှဲဖွဲ့ဝင်လေန ယောင်ကြည်သူ တချို့လေဟာ ထဘီးဟာ “လူမျိုးခြားလေဟာ ရေဖျားလီးဇာခံရဘီး မောရှေရဲ့ ပညတ်တရားဟို့ စောန့်ထီးရမယ်” ဆိုဘီးပြောဂေဟယ်။

⁶ တမန်တော်လေန သင်းလူဂီးလေဟာ အယ်ကိစဟို့ သောင်းသပ်ဟို့တွပ် စုဂေဟယ်။

⁷ ခီကြာဂီး ဆွေးနွီးဂေဘီးန ပေတရုဟာ ထဘီးဟာ “ညီ

ကိုလေ၊ လူမျိုးခြားလေဟာ ဒန်းကောင်းကြားဘီး ယောင်ကြည်နိုင်တို့တွပ် ရင်းရင်ဂဒဲဟု ဘုရားသခင်ဟာ ဒန်းကောင်းတို့ ဟောပြောတို့တွပ် ငါ့တို့ ဦးဆောင်း နန်းနို့ ထဲဟုနေဝီးကော့-က်ဟူးဟယ် ဆိုဇာတို့ နန်းနို့ သိဂေဟယ်။

⁸ လူလေရဲ့ စိန်လောင်းတို့သိဟူ ဘုရားသခင်ဟာ သန်ရှင်းဟူဝိညာဉ်တော်တို့ နို့လေတို့ ပေးမျိုးဘဲ လူမျိုးခြားလေတို့လည်း ပေးရှင်းအားဖြင့် သူးနို့လေတို့ လတ်ခံကြောင်း သတ်သေတို့ ပြလေဟယ်။

⁹ ကိုယ်တော်ဟာ သူးနို့လေန နို့လေတို့ ခွဲခြားဟု။ သူးနို့ဟာ ကိုယ်တော်တို့ ယောင်ကြည်ဟူကြောန့် သူးနို့ရဲ့ စိန်လောင်းဟာ သန်ရှင်းဟူးဘီး သူးနို့ရဲ့ ပြစ်လေလည်း ဖြေလွတ်ပေးဟယ်။

¹⁰ အယ်ကြောန့် နန်းနို့ဟာ ဖြားဖြစ်ကြောန့် ဘုရားသခင်တို့ စောင်ဇမ်းဂေနှူး။ နို့လေရဲ့ ဘိုးဘေးလေရော၊ နို့လေကိုယ်တိုင်ဟာ ထမ်းနိုင်ဘဲဟူ ဝန်ထောက်လေတို့ ဖြားဖြစ်ကြောန့် တမဲ့တော်လေတို့ ထမ်းခိုင်းဂေနှူး။

¹¹ မူဟု! နို့လေဟုလည်း အယ်လူလေမျိုးဘဲ သခင်ယေရှုရဲ့ ကျေးဇူးတော်အားဖြင့် ကယ်တန်ခံရဟယ် ဆိုဇာတို့ ယောင်ကြည်ဂေဟယ်” ဆိုဘီး ပြောဟယ်။

¹² ဗာနဗန ပေါလုလေဟာ လူမျိုးခြားလေထဲမှာ ဘုရားသခင်လောက်ဟူ အံ့ဩဘွယ်ရာလေန နိမိတ်လတ်ခဏာကြောင်းတို့ ပြောနေဟူ ခီမာ စုနေဟူ လူလေဟု တိ

တိဆိဆိဟူး နားထောန်နေဂေဟယ်။

13 သူးနို့လေ ပြောဘီးန ယာကုပ်ဟု “ညီကိုလေ၊ ငါ့စကားဟို့ နားထောန်ဂေ့!

14 ဘုရားသခင်ဟာ သူ့နာမတော်တွပ် လူမျိုးခြားလေထဲဟု လူတချို့ဟို့ သူ့ရဲ့ လူစုဖြစ်ဟို့တွပ် ဝီးထုဟူ ခီမာသူးနို့ဟို့ ဂရုစိုက်ကြောင်းဟို့ ရှိမုန်ဟု ရှင်းပြဟူးပီးဘီ။

15 ပရောဖက်လေရဲ့ စကားလေဟာ အယ်ကြောင်းရာနကိုက်ညီဟယ်။ ကျမ်းစာထဲမာ”

16 ““အယ်မူဇာ ပီးဟူးဘီးန ငါ့ပုလန်လာမယ်၊
အယ်ဘီးဟာ ပြိုကုလနေဟူ ဒါဝိဒ်ရဲ့တဲဟို့ ငါ့ပုလန်
ဆော့-က်မယ်။

ငါဟာ ပျစ်စီးနေဟူ အယ်တဲတော်ဟို့ ပုလန်ဆော့-က်ဘီး
ဒါဝိဒ်ရဲ့တဲဟို့ နော့-က်တခါ ပုလန်ဆော့-က်မယ်။

17 ကျန်ရစ်ဟူ လူလေန ငါ့နာမအားဖြင့် ခေါ်ရှင်းခံရဟူ
လူမျိုးခြားလေ ဂူလောင်းဟာ
ဘုရားသခင်ဟို့ ရှာဂေလေ့မယ်။

18 ရင်းရင် ဂ ဒဲ ဟု အယ် မူဇာ ဟို့ သိစေတော် မူဟူ
ထာဝရဘုရား မိန့်တော်မူဟူးဟယ်”
ဆိုဘီး ရေးဟူးဟယ်။

19 ယာကုပ်ဟု ဆစ်ဘီးဟာ “အယ်ကြောန် ဘုရားသခင်
နားဟို့ ပုလောင်းလဲလာဂေဟူ လူမျိုးခြားလေဟို့ ဒေါက်ခ
ရော့-က်အောန် နို့လေ စီရင်သင့်ဟု ဆိုဘီး ငါထန်ဟယ်။

20 အယ်ကြောန့် ရောက်ထုလေဟို့ ပူဇော်ဟူးဘီး သန်ရှင်းဘဲဟူ စားဇာလေဟို့ စားရှင်း၊ တရားဘဲဟူ မေထုန်ပြုရှင်း၊ လည်ဗန်းလှီးဘဲနု သတ်ဟူးဟူ လိဆန် နု သွိုးလေဟို့ စားရှင်းဟုနေ ရှောန်ဂေဟို့တွပ် စာရေးသင့် ဟယ် ဆိုဇာ ငါယူဆဟယ်။

21 ဖြားဖြစ်ကြောန့်နူးဆိုဟာ ရင်းရင်ဒူးဟု မောရှေရဲ့ ပညတ်တရားဟို့ ဝါလယ်ဇရပ်မာ ဒန်းနေတိုင်းမာ ဖတ်ဟယ်။ အယ်ဘီးဟာ သူရဲ့ တရားဟို့ မြို့တိုင်းမာ ဟောပြော ဂေဟယ်” ဆိုဘီး ပြောဟယ်။

ယောင်ကြည်သူ လူမျိုးခြားလေဟို့ ပေးဟူစာကြောင်း

22 အယ်ကြောန့် တမန်တော်လေ၊ သင်းလူဂီးလေန သင်း တော်တခုလောင်းဟာ သူးနို့လေထဲဟု လူတချို့ဟို့ ဝီး ကော့-က်ဘီးဟာ ပေါလုန ဗာနဗလေနတူးဒူ အနုတိအုတ် မြို့ဟို့ လွတ်ဟို့တွပ် ဆောင်းဖြတ်ဂေဟယ်။ သူးနို့လေဟာ ညီကိုလေထဲမာ ရရာတိုင်း လေးစားခံရဟူ ဗာရှဗ ဆိုဘီး ခေါ်ဟူ ယုဒနု သိလလေဟို့ ဝီးကော့-က်ဂေဟယ်။

23 သူးနို့ဟုနေ တဆင့် ပေးလိုက်ဟူ စာထဲမာ၊

“နန်းနို့ ညီကိုလေ ဖြစ်ဂေဟူ တမန်တော်လေန သင်း လူဂီးလေဟု အနုတိအုတ်မြို့၊ ရှုရိပြည်နု ကိလိကိပြည် မာနေဟူ လူမျိုးခြား ညီကိုလေဟို့ နှောက်ဆစ်လိုက်ဟယ်။

24 နို့လေထဲဟု လူတချို့ဟာ နို့လေရဲ့ ခွမ်ပြုချစ်ရဘဲ နန်းနို့နားဟို့ သွားဘီးဟာ စံနှောက်ယုစ်ဖြစ်စေဟူ စကား

လေဟို့ ပြောဘီး နန်းနို့ဟို့ ဒေါက်ခပေးကြောင်းဟို့ နို့လေ သိရဟယ်။

25 အယ်ဘေမဲ့ ကျွန်တော့်လေဟာ စည်းဝေးလောက် ဘီး လူတချို့ဟို့ ဝီးကော့-က်ဘီးဟာ နန်းနို့နားဟို့ လွတ်ဟို့ တွပ် ဂူလောင်း ဘောတူဂေဟယ်။ အယ်လူလေဟာ ကျွန် တော့်လေ ရှစ်ဟူဗာနဗန ပေါလုလေနတူးဒု လိုက်ဟားဂေ လေ့မယ်။

26 ပေါလုန ဗာနဗလေဟာ နို့လေရဲ့ သခင်ယေရှု ခရစ်တော်ရဲ့ နာမတော်တွပ် မှုတော်ဟို့ သတ်စွန့်ဘီး လော က်ဂေဟယ်။

27 အယ်ကြောန့် ကျွန်တော့်လေဟာ သူးနို့နတူးဒု ယုဒ န သိလလေဟို့ နန်းနို့နားဟို့ လွတ်လိုက်ဟယ်။ ကျွန်တော့် လေ ရေးလိုက်ဟူစာမာ ပြောဟားဟူ ကြောန်းရာလေဟို့ သူးနို့ ကိုယ်တိုင်လည်း ပြောပြဂေလေ့မယ်။

28 သန့်ရှင်းဟူ ဝိညာဉ်တော် န ကျွန်တော့်လေဟာ လိုက်နာဟို့ လိုအပ်ချစ်လေမှတပါး တခြားဝန်လေဟို့ ထမ်းဘဲဟို့တွပ် ဘောတူဂေဟယ်။

29 ရောက်ထုဟို့ ပူဇော်ဟားဟူစာဟို့ စားန။ သွီးဟို့ လည်း စားန။ လည်ဗန်းလှီးဘဲန သတ်ဟားဟူ လိဆန်ဟို့ လည်း စားန။ နန်းနို့ ကိုယ်တိုင်လည်း တရားဘဲဟူ မေထုန် ဟို့ ရှောန်ရမယ်။ အယ်မူဇာလေဟို့ ရှောန်မယ် ဆိုဟာ နန်း နို့တွပ် လောင်လော့-က်ဟားဘီ။ ကျန်းမာရွှင်လန်းဂေပါ စေ” ဆိုဘီး ရေးဟားဟယ်။

30 စေတမန်လေဟူ လွှတ်လိုက်ဘီး သူးနှိဟာ အနုတိ အုတ်မြို့ဟူ သွားဘီး ယောင်ကြည်သူလေဟူ စုခိုင်းဘီး ဟာ အယ်ပေးစာဟူ ပေးလိုက်ဂေဟယ်။

31 သူးနှိဟာ အယ်စာဟူ ဖတ်ပြဂေဟူ ခီမာ တိုက်တွန်း ဟားဟူ စကားလေကြောန် ရရာတိုင်း ဝန်းသာဂေဟယ်။

32 ယုဒန သိလလေ ကိုယ်တိုင်ဟု ပရောဖက်လေ ဖြစ် ဂေဟူကြောန် ညီကိုလေဟူ ခီကြာဂီး တိုက်တွန်းအားပေး ဘီး ခိုင်ခန့်စေဂေဟယ်။

33 သူးနှိဟာ အယ်နေရာမာ ရစ်ကြာဂီး နေဘီးန ညီကို လေဟူ ငြီးငြီးချမ်းချမ်းဟား ပုလန်လွှတ်လိုက်ဂေဟယ်။

34 *

35 ပေါလုန ဗာနဗလေဟာ အနုတိအုတ်မြို့မာ နေ ဘီး သခင်ဘုရားရဲ့ ဒန်းကောင်းဟူ တခြားလူလေနတူး ဒု ဟောပြောသွန်သန်ဂေဟယ်။

ပေါလုန ဗာနဗ လမ်းခွဲဂေကြောန်း

36 ရစ်နဲနဲကြာဘီးန ပေါလုဟု ဗာနဗဟူ “သခင်ဘုရားရဲ့ စကားတော်ဟူ နို့လေဟောဟားဟူ၊ မြို့လေမာရှိဟူ ညီကို လေနားဟူ ပုလန်ဟားဘီးဟာ သူးနှိလေရဲ့ ခြေနေလေဟူ လေ့လာဂေဇို” ဆိုဘီး ပြောဟယ်။

37 ဗာနဗဟာ မာကုနာမယ် ဆိုဘီး ခေါ်ဟူ ယောဟန်ဟူ ခေါ်ဆော်ရှင်ဟယ်။

* 15:34 ၁၅.၃၄ တချို့ မူရင်းလတ်ရေးမူလေမာ ခန်းငယ် ၁၇ ဟို့၊ အယ်ဘေမဲ့ သိလဟာ နေရစ်ဟို့တွပ် ဆောင်းဖြတ်လိုက်ဟယ်၊ ဆိုဘီး ထပ်ပေါင်းထဲဟားဟယ်။

38 အယ်ဘေမဲ့ ပေါလုဟု ပံဖုလိပြည်မှာ သူးနှိနားဟုနေ ထွပ်ဟူးဘီး သာသနာခရီးဟို့ ဆောင်းထိလိုက်ဘဲဟူ သူ ဟို့ ခေါ်ဆောန်ဟို့ သင့်ဟု ဆိုဘီး ယူဆဟယ်။

39 သူးနှိဟု ပြင်းပြင်းထန်းထန်းဟူး ဂြင်းခူဂေဘီး လမ်းခွဲဂေဟယ်။ ဗာနဗဟု မာကုဟို့ ခေါ်ဘီးဟု ကုပရု ကျွန်းဟို့ သန်းဖောန သွားလိုက်ဟယ်။

40 ပေါလုဟု သိလဟို့ ဝီးကော့-က်ဘီးဟု ထွပ်ဟူး ဟယ်။ ညီကိုလေဟု ပေါလုဟို့ သခင်ဘုရားရဲ့ ကျေးဇူး တော်န အပ်လိုက်ဂေဟယ်။

41 ပေါလုဟု အယ်နေရာဟုနေ ရှုရိပြည်န ကိလိကိပြ ည်ဟို့ သွားဘီးဟု သင်းတော်လေဟို့ ခိုင်ခန့်စေဟယ်။

16

ပေါလု၊ သိလလေနတူးဒူ တိမောသေ လိုက်ဟူးကြာ န်း

1 ပေါလုဟု ဒေရဗေမြို့န လုတုတရမြို့ဟို့ ရော့-က် လာဟယ်။ လုတုတရမြို့မှာ တိမောသေ နာမယ်ရှိဟူ တမဲ့ တော်တယော့-က်ရှိဟယ်။ သူ့မိဟု ယောင်ကြည်ဟူ ယုဒ လူမျိုးဖြစ်ဟယ် သူ့ဖဟု ဟေလသလူမျိုးဖြစ်ဟယ်။

2 လုတုတရမြို့န ကူကောနိမြို့ဟု ညီကို မောန်နှမလေ ထဲမှာ အသရေရှိဘီး သတ်သေခံနိုင်ဟူ လူလည်းဖြစ်ဟယ်။

3 ပေါလုဟာ တိမောသေဟို သူးနို့တူးဒူ လိုက်ဟိုရ အောန် ဆိုဘီး အယ်နေရာမာရှိဟူ ယုဒလူမျိုးလေကြောန် သူ့ဟို ရေဖျားလီးပေးလေဟယ်။ အယ်မျိုး လောက်ရဟူ ကြောန်းဟု တိမောသေရဲ့ ဖဟု ဟောလသလူမျိုးဖြစ်ဟယ် ဆိုဇာဟို သူးနို့လေ ဂူလောင်း သိဂေဟယ်။

4 သူးနို့ဟာ မြို့လေဟို ဖြတ်ဟားဘီး ယေရုရှလင်မြို့ မာနေဟူ တမန်တော်လေန သင်းလူဂီးလေ ဆောင်းဖြတ် ဟားဟူ စည်းမျဉ်းလေဟို စောန့်ထီးဟိုတွပ် ယောင်ကြည် သူလေဟို ပေးအပ်ဂေဟယ်။

5 အယ်ကြောန် သင်းတော်လေဟာ ယောင်ကြည်မှု ပိုခိုင် မြဲလာဘီး နေ့တိုင်း လူဦးရေ တိုးပွားလာလေဟယ်။

တရောမြို့မာ ပေါလုမြင်ရဟူ ရှုပါရောင်ကြောန်း

6 သူးနို့ဟာ ဖြူဂံပြည်န ဂလာတံပြည်ဟို ဖြတ်ဟားဂေ ဟယ်။ သန်ရှင်းဟူဝိညာဉ်တော်ဟာ သူးနို့ဟို အာရှိပြည် မာ တရားဟောဟိုတွပ် ခွမ်ပေးဟူ။

7 သူးနို့ဟာ မုသိပြည်နယ်စပ်ဟို ရော-က်ဟားဂေဟူ ခီ မာ မိသုန်ပြည်ဟို သွားဟိုတွပ် ကြိုးစားဂေဟယ်။ အယ် ဘေမဲ့ သခင်ယေရှုရဲ့ ဝိညာဉ်တော်ဟာ သူးနို့ဟို ခွမ်ပေးဟု မ်း။

8 အယ်ကြောန် သူးနို့ဟာ မုသိပြည်ဟို ဖြတ်ဟားဘီး* တရောမြို့ဟို သွားဂေဟယ်။

* 16:8 ၁၆.၈ ဖြတ်ဟားဘီး၊ အယ်မျိုးမှုဘဲနေဟာ ဖြတ်သွားဟားဟယ်။

9 အယ်ညဉ်ဗာ ပေါလုဟာ “မာကေဒေါနိုပြည်ဟို့ လာဘီးဟာ ကျွန်တော့်လေဟို့ ကူညီမဇပါ” ဆိုဘီး မာကေဒေါနိုပြည်သား တယော့-က်ဟာ ရပ်ဘီးဟာ တောန်းဗန်နေဇာဟို့ ရူပါရောင်ထဲမာ မြင်ရဟယ်။

10 ပေါလုဟာ အယ်ရူပါရောင်ဟို့ မြင်ဘီးန မာကေဒေါနိုပြည်သားလေဟို့ ဒန်းကောန်းဟောဟို့တွပ် ဘုရားသခင်ဟာ နို့လေဟို့ ခေါ်တော်မူဟယ် ဆိုဘီး ရှစ်ရှင်းဘဲ မာကေဒေါနိုပြည်ဟို့ သွားဟို့တွပ် ဆောင်းဖြတ်ဂေဟယ်။

ဖိလိပုပိမြို့မာ လုဒိရဲ့ ပုလောန်းလဲရှင်းကြောင်း

11 ကျွန်တော့်လေဟာ တရောမြို့ဟုနေ သာမောသရက်ကျွန်းဟို့ သန်းဖောန သွားဂေဘီးန နော့-က်တနေ့မာ နာပေါလိမြို့ဟို့ ရော့-က်ဟားဂေဟယ်။

12 အယ်မြို့ဟုနေဘီး ဖိလိပုပိမြို့ဟို့ သွားဂေဟယ်။ ဖိလိပုပိမြို့ဟာ မာကေဒေါနိုပြည်ရဲ့ ပထမနယ်ရဲ့ မြို့တမြို့† ရောမလတ်အော့-က်ခံဟူ မြို့လည်းဖြစ်ဟယ်။ အယ်မြို့မာ ကျွန်တော့်လေဟာ ကြာဂီးနေဂေဟယ်။

13 ဒန်းနေ့မာ နို့လေဟာ မြို့ပုလန်ဟို့ ထွပ်ဂေဟယ်။ အယ်ဘီးန ဆုတောန်းဟို့တွပ် နေရာရှိနိုင်ဟယ် ဆိုဘီး စိထန်န မြစ်ကမ်းနားဟို့ သွားဘီး အယ်နေရာမာ စုနေဟူ မီးမလေဟို့ ဟောဂေဟယ်။

† 16:12 ၁၆.၁၂ မာကေဒေါနိုပြည်ရဲ့ ပထမနယ်ရဲ့ မြို့တမြို့၊ တချို့မူရင်းလတ်ရေးမူလေမာ မာကေဒေါနိုပြည်ရဲ့ မြို့ဟို့ ဦးတယ်ဟယ်၊ အယ်မျိုးမှတ်နေဟာ မာကေဒေါနိုပြည်မာရှိဟူ မြို့ဟို့ ဦးတယ်ဟယ်၊ ဆိုဘီးပါရှိဟယ်။

14 အယ်လူလေထဲမှာ သွာတိရဗြို့ဟု ခရမ်းရောင် ဝတ်လေဟို့ ရောင်းဝယ်မား လုဒ်နာမယ်ရှိဟူ မီးမတယော့-က်လည်း နားထောန်နေဟယ်။ သူဟာ ဘုရားသခင်ဟို့ ကိုးကွယ်ဟူသူ ဖြစ်ဟယ်။ သခင်ဘုရားဟာ ပေါလုဟောနေဟူ တရားစကားဟို့ အာရောင်စိုက်ဟို့တွပ် အယ်မီးမရဲ့ စံနှလောင်းဟို့ ဖွမ်ပေးဟယ်။

15 သူနတူးဒူ အီသူအီသားလေဟာ ဗတုတိဇံသီးန လုဒ်ဟု “ကျွန်မဟာ သခင်ဘုရားဟို့ တကယ်ယောင်ကြည်သူ ဖြစ်ဟယ် ဆိုဘီး ဆောင်းဖြတ်ဟယ် ဆိုဟာ ကျွန်မအီဟို့ လာဘီးဟာ နေဂေပါ” ဆိုဘီး ကျွန်တော့်လေဟို့ တောင်းဗန်လေဟယ်။

ပေါလုန သိလလေဟာ ဖိလိပုပိဗြို့မာ ထောန်ခလခရကြောင်း

16 တနေ့မာ ကျွန်တော့်လေဟာ ဆုတောင်းဟူ နေရာဟို့ သွားဂေဟူ ခီမာ ဗေဒန်ဟောနိုင်ဟူ၊ နတ်ဝမ်ပူးနေဟူ၊ စေခံမီးမဂန်း တယော့-က်ဟို့ တွံဂေဟယ်။ သူဟာ အယ်မျိုးဗေဒန်ဟောရှင်းအားဖြင့် သူဇရှင်ဟို့ ကပ်လေဘောင်ဂီး ရစေဟယ်။

17 အယ်စေခံဟာ ပေါလုန ကျွန်တော့်လေ နော့-က်ဟို့လိုက်ဘီးဟာ “အယ်လူလေဟာ မြစ်ဆောင်းဟု ဘုရားသခင်ရဲ့ စေခံလေဖြစ်ဟယ်! သူးနို့ဟာ နန်းနို့ဟို့ ဖယ်မျိုး ကယ်တန်ခံရနိုင်ဟယ် ဆိုဇာဟို့ ဟောဟူလူလေ

ဖြစ်ဟယ်” ဆိုဘီး အော်နေဟယ်။

18 အယ်မီးမဂန်းဟားဟာ ရစ်လေကြာဂီး အယ်မျိုး
လောက်နေကြောန့် ပေါလုဟာ ရရာတိုင်း စိနှောက်ရှစ်
ဖြစ်လာဘီး၊ နှော-က်ဟို့လှည့်ဘီးဟာ “နန်ဟာ အယ်မီး
မဂန်းဟားထဲဟုနေ ထွပ်ဟားလိုက်။ ယေရှုခရစ်တော်ရဲ့
နာမတော်နှိုက် နန်ဟို့ ငါ မိန့်ပေးဟယ်!” ဆိုဘီး အယ်နတ်
ဟို့ ပြောလေဟယ်။ ရှစ်ရှင်းဘဲ အယ်နတ်ဟာ ထွပ်ဟားဟ
ယ်။

19 မီးမဂန်းဟားရဲ့ ဇရှင်ဟာ သူးနို့မာ ကပ်ဝမ်ဟို့တွပ်
မျှော်လင့်ချစ်မေ့ဘီ ဆိုဇာဟို့ သိဟူ ခီမာ ပေါလုန သိ
လလေဟို့ ဖမ်းဘီးဟာ လူလေစုဝီးဟူ နေရာမာရှိနေဟူ
အာဏာပိုင်လေနားဟို့ ဆွဲခေါ်ဟားဂေဟယ်။

20 ရောမရာရှိလေရဲ့ ရှေ့ဟို့ ရော-က်ဟူ ခီမာ “အယ်
လူလေဟာ ယုဒလူမျိုးလေ ဖြစ်ဂေဟယ်။ ကျွန်တော့်လေ
မြို့ဟို့ ဆူပူအောန် လောက်နေဂေဟယ်။

21 ရောမနိုင်ငံသားလေဖြစ်ဟူ၊ ကျွန်တော့်လေ လတ်
ခံအပ်ဘဲဟူ၊ ကျင့်သောင်းအပ်ဘဲဟူ ထောင်းဒန်းစဉ်လာ
လေဟို့ သူးနို့လေဟာ သွန်သန်နေဂေဟယ်” ဆိုဘီး
လျှော့-က်ဟားဂေဟယ်။

22 လူအောက်ဂီးဟုလည်း ပေါလုန သိလလေဟို့ ဆန့်
ကျင်ဂေဟယ်။

ရာရှိလေဟာ အယ်လူနေ့ယော့-က်ရဲ့ ဝတ်လေဟို့ ဆုဖု
လဲဘီး သူးနို့ဟို့ ကီဒန်ပေးဟို့တွပ် မိန့်ပေးဂေဟယ်။

23 သူ့နှို့ဟို့ ပြင်းပြင်းထန်းထန်းဟူး ရိုက်ဘီးန ထောန်ထဲမာ ထားဟူးဂေဟယ်။ အယ်ဘီးန သူ့နှို့ဟို့ လောင်းလောင်ခြောင်းခြောင်ဟူး ထားဟို့တွပ် ထောန်မှူးဟို့ မိန်ပေးဂေဟယ်။

24 အယ်မျိုး မှာလိုက်ဟူတိုင်း ထောန်မှူးဟာ သူ့နှို့ဟို့ ထောန်ရဲ့ ထဲခန်းမာ ထားဟူးဘီးဟာ သူ့နှို့ ခေလေဟို့လည်း ထိတောင်းခတ်ဟူးလိုက်ဟယ်။

25 ညဉ့်သန်းဂေါန်ခီမာ ပေါလုန သိလလေဟာ ဘုရားသခင်ဟို့ ဆုတောင်းဘီး ချီးမွမ်းချင်း ဆိုနေဂေဟယ်။ သူ့နှို့လေ ချင်းဆိုနေဇာဟို့ တခြားထောန်သားလေလည်း နားထောန်နေဂေဟယ်။

26 အယ်ခီမာ ရှော့-က်တရစ် ပြင်းထန်ဟူ မုလေဂီး လှောက်လာဘီး ထောန်ရဲ့ အုပြစ်လေဟာ လှောက်ခါလာဟယ်။ ခွဗော့-က်လေ ဂူလောင်းဟာ ရှစ်ရှင်းဘဲ ပွမ့်ထွပ်ဟူးဘီး ထောန်သားလေ ဂူလောင်းရဲ့ ခယ်ဟူးဟူ သံကြိုးလေလည်း ပုလုထွပ်ဟူးဂေဟယ်။

27 ထောန်မှူးဟာ အိယာဟူ နိုးဟူးဘီး ပွမ့်နေဟူ ထောန်ခွဗော့-က်လေဟို့ ဗြင်ဟူ ခီမာ ထောန်သားလေဟာ ထွပ်ပုလေးဟူးဘီး ဆိုဘီး စိထန်နေဟူကြောန့် ထားဟို့ ဆွဲထုဘီးန သူ့ကိုယ်သူ သတ်ဟို့ လောက်နေဟယ်။

28 အယ်ဘေမဲ့ ပေါလုဟ “နန့်ကိုယ်နန့် အန္တရာယ်ဖြစ်စေန! နို့လေဂူလောင်း အယ်နေရာမာ ရှိနေဂေဟယ်” ဆိုဘီး သံကုလယ်ဂီးန အော်ပြောလေဟယ်။

29 ထောန်မှူးဟာ မီးတိုင်ဟို့ တောန်းဘီးန ပုလေးဝမ်ဟား ဘီး ပေါလုန သိလလေရဲ့ ခေရင်းမာ တောင်လှောက်ဘီး ပျပ်ဝပ်နေဟယ်။

30 အယ်ဘီးန သူးနို့ဟို့ ပုလန်ဟို့ ခေါ်ဆောန်လာဘီးဟာ “ဆရာလေ၊ ကျွန်တော်ဟာ ကယ်တန်ခံရဟို့တွပ် ဖြားမျိုး လောက်ဟို့နူး” ဆိုဘီး မေးလိုက်ဟယ်။

31 သူးနို့ဟုလည်း “သခင်ယေရှုဟို့ ယောင်ကြည်ပါ။ ယောင်ကြည်မယ် ဆိုဟာ နန်နု နန်မိသားစုဟာ ကယ်တန် ခံရလေ့မယ်” ဆိုဘီး ပုလန်ဖြေလေဟယ်။

32 အယ်ဘီးန သူနု သူ့အီမာရ်နီဟူ လူလေ ဂူလောင်း ဟို့ သခင်ဘုရားရဲ့ စကားတော်ဟို့ ဟောပြောဂေဟယ်။

33 အယ်ညဉ့်မာဘဲ ထောန်မှူးဟာ ပေါလုန သိလလေဟို့ ခေါ်ဘီးဟာ ဒန်ရာလေဟို့ ဆေးပေးဟယ်။ အယ်ဘီးန သူ့နု သူ့အီသူ့အီသား ဂူလောင်းဟာ ရှစ်ရှင်းဘဲ ဗတုတိဇီခံဂေဟယ်။

34 သူဟာ ပေါလုန သိလလေဟို့ သူ့အီဟို့ ခေါ်ဘီးဟာ စားဇာလေဟို့ ကျွေးဟယ်။ သူ့နု သူ့မိသားစုဟာ ဘုရားသခင်ဟို့ ယောင်ကြည်ရဂေကြောန့် ရရာတိုင်း ဝန်းသာဂေဟယ်။

35 နှော-က် တ နေ့ မိုး လ န်း ဟား ဟူ ဒီ မာ ရောမ အာဏာပိုင်လေဟာ သူးနို့လေဟို့ ထောန်ဟုနေ လွတ်လိုက်ဟို့တွပ် ရဲရာရှိလေဟို့ မိန့်ပေးလိုက်ဟယ်။

36 အယ်ကြောန့် ထောန်မှူးဟာ ပေါလုဟို့ “ရာရှိလေဟာ

နန်းနို့ဟို ထောန်ဟုနေ လွှတ်ဟို့တွပ် ပြောဟူးဟယ်။ အယ်
ကြောန့် ငြီးငြီးချမ်းချမ်းဟူး သွားဂေ့ပါ” ဆိုဘီး ပြောဟု
ယ်။

³⁷ ပေါလုဟု “ရောမနိုင်ငံသားဖြစ်ဟူ နို့လေဟို့ စစ်ကြော
စီရင်ဘဲန လူလေရှေ့မာ ရိုက်ဂေ့ဟယ်! အယ်ဘီးန နို့လေ
ဟို့ ထောန်ခလဟူးဂေ့ဟယ်။ ခုလည်းဘဲ နို့လေဟို့ တိ
တိဟူး လွှတ်လိုက်ဂေ့ဟို့လော။ အယ်မျိုးလောက်သင့်
ဟု! သူးနို့ ကိုယ်တိုင်လာဘီး နို့လေဟို့ ထောန်ဟုနေ လာ
ထုဂေ့” ဆိုဘီး ရဲရာရှိလေဟို့ ပြောဟယ်။

³⁸ ရဲရာရှိလေဟာ အယ်ကြောန်းဟို့ ရာရှိလေဟို့ ပုလန်
ပြောဂေ့ဟယ်။ ပေါလုန သိလလေဟာ ရောမနိုင်ငံသား
ဖြစ်ကြောန်းဟို့ ရာရှိလေဟာ ကြားရဟူ ခီမာ ကြော့-က်
လန်ဂေ့ဟယ်။

³⁹ အယ်ကြောန့် သူးနို့ဟာ လာဘီးဟာ ပေါလုန သိ
လလေဟို့ တိုက်တွန်းဂေ့ဟယ်။ အယ်ဘီးန သူးနို့လေဟို့
ထောန်ဟုနေ ထုဆောန်ဘီးဟာ အယ်မြို့ဟုနေ ထွပ်ဟူး
ဟို့တွပ် တောန်းဗန်ဂေ့ဟယ်။

⁴⁰ ပေါလုန သိလလေဟာ ထောန်ထဲဟု ထွပ်ဘီးဟာ လု
ဒီအီဟို့ သွားဂေ့ဟယ်။ အယ်ဘီးန ညီကို မောန်နှမလေဟို့
တို့ဘီးဟာ အားပေးစကားလေဟို့ ပြောဘီးန အယ်မြို့ဟု
နေ ထွပ်ဟူးဂေ့ဟယ်။

17

သက်သာလောနိတ်မြို့မာ မှုတော်မြတ်ကြောန်း

¹ ပေါလုန သိလဟာ ခရီးသွားဂေဟူ ခီမာ အံဖိပေါလံ မြို့န အာပေါလောနိမြို့ဟို့ ဖြတ်ဟူးဘီး သက်သာလော နိတ်မြို့ဟို့ ရော-က်ဟူးဂေဟယ်။ အယ်မြို့မာ ယုဒဝါ လယ်ဇရပ်ရှိဟယ်။

² ပေါလုဟာ သူးနို့ထောင်းဇံရှိဟူတိုင်း ဝါလယ်ဇရပ်ဟို့ သွားဘီးဟာ ဒန်းနေ့ သောင်းရစ်လောင်းလောင်း ကျမ်းစာ ဟို့ ကိုးကားဘီးဟာ လူလေန သေးသေချားချာဟူး ဆွေး နှီးဂေဟယ်။

³ မေရှိယဟာ ဒေါက်ခဝေဒနာခံရဟူ ကြောင်းဟို့ ကျမ်း ချစ် ထော့-က်ထားလေနတူးဒ ရှင်းရှင်းလန်းလန်းဟူး ပြောပြဟယ်။ ပေါလုဟ “နန်းနို့ဟို့ ငါပြောပြနေဟူ ယေရှု ဟာ မေရှိယဖြစ်ဟယ်” ဆိုဘီး ပြောဟယ်။

⁴ ယုဒလူတချို့ဟာ သွီးဆောန်ခံရဘီး ပေါလုန သိလ လေရဲ့ ဖွဲ့ထဲဟို့ ဝမ်ဟူးဂေဟယ်။ ဘုရားသခင်ဟို့ ကိုးကွ ယ်ဟူ ဟေလသလူမျိုး ဘောင်ဂီးန ထန်ပေါကျော်ကြားဟူ မီးမလေလည်း သူးနို့ဖွဲ့ထဲဟို့ ဝမ်ဂေဟယ်။

⁵ အယ်ဘေမဲ့ ယုဒလူ တချို့ဟာ နာလိုဘဲဟူ စိရှိဟူ ကြောန့် လမ်းလေမာ ကောင်းဘဲဟူ လူလေဟို့ ခေါ်ဘီး ဟာ လူလေဘောင်ဂီးဟို့ စုခိုင်းဘီးဟာ တမြို့လောင်း ဆူ ပူအောန် လောက်ဂေဟယ်။ သူးနို့ဟာ ယာသုန်ရဲ့အီဟို့ ဝမ် ဘီးဟာ ပေါလုန သိလလေဟို့ လူလေရှေဟို့ ဆွဲထုဟို့တွပ် ရှာဂေဟယ်။

⁶ ရှာတို့ဘဲဟူ ခီမာ သူးနို့ဟာ ယာသုန်န ညီကို မောန်

နှမလေ တချို့ဟို့ မြို့ရဲ့ အာဏာပိုင်လေရဲ့ဟို့ ခေါ်ဆော
န့်ဟူးဘီးဟာ “အယ်လူလေဟာ လောကီနိုင်ငံရဲ့ နေရာ
တိုင်းမာ ဒေါက်ခပေးနေဂေဟယ်။ သူးနို့ဟာ ခုလည်း ကျွန်
တော့်လေရဲ့မြို့ဟို့ ရော့-က်လာဂေဟယ်။

⁷ ယာသုန်ဟာ အယ်လူလေဟို့ သူ့အီမာ လတ်ခံဟူးဟ
ယ်။ အယ်လူလေဟာ ယေရှုနာမယ်န မန်းဂီးတပါးရှိဟယ်
ဆိုဘီး ကဲသာမန်းဂီးရဲ့ မိန့်တော်ဟို့ ဆန့်ကျင်ဖတ် လောက်
နေဂေဟယ်” ဆိုဘီး အော်ဂေဟယ်။

⁸ အယ်မျိုး စကားလေန သူးနို့လေဟာ လူအောက်ဂီးန
မြို့အာဏာပိုင်လေဟို့ ရောက်ရောက်သဲသဲ လောက်ဂေဟ
ယ်။

⁹ အာဏာပိုင်လေဟာ ယာသုန်န လောက်ဖော်ဆောန်
ဖတ်လေဟို့ အာမခံဖြစ်န ကပ်ပေးခိုင်းဘီးဟာ ထွပ်ဟူး
ဟို့တွပ် ခွမ်ပြုလိုက်ဂေဟယ်။

ဗေရိမြို့မာ မှုတော်မြတ်ကြောန်း

¹⁰ ညဉ့်ခန်းဇာ ရော့-က်လာဟူ ခီမာ ညီကို မောန်နှမလေ
ဟာ ပေါလုန သိလလေဟို့ ဗေရိမြို့ဟို့ စေလွှတ်ဂေဟယ်။
အယ်မြို့ဟို့ ရော့-က်ဟူ ခီမာ သူးနို့ဟာ ယုဒဝါလယ်ဇရပ်
ဟို့ သွားဂေဟယ်။

¹¹ ဗေရိမြို့သားလေဟာ သက်သာလောနိတ်မြို့ဟု လူ
လေထတ် စိထားမြတ်ဂေဟယ်။ အယ်ကြောန့် ပေါလု
ဟောဟူ တရားဟို့ ရရာတိုင်း ကြည်ညိုဟူစိန နာခံဂေ
ဟယ်။ သူးနို့ဟာ ပေါလု ပြောဇာလေဟာ တကယ်မှန်ဘဲ

လား ဆိုဘီး သိနိုင်ဟို့တွပ် နေ့တိုင်းကျမ်းစာဟို့ လေ့လာ
ဂေ့ဟယ်။

¹² အယ်ကြောန့် လူလေဘောင်ဂီး ယောင်ကြည်လာဂေ့
ဟယ်။ အယ်မျိုး ယောင်ကြည်သူလေထဲမာ ဂေါန်သရေရှိ
ဟူ ဟေလသလူမျိုး မီးမန ယော့-က်ကျားလေလည်း ပါ
ဝမ်ဂေ့ဟယ်။

¹³ ဗေရိမြို့မာ ဘုရားသခင်ရဲ့ စကားတော်ဟို့ ပေါလု
ဟောနေဟယ် ဆိုဇာဟို့ သက်သာလောနိတ်မြို့ဟု ယုဒ
လူမျိုးလေဟာ ကြားရဂေ့ဟူ ခီမာ ဗေရိမြို့ဟို့ လာဂေ့ဘီး
ဟာ လူလေဟို့ ဆူပူအေန် နှိုးဆော်ဂေ့ဟယ်။

¹⁴ ညီကို မောန်နှမလေဟာ ရှစ်ရှင်းဘွဲ ပေါလုဟို့ ပန်
လယ်ကမ်းခြေဟို့ သွားခိုင်းလိုက်ဟယ်။ သိလန တိမော
သေလေဟု ဗေရိမြို့မာဘွဲ နေရစ်ဂေ့ဟယ်။

¹⁵ ပေါလုဟို့ လိုက်ပို့ဂေ့ဟူ လူလေဟာ သူနတူးဒု အာ
သင်မြို့ထိ လိုက်ဟွားဂေ့ဟယ်။ အယ်ဘီးန သိလန တိ
မောသေလေဟို့ မြန်းမြန်ဟွား လိုက်လာဟို့တွပ် ညွှန်ကြား
ချစ်ဟို့ ယူဘီးန ဗေရိမြို့ဟို့ ပုလန်ဟွားဂေ့ဟယ်။

အာသင်မြို့မာ မှတော်ဆောန်ဟူကြောန်း

¹⁶ ပေါလုဟာ အာသင်မြို့မာ သိလန တိမောသေလေ
ဟို့ စောန်နေဒူးမာ အယ်မြို့မာ ရောက်ထုလေဘောင်ဂီး ရှိ
နေဟယ် ဆိုဇာဟို့ မြင်ဟူ ခီမာ ရရာတိုင်း စိကောန်းဘဲ ဖြ
စ်ဟွားဟယ်။

17 အယ်ကြောန့် ဝါလယ်ဇရပ်မာ ယုဒလူမျိုးလေ၊ ဘုရားသခင်ဟို့ ကိုးကွယ်ဟူ လူမျိုးခြားလေ နေ့တိုင်းမြို့ထဲဟု လူလေစုဝီးဟူ နေရာဟို့ လာဂေဟူ လူလေန ဆွေးနွီးဂေဟယ်။

18 ဧပိုကုရုန သတောအိပ် တွေးခေါ်ညာရှင်လေ တချို့လည်း ပေါလုန ဆွေးနွီးငြင်းခုဂေဟယ်။ အယ်လူလေထဲမာ တချို့ဟု “အယ်လူဟာ ဖြားဇာပြောနေနူး” ဆိုဘီးပြောဂေဟယ်။

တခြားလူလေဟု “သူဟာ လူမျိုးခြားလေရဲ့ နတ်ဘုရားလေရဲ့ ကြောန်းဟို့ ပြောနေဇာနတူဟယ်” ဆိုဘီး ပြောဂေဟယ်။ ပေါလုဟာ ယေရှုကြောန်းန ရှင်ပုလန်ထမြော့-က် ရှင်းကြောန်း*ဖြစ်ဟူ ဒန်းကောန်းဟို့ ဟောပြောကြောန့် သူးနို့လေဟာ အယ်မျိုး ပြောနေဂေဇာဖြစ်ဟယ်။

19 အယ်ကြောန့် အယ်လူလေဟု ပေါလုဟို့ အာရေပါဂု တရားရောင်းဟို့ ခေါ်ဆောန်ဟူးဂေဘီးဟာ “နန်ဟောပြောနေဟူ ယူဝါဒသစ်ကြောန်းဟို့ နို့လေလည်း သိရှင်ဟယ်။

20 နန်ဟောပြောဟူ ကြောန်းရာတချို့ဟာ နို့လေတွပ်သစ်ဆန်းဖြစ်နေဟယ်။ အယ်ကြောန်းရာရဲ့ ဓိပါယ်ဟို့လည်း နို့လေသိရှင်ဟယ်” ဆိုဘီး ပြောဂေဟယ်။

21 အာသင်မြို့သား ဂူလောင်းန အယ်မြို့မာနေဟူ

* 17:18 ၁၇.၁၈ ယေရှုကြောန်းန ရှင်ပုလန်ထမြော့-က်ရှင်းကြောန်း၊ ဟေလသစကားမာ ဆိုဟာ ရှင်ပုလန်ထမြော့-က် စကားလောင်းရဲ့ ဓိပါယ်ဟု နတ်သမီးရဲ့ နာမယ်တခုဖြစ်ဟယ် ဆိုဇာ နားလည်ဂေဟယ်။

ညွှတ်သည်လေဟာ ကြောန်းရာသစ်ဆန်းလေဟို ပြောဇာ
န နားထောန်ဇာ အားဖြင့်ဘဲ ခိုဟို ကူစေဂေဟယ်။

²² ပေါလုဟာ အာရေပါဂု တရားရောင်းရှေ့မှာ ရပ်ဘီး
“အာသင်မြို့သားလေ၊ နန်းနို့ဟာ ရရာတိုင်း ဘုရားတရား
ဟို ကြည်ညိုဟူ လူလေဖြစ်ဟယ် ဆိုဇာဟို ငါမြင်ဟယ်။

²³ ကျွန်တော့်ဟာ ခန်ဗျားလေရဲ့ မြို့ဟို ရှော့-က်လည်
ဘီး ကိုးကွယ်ဟူဇာလေဟို ကေ့ဟူ ခီမာ ‘နှိုလေ သိဘဲဟူ
ဘုရားတွပ်’ ဆိုဘီး နာမယ်ရေးဟားဟူ ယဇ်ပလ္လင်တခုဟို
တွံဟယ်။ အယ်မျိုး ခန်ဗျားလေသိဘဲန ကိုးကွယ်နေဟူ
ဘုရားကြောန်းဟို ခု ကျွန်တော်ပြောပြမယ်။

²⁴ ကမ္ဘာလောကဂီးန ရှိဇာဂူလောင်းဟို ဖန်ဆင်းဟူ
ဘုရားသခင်ဟာ ကောန်းဂန်န မှလေဂီးရဲ့ သခင်ဖြစ်ဟူ
ကြောန့် လူလတ်န ဆော့-က်ဟားဟူ ဗိမာန်တော်လေမာ
နေဇာ မူဟူ။

²⁵ အယ်သခင်ကိုယ်တိုင်ဘဲ လူလေ ဂူလောင်းဟို သတ်
နတူးဒု တခြားရာ ဂူလောင်းဟိုလည်း ပေးသနားတော်မူ
ဟယ်။ အယ်ကြောန့် သူဟာ တခုခုဟို လိုရှင်ဟူကြောန့်
လူလတ်န ပြုစုဇာဟို ခံတော်မူဟူ။

²⁶ ကိုယ်တော်ဟာ လူတယော့-က်ဟုနေဘီး လူမျိုးဂူ
လောင်းဟို ဖန်ဆင်းလိုက်ဘီး တကမ္ဘာလောင်းမာ သူးနှိုဟို
နေစေဟယ်။ အယ်လူမျိုး ဂူလောင်းဟို သတ်ရှင်နေထိုင်
ဟို့တွပ် ခီကာလန နေရာလေဟို ကြိုတန်ပိုင်းခြား သတ်မှ

တ်ဟူးဘီး ပေးဟူးဟယ်။

27-28 အယ်မျိုးလောက်ဇာဟာ လူလေဟာ ကိုယ်တော့်
ဟို့ တို့လိုတို့ငြား စမ်းသပ်ဘီး ရှာဟို့တွပ်ဘွဲ ဖြစ်ဟယ်။”

“ကျွန်တော့်လေဟာ ကိုယ်တော်ကြောန့် သတ်ရှင်ဘီး
လောက်ရှား နေရဂေဟယ်။”

အယ်ကြောန့် တကယ်ဆိုဟာ ဘုရားသခင်ဟု ဖယ်သူနလ
ည်းဝီးဇာ မူဟု။ ခန်ဗျားဟူးလေထဲမာ ကဗျာဆရာတချို့
ဟု၊

“နို့လေဟာ ကိုယ်တော်ရဲ့ သားမီးလေ ဖြစ်ဂေဟယ်” ဆို
ဘီး ပြောဟူးဟယ်။

29 “ကျွန်တော့်လေဟာ ဘုရားသခင်ရဲ့ သားမီးလေ ဖြစ်
ဂေဟူကြောန့် ဘုရားသခင်ဟို့ လူရဲ့နုပညာန ကျွမ်းကျင်
ရှင်းအားဖြင့် ထုလောက်ဟူးဟူ ရွှေရောက်ထု၊ ငွေရောက်
ထု၊ ကုလော့-က်ရောက်ထုနတူဟယ် ဆိုဘီး ထန်မှတ်သင့်
ဟု။

30 ဘုရားသခင်ဟာ လူလေသိနားလည်ဘဲဟူ ခီကာလဟို့
ရှုမှတ်တော် မူဟု။ အယ်ဘေမဲ့ ခု နေရာတိုင်းဟု လူလေဂူ
လောင်းဟို့ နှောန်ဒရဟို့တွပ် မိန့်တော်မူဟယ်။

31 ဖြားဖြစ်ကြောန့်နူးဆိုဟာ ကိုယ်တော် ဝီးကော့-က်ဟူး
ဟူ လူအားဖြင့် လောကသားလေဟို့ ဖြောန်မတ်ရှင်းတရား
န စီရင်မယ့် နေရစ်ဟို့ သတ်မှတ်ဟူးကြောန့် ဖြစ်ဟယ်။
အယ်မျိုးဖြစ်မယ် ဆိုဇာဟို့ အယ်သခင်ဟာ သေရာဟုနေ
ထမြော့-က်ရှင်းအားဖြင့် လူလေဂူလောင်းဟို့ အယ်သတ်

သေဟို့ ပြဟားဟယ်” ဆိုဘီး ပြောဟယ်။

³² သေရာဟုနေ ထမြော-က်ကြောင်းဟို့ ကြားရဟူ ခီမာ တချို့လူလေဟု ရယ်ဇားဂေဟယ်။ အယ်ဘေမဲ့ တချို့လူ လေဟု “နန်ပြောနေဟူကြောင်းဟို့ နို့လေဟု နှော-က်တခါ ကြားရှင်သေးဟယ်” ဆိုဘီး ပြောဂေဟယ်။

³³ အယ်ဘီးန ပေါလုဟာ စည်းဝေးဟုနေ ထွပ်ဟားလို က်ဟယ်။

³⁴ တချို့လူလေဟာ ပေါလုန ပေါန်းဘီးဟာ ယောင် ကြည်သူလေ ဖြစ်လာဂေဟယ်။ အယ်လူလေထဲမာ ဒ ယောနသိ နာမယ်ရှိဟူ အာရေတောင် တရားရောင်းရဲ့ ဖွဲ့ ဝမ်တယော့-က်၊ ဒမာရိ နာမယ်ရှိဟူ မီးမတယော့-က်န တခြားလူ တချို့လည်း ပါဂေဟယ်။

18

ကောရိန်မြို့မာ မူတော်ဆောန်ဟူကြောင်း

¹ အယ်ဘီးန ပေါလုဟာ အာသင်မြို့ဟု ထွပ်ဟားဘီး ကောရိန်မြို့ဟို့ ရော့-က်ဟားဟယ်။

² အယ်မြို့မာ ပုနုတုပြည်သား အာကုလ နာမယ်ရှိဟူ ယုဒလူမျိုးတယော့-က်န သူမယား ပြစ်ကိလလေဟို့ တွဲ ဟားဟယ်။ ယုဒလူမျိုးလေဟု ရောမမြို့ဟုနေ ထွပ်ဟား ဟို့တွပ် ကလောဒီမန်းဂီးဟု မိန့်ထုဟားဟူကြောန် သူးနို့ ဟာ ကြာသေးခန်ဟု ဣတလိပြည်ဟုနေ ထွပ်လာဂေဟူ လူလေဖြစ်ဟယ်။

3 အယ်လူလေဟာ ပေါလုမျိုးဘဲ တဲရှင်ချောက်ဘီး သတ်မွီးနေဟူ တဲရှင်ချောက်မားလေ ဖြစ်ဂေဟယ်။ အယ်ကြောန့် ပေါလုဟာ သူးနိုလေနားဟို သွားဘီးဟာ သူးနိုနတူးဒု လောက်ဂေဟယ်။

4 ယုဒလူမျိုးနု ဟေလသလူမျိုးလေဟို သွီးဆောန်ဟို တွပ် သူဟာ ဒန်းနေတိုင်း ဝါလယ်ဇရပ်မာ ဆွေးနွီးဂေဟယ်။

5 သိလနု တိမောသေလေဟာ မာကေဒေါနိုပြည်ဟုနေ ရှေ့-က်လာဂေဟူ ခီမာ ပေါလုဟာ ယုဒလူမျိုးလေဟို တခီလောင်း တရားဟောပြောဘီးနု ယေရှုဟာ မေရှိယဖြစ်ဟယ် ဆိုဘီး သတ်သေခံလေဟယ်။

6 ယုဒလူမျိုးလေဟာ သူဟို စော်ကားဘီး ပြောနေဟူ ခီမာ ပေါလုဟာ သူ့အန်းဂီဟုနေ ဖောင်လေဟို ခါခုလဘီးဟာ “နန်းနိုရဲ့ သွီးဟာ နန်းနို ခေါင်းထတ်မာ ရှိပါစေ! ငါ့တာဝန် မူဟူ။ ခုဟုစဘီး ငါဟာ လူမျိုးခြားလေနားဟို သွားမယ်” ဆိုဘီး ပြောဟယ်။

7 အယ်ဘီးနု အယ်လူလေနားဟု ထွပ်ဟားဘီးဟာ ဘုရားသခင်ဟို ကိုးကွယ်ဟူ တိတုယုတုတု နာမယ်ရှိဟူ လူမျိုးခြားရဲ့ အီဟို သွားဘီးဟာ နေလေဟယ်။ သူ့အီဟာ ဝါလယ်ဇရပ်နု ကပ်နေဟယ်။

8 ဝါလယ်ဇရပ်မူးဖြစ်ဟူ ကရိပုပုနု သူ့မိသားစုဂူလောင်းဟာ သခင်ဘုရားဟို ယောင်ကြည်ဟူသူလေ ဖြစ်လာဂေဟယ်။ တခြား ကောရိနုသုမြို့သား ဘောင်ဂီးဟုလည်း

တရားတော်ကို ကြားရဟူ ခီမာ ယောင်ကြည်ဘီးဟာ ဗတု တိဇိခံဂေဟယ်။

9 တညဉ်မာ ပေါလုဟာ ရှုပါရောင်ကို မြင်ရဟယ်။ ရှုပါ ရောင်ထဲမာ သခင်ဘုရားဟု “ကြော့-က်န။ ဆစ်ဘီးဟော ပါ။ လတ်ရှောန။

10 ဖြားဖြစ်ကြော့နန်းဆိုဟာ ငါဟာ နန်းတူးဒု ရှိဟယ်။ ဖယ်သူဟုလည်း နန်းကို ဘေးပြုနိုင်ဟု။ အယ်မြို့မာရှိဟူ လူဘောင်ဂီးဟု ငါ့လူလေ ဖြစ်ဂေဟယ်” ဆိုဘီး ပြောဟယ်။

11 ပေါလုဟာ အယ်မြို့မာ တနှစ်နခြော့-က်လ နေဘီး ဟာ ဘုရားသခင်ရဲ့ စကားတော်ကို သွန်သန်လေဟယ်။

12 ဂါလုန်ဟာ အခါယပြည်ရဲ့ မြို့ဝန်မန်း ဖြစ်နေဟူ ခီမာ ယုဒလူမျိုးလေဟာ စုဘီး ပေါလုကို ဖမ်းဘီးဟာ တရားပလ္လင်ရှေ့ကို ခေါ်ဆောင်လာဂေဟယ်။

13 သူးနို့ဟု “အယ်လူဟာ ပညတ်တရားကို ဆန့်ကျင်ဘီး ဘုရားသခင်ကို ကိုးကွယ်ဂေဟို့တွပ် လူလေဟို့ သွီးဆော န်နေဟယ်” ဆိုဘီး လျော့-က်ဂေဟယ်။

14 ပေါလုဟာ စကားပြောဟို့ လောက်နေဒူးမာ ဂါလုန် ဟု “ယုဒလူမျိုးလေ၊ အယ်မူဟာ ကောန်းဘ်ဟူမူ၊ တရား ဘ်ဟူမူဖြစ်ဟယ် ဆိုဟာ ငါဟာ နန်းနို့ရဲ့ စွပ်စွဲချစ်လေဟို့ စိရယ်လတ်ရှယ်န နားထောန်နိုင်ဟယ်။

15 အယ်ဘေမဲ့ အယ်မူဇာဟာ စကားလေ၊ နာမယ်လေ န ပညတ်တရားနဆိုင်ဟယ် ဆိုဟာ နန်းနို့ ကိုယ်တိုင်ဘဲ

ဆောင်းဖြတ်ဂေ့။ အယ်မှုဟို ငါစီရင်ဟ” ဆိုဘီး ပြောဟယ်။

¹⁶ ယုဒလူမျိုးလေဟို တရားပလ္လင်ရှေ့ဟုနေ နှိပ်ထုလိုက်ဟယ်။

¹⁷ အယ်လူလေဟာ ဝါလယ်ဇရပ်မှူး သုဿင်ဟို ဖမ်းဘီးဟာ တရားပလ္လင်ရှေ့မာ ရိုက်ဂေ့ဟယ်။ အယ်ဘေမဲ့ဂါလုန်ဟာ အယ်မှုဟို လောင်းဝ ဂရုစိုက်ဘဲနေဟယ်။

အနုတိအုတ်မြို့ဟို ပေါလု ပုလန်ရော့-က်လာဟူကြောန်း

¹⁸ ပေါလုဟာ ကောရိနုသုမြို့မာ ကြာဂီးနေဟယ်။ အယ်ဘီးန ညီကို မောန်နမလေဟို နောက်ဆစ်ဘီး ပြစ်ကံလ၊ အာကုလလေနတူးဒူ ရှုရိပြည်ဟို သန်းဖေန သွားဂေ့ဟယ်။ ကင်ခြေမြို့ဟုနေ သန်းဖေန ထွပ်ခန်မာ သူဟာ ဘုရားသခင်ဟို သစ်စာဂဒိ ပြဟားဟူကြောန်း* သူခေါင်းဟို ရိုလိုက်ဟယ်။

¹⁹ ဖေက်မြို့ဟို ရော့-က်ဟားဟူ ခီမာ ပေါလုဟာ ပြစ်ကံလန အာကုလလေဟို မြို့မာထားရစ်ဟယ်။ သူဟာ ဝါလယ်ဇရပ်ဟို ဝမ်ဘီးဟာ ယုဒလူမျိုးလေန ဆွေးနွီးဟယ်။

²⁰ လူလေဟာ သူးနှိန်တူးဒူ ကြာဂီးနေဟိုတွပ် တိုက်တွန်းဂေ့ဘေမဲ့လည်း ပေါလုဟာ လတ်ခံဟယ်။

* 18:18 ၁၈.၁၈ သစ်စာဂဒိ ပြဟားဟူကြောန်း၊ ယုဒလူမျိုးရဲ့ ထောင်းဒန်းခလေမာ ခေါင်းရိဇဟာ သစ်စာဂဒိပြဟူ လတ်ခဏာဖြစ်ဟယ် ဆိုဇာဟို ရည်ညွှန်းဟယ်။

21 အယ်မျိုးပြောမယ့်စား “ဘုရားသခင်ဟု လိုတော်ရှိမယ် ဆိုဟာ နန်းနိနားဟို ပုလန်လာမယ်” ဆိုဘီး ဖောက်မြို့ဟုနေ သန်းဖောန ထွပ်ဟူးလေဟယ်။

22 သူဟာ ကဲသရိမြို့ဟို ရော့-က်ဟူးဟူ ခီမာ ယေရုရှလင်မြို့ဟို တတ်ဟူးဘီး သင်းတော်ဟို နှောက်ဆစ်ဘီး အနုတိအုတ်မြို့ဟို သွားလေဟယ်။

23 အယ်မြို့မာ ကြာဂီးနေဘီးန ပုလန်ထွပ်ဟူးဘီး၊ ဂလာတိပြည်န ဖြူဂိပြည်ဟို လှည့်လည်ဘီး တမဲ့တော်လေဟို ခိုင်ခန့်မြဲမြဲ စေလေဟယ်။

အာပေါလုဟာ ဖောက်မြို့န ကောရိနုသုမြို့လေမာ တရားဟောဟူကြောန်း

24 အယ်ခီမာ အာလေဇနဒြိမြို့သား အာပေါလု နာမယ်ရှိဟူ ယုဒလူမျိုးတယော့-က်ဟာ ဖောက်မြို့ဟို ရော့-က်လာဟယ်။ သူဟာ ကျမ်းစာဟို ကျမ်းကျင်ဘီး ဟောပြောကောင်းဟူ လူဖြစ်ဟယ်။

25 သူဟာ သခင်ဘုရားရဲ့ လမ်းစဉ်ဟို သေးသေချားချာဟူး သွန်သန်ခံဟူးရဟူလူ ဖြစ်ဟယ်။ သူဟာ စိအားထတ်သန်ဘီး ယေရုရှလင်ဟို မှန်းမှန်ကန်းကန်ဟူး သွန်သန်နေဟယ်။ အယ်ဘေမဲ့ သူဟာ ယောဟန်ရဲ့ ဗတုတိဇီဟိုဘွဲ့ သိဟယ်။

26 သူဟာ ဝါလယ်ဇရပ်မာ စဘီးဟာ ရဲရဲရင့်ရင့်ဟူးဟောနေဟယ်။ သူဟောပြောချစ်လေဟို ကြားရဟူ ပြစ်ကိလန အကုလလေဟာ သူဟို အီဟို ခေါ်ဘီးဟာ

ဘုရားသခင်ရဲ့ လမ်းစဉ်ဟို့ သေးသေချားချာဟွား ရှင်း ပြပေးဂေဟွယ်။

²⁷ အယ်ဘီးန သူဟာ အခါယပြည်ဟို့ သွားဟို့ ဆောင်း ဖြတ်လိုက်ဟွယ်။ အယ်ကြောန့် ဖေက်မြို့ဟု ယောင်ကြည် သူလေဟာ သူဟို့ လတ်ခံဟို့တွပ် အခါယပြည်ဟု ယောင် ကြည်သူလေနားဟို့ စာရေးပေးရှင်းအားဖြင့် ကူညီပေး ဂေဟွယ်။ သူဟာ အခါယပြည်ဟို့ ရော့-က်ဟူ ခီမာ ဘုရားသခင်ရဲ့ ကျေးဇူးတော်အားဖြင့် ယောင်ကြည်လာ ဟူ လူလေဟို့ ဘောင်ဂီး ကူညီပေးဟွယ်။

²⁸ ဖြားဖြစ်ကြောန့်နိုးဆိုဟာ သူဟာ ကျမ်းစာအားဖြင့် ယေရှုဟာ မေရှိယ ဖြစ်ဟူကြောန့်ဟို့ ထော့-က်ပြဘီး လူ လေရှေ့မာ ယုဒလူမျိုးလေဟို့ ပိုင်းပိုင်ဟွား ချေပလေဟွယ်။

19

ပေါလုဟာ ဖေက်မြို့ဟို့ ရော့-က်လာကြောန့်

¹ ကောရိန့်မြို့မာ အာပေါလု ရှိနေဟူ ခီမာ ပေါလုဟာ ထတ်မာ ဖော်ပြဟွားဟူ နေရာလေဟို့ ရော့-က်သွားဘီးန ဖေက်မြို့ဟို့ ရော့-က်လာဟွယ်။ အယ်မြို့မာ တမဲ့တော် တချို့ဟို့ တွံဘီး၊

² သူးနို့ဟို့ “နန်းနို့လေဟာ ယောင်ကြည်သူလေ ဖြစ်လာ ဂေဟူ ခီမာ သန်ရှင်းဟူဝိညာဉ်တော်ဟို့ လတ်ခံဂေဘီး လော” ဆိုဘီး မေးဟွယ်။

အယ်လူလေဟု “သန့်ရှင်းဟူဝိညာဉ်တော်ရှိဟယ် ဆိုဇာ
ဟို့ ကျွန်တော့်လေ ကြားဖူးဟု” ဆိုဘီး ပြောဂေဟယ်။

³ ပေါလုဟု “အယ်မျိုးဆိုဟာ နန်းနို့ဟာ ဖြားမျိုးစား ဗ
တုတိဇ်ဟို့ ခံဟားနူး” ဆိုဘီး မေးဟယ်။

အယ်လူလေဟု “ယောဟန်ရဲ့ ဗတုတိဇ်ဟို့ ခံဟားဟယ်”
ဆိုဘီး ပုလန်ဖြေဂေဟယ်။

⁴ ပေါလုဟု “ယောဟန်ရဲ့ ဗတုတိဇ်ဟာ နောက်ဒနဆိုင်
ဟူ ဗတုတိဇ်ဖြစ်ဟယ်။ ယောဟန်ဟာ သူ့နော့-က်မာ ကြွ
လာဟူ သခင်ဟို့ ယောင်ကြည်ရမယ် ဆိုဘီး ကူသရေလ
လူမျိုးလေဟို့ ပြောရစ်ဟယ်။ အယ်သခင်ဟာ ယေရှုဘွဲ့
ဖြစ်ဟယ်” ဆိုဘီး ပြောဟယ်။

⁵ အယ်စကားဟို့ ကြားရဟူ ခီမာ သူးနို့ဟာ သခင်ယေရှု
နာမနှိုက် ဗတုတိဇ်ခံဂေဟယ်။

⁶ ပေါလုဟာ သူးနို့ခေါင်းထတ်ဟို့ လတ်တန်လိုက်
ဟူ ခီမာ သန့်ရှင်းဟူဝိညာဉ်တော်ဟာ သူးနို့ထတ်ဟို့
ရော့-က်လာဟယ်။ အယ်ဘီးန သူးနို့ဟာ ထူးဆန်းဟူ
ဘာသာစကားလေဟို့ ပြောဂေဘီး ဘုရားသခင်ရဲ့ တရား
တော်ဟို့လည်း ပရောဖက်ပြုဘီး ဟောပြောဂေဟယ်။

⁷ သူးနို့ဟာ အားလောင်းပေါန်း လူဆယ့်နှေ့ယော့-က်
လော့-က် ရှိဟယ်။

⁸ ပေါလုဟာ ဝါလယ်ဇရပ်ထဲဟို့ ဝမ်ဟားဘီး
သောင်းလလောင်းလောင်း ရဲရဲရင့်ရင့်ဟား ဟောပြောဘီး

ဘုရားသခင်ရဲ့ နိုင်ငံတော်ကြောင်းကို ဆွေးနွေးဘီး လူလေ
ဟို့ သွီးဆောန်လေဟယ်။

⁹ အယ်ဘေမဲ့ လူတချို့ဟာ ခေါင်းမာဘီး ယောင်ကြည်
ဘဲန လူလေရှေ့မာ သခင်ဘုရားရဲ့ လမ်းစဉ်လေဟို့ ကဲ့ရဲ့
ဂေ့ဟယ်။ အယ်ကြောန့် ပေါလုဟာ တမဲ့တော်လေဟို့ ခေါ်
ဘီး အယ်လူလေနားဟုနေ ထွပ်ဟားဘီးဟာ တုရနန့်ရဲ့ စာ
သန်ခန်းမမာ နေ့တိုင်း* ဆွေးနွေးဗွဲလေ လောက်ဟယ်။

¹⁰ နှေ့နှစ်လောင်းလောင်း အယ်မျိုးလောက်ဟူကြောန့်
အာရုံပြည်မာနေဟူ ယုဒလူမျိုးလေန ဟေလသလူမျိုးလေ
ဟာ သခင်ဘုရားရဲ့ စကားတော်ဟို့ ကြားရဂေ့ဟယ်။

သကေဝရဲ့ သားလေကြောင်း

¹¹ ဘုရားသခင်ဟာ ပေါလုအားဖြင့် ရရာတိုင်း ထူးခြား
ဟူ နိမိတ်လတ်ခဏာလေဟို့ ပြတော်မူဟယ်။

¹² ပေါလုသောင်းဟားဟူ လတ်ကိုင်ပဝါန ခါးဗတ်လေ
ဟို့ လူနာလေနားဟို့ ယူဆောန်ဟားဟူ ခီမာ သူးနို့ဟာ
ရောဂါပျော့-က်ဟားဘီး နတ်ဆိုးလေလတ်ဟုနေလည်း
လွတ်ဟားဂေ့ဟယ်။

¹³ နယ်တကာလှည့်ဘီး နတ်ဆိုးလေဟို့ နန်ထုနေဟူ ယုဒ
လူတချို့ဟာ သခင်ယေရှုရဲ့ နာမဟို့ သောင်းပြုဘီး နတ်
ဆိုးဟို့ နန်ထုဟို့ ကြိုးစာဂေ့ဟယ်။ သူးနို့ဟာ “ပေါလုဟော

* 19:9 ခဉ်း တချို့ မူရင်းလတ်ရေးမူလေမာ မိုးလန်း ၁၁ နာရီ ဟုနေဘီး
နေဒန် ၄ နာရီထိ၊ ဆိုဘီး ပေါင်းထဲဟားဟယ်။

နေဟူ ယေရှုရဲ့ နာမန နှံ့ဟို့ ငါနှံ့ထုဟယ်” ဆိုဘီး နတ်ဆိုးဟို့ မိန့်ပေးဂေဟယ်။

14 အယ်မျိုးလောက်နေဟူ သူလေဟာ သာကေဝ နာမယ်ရှိဟူ ယုဒယဇ်ပုရောဟိတ်ဂီးရဲ့ သားခွန်နစ်ယော့-က် ဖြစ်ဂေဟယ်။

15 အယ်ဘေမဲ့ နတ်ဆိုးဟ “ယေရှုဟို့ ငါသိဟယ်။ ပေါလုဟို့လည်း ငါသိဟယ်။ အယ်ဘေမဲ့ နန်းနို့ဟ ဖယ်သူလေနှူး” ဆိုဘီး သူးနို့ဟို့ မေးလိုက်ဟယ်။

16 အယ်ဘီးန နတ်ဆိုးဝမ်နေဟူ လူဟာ သူးနို့ဟို့ ပြင်းပြင်းထန်းထန်းဟား တိုက်ခိုက်ဂေဟယ်။ သူးနို့ဟာ ခုလေးဗုလန်းဗုလန်းန၊ ဒန်ရာလေန အီထဲဟုနေ ထွပ်ပုလေးဂေဟယ်။

17 အယ်ကြောင်းဟို့ ဖေက်မြို့မနေဟူ ယုဒလူမျိုးလေန ဟေလသလူမျိုးလေဟာ ကြားရဂေဟယ်။ သူးနို့ဟာ ရရာတိုင်း ကြော့-က်ဂေဘီးဟာ သခင်ယေရှုရဲ့ နာမဟို့ ချီးမွမ်းဂေဟယ်။

18 ယောင်ကြည်သူလေဟာ ရော့-က်လာဂေဘီး သူးနို့လောက်မိဟူ ဇာလေဟို့ ပွမ်ပွမ်လန်းလန်းဟား ဖော်ပြဘီးဟာ ဝန်ခံဂေဟယ်။

19 နတ်ဝိဇ္ဇာတတ်ဟို့ သောင်းဟူလူလေဟာ သူးနို့ စာစောန်လေဟို့ စုစည်းယူလာဘီး လူအားလောင်းရှေ့မာ မီးရှို့ဂေဟယ်။ အယ်စာစောန်လေရဲ့ တန်ဖိုးဟို့ တွပ်ကေ့ဟူ

ခီမာ ငွေဒန်းဂါး† ၅၀,၀၀၀ ဖိုးလော့-က် ရှိဟယ်။

၂၀ အယ်နည်းလမ်းအားဖြင့် သခင်ဘုရားရဲ့ စကားတော်ဟာ တဂိုးတော်န‡ တိုးပွားဘီး အောက်မြင်လေဟယ်။

ဖောက်မြို့မာ ပဒိပခ ဖြစ်ဟူကြောန်း

၂၁ အယ်ဇာလေ ဖြစ်ဟွားဘီးန မာကေဒေါနိုပြည်န အခါယပြည်ဟုနေဘီး ယေရုရှလင်မြို့ဟို့ သွားဟို့တွပ် ဝိညာဉ်တော်အားဖြင့် ပေါလုဟာ စိဆောင်းဖြတ်လိုက်ဟယ်။ ၆ သူဟု “အယ်မြို့ဟို့ ငါသွားဘီးန ရောမမြို့ဟို့လည်း သွားမယ်” ဆိုဘီး ပြောဟယ်။

၂၂ ပေါလုဟာ သူ့ဟို့ စေခံနေဟူ တိမောသေန ဧရတုတုလေဟို့ မာကေဒေါနိုပြည်ဟို့ လွှတ်လိုက်ဟယ်။ သူဟု အာရှိုပြည်မာ ရှစ်ဟွားနေရစ်ဟယ်။

၂၃ အယ်ခီမာ သခင်ဘုရားရဲ့ လမ်းစဉ်ကြောန့် ဖောက်မြို့မာ ဆူပူမှုဂီးတခု ဖြစ်လာဟယ်။

၂၄ ဒေမေတရို နာမယ်ရှိ ဟူ ငွေ ပ ဒေခတ်မားဟာ အာတေမိနတ်မီးရဲ့ ငွေနတ်ကွန်းငယ်လေ လောက်ရှင်းအားဖြင့် လတ်မှုပညာရှင်လေဟို့ ရရာတိုင်း ကပ်ရစေလေဟယ်။

† 19:19 ၁၉.၁၉ ငွေဒန်းဂါး၊ လောက်သမား တယော့-က်ရဲ့ တရစ်လောက်အားခဟာ ငွေဒန်းဂါးတယွား ဖြစ်ဟယ် (ရှု မ ၂၀.၂)။

‡ 19:20 ၁၉.၂၀ သခင်ဘုရားရဲ့ စကားတော်ဟာ တဂိုးတော်န၊ အယ်မျိုးမှုဘဲနေဟာ သခင်ဘုရားရဲ့ စကားတော်ဟာ တဂိုးတော်အားဖြင့်။

§ 19:21 ၁၉.၂၁ ပေါလုဟာ စိဆောင်းဖြတ်လိုက်ဟယ်၊ အယ်မျိုးမှုဘဲနေဟာ ဝိညာဉ်တော်ရဲ့ ဦးဆောင်မှုအားဖြင့် ပေါလုဟာ ဆောင်းဖြတ်လိုက်ဟယ်။

25 အယ်ကြောန့် သူဟာ အယ်လောက်ငန်း လောက်နေဟူ လောက်မားလေနတူးဒူ တခြားလောက်မား လေဟိုလည်း စုဘီးဟာ “ငါ့လူလေ၊ အယ်လောက်ငန်းန နို့လေဟာ ဝမ်ငွေကောန်းနေဟယ် ဆိုဇာဟို နန်းနို့လေ သိဂေဟယ်။

26 ခု နန်းနို့ကိုယ်တိုင် မြင်ရ၊ ကြားဟားဟူတိုင်း အယ်ပေါလုဟာ ‘လူလတ်န လောက်ဟားဟူ ဘုရားလေဟာ ဘုရားမူဟ’ ဆိုဘီး ဖေက်မြို့န အာရိုပြည် တပြည်လောင်းဟ လူလေဘောင်ဂီးဟို သွိုးဆောန်ဘီး လမ်းမှားစေဟယ်။

27 အယ်မူဟာ နို့လေရဲ့ လောက်ငန်းဟို နာမယ်ပျစ်စေမယ် ဆိုဘီး စိုးရိမ်ဇာရိုမျှ မကဘဲန ကီးမြတ်ဟူ အာတေမိနတ်ဖုရားမရဲ့ ဗိမာန်ဟာ ပမာဏပြုဇာ မှော့ဘဲန အာရိုပြည်န ကမ္ဘာတဝန်းလောင်းမာ ကိုးကွယ်ဟူ နတ်ဖုရားမရဲ့ ဂေါင်သရေလည်း ပျော့-က်ကွယ်ဟားလေ့မယ်” ဆိုဘီး ပြောလေဟယ်။

28 အယ်စကားဟို ကြားဟူ လတ်မူပညာရှင်လေဟာ ဒေါသထွပ်ဘီးဟာ “ဖေက်မြို့ရဲ့ အာတေမိ နတ်ဖုရားမဟာ ကီးမြတ်ဟယ်” ဆိုဘီး အော်ဂေဟယ်။

29 တမြို့လောင်းဟာ ရရာတိုင်း ရှောက်ရှစ်ခတ်ဟားဟယ်။ လူလေဟာ ပေါလုနတူးဒူ ခရီးသွားဟူ မာကေဒေါနိုပြည်သား ဂါယုန အာရိုတုတာခုလေဟို ဖမ်းဘီးဟာ ပွဲခံဟူ ခန်းမဂီးဟို ဗြန်းဗြန်ဟား ဆွဲခေါ်ဟားဂေဟယ်။

30 ပေါလုဟာ သူကိုယ်တိုင်ဘဲ လူအောက်ဂီးရှေ့ဟို သွား

ရှင်ဘေမဲ့လည်း တမဲ့တော်လေဟာ ခွမ်ပြုဂေဟ။

³¹ ပေါလုရဲ့ မိဆွေဖြစ်ဟူ နယ်အာဏာပိုင် တချို့ဟု လည်း ပွဲခံဟူ ခန်းမဂီးထဲဟို့ ဝမ်ဘဲဟို့တွပ် သူနားဟို့ လူ လွတ်ဘီး တောန်းဗန်ဂေဟယ်။

³² အယ်ဒီမာ လူလေဟာ တယော့-က်တဘော့-က် အော်ဘီးဟာ ရောက်ရောက်သဲသဲ ဖြစ်နေဂေဟယ်။ လူ လေဟု သူးနို့လေ ဖြားဖြစ်ကြောန့် စုနေဂေဟယ် ဆိုဇာဟို့ သိဂေဟ။

³³ ယုဒလူမျိုးလေဟာ အာလေဇနဒြါဟို့ ရှေ့ဟို့ ထွပ် ခိုင်းစေဟယ်။ လူလေတချို့ဟုလည်း အယ်လူဟာ ခုဖြစ် နေဟူ ကိစနဆိုင်ဟယ် ဆိုဘီး ယူဆဂေဟယ်။ အာလေဇနဒြါဟာ လူအောက်ဂီးဟို့ တိတိဟားနေဟို့တွပ် လတ်န ချစ် ပြလိုက်ဟယ်။ အယ်ဘီးဟာ ဖြေရှင်းဟူ စကားဟို့ ပြော ဟို့တွပ် ကြိုးစားဟယ်။

³⁴ သူဟာ ယုဒလူမျိုးဖြစ်ဟယ် ဆိုဇာဟို့ သူးနို့လေ သိ ဂေဟူ ဒီမာ “ဇေက်မြို့သားလေရဲ့ အာတေမိ နတ်ဖုရားမ ဟာ ကီးမြတ်ဟယ်” ဆိုဘီး နှေ့နာရီလော့-က်ထိ လူလေ ဟာ တသံဒဲ အော်နေဂေဟယ်။

³⁵ နော့-က်ဆောင်းမာ မြို့စာရေးဟာ လူအောက်ဂီးဟို့ တိတိဟားနေခိုင်းဘီး “ဇေက်မြို့သားလေ၊ ဇေက်မြို့တော် ဟာ ကီးမြတ်ဟူ အာတေမိနတ်ဖုရားမရဲ့ ဗိမာန်တော်န ကောင်းဂန်ဘောင်ဟုနေ ကုလလာဟူ ရောက်ထုလေဟို့ ထီးသီးစော့-က်ရှော့-က်ဟားဟူ မြို့ဖြစ်ဟယ် ဆိုဇာဟို့

လူတိုင်းသိဂေဟယ်။

³⁶ အယ်မူဇာဟို ဖယ်လူလည်း ဂြင်းနိုင်ဟု။ အယ်ကြော
န့် နန်းနို့ဟာ တိတိဆိဆိနေဂေ။ စဉ်းစားဘဲန ဖြားဇာလည်း
လောက်ဂေန။

³⁷ နန်းနို့ဟာ သူးနို့ဟို အယ်နေရာဟို ခေါင်းဆော်လာ
ဂေဟယ်။ သူးနို့ဟာ နို့လေရဲ့ ဗိမာန်တော်ဟို ဖျစ်ဆီးရှင်း
လည်း မူဟု။ နို့လေရဲ့ နတ်ဖုရားမဟိုလည်း ကဲ့ရဲ့ဟူ စကား
လေလည်း ပြောဟု။

³⁸ ဒေမေတရီန သူပေါင်းပါလေ ထဲဟု ယော့-က်
ယော့-က်ဟု တရားစွဲမယ် ဆိုဟာ တရားရောင်းဖွဲ့မ့်ဟူ ရစ်
မာဘဲ အာဏာပိုင်လေရှိဟူကြောန့် တရားစွဲနိုင်ဟယ်။

³⁹ အယ်ဘေမဲ့ နန်းနို့မာ တခြားကိစ္စရှိဟယ် ဆိုဟာ
တရားဝမ်စည်းဝေးမာ ဆောင်းဖြတ်ရမယ်။

⁴⁰ အယ်နေဖြစ်ဟူးဟူ ကိစ္စန ပတ်သတ်ဘီး ခိုင်လောင်
ဟူ ကြောန်းပြချစ် ပေးနိုင်ဘဲဟူကြောန့် နို့လေဟာ အယ်
ပဒိပခတွပ် တရားစွဲခံရမယ် ဆိုဇာဟိုဘဲ စိုးရိမ်ရဟယ်။
နို့လေဟာ အယ်ပဒိပခတွပ် ဖြေရှင်းချစ်ပေးနိုင်ဟို မူဟု”
ဆိုဘီး ပြောဟယ်။

⁴¹ အယ်မျိုးပြောဘီးန မြို့စာရေးဟာ လူအောက်ဂီးဟို
ပုလန်ခိုင်းလိုက်ဟယ်။

20

မာကေဒေါနိုပြည်ဟို ပုလန်ရော့-က်လာဟူ ပေါလု
ကြောန်း

၁ ရှောက်ရှစ်ခတ်ဇာလေ ပီးဟူးဘီးန ပေါလုဟာ တမဲ့
တော်လေဟို့ ခေါ်ဘီး နှစ်သိမ့်ပေးဟယ်။ အယ်ဘီးန သူးနို့
ဟို့ နှောက်ဆစ်ဘီးဟာ မာကေဒေါနိုပြည်ဟို့ ထွပ်ဟူးလို
က်ဟယ်။

၂ သူဟာ နေရာတိုင်းဟို့ သွားဘီးဟာ ယောင်ကြည်သူ
လေဟို့ နှစ်သိမ့်အားပေးဘီးန အခါယပြည်ဟို့ သွားဟ
ယ်။

၃ သူဟာ အယ်ပြည်မာ သောင်းလနေဟယ်။ အယ်ဘီးန
ရှုရိပြည်ဟို့ သန်းဖောန သွားဟို့ ဆင်သင့်ဖြစ်နေဟူ ခီမာ
ဘဲ ယုဒလူမျိုးလေဟာ သူဟို့ သတ်ဟို့တွပ် ကြံစည်နေဟ
ယ် ဆိုဇာဟို့ ကြားရဟယ်။ အယ်ကြောန့် သူဟာ မာကေ
ဒေါနိုပြည်ဟို့ ဖြတ်ဘီး ပုလန်ဟို့တွပ် စီဆောင်းဖြတ်လိုက်
ဟယ်။

၄ ပေါလုနတူးဒု လိုက်ဟူးသူလေဟု ဗေရိုမြို့သားဖြစ်
ဟူ ပုရရဲသား သောပတရု၊ သက်သာလောနိတ်မြို့သား
လေ ဖြစ်ဂေဟူ အာရိတုတာခုန သေကနုဒု၊ ဒေရဗေမြို့
သားဖြစ်ဟူ ဂါယု၊ အာရိပြည်သားလေ ဖြစ်ဂေဟူ တုခိတ်
န တရောဖိမ်လေ၊ အယ်ဘီးဟာ တိမောသေလေ ဖြစ်ဂေ
ဟယ်။

၅ အယ်လူလေဟာ ရင်ဦးဆောင်းသွားဂေဘီးန ကျွန်
တော့်လေဟို့ တရောမြို့မာ စောန့်နေဂေဟယ်။

၆ တဆေးမောဘဲဟူ မုပွဲတော် ပီးဟူးဘီးန ကျွန်တော့်
လေဟု ဖိလိပုပိမြို့ဟုနေဘီး သန်းဖောန လာဂေဟယ်။

ငါးရစ်ကြာဘီးန သူးနှိရှိနေဟူ တရောမြို့ဟို့ ရှေး-က်ဟား
ဘီး အယ်မြို့မာ ခွန်နစ်ရစ်လော့-က် နေဂေဟယ်။

ပေါလုဟာ တရောမြို့ဟို့ နှော့-က်ဆောင်းခီ ရှေး-က်
ဟားဟူကြောန်း

7 ကျွန်တော့် လေ ဟာ စနေနေ့ * နေ ဒန် ဇာ မာ
မိတ်သဟာယစာ စားဂေဟို့တွပ် စုဂေဟယ်။ ပေါလုဟာ
နှော့-က်တနေ့မာ အယ်မြို့ဟူနေ ထွပ်ဟို့တွပ် ကြံစည်ဟား
ကြောန်း ညဉ့်နတ်ခီထိ လူလေဟို့ ဆစ်ဘီးဟာ ဟောပြော
နေဟယ်။

8 ကျွန်တော့်လေ စည်းဝေးဟူ ထတ်ခန်းမာ မီးအီလေ
ဘောင်ဂီးထွန်းဟားဟယ်။

9 ဥတုခု နာမယ်ရှိဟူ ကောန်သားတယော့-က်ဟာ လတ်
တန်ဗော့-က်ထတ်မာ ထိုင်နေဟယ်။ ပေါလုဟာ ဆစ်ဘီး
ဟောနေဟူ ခီမာ ဥတုခုဟာ အိဉိုက်လာဘီးန နှော့-က်
ဆောင်းမာ အိမ့်ဟားဟူကြောန်း အီသောင်းထပ်ဟူနေဘီး
မုလေဂီးထတ်ဟို့ ကုလဟားလေဟယ်။ လူလေဟာ သူဟို့
ခီလိုက်ဟူ ခီမာ သေဟားဘီ ဆိုဇာဟို့ တွံဂေဟယ်။

10 အယ်ခီမာ ပေါလုဟာ အော့-က်ဟို့ ဆင်းဘီးဟာ
အယ်လူထတ်မာ သူ့ကိုယ်ဟို့ မှောက်ခလဘီးန ဖတ်ဟား
လိုက်ဟယ်။ လူလေဟို့ “စိုးရိမ်ဂေ့န။ သူဟာ သတ်ရှင်နေ
သေးဟယ်” ဆိုဘီး ပြောဟယ်။

* 20:7 ၂၀.၇ စနေနေ့၊ အယ်မျိုးမူနေဟာ နန်းနေ့နော်။

11 ပေါလုဟာ အီထတ်ဟို့ ပုလန်တတ်ဘီး တမဲ့တော် လေနတူးဒု မဟို့ဖဲဘီး စားဂေဟယ်။ မိုးလန်းဟူခီထံ ကြာ ဂီးစကားပြောဘီးန ပေါလုဟာ ထွပ်ဟူးလေဟယ်။

12 တမဲ့တော်လေဟာ သတ်ရှင်နေသေးဟူ ကောန်သား ဟို့ သူ့အီဟို့ ခေါ်ဟူးဘီးမှ ရရာတိုင်း သတ်သာရာ ရဂေ ဟယ်။

တရောမြို့ဟုနေ မိလက်မြို့ဟို့ သွားဟူကြောင်း

13 ကျွန်တော့်လေဟာ သန်းဖောနားဟို့ ရင်ဦးဆောင်း သွားဘီးန အသုမြို့ဟို့ သွားဂေဟယ်။ အသုမြို့ဟို့ ရော့-က်မှ ပေါလုဟို့ သန်းဖောစီးခိုင်းဟို့တွပ် ဖြစ်ဟယ်။ ပေါလုဟာ အယ်မြို့ဟို့ ကူးလမ်းဟုနေ သွားမယ် ဆိုဘီး ပြောဟူးကြောန့် ဖြစ်ဟယ်။

14 သူဟာ ကျွန်တော့်လေဟို့ အသုမြို့မာ တို့ဟူကြောန့် သူဟို့ သန်းဖောထတ်ဟို့ ခေါ်ဘီးဟာ မိတုလင်မြို့ဟို့ သွား ဂေဟယ်။

15 ကျွန်တော်ဟူးလေဟာ အယ်နေရာဟုနေ ဝှပ်လွပ် ဘီး နော့-က်တနေမာ ခိအူကျွန်းနားဟို့ ရော့-က်ဟူးဂေ ဟယ်။ တရစ်ကြာဘီးန သာမူကျွန်းဟို့ ရော့-က်ဟူးဘီး နော့-က်တရစ်မှ မိလက်မြို့ဟို့ ရော့-က်ဟူးဂေဟယ်။

16 ပေါလုဟာ အာရုံပြည်မာ ခိကူရှင်ဘဲကြောန့် ဖေက် မြို့ဟို့ ဖြတ်ဘီး သန်းဖောန သွားဟို့တွပ် စံဆောင်းဖြတ် ဟူးဟယ်။ ဖြစ်နိုင်မယ် ဆိုဟာ ပင်တေကုတုတေ ပွဲတော်

မိအောန် ယေရုရှလင်မြို့ဟို့ ရော့-က်ဟို့တွပ် သူဟာ မြန်း
မြန်ဟား သွားနေဟယ်။

ပေါလုဟာ ဖေက်သင်းတော်ရဲ့ လူဂီးလေဟို့ နောက်
ဆစ်စကားပြောဟူကြောန်း

17 အယ်ခီမာ ပေါလုဟာ ဖေက်မြို့ဟု သင်းတော်လူဂီး
လေဟို့ သူဟို့ လာတို့ဟို့တွပ် မိလက်မြို့ဟုနေ လူလွတ်
ဘီး ကြောန်းကြားလိုက်ဟယ်။

18 အယ်လူလေဟု ရော့-က်လာဂေဟူ ခီမာ ပေါလုဟု
“ငါဟာ အာရှိပြည်ဟို့ ရော့-က်ဟူနေဟုစဘီး နန်းနို့တူးဒု
ရှိနေဟူ ခီတိုင်းဟာ ဖယ်မျိုးသတ်ရှင်ဟယ် ဆိုဇာဟို့ နန်း
နို့လေ သိဂေဟယ်။

19 ယုဒလူမျိုးလေရဲ့ ကြံစည်လေကြောန်း ခတ်ခဲဟူခီ
လေဟို့ ကြောင်တို့နေရဘေမဲ့လည်း ငါဟာ မျစ်ရယ်ကုလ
ဘီး၊ စိန်လောင်းနို့ခဲလဘီး သခင်ဘုရားဟို့ စေခံဟယ်။

20 လူအောက်ဂီးရှေ့မာရော၊ နန်းနို့ အီလေမာရော ငါ
ဟာ ဟောပြောဘီး သွန်သန်ဟူ ခီမာ နန်းနို့တွပ် ကျိုးရှိဟူ
စကားလေဟို့ ဖယ်ခါလည်း ဝှပ်ဘီးထားဟု။

21 ဘုရားသခင်ရှေ့မာ နောက်ဒရရှင်း၊ နို့လေရဲ့ သခင်
ယေရှုဟို့ ယောင်ကြည်ရှင်း ကြောန်းလေဟို့ ယုဒလူမျိုး
လေဟို့ရော၊ ဟေလသလူမျိုးလေဟို့ရော လေးလေးနတ်
နတ်ဟား ဒီပေးဟယ်။

22 ခု ငါဟာ ဝိညာဉ်တော်ရဲ့ မိန့်တော်ဟို့ နာခံဘီး ယေ
ရုရှလင်မြို့ဟို့ သွားရမယ်။ အယ်မြို့မာ ဖယ်မျိုးဖြစ်မယ်

ဆိုဇာဟို ငါသိဟု။

²³ သန့်ရှင်းဟူဝိညာဉ်တော်ဟု ‘နန်ဟာ တောက်နှောန့်ရှင်းန ဒေါက်ခလေဟို ခံရလေ့မယ်’ ဆိုဘီး မြို့တိုင်းမာ ငါ့ဟို ဒိပေးဟူးဟယ် ဆိုဇာဟို ငါသိဟယ်။

²⁴ အယ်ဘေမဲ့ ငါ့တွပ်သတ်မှတ်ဟူးဟူ လောက်တာဝန်န သခင်ယေရှုပေးဟူးဟူ မှုတော်ဟို ပီးအော်လောက်ဆော်ဟို ဓိကဖြစ်ဟူကြောန့် ငါဟာ ကိုယ့်သတ်ဟို ကိုယ်ပြောဟု။ ကိုယ်တော်ပေးဟူးဟူ မှုတော်ဟာ ဘုရားသခင်ရဲ့ ကျေးဇူးတော်ကြောန်းဖြစ်ဟူ ဒန်းကောန်းဟို ကြေညာဟိုတွပ် ဖြစ်ဟယ်။”

²⁵ “ငါဟာ ဘုရားသခင်ရဲ့ နိုင်ငံတော်ကြောန်းဟို နန်းနို့နားဟို လာဘီး ဟောပြောဟယ်။ အယ်ဘေမဲ့ နန်းနို့ဟုလွဲဘီး ဖယ်သူဟုလည်း ငါ့မျစ်နှာဟို နှော့-က်တခါ မြင်ရဟို မှုဘီ ဆိုဇာဟို ငါသိနေဟယ်။

²⁶ အယ်ကြောန့် နန်းနို့ထဲဟု ယော့-က်ယော့-က်ဟာ သတ်ဝိညာဉ်ဆောင်းရှောင်းမယ် ဆိုဟာ လူလေရဲ့သွီးန ငါကင်းလွတ်ဟယ် ဆိုဇာဟို အယ်နေဘဲ့ နန်းနို့ဟို ငါဟာ လေးလေးနတ်နတ်ဟူး သတ်သေခံဟယ်။

²⁷ ပြားဖြစ်ကြောန့်နူးဆိုဟာ ငါဟာ ဘုရားသခင်ရဲ့ လိုတော်ဟို နန်းနို့လေဟို ဂူလောင်း ပြောပြဟူးပီးဘီ။

²⁸ အယ်ကြောန့် နန်းနို့လေဟာ ကိုယ့်ကိုယ်ကိုယ်ရော၊ နန်းနို့လတ်ထဲဟို သန့်ရှင်းဟူဝိညာဉ်တော်ဟု ပေးဟူး

ဟူ သိုးစုလေဟိုရော စောန့်ရှေး-က်ဘီး ကေ့ရှုဂေပါ။
ဘုရားသခင်[†] ရဲ့ သင်းတော်ဟို သိုးထီးမျိုး ကေ့ရှုဂေပါ။
ဘုရားသခင်ဟာ သူ့သားတော်ရဲ့ သွီးတော်အားဖြင့်[‡] သင်း
တော်ဟို ဝယ်ဟူးဟယ်။

²⁹ ငါမေ့ဘဲဟူ နှော-က်မာ လူတချို့ဟာ နန်းနို့နားဟို
လာဘီးဟာ ရစ်ဆစ်ကြမ်းထန်းဟူ ဝံပုလွေလေမျိုး သိုးစု
ဟို ညှာတာဘဲန လောက်ဂေမယ် ဆိုဇာဟို ငါသိနေဟယ်။

³⁰ နန်းနို့ထဲမာ တချို့လူလေဟာ လီညာပြောဆိုဘီး
ယောင်ကြည်သူလေဟို သူ့နှော-က်ဟို ခေါ်ဟူးဟူခီ
ရော-က်လာလေ့မယ်။

³¹ အယ်ကြောန့် ဒိန်နေဂေပါ။ ငါဟာ နန်းနို့ ဂူလောင်းဟို
သောင်းနှစ်လောင်းလောင်း နေ့ရောညဉ့်ရော မျစ်ရယ်က
လဘီး ဆောင်းမသွန်သန်ဇာဟို ဒိရဂေပါ။

³² “ခု နန်းနို့လေဟို ဘုရားသခင်ရဲ့ လတ်ထဲဟိုရော၊
ကျေးဇူးတော်တရားရဲ့ လတ်ထဲဟိုရော ငါအပ်လိုက်ဟ
ယ်။ အယ်ကျေးဇူးတော်တရားဟာ နန်းနို့လေဟို တည်
ဆော့-က်ဟိုတွပ် ကိုယ်တော်ရဲ့ သန်ရှင်းသူလေတွပ် ထား
ဟူးဟူ ကောန်းဂျီးမင်္ဂလာလေဟို နန်းနို့ ခံစားရလေ့မယ်။

³³ ငါဟာ တခြားသူလေရဲ့ ရွှေလေ၊ ငွေလေန ဝတ်စား
လေဟို တတ်မတ်ဇာ မေ့ဟူ။

[†] 20:28 **၂၀.၂၈** ဘုရားသခင်၊ တချို့ မူရင်းလတ်ရေးမူလေမာ
သခင်ဘုရား၊ ဆိုဘီး ပါရှိဟယ်။ [‡] 20:28 **၂၀.၂၈** သူ့သားတော်ရဲ့
သွီးတော်အားဖြင့်၊ အယ်မျိုးမူဘဲနေဟာ သူ့သားတော်ရဲ့ သေခံဇာအားဖြင့်၊
အယ်မျိုးမူဘဲနေဟာ သူ့ရဲ့ သွီးတော်အားဖြင့်။

34 ငါဟာ အယ်လတ်လေန လောက်လောက်ဘီး ငါပေါ
န်းသင်းလေရဲ့ လိုအပ်ဇာလေဟို ဖုလဲ့ပေးနေဟယ် ဆိုဇာ
ဟို နန်းနီလေဟာ သိဂေဟယ်။

35 အယ်မျိုးဘွဲ နန်းနီလေလည်း လောက်ဟို ကြိုးစား
ဘီး ဆင်းရဲဟူ လူလေဟို ကူညီဂေဟိုတွပ် ငါပြရစ်ဟယ်။
သခင်ယေရှု ကိုယ်တိုင်ဟာ ‘ပေးဟူဇာဟာ ရယူဇာထတ် ပို
ဘီး မင်္ဂလာရှိဟယ်’ ဆိုဘီး မိန့်တော်မူဟားဟူ စကားဟို ဒီ
ရဂေပါ” ဆိုဘီး ပြောဟယ်။

36 အယ်မျိုးပြောဘီးန ပေါလုဟာ ဒူးထော့-က်ဘီး
အယ်လူလေနတူးဒု ဆုတောင်းလေဟယ်။

37 သူးနီလေ ဂူလောင်းဟာ ရရာတိုင်း ငိုဂေဘီးန ပေါလု
ဟို ဖတ်ဘီး နောက်ဆစ်ဂေဟယ်။

38 ပေါလုဟာ သူ့မျစ်နှာဟို နှော့-က်တခါ မြင်ရဟိုမှဘီ
ဆိုဘီး ပြောဟူကြောန့် သူးနီလေဟာ ပိုဘီး ဟာ ဝန်းနဲဂေ
ဟယ်။ အယ်ဘီးန သူးနီဟာ ပေါလုဟို သန်းဖောနားဟို
လိုက်ပို့ဂေဟယ်။

21

ယေရှုလင်မြို့ဟို ပေါလု ရော့-က်လာဟူကြောန်း

1 ကျွန်တော့်လေဟာ အယ်လူလေနားဟုနေဘီး ထွပ်လာ
ဘီးဟာ သန်းဖောန ကောသကျွန်းဟို တည့်တည့်သွားဂေ
ဟယ်။ နှော့-က်တနေမာ ရောဒုကျွန်းဟိုရော၊ အယ်ကျွန်း
ဟုနေဘီး ပါတရမြို့ဟိုရော ရော့-က်ဟားဂေဟယ်။

² ဖိနိတ်ပြည်ဟို့ သွားဟူ သန်းဖောတစင်းဟို့ တို့ဟားဟူ ခီမာ အယ်သန်းဖောထတ်ဟို့ တတ်ဘီး သွားဂေဟယ်။

³ ကျွန်တော့်လေဟာ ကုပရုကျွန်းဟို့ မြင်ရဟူ ခီမာ အယ်ကျွန်းရဲ တောန်ဖတ်ဟုနေဖြတ်ဘီး ရှုရိပြည်ဟို့ သန်းဖောန သွားဂေဟယ်။ တုရုမြို့မာ ကူပစ်စီးလေဟို့ ခုလရဟို့တွပ် အယ်မြို့မာ သန်းဖောဟို့ ဝမ်ဘီးနားရဟယ်။

⁴ ကျွန်တော့်လေဟာ အယ်နေရာမာ တဗဲတော်တချို့ဟို့ တို့ဘီး သူးနိနတူးဒု ခွန်နစ်ရစ် နေဂေဟယ်။ အယ်တဗဲတော်လေဟာ ဝိညာဉ်တော်ရဲ တဂိုးန ပေါလုဟို့ ယေရုရှလင်မြို့ဟို့ သွားဘ်ဟို့တွပ် ပြောဂေဟယ်။

⁵ အယ်ဘေမဲ့ ခွန်နစ်ရစ် ကြာဟားဟူ ခီမာ ကျွန်တော့်လေဟာ ခရီးသွားဂေဟယ်။ တဗဲတော်လေ ဂူလောင်းဟာ သူးနိ မီးမလေန သားဂန်းဟားလေနတူးဒု မြို့ပုလန်ဟု ပန်လယ်ကမ်းနားဟို့ ရော့-က်အောန် လိုက်ပို့ဂေဟယ်။ ကျွန်တော့်လေဟာ ပန်လယ်ကမ်းနားမာ ဒူးထော့-က်ဘီး ဆုတောင်းဂေဟယ်။

⁶ အယ်ဘီးန ယော့-က်နယော့-က် နှောက်ဆစ်ဘီးဟာ ကျွန်တော့်လေဟာ သန်းဖောထတ်ဟို့ တတ်ဘီး သူးနိလေဟု အီဟို့ ပုလန်ဟားဂေဟယ်။

⁷ တုရုမြို့ဟုနေဘီး ဆစ်ဘီးသွားဂေဟူ ခီမာ ကျွန်တော့်လေဟာ ပတောလင်မြို့ဟို့ ရော့-က်ဟားဂေဟယ်။ အယ်မြို့မာ ညီကို မောန်နှမလေဟို့ နှောက်ဆစ်ဘီးန သူးနိနတူးဒု တရစ်လော့-က်နေဂေဟယ်။

⁸ နှော-က်တနေမာ ထွပ်ဟူးဘီး ကဲသရိမြို့ဟို့ ရှော-က်ဟူးဂေဟယ်။ ကျွန်တော့်လေဟာ ဧဝံဂေလိဆရာ ဖိလိပ္ပု အီမာတည်းဂေဟယ်။ ဖိလိပ္ပုဟု တမဲ့တော်လေဟို့ ကူညီဟို့တွပ် ယေရုရှလင်သင်းတော်ဟု ဝီးကော့-က်ဟူးဟူလူ ခွန်နစ်ယော့-က်ထဲမာပါဟူ လူတယော့-က်ဖြစ်ဟယ်။

⁹ သူမာ အီထောန်ကုလသေးဘဲဟူ သမီးလေးယော့-က်ရှိဟယ်။ သူသမီးလေဟာ ပရောဖက်ပြုဘီး ဘုရားသခင်ရဲ့ တရားတော်ဟို့ ကြေညာဂေဟယ်။

¹⁰ အယ်အီမာ ကျွန်တော့်လေဟာ ရစ်တန်ကြာ နေဘီးဟူ ခီမာ အာဂဗု နာမယ်ရှိဟူ ပရောဖက်တယော့-က်ဟာ ယုဒပြည်ဟုနေ ရှော-က်လာဟယ်။

¹¹ သူဟာ ကျွန်တော့်လေနားဟို့ လာဘီး ပေါလုရဲ့ ခါးဗတ်ဟို့ ယူဘီး သူခေန် လတ်ဟို့ ခယ်လိုက်ဟယ်။ အယ်ဘီးန “အယ်ခါးဗတ် ဇရှင်ဟို့ ယုဒလူလေဟု ယေရုရှလင်မြို့မာ အယ်မျိုးခယ်ဘီးဟာ လူမျိုးခြားလေဟို့ အပ်ဂေလေ့မယ် ဆိုဘီး သန်ရှင်းဟူဝိညာဉ်တော်ဟု မိန့်တော်မူဟယ်” ဆိုဘီး ပြောဟယ်။

¹² အယ်စကားဟို့ ကြားရဟူ ခီမာ ကျွန်တော့်လေန အယ်နေရာမာရှိနေဟူ လူလေဟု ယေရုရှလင်မြို့ဟို့ သွားဘဲဟို့တွပ် ပေါလုဟို့ တောင်းဗန်ဂေဟယ်။

¹³ အယ်ဘေမဲ့ ပေါလုဟု “နန်းနို့ဟာ ပြားဖြစ်ကြောန့် အယ်မျိုးငိုဘီးဟာ ငါ့ရဲ့ စိန်လောင်းဟို့ ကြေကွဲစေဂေနှူး။

ငါဟာ သခင်ယေရှုရဲ့ နာမတော်ကြောနဲ့ ယေရှုလင်မြို့
မာ ခယ်ခံရဘီး သေခံဟို့ဟို့မှ ဆင်သင့်ရှိဟယ်” ဆိုဘီး ပု
လန်ပြောဟယ်။

¹⁴ ပေါလုဟို့ သွီးဆောန်နိုင်ဘဲကြောနဲ့ ကျွန်တော့်လေ
ဟာ လတ်ရှော့လိုက်ဘီး “သခင်ဘုရားရဲ့ လိုတော်တိုင်းဘဲ
ဖြစ်ပါစေ” ဆိုဘီး ပြောဂေဟယ်။

¹⁵ ရစ်နဲနဲကြာဘီးန ကျွန်တော့်လေဟာ ပစ်စီးလေဟို့
ထောက်ဘိုးဘီးဟာ ယေရှုလင်မြို့ဟို့ တတ်ဟွားဂေဟ
ယ်။

¹⁶ ကဲသရိမြို့ဟ တမဲ့တော်တချို့ဟာ ကျွန်တော့်လေန
တူးဒု လိုက်ဘီး ကျွန်တော့်လေဟို့ ကုပရုကျွန်းသား တမဲ့
တော်ဟောင်း တယော့-က်ဖြစ်ဟူ မနာသုန်ရဲ့ အီမာတည်း
ဟို့တွပ် ခေါ်ဟွားဂေဟယ်။*

ပေါလုဟာ ယာကုပ်ဟို့ သွားတို့ဟူကြောင်း

¹⁷ ယေရှုလင်မြို့ဟို့ ရော့-က်ဟွားဂေဟူ ခီမာ ညီကို
မောန်နှမလေဟ ကြိုဆိုဂေဟယ်။

¹⁸ ရော့-က်တနေမာ ပေါလုဟာ ကျွန်တော့်လေနတူးဒု
ယာကုပ်ဟို့ တို့ဟို့တွပ် သွားဂေဟယ်။ သင်းတော်လူဂီး
လေ အားလောင်းလည်း သူနားမာ ရှိနေဂေဟယ်။

* **21:16 ၂၁.၁၆** ကျွန်တော့်လေဟို့ ကုပရုကျွန်းသား တမဲ့တော်ဟောင်း
တယော့-က်ဖြစ်ဟူ မနာသုန်ရဲ့ အီမာတည်းဟို့တွပ် ခေါ်ဟွားဂေဟယ်။
အယ်မျိုးမူဘဲနေဟာ သူးနို့အီမာနေဟို့တွပ် ကျွန်တော့်ဟွားလေဟို့
ခေါ်ဆောန်ဟွားဟယ်။

19 ပေါလုဟာ အယ်လူလေဟို့ နောက်ဆစ်ဘီးန သူ့ရဲ့ မှုတော်လောက်ငန်းအားဖြင့် လူမျိုးခြားလေဟို့ ဘုရားသခင်လောက်ဟူ မှုရှိမျှဂူလောင်းဟို့ တန်ပြဟယ်။

20 သူးနို့လေဟာ အယ်မူဇာဟို့ ကြားရဘီးန ဘုရားသ ခင်ဟို့ ချီးမွမ်းဂေဟယ်။ အယ်ဘီးန သူးနို့ဟ “ညီပေါလု၊ ယုဒလူလေ ထောန်နသောန်းနချီဘီး ယောင်ကြည်သူလေ ဖြစ်လာဂေဟယ် ဆိုဇာဟို့ နန်းနို့လေ သိမြင်ဂေဟယ်။ သူး နို့လေ ဂူလောင်းဟာ ပညတ်တရားဖတ်မာ စိအားထတ်သ န်ဟူ သူလေ ဖြစ်ဂေဟယ်။

21 ‘နန်ဟာ လူမျိုးခြားလေထဲမာနေဟူ ယုဒလူလေဟို့ နန်းနို့ရဲ့ သားဂန်းဟားလေဟို့ ရေဖျားလှီးပေးဂေန။ နန်း နို့ဟာ ယုဒ ထောင်းဒန်းစဉ်လာလေဟို့ လိုက်ဂေန်’ ဆိုဘီး မောရှေရဲ့ ပညတ်တရားဟို့ စွန်ပစ်ဟို့တွပ် သွန်သန်နေဇာ ဟို့ အယ်လူလေဟာ ကြားရဂေဟယ်။

22 အယ်မျိုးဆိုဟာ နို့လေဟာ ဖယ်မျိုးလောက်ရဟို့နူး။ နန်ရော-က်လာဟူဒန်းဟို့ သူးနို့လေဟာ ကြားရမယ် ဆိုဇာ သေချာနေဟယ်။

23 အယ်ကြောန် နန်ဟို့ နို့လေပြောဟားဟူတိုင်း လောက် လိုက်။ နို့လေမာ သစ်စာဂဒိပြုဟားဟူ လူလေးယော့-က် ရှိဟယ်။

24 အယ်လူလေဟို့ ခေါ်ဟားဘီး သူးနို့နတူးဒူ စင်ကြယ် ရှင်းဟို့ လောက်ဘီးဟာ သူးနို့ခေါန်းဟို့ ရံဟို့တွပ်†ခဟို့

† 21:24 ၂၁.၂၄ သူးနို့ခေါန်းဟို့ ရံဟို့တွပ်၊ ရှု ၁၈.၁၈။

ပေးလိုက်။ အယ်မျိုးလောက်မယ် ဆိုဟာ နန်းကြွန်းကို သူ့နှိကြားရဂေဟူ ဒန်းဟာ မှန်ဟု ဆိုဇာဟိုရော၊ နန်ကိုယ် တိုင်ဘဲ မောရှေရဲ့ ပညတ်တရားကို တိတိကုလကုလဟား စောင့်ထီးဟယ် ဆိုဇာဟိုရော လူတိုင်းသိဂေလေ့မယ်။

²⁵ အယ်ဘေမဲ့ ယောင်ကြည်သူ လူမျိုးခြားလေတွပ်ဟု ရောက်ထုရှေ့မာ ပူဇော်ဟူးဟူ စားဇာ၊ သွီး၊ လည်ဗန်းလှီး ဘဲန သတ်ဟူးဟူ လိဆန်လေဟို စားဘဲဟိုတွပ်န တရား ဘဲဟူ မေထုန်ဟိုလည်း ရှောန်ဟိုတွပ် နို့လေဟာ ဆောင်း ဖြတ်ဘီး သူ့နှိနားဟို စာရေးဘီး ကြွန်းကြားဟူးပီးဘီ” ဆိုဘီး ပြောဂေဟယ်။

²⁶ အယ်ကြောန့် ပေါလုဟာ နှော-က်တနေ့မာ အယ် လူလေးယော့-က်ဟို ခေါ်ဘီးန သူ့နှိနတူးဒု စင်ကြယ်ရှင်း ဟို လောက်ဂေဟယ်။ အယ်ဘီးန သူဟာ ဗိမာန်တော်ဟို သွားဘီး သူ့နှိယော့-က်ချင်းစီတွပ် ပူဇော်သကာလောက် ရမယ့် ခီဖြစ်ဟူ စင်ကြယ်ရှင်းဟို လောက်ရဟူ နေရစ်လေ ပီးဆောင်းမယ့်ခီဟို သိပေးလေဟယ်။

ဗိမာန်တော်မာ ပေါလု ဖမ်းခံရဟူကြွန်း

²⁷ ခွန်နစ်ရစ်လော့-က် ကြာဟူးဟူ ခီမာ အာရှိပြည်ဟု နေ ယုဒလူတချို့ဟာ ပေါလုဟို ဗိမာန်တော်မာ မြင်ဟူး ဂေဟယ်။ သူ့နှိဟာ လူအောက်ဂီးဟို နှိုးဆော်ပေးဘီး ပေါ လုဟို ဖမ်းဂေဟယ်။

28 သူ့နှို့ဟာ “ဣသရေလလူလေ၊ ကူညီဂေ့ပါ။ အယ်လူဟာ နေရာတိုင်းဟို့ သွားဘီး နို့လူမျိုးန နို့လူမျိုးရဲ့ ပညတ်တရားဟို့ရော၊ အယ်ဗိမာန်တော်ဟို့ရော ဆန့်ကျင်ဘီး လူတိုင်းဟို့ သွန်သန်နေဟယ်။ အယ်မျှလော့-က်ဘဲ မှဘဲန သူဟာ လူမျိုးခြားလေဟို့လည်း ဗိမာန်တော်ထဲဟို့ ခေါ်ဆောန်လာဘီးဟာ အယ်သန်ရှင်းဟူ နေရာဟို့ ညစ်ညူးစေဟယ်” ဆိုဘီး အော်ဂေ့ဟယ်။

29 ဖြားဖြစ်ကြောန့် အယ်မျိုးပြောနူး၊ ဆိုဟာ သူ့နှို့ဟာ ပေါလုဟို့ ဖေက်မြို့သား တရောဖိမ်နတူးဒု မြို့ထဲမာတို့ဘီး အယ်လူဟို့ ဗိမာန်တော်ထဲဟို့ ပေါလုဟာ ခေါ်လာဟယ် ဆိုဘီး ထန်ဂေ့ဟယ်။

30 တမြို့လောင်းဟာ ရှောက်ရှစ်ခတ်ဘီး လူလေဟာ ပုလေးလာဘီးန ပေါလုဟို့ ဖမ်းဘီးဟာ ဗိမာန်တော်ပုလန်ဟို့ ဆွဲထုဂေ့ဟယ်။ ရှစ်ရှင်းဘဲ ဗိမာန်တော်ရဲ့ ခွဗော့-က်လေဟို့ ပီလိုက်ဂေ့ဟယ်။

31 သူ့နှို့ဟာ ပေါလုဟို့ သတ်ဟို့တွပ် ကြိုးစားနေဂေ့ဒူးမာ ယေရုရှလင်မြို့ တမြို့လောင်းဟာ ရှောက်ရှစ်ခတ်နေဟယ် ဆိုဘီး ရောမတပ်မှူးနားဟို့ ဒန်းဟာ ရော့-က်လာဟယ်။

32 ရှစ်ရှင်းဘဲ တပ်မှူးဟာ စစ်သားလေန ရာရှိတချို့ဟို့ ခေါ်ဘီးဟာ လူအောက်နားဟို့ ဆင်းပုလေးလာဂေ့ဟယ်။ လူလေဟာ တပ်မှူးန စစ်သားလေဟို့ မြင်ဟွားဟူ ဒီမာ ပေါလုဟို့ ရိုက်ဘဲန နေဂေ့ဟယ်။

33 အယ်ခီမာ တပ်မှူးဟာ ပေါလုနားဟို့ ရှေ့-က်လာဘီး ဖမ်းဘီးဟာ သံကြိုးနှေ့ပန်န ခယ်ဟို့တွပ် မိန့်ပေးလိုက်ဟယ်။ အယ်လူဟု ဖယ်သူဖြစ်နူး။ ဖြားဇာလောက်ဟားနူး၊ ဆိုဘီး မေးဟယ်။

34 လူလေဟု တယော့-က်တဘော့-က် အော်ဘီးဟာ ရောက်ရောက်သဲသဲ ဖြစ်နေဟူကြောန့် တပ်မှူးဟာ ခြေနေ မှန်ဟို့ သိနိုင်ဘဲကြောန့် ပေါလုဟို့ ရဲတိုက်ထဲဟို့ ခေါ်ဆော န်ဟားဟို့တွပ် မိန့်ပေးလိုက်ဟယ်။

35 ရဲတိုက်လှေကားဟို့ ရှေ့-က်ဟားဟူ ခီမာ လူလေဟု ပိုဘီး ကြမ်းလာဘီးဟာ စစ်သားလေဟာ ပေါလုဟို့ ခီဘီး ဟာ ထမ်းဟားဂေရဟယ်။

36 လူလေဟာ “သူ့ဟို့ သတ်လိုက်” ဆိုဘီး အော်ဘီး လိုက်နေဂေဟယ်။

ပေါလုကိုယ်တိုင် ဖြေရှင်းဟူကြောန့်

37 ပေါလုဟာ သူ့ဟို့ ရဲတိုက်ထဲဟို့ ခေါ်ဆောန်ဟားဟို့ လောက်ဟူ ခီမာ သူဟု တပ်မှူးဟို့ “ခန်ဗျားန ကျွန်တော် စကားနဲနဲဟား ပြောရှင်ဟယ်” ဆိုဘီး ပြောလိုက်ဟယ်။

တပ်မှူးဟု “နန်ဟာ ဟေလသစကားဟို့ ပြောတတ်ဘဲ လော။

38 အယ်ဆိုဟာ နန်ဟာ အယ်ရစ်လေတိုင်ခန်ဟု ပေါင် ကန်ထကြွဘီး ကြမ်းဖတ်မား ၄,၀၀၀ ဟို့ တောကနုတာရ ဟို့ ခေါ်ဆောန်ဟားဟူ အဲဂုတုတုလူ မူဟုလော” ဆိုဘီး မေးဟယ်။

39 ပေါလုဟု “ကျွန်တော်ဟာ ယုဒလူဖြစ်ဘီး ကိလိကိနယ်ရဲ့ ထန်ရှားဟူ၊ တာရှုမြို့မာမိုးဟူ မြို့ကီးသားဖြစ်ဟယ်။ ကျွန်တော့်ဟို့ ကျေးဇူးပြုဘီး လူလေဟို့ စကားပြောခွံပေးပါ” ဆိုဘီး ပြောဟယ်။

40 တပ်မှူးဟု ခွံပေးဟူကြောန့် ပေါလုဟာ လှေကားထတ်မာရပ်ဘီး လူလေဟို့ တိတိဆိဆိဟား နေဟို့တွပ်လတ်န ချစ်ပြလိုက်ဟယ်။ အယ်လူလေဟာ တိတိဆိဆိဟား ဖြစ်ဟားဂေဟူ ခီမာ သူဟာ ယုဒစကားန၊

22

1 “သူ့ညီကိုလေန ဖလေ၊ ခုကျွန်တော့်ရဲ့ ဖြေရှင်းချစ်ဟို့ နားထောန်ဂေပါ” ဆိုဘီး ပြောဟယ်။

2 သူးနို့ဟို့ ယုဒစကားန ပြောနေဟယ် ဆိုဇာဟို့ ကြားရဟူ ခီမာ သူးနို့ဟာ ပိုဘီး တိဆိဟားဂေဟယ်။

အယ်ဘီးန ပေါလုဟု၊

3 “ကျွန်တော်ဟာ ကိလိကိနယ်၊ တာရှုမြို့မာမိုးဟူ ယုဒလူဖြစ်ဟယ်။ ယေရုရှလင်မြို့မာ ကီးလာဘီး ဘိုးဘေးလေ လိုက်လျှော့-က် ကျင့်သောင်းဟူ ပညတ်တော်ဟို့ ဂါမလျေလနားမာ တိတိကုလကုလဟား သန်ယူဟားဟယ်။ ခုနန်းနို့ဟာ ဘုရားသခင်ရဲ့ မှုတော်ဟို့ လောက်ဟို့တွပ် စိအားထတ်သန်ဟူမျိုးဘဲ ကျွန်တော်ဟုလည်း စိအားထတ်သန်ဟားဟယ်။

4 ကျွန်တော်ဟာ ယေရှုရဲ့ လမ်းစဉ်ဟို့ လိုက်လျှော့-က်

ဂေဟူ လူလေဟို့ သေလော့-က်အောန်ထိ ညဉ်းဆဲဟူးဟယ်။ ယော့-က်ကျားလေန မီးမလေဟို့ ဖမ်းဘီးဟာ ထောန်ခဲလဟူးဟယ်။

⁵ ကျွန်တော် ပြောနေဇာလေဟာ မှန်ဟယ် ဆိုဇာဟို့ ယဇ်ပုရောဟိတ်မန်းနတူးဒု ယုဒတရားလွတ်တော် တခုလောင်းဟု သတ်သေပြနိုင်ဂေဟယ်။ ကျွန်တော်ဟာ သူးနီနားဟုနေဘီး ဒဗာသက်မြို့မရှိဟူ ယုဒညီကိုလေဟို့ ရေးပေးလိုက်ဟူ စာလေဟို့ ယူဘီးန အယ်လမ်းစဉ်ဟို့ လိုက်လျော့-က်ဟူ လူလေဟို့ ပြစ်စီရင်ဟို့တွပ် ဖမ်းဘီးဟာ ယေရုရှလင်မြို့ဟို့ ခေါ်ဆောန်လာဟို့တွပ် အယ်မြို့ဟို့ ထွပ်ဟူးဟယ်။

ပေါလုဟာ သူ့ရဲ့ ပုလောန်းလဲလာပေါင်ဟို့ ပြောပြကြောန်း

(တမန်တော် ၉.၁-၁၉; ၂၆.၁၂-၁၈)

⁶ “ကျွန်တော်ဟာ ခရီးသွားရင်းန ဒဗာသက်မြို့နားဟို့ ရော့-က်ဟူ ခီမာ မွန်းဒဲခီန ကောန်းဂန်ဟုနေ တော့-က်ပဟူ လန်းရောန်တခုဟာ ရောက်တရစ် ကျွန်တော့်ပတ်လည်မာ ထွန်းတော့-က်လာဟယ်။

⁷ ကျွန်တော်ဟာ မုလေဂီးထတ်ဟို့ လဲကုလဟူးဘီး ‘ရှောလု၊ ရှောလု၊ နန်ဟာ ဖြားဖြစ်ကြောန် ငါဟို့ ညဉ်းဆဲနူး’ ဆိုဘီး ကျွန်တော့်ဟို့ ပြောနေဟူသံဟို့ ကြားရဟယ်။

8 ကျွန်တော်ဟု ‘သခင်၊ ကိုယ်တော်ဟု ဖယ်သူနဲ့’ ဆိုဘီး မေးလျှော့-က်လိုက်ဟယ်။ ကိုယ်တော်ဟု ‘ငါဟာ နန်ညှဉ်းဆဲနေဟူ နာဇရက်မြို့သား ယေရှုဘဲဖြစ်ဟယ်’ ဆိုဘီး မိန့်တော်မူလေဟယ်။

9 ကျွန်တော်နတူးဒူ ရှိနေဂေဟူ လူလေဟာ အယ်လန်းရောန်ဟို့ မြင်ရဂေဘေမဲ့ ကျွန်တော့်ဟို့ ပြောနေဟူသူရဲ့ သံတော်ဟို့ ကြားရဂေဟု။

10 ကျွန်တော် ဟု ‘သခင်၊ ကျွန်တော် ဟာ ဖယ်မျိုးလောက်ရဟို့နဲ့’ ဆိုဘီး မေးလျှော့-က်လိုက်ဟယ်။ ကိုယ်တော်ဟု ‘ထဘီးဟာ ဒမာသက်မြို့ဟို့ သွားလိုက်။ နန်လောက်ရဟို့တွပ် သတ်မှတ်ဟူးဟူဇာလေ ဂူလောင်းဟို့ အယ်မြို့မာ နန်ဟို့ ငါပြောပြမယ်’ ဆိုဘီး မိန့်တော်မူလေဟယ်။

11 ကျွန်တော်ဟာ တော့-က်ပဟူ လန်းရောန်ကြောန့် မျစ်စိကန်းဟူးဘီး ကျွန်တော်နတူးဒူ ရှိနေဂေဟူ လူလေဟု ကျွန်တော့်လတ်ဟို့ ဆွဲဘီးဟာ ဒမာသက်မြို့ထဲဟို့ ခေါ်ဆောန်ဟူးဂေဟယ်။

12 “အယ်မြို့မာ အာနနို နာမယ်ရှိဟူ လူဟာ ပညတ်တရားဟို့ လိုက်လျှော့-က်ကျင့်သောင်းဘီး ဘာသာရေးလိုက်စားဟူ လူလည်းဖြစ်ဟယ်။ အယ်မြို့မာနေဟူ ယုဒလူလေရဲ့ ချီးကျူးလေးစားခံရဟူ လူဖြစ်ဟယ်။

13 သူဟာ ကျွန်တော်နားဟို့ လာဘီး နီးနားမာ ရပ်ဘီးဟာ ‘ညီရှောလု၊ မျစ်စိပုလန်မြင်စေ!’ ဆိုဘီး ပြောဟယ်။

ရှစ်ရှင်းဘဲ ကျွန်တော့်ဟာ မျစ်စိပုလန်မြင်ဟူးဘီး သူ့ဟို
ကော့လိုက်ဟယ်။

14 အာနနိဟ ‘နန်ဟာ နို့ဘိုးဘေးလေရဲ့ ဘုရားသခင် လို
တော်ဟို သိဟိုတွပ်ရော၊ ကိုယ်တော်ရဲ့ ပြောန့်မတ်ဟူ စေ
ခံဟို မြင်ရဟိုတွပ်ရော၊ အယ်သခင်ရဲ့ နောက်တော်ဟူနေ
သံတော်ဟို ကြားရဟိုတွပ်ရော ကိုယ်တော်ဟာ နန်ဟို ဝီး
ကော့-က်လိုက်ဟယ်။

15 နန်ဟာခု မြင်ရကြားရဇာလေဟို လူတိုင်းဟို ပြောဟို
တွပ် အယ်သခင်ရဲ့ သတ်သေ ဖြစ်ရလေ့မယ်။

16 ခုနန်ဟာ ပြားဖြစ်ကြောန့် ခီဆွဲနေရနူး။ ထဘီးဟာ ဗ
တုတိဇံလိုက်။ အယ်ဘီးဟာ နန်ရဲ့ ပြစ်လေ လွတ်ခံရဟို
တွပ် သခင်ဘုရားရဲ့ နာမတော်န ဆုတောင်းလိုက် ဆိုဘီး
ပြောဟယ်။

လူမျိုးခြားလေဟို ဟောဟိုတွပ် ပေါလုဟို စေလွှတ်ခံ
ရကြောန့်

17 “ကျွန်တော်ဟာ ယေရုရှလင်မြို့ဟို ပုလန်ရော့-က်
ဘီး ဗိမာန်တော်မာ ဆုတောင်းနေဒူးမာ ရူပါရောင်ဟို မြင်
ရဟယ်။

18 အယ်ရူပါရောင်မာ သခင်ဘုရားဟို မြင်ရဘီး ကိုယ်
တော်ဟာ ‘နန်ဟာ ယေရုရှလင်မြို့ဟူနေ မြန်းမြန်ဟူး ထွပ်
ဟူးလိုက်။ အယ်မြို့သားလေဟာ ငါ့ကြောန့်သတ်သေခံ
ဇာဟို လတ်ခံဂေ့မှုဟာ’ ဆိုဘီး မိန့်တော်မူဟယ်။

19 ကျွန်တော်ဟုလည်း ‘သခင်ဘုရား၊ ကျွန်တော်ဟာ ဝါလယ်ဇရပ်လေဟို့ သွားဘီးဟာ သခင်ဟို့ ယောင်ကြည်ဟူလူလေဟို့ ရိုက်နှက်ဘီး ထောင့်ခလဟားဟယ် ဆိုဇာဟို့ အယ်လူလေ သိဂေဟယ်။

20 ကိုယ်တော်ရဲ့ သတ်သေဖြစ်ဟူ သတေဖန်ဟို့ သတ်ဂေဟူ ခီမာလည်း ကျွန်တော်ကိုယ်တိုင်ဟာ နားမာရပ်ဘီး လိုတူလိုပါဖြစ်ဟယ်။ သူ့ဟို့ သတ်ဟူလူလေရဲ့ အန်းဂီလေဟို့ စောန်ပေးဟားဟယ်’ ဆိုဘီး ပုလန်လျှော့-က်လိုက်ဟယ်။

21 သခင် ဘုရား ဟု ‘သွား လိုက်။ ရပ် ဝီး မာ နေ ဟူ လူမျိုးခြားလေနားဟို့ နန်ဟို့ ငါလွတ်မယ်’ ဆိုဘီး မိန်တော်မူဟယ်” ဆိုဘီး ပြောဟယ်။

22 လူလေဟာ ပေါလုရဲ့ စကားဟို့ အယ်မျှထိ နားထောန်ဂေဘီးန “အယ်လူဟို့ ကမုဘာမုလေဂီးဟုနေ ဖယ်ရှားလိုက်! သူ့ဟို့ သတ်လိုက်! သူဟာ သတ်ရှင်သင့်ဟု!” ဆိုဘီး သံကုလယ်ဂီးန အော်ဂေဟယ်။

23 သူးနို့ဟာ အန်းဂီလေဟို့ခါရမ်းဘီး မုလေမုလေဟို့ လေထဲဟို့ ပစ်တန်ဘီးဟာ အော်ဂေဟယ်။

24 အယ်ခီမာ ရောမတပ်မှူးဟာ ပေါလုဟို့ ရဲတိုက်ထဲဟို့ ခေါ်ဆောန်ဟားဟို့တွပ်န လူလေဟာ ဖြားဖြစ်ကြောန့် သူ့ဟို့ ဆန့်ကျင်ဘီး အယ်မျိုး အော်နေဂေဇာဟို့ သိရှင်တွပ် သူ့ဟို့ရိုက်ဘီး စစ်ဆေးဟို့တွပ် မိန်ပေးလိုက်ဟယ်။

25 သူ့တို့ ရိုက်တို့တွင် ကြိုးနု တောက်ဂေဟူ ခီမာ ပေါလုဟု နိုးနားမာရပ်နေဟူ ရာရှိဟူ “ရောမ နိုင်ငံသားတယော့-က်ဟူ စစ်ဆေးဘဲနု ကီဒန်ပေးဇဟူ တရားဥပဒေနု ကိုက်ညီဘဲလော” ဆိုဘီး မေးဟယ်။

26 အယ်စကားဟူ ကြားရဟူ ရာရှိဟူ တပ်မှူးနားဟူ သွားဘီး “သခင် ဖယ်မျိုးလောက်ဟူနူး။ အယ်လူဟူ ရောမနိုင်ငံသားဖြစ်ဟယ်!” ဆိုဘီး လျှော့-က်လိုက်ဟယ်။

27 အယ်ကြောန့် တပ်မှူးဟူ ပေါလုနားဟူ လာဘီး “ငါ့ဟူပြောပါ။ နန်ဟူ ရောမနိုင်ငံသားလော” ဆိုဘီး မေးဟယ်။

ပေါလုဟု “မှန်ဟယ်” ဆိုဘီး ပုလန်ဖြေလိုက်ဟယ်။

28 တပ်မှူးဟု “ငါဟူ ကပ်လေဘောင်ဂီး ပေးဘီးမှ ရောမနိုင်ငံသား ခံယူဟူးဟယ်” ဆိုဘီး ပြောဟယ်။ ပေါလုဟု “ငါဟူ ဇာတိအားဖြင့် ရောမနိုင်ငံသားဖြစ်ဟယ်” ဆိုဘီး ပုလန်ပြောဟယ်။

29 သူ့တို့ စစ်ဆေးနေဟူ လူလေဟူ ရှစ်ရှင်းဘဲ နှော့-က်ဟူ ဆုဟူးဂေဟယ်။ ပေါလုဟူ ရောမနိုင်ငံသားဖြစ်ဟယ် ဆိုဇာဟူရော၊ သူ့တို့ သံကြိုးနု ခယ်လိုက်မိဘိ ဆိုဇာဟူ ရော သိဟူးဟူ ခီမာ တပ်မှူးဟူ ကြော့-က်နေဟယ်။

ပေါလုဟူ ယုဒတရားလွတ်တော်ရှေ့ဟူ ခေါ်ဆောန့်ဟူးဟူကြောန်း

30 တပ်မှူးဟာ ပေါလုဟို ယုဒလူလေဟာ ဖြားပြစ်မှုန စွပ်စွဲဂေ့နုး၊ ဆိုဇာဟို သေးသေချားချာဟား သိရှင်ဟု ယ်။ အယ်ကြောန့်နော့-က်တနေ့မာ ပေါလုဟို ခယ်ဟားဟူ သံကြိုးဟို ဖယ်ဘီးဟာ ယဇ်ပုရောဟိတ်ဂီးလေန တရား လွတ်တော် ဖွဲ့ဝမ်လေဟို စုဂေ့ဟိုတွပ် မိန့်ပေးလိုက်ဟယ်။ အယ်ဘီးန ပေါလုဟို ခေါ်ဆောန်လာဘီး အယ်လူလေရှေ့ မာ ရပ်ခိုင်းလိုက်ဟယ်။

23

1 ပေါလုဟာ ယုဒတရားလွတ်တော် ဖွဲ့ဝမ်လေဟို စေ့ စေ့ကော့ဘီး “ညီကိုလေ၊ ကျွန်တော်ဟာ အယ်နေ့ထိ ဘုရားသခင်ရှေ့မာ ကောန်းဟူစိပုလဲဝန သတ်ရှင်နေထို င်ဟယ်” ဆိုဘီး ပြောဟယ်။

2 ယဇ်ပုရောဟိတ်မန်း အာနနိဟာ ပေါလုနားမာရပ်နေ ဟူ လူလေဟို သူဇာတ်ပေါ့-က်ဟို ရိုက်ခိုင်းလိုက်ဟယ်။

3 ပေါလုဟ “ထူးဖုလုသုဟားဟူ အုရိုး၊ နန့်ဟို ဘုရား သခင်ဟာ ဒန်ခတ်လေ့မယ်။ ခန်ဗျားဟာ ကျွန်တော့်ဟို တရားဥပဒေန စီရင်ဟိုတွပ် တရားခွမ်မာ ထိုင်နေဘီး ကျွန် တော့်ဟို ရိုက်ခိုင်းဇာဟာ ဥပဒေဟို ခုလိုးဖော့-က်ဟယ်!” ဆိုဘီး သူ့ဟို ပြောဟယ်။

4 ပေါလုနားမာ ရပ်နေ ဟူ လူလေဟ “နန်ဟာ ဘုရားသခင်ရဲ့ ယဇ်ပုရောဟိတ်မန်းဟို အယ်မျိုးဘဲ့ ပုလန် ပြောရလော!” ဆိုဘီး သူ့ဟိုပြောဟယ်။

5 ပေါလုဟု “ညီကိုလေ၊ အယ်လူဟာ ယဇ်ပုရောဟိတ် မန်း ဖြစ်ဟယ် ဆိုဇာဟို ကျွန်တော်သိဟု။ ကျမ်းစာမာ ‘နန့် လူမျိုးရဲ့ လူဂီးမန်းဟို ကောင်းဘဲကြောင်းဟို ပြောရဟု’ ဆိုဘီး ရေးဟားဟယ်” ဆိုဘီး ပုလန်ဖြေလိုက်ဟယ်။

6 အယ်လူလေထဲမာ တဖွဲဟု ဖာရီရဲဖြစ်ဘီး တဖွဲဟု ဒေ့ကဲလေဖြစ်ဟယ် ဆိုဇာဟို ပေါလုဟု သိဟားဟူ ခီမာ “ညီကိုလေ၊ ကျွန်တော့်ဟာ ဖာရီရဲဖြစ်ဟယ်။ ဖာရီရဲရဲ့ သားလည်းဖြစ်ဟယ်။ သေဟားလူလေဟာ ရှင်ပုလန်ထမြော့-က်လေ့မယ် ဆိုဇာဟို မျှော်လင့်ရှင်းကြောင်း ကြောန့် စစ်ဆေးခံနေရဟယ်” ဆိုဘီး တရားလွှတ်တော်မာ အော်ဟစ်ဘီးပြောဟယ်။

7 အယ်မျိုး သူပြောလိုက်ဟူ ခီမာ ဖာရီရဲလေန ဒေ့ကဲလေဟု စဘီး ပြဿနာဖြစ်ဂေ့ဘီးဟာ အောက်စု နေ့ခြမ်းကွဲဟားဟယ်။

8 ဖြားဖြစ်ကြောန့်နူးဆိုဟာ ဒေ့ကဲလေဟု ရှင်ပုလန်ထမြော့-က်ဇာ မေ့ဟု။ ကောင်းဂန်တမန်လည်း မေ့ဟု။ နာမ် ဝိညာဉ်လည်း မေ့ဟု ဆိုဘီး ပြောဂေ့ဟယ်။ အယ်ဘေမဲ့ ဖာရီရဲလေဟု အယ်မူသောင်းခုလောင်းရှိဟယ် ဆိုဘီး ယောင်ကြည်ဂေ့ဟယ်။

9 အော်ဟစ်သံဟာ ပိုကုလယ်လာဘီး ဖာရီရဲဂိုဏ်းဝမ်ဖြစ်ဟူ ကျမ်းတတ်ဆရာတချို့ဟာ ထဘီးဟာ “အယ်လူမာ ဖြားပြစ်လည်း နို့လေတို့ဟု! ဝိညာဉ်တပါးပါး၊ ကောင်းဂန်

တမန် တပါးပါးဟု သူ့တို့ ပြောဟော့ဇာ ဖြစ်နိုင်ဟယ်!” ဆိုဘီး ပြင်းပြင်းထန်ထန် ဂြင်းခူဂေဟယ်။

10 ဂြင်းခူဇာဟာ ရရာတိုင်း ပြင်းထန်လာဟူကြောင့် သူးနို့လေဟာ ပေါလုတို့ ပိုင်းပိုင်းဆွဲဖြတ်လေ့မယ် ဆိုဘီး တပ်မှူးဟာ စိုးရိမ်ဟော့ဟယ်။ အယ်ကြောင့် စစ်သားလေတို့ ဆင်းခိုင်းလိုက်ဘီး ပေါလုတို့ အယ်လူလေနားဟုနေ ခေါ်ထုလာဘီးဟာ ရဲတိုက်ထဲတို့ ခေါ်ဆောန်ဟော့တို့တွပ် မိန့်ပေးလိုက်ဟယ်။

11 အယ်ညဉ့်မာဘဲ သခင်ဘုရားဟာ ပေါလုနားမာ ပေါ်လာဘီး “ကြော့-က်န။ နန်ဟာ ယေရုရှလင်မြို့မာ ငါ့ကြောန်းတို့ သတ်သေခံရဟူမျိုးဘဲ ရောမမြို့မာလည်း သတ်သေခံ ဟောပြောရအူးမယ်” ဆိုဘီး ပြောဟယ်။

ပေါလုတို့ သတ်တို့ ကြံစည်ဂေကြောန်း

12 နော့-က်တနေ့ မိုးလန်းဟူ ခီမာ ယုဒလူတချို့ဟာ တွံဂေဘီး ပေါလုတို့ သတ်ရဘဲဟု ဆိုဟာ ဖြားလည်းစားဘဲ၊ သော့-က်ဘဲနေမယ် ဆိုဘီး ခိဌာန်ပြုဂေဟယ်။

13 အယ်မျိုး ကြံစည်ဂေဟူ လူလေဟု ယော့-က်လေး ဆယ်ကျော်ရှိဟယ်။

14 သူးနို့ဟာ ယဇ်ပုရောဟိတ်ဂီးလေန သတ်ဂီးဝါဂီးလေနားတို့ သွားဘီး “ကျွန်တော့်လေဟာ ပေါလုတို့ သတ်ရဘဲဟု ဆိုဟာ ဖြားလည်းစားဘဲ၊ သော့-က်ဘဲနေမယ် ဆိုဘီး ဂဒိသစ်စာပြုဟော့ဂေဟယ်။

15 အယ်ကြောန့် သခင်လေဟာ တရားလွှတ်တော် ဖွဲ့ဝင် လေနတူးဒူ ပေါလုရဲ့ မူဟို ပိုဘီး ဟာ တိတိကုလကုလ ဟား စစ်ဆေးရှင်ဟယ် ဆိုဘီး ယောန်ဆောန်ဘီးဟာ သူ ဟို သခင်လေနားဟို ခေါ်လာဟိုတွပ် ရောမတပ်မှူးဟို မြစ် တာရပ်ခံဂေပါ။ ပေါလုဟာ သခင်လေနားဟို ရှေး-က်ခန် မာ သူဟို သတ်ဟိုတွပ် ကျွန်တော့်လေဟာ ဆင်သင့်ရှိနေ မယ်” ဆိုဘီး လျှော့-က်ဂေဟယ်။

16 အယ်ဘေမဲ့ အယ်မျိုး ကြံစည်နေဇာဟို ပေါလုညီမ ရဲ့ သားဟာ ကြားဟားလေဟယ်။ အယ်ကြောန့် သူဟာ ရဲတိုက်ထဲဟို ဝမ်ဘီးန ပေါလုဟို သွားပြောဟယ်။

17 ပေါလုဟာ ရာရှိတယော့-က်ဟို ခေါ်ဘီးဟာ “အယ် ကောန်သားဟို တပ်မှူးနားဟို ခေါ်ဟားပေးပါ။ သူမာ တပ် မှူးဟို ပြောဇာတခုရှိဟယ်” ဆိုဘီး ပြောဟယ်။

18 ရာရှိဟာ အယ်ကောန်သားဟို တပ်မှူးနားဟို ခေါ်ဆော န်ဟားဘီးန “ထောန်သားပေါလုဟာ ကျွန်တော့်ဟို ခေါ်ဘီး ဟာ အယ်ကောန်သားဟို သခင်နားဟို ပို့ခိုင်းလိုက်ဟယ်။ ဖြားဖြစ်ကြောန့်နူးဆိုဟာ သူမာ သခင်ဟို ပြောဇာတခုရှိ ဟယ်” ဆိုဘီး တောန်းလျှော့-က်လိုက်ဟယ်။

19 တပ်မှူးဟာ အယ်ကောန်သားရဲ့ လတ်ဟို ဆွဲဘီး လူ လေမေ့ဘဲဟူ နေရာတခုဟို ခေါ်ဟားဟယ်။ အယ်ဘီးန “န န်ဟု ငါ့ဟို ဖြားဇာပြောရှင်နူး” ဆိုဘီး မေးဟယ်။

20 ကောန်သားဟု “ယုဒအာဏာပိုင်လေဟာ ပေါလုရဲ့ မူ ဟို ပိုဘီး ဟာ တိတိကုလကုလဟား စစ်ဆေးရှင်ဟယ် ဆို

ဘီး ယောန်ဆောန်ဘီးဟာ သခင်ဟို့ နတ်ကီးတန်ဟာ ပေါလုဟို့ တရားလွတ်တော်ဟို့ ခေါ်ဆောန်ဟူးဟို့တွပ် တောန်းလျှော့-က်ဂေမယ် ဆိုဘီး ဘောတူဟူးဂေဟယ်။

²¹ သူးနို့ရဲ့ စကားလေဟို့ လတ်ခံယောင်ကြည်န။ ဖြားဖြစ်ကြောန်နူးဆိုဟာ လူလေးဆယ်ကျော်ဟာ ပူးနေဘီးစောန်နေဂေဟယ်။ အယ်လူလေဟာ ပေါလုဟို့ သတ်ရဘဲဟာ ဆိုဟာ ဖြားလည်း စားဘဲ၊ သော့-က်ဘဲနေမယ် ဆိုဘီး ဓိဌာန်ပြုဂေဟယ်။ ခုဘဲ သူးနို့ဟာ ပေါလုဟို့ သတ်ဟို့တွပ် ဆင်သင့်ဖြစ်နေဘီး သခင်ရဲ့ ဆောင်းဖြတ်ချစ်ဟို့ စောန်နေဂေဟယ်” ဆိုဘီး လျှော့-က်လိုက်ဟယ်။

²² တပ်မှူးဟာ “နန်ဟာ အယ်မျိုးငါ့ဟို့ လာပြောဟယ် ဆိုဇာဟို့ ဖယ်သူဟို့လည်း ပြောန” ဆိုဘီး အယ်ကောန်သားဟို့ သွားခိုင်းလိုက်ဟယ်။

ပေါလုဟို့ မြို့ဝန်မန်းဖေလင်နားဟို့ ပို့လိုက်ဟူကြောန်း

²³ အယ်ဘီးန တပ်မှူးဟာ ရာရှိနေ့ယော့-က်ဟို့ ခေါ်ဘီး “ကဲသရိမြို့ဟို့ သွားဟို့တွပ် စစ်သား ၂၀၀၊ မြင်းတပ်သား ခွန်နစ်ဆယ်န လုံတပ်သား ၂၀၀ ဟို့ အယ်ညဉ့်ခန်း ကိုးနာရီမာ ထွပ်ဟို့တွပ် ဆင်သင့်ဖြစ်နေဂေပါ။

²⁴ ပေါလုတွပ် မြင်းလေဟို့လည်း ဆင်သင့်ပြင်ဟူးဂေ။ သူးဟို့ မြို့ဝန်မန်းဖေလင်နားဟို့ လောင်းလောင်ချောင်းချောင်ဟူး ပို့ဂေပါ” ဆိုဘီး ပြောလိုက်ဟယ်။

²⁵ အယ်ဘီးန တပ်မှူးဟာ စာတစောန်ဟို့ ရေးဘီးဟာ ပေးလိုက်ဟယ်။

26 အယ်စာမာ “ကလော်ဒီလုသိဟာ မြတ်ဟူ မြို့ဝန် မန်းဖေလဇ်ဟို့ နှောက်ဆစ်လိုက်ပါဟယ်။

27 ယုဒလူလေဟာ အယ်လူဟို့ ဖမ်းဘီးဟာ သတ်ဟို့ လောက်နေဂေဟယ်။ သူဟာ ရောမနိုင်ငံသားဖြစ်ဟယ် ဆိုဇာဟို့ ကျွန်တော့်လေဟာ သိရဟူကြောန်၊ ကျွန်တော့်ရဲ့ စစ်သားလေနတူးဒု သွားဘီးဟာ သူဟို့ ကယ်တန်လာရဟယ်။

28 ယုဒလူလေဟာ ဖြားပြစ်မှုန စွပ်စွဲဂေဟယ် ဆိုဇာ ဟို့ သိရှင်ဟူကြောန်၊ သူးနှိလေရဲ့ တရားလွှတ်တော်ဟို့ ခေါ် ဆောန်ဟားဟယ်။

29 သူဟာ သူးနှိရဲ့ ပညတ်တရားနဆိုင်ဟူ ပြဿနာ လေတွပ် စွပ်စွဲခံရဟယ်။ သူ့မာ သေဒန်ခံထိုက်ဟူပြစ်၊ တောက်နှောန်ခံထိုက်ဟူပြစ် တခုလည်း မှေ့ဟု ဆိုဇာဟို့ ကျွန်တော်တို့မြင်ရဟယ်။

30 ယုဒလူလေဟာ သူဟို့ လောက်ကြံဟို့တွပ် ကြံစည် နေဟယ် ဆိုဇာဟို့ သိရဟူ ခီမာ ကျွန်တော်ဟာ သခင်နား ဟို့ သူဟို့ ရှစ်ရှင်း စေလွှတ်လိုက်ဟယ်။ စွပ်စွဲမားလေဟို့ လည်း သူဟို့ စွပ်စွဲဟားဇာလေဟို့ သခင်ရှေ့မာ လျှော့-က် ဂေဟို့ ညွှန်ကြားလိုက်ဟယ်။ သခင် ကျန်းမာပါစေ” ဆို ဘီး ပါရှိဟယ်။

31 စစ်သားလေဟာ တပ်မှူးရဲ့ မိန့်တိုင်း လောက်ဂေဟယ်။ သူးနှိဟာ ပေါလုဟို့ ခေါ်ဘီး အယ်ညဉ့်ခန်းမာဘဲ့ အနု တိပတရိမြို့ထိ ပို့ဆောန်ဂေဟယ်။

³² နှော့-က်တနေ့မှာ ခေလျင်စစ်သားလေဟာ ရဲတိုက်ဟို့ ပုလန်လာဂေ့ဟယ်။ မြင်းတပ်သားလေဟာ ပေါလုနတူးဒု ဆစ်ဘီးဟာ ခရီးသွားဂေ့ဟယ်။

³³ မြင်းတပ်သားလေဟာ ကဲသရိမြို့ဟို့ ရှော့-က်ဟူ ခီမာ တပ်မှူးရဲ့ စာဟို့ မြို့ဝန်မန်းဟို့ ပေးဘီး ပေါလုဟို့ သူလတ်ထဲဟို့ အပ်လိုက်ဟယ်။

³⁴ မြို့ဝန်မန်းဟာ စာဟို့ဖတ်ဘီးန “နန်ဟာ ဖယ်ပြည်သားဖြစ်နူး” ဆိုဘီး ပေါလုဟို့ မေးဟယ်။ ပေါလုဟာ ကံလိကံပြည်သား ဖြစ်ဟယ် ဆိုဇာဟို့ သိဟူ ခီမာ

³⁵ မြို့ဝန်မန်းဟ “အယ်နေရာမှာ နန့်ဟို့ စွပ်စွဲမားလေ ရှော့-က်လာဂေ့ဟူ ခီမာ နန့်ဟို့ ငါစစ်ဆေးမယ်” ဆိုဘီး ပြောဟယ်။ အယ်ဘီးန ပေါလုဟို့ ဟေရုဒ်ရဲ့ နန်းတော်မာ စောန်လေန ထားဟို့တွပ် ပြောလိုက်ဟယ်။

24

ပေါလုဟို့ ယုဒလူလေဟာ စွပ်စွဲဂေ့ကြောန်း

¹ ငါးရစ်ကြာဘီးန ယဇ်ပုရောဟိတ်မန်း အာနနိဟာ သတ်ဂီးဝါဂီးတချို့န တေရတုလု နာမယ်ရှိဟူ ရှေ့နေနတူးဒု ကဲသရိမြို့ဟို့ ရှော့-က်လာဟယ်။ အယ်လူလေဟာ မြို့ဝန်မန်းဖေလဇ်ရှေ့ဟို့ ဝမ်ဘီးဟာ ပေါလုဟို့ တရားစွဲဂေ့ဟယ်။

² မြို့ဝန်မန်းဟာ ပေါလုဟို့ ရှေ့ဟို့ ခေါ်ဟူ ခီမာ ရှေ့နေတေရတုလုဟု၊

“မြို့ဝန်မန်းဖေလဇ်၊ သခင်ရဲ့ ကီးမြတ်ရှင်းကြောန့် ကျွန်တော့်လေဟာ ရရာတိုင်း ငြီးငြီးချမ်းချမ်းနဲ့ နေရရဲဟယ်။ သခင်ဟာ ကျွန်တော့်လေရဲ့ တိုင်းပြည်နဲ့ လူမျိုးလေတွပ် လိုအပ်ဟူ ပြုပြင်ပုလောက်လဲဇာလေဟို့ ဘောင်ဂီးလောက်ပေးနေဟယ်။”

3 “မြတ်ဟူဖေလဇ်၊ ကျွန်တော့်လေဟာ အယ်မူဇာဟို့ နေရာတိုင်းမာ ရရာတိုင်း ကျေးဇူးတန်ဘီးဟာ ကြိုဆိုရဲဟယ်။

4 ကျွန်တော့်ဟာ သခင်ရဲ့ ဒီဟို့ ဘောင်ဂီးယူရှင်ဘဲကြောန့် ကျဉ်းချောက်နဘဲ လျှော့-က်ဟားဇာဟို့ ကြင်နာဟူစိနနားထောန်ပေးဟို့ တောန်းဗန်ဟယ်။

5 အယ်လူဟာ ပြဿနာကောန်ဖြစ်ဘီး ကမ္ဘာတဝန်းလောင်းမာရှိဟူ ယုဒလူလေဟို့ ဆူပူအောင်ကြွမှု ဖြစ်အောန် နှိုးဆော်ပေးနေဟယ်။ အယ်ဘီးဟာ သူဟာ နာဇရက်ဂိုဏ်းရဲ့ ခေါင်းဆောန် တယော့-က်လည်း ဖြစ်ဟယ် ဆိုဇာဟို့ ကျွန်တော့်လေ တွံရဟယ်။

6 မိမာန်တော်ဟို့လည်း ညစ်ညူးအောန်လောက်ဟို့ ကြိုးစားဟယ်။ အယ်ကြောန့်သူဟို့ ကျွန်တော့်လေဟာ ဖမ်းဘီးဟယ်။

7 *

8 သခင်ဟာ အယ်လူဟို စစ်ဆေးမယ် ဆိုဟာ သူ့ဟို ကျွန်တော့်လေဟာ စွပ်စွဲနေဟူဇာလေ ဂူလောင်းဟို သခင် ကိုယ်တိုင် သိရလေ့မယ်” ဆိုဘီး လျှော့-က်ဟယ်။

9 ယုဒလူလေဟလည်း အယ်စွပ်စွဲချစ်ဟာ မှန်ဟယ် ဆို ဘီး ပေါလုဟို ဝိုင်းဘီးဟာ ပြောဂေဟယ်။

ဖေလဇ်မန်းရှေ့မာ ပေါလုရဲ့ ချေပကြောင်း

10 မြို့ဝန်မန်းဟာ ပေါလုဟို ပြောဟို့တွပ် လတ်ပြလိုက် ဟူ ခီမာ ပေါလုဟ

“သခင်ဟာ အယ်လူမျိုးဟို နှစ်ကြာဂီး တရားစီရင်သူ ဖြစ်ဟယ် ဆိုဇာဟို ကျွန်တော်သိဟယ်။ သခင်ရှေ့မာ ကျွန်တော်ကိုယ်တိုင် ချေပခွင့်ရဟူကြောန့် ဝန်းသာဟယ်။

11 ကျွန်တော်ဟာ ဘုရားသခင်ဟို ဝတ်ပြုကိုးကွယ်ဟို့ တွပ် ယေရုရှလင်မြို့ဟို သွားဟူဇာ ဆယ်နှေ့ရစ်လော့-က် ဘဲ့ ကြာသေးဟယ် ဆိုဇာဟို ကိုယ်တော်ကိုယ်တိုင် စောင့် ဇမ်းသိနိုင်ဟယ်။

12 ကျွန်တော်ဟာ ဗိမာန်တော်မာ တယော့-က်ယော့က် န ငြင်းခူဘီး ဝါလယ်ဇရပ်မာဘဲ့ဖြစ်ဖြစ်၊ မြို့ထဲမာဘဲ့

* 24:7 ၂၄-၇ တချို့ လတ်ရေးမှုလေမာ ခန်းငယ် ၆၁-၈က ဟို့၊ နို့လေရဲ့ ကိုယ်ပိုင်ဥပဒေန သူ့ဟို စီရင်ဟို့ ကြံစည်ဂေဟယ်။
၇ အယ်ဘေမဲ့ တပ်မှူးလုသိဟ ရရာတိုင်း ဒေါသထွပ်ဘီးဟာ ပေါလုဟို သူးနို့လတ်ထဲဟုနဘီး ခ ထပ်ပေါန်းထဲဟားဟယ်။

ဖြစ်ဖြစ် လူလေဟို ဆူပူအောင်ကြွအောန် လောက်နေဟု
ယ် ဆိုဇာဟို ယုဒလူလေဟာ တွံရဲဂေဟု။

¹³ ခု ကျွန်တော်ဟို စွပ်စွဲနေဂေဟူ ဇာလေဟိုလည်း သူး
နို့ဟာ သခင်ရှေ့မာ သတ်သေပြနိုင်ဂေဟု။

¹⁴ အယ်ဘေမဲ့ အယ်လူလေဟု လွဲမှားဟယ် ဆိုဘီး ယူ
ဆဟူ လမ်းစဉ်ရ ကျွန်တော်ဟာ ဘိုးဘေးလေရဲ့ ဘုရား
သခင်ဟို ကိုးကွယ်ဟယ် ဆိုဇာဟို သခင်နားမာ ဝန်ခံဟု
ယ်။ အယ်ဘေမဲ့ ကျွန်တော်ဟာ မောရှေရဲ့ ပညတ်ကျမ်းန
ပရောဖက်ကျမ်းလေမာ ပါဟူဇာ ဂူလောင်းဟို ယောင်ကြ
ည့်ဟယ်။

¹⁵ သူးနို့ ကိုယ်တိုင်လည်း ဘုရားသခင်ဟို မျှော်လင့်
ဟူမျိုးဘွဲ လူဆိုး၊ လူကောင်းဝီးဘဲန လူလေ ဂူလောင်းဟာ
သေရာဟုနေ ထမြော့-က်ဂေလေ့မယ် ဆိုဇာဟို ကျွန်တော်
ဟာ မျှော်လင့်ဟူလူ ဖြစ်ဟယ်။

¹⁶ အယ်ကြောန့် ကျွန်တော့်ဟာ ဘုရားသခင်ရှေ့၊ လူ
လေရှေ့မာ ပြစ်တန်ဇာမောဘဲဟို သိစိမြဲဒမ်းရှိဟိုတွပ် ကော
န်းဆောင်း လောက်ဆောန်ဟယ်။

¹⁷ “ကျွန်တော်ဟာ ယေရုရှလင်မြို့ဟု ထွပ်ဘီး နှစ်
ပေါင်းဘောင်ဂီး ကြာဘီးန ကိုယ့်လူမျိုးလေဟို ပေးကမ်း
စွန့်ကြဲဟိုတွပ်န ဘုရားသခင်ဟို ပူဇော်ဆစ်သဟိုတွပ်
ရော့-က်လာဟယ်။

¹⁸ ဗိမာန်တော်ထဲမာ ကျွန်တော့်ဟာ စင်ကြယ်ရှင်းဟို

လောက်ဘီးန ပူဇော်သကာ ဆစ်သနေဒူးမာ အယ်လူလေ
ဟာ ကျွန်တော့်ဟို့ တို့ဟူးဂေဟယ်။ အယ်နေရာမာ လူ
အောက်ဂီးလည်း ကျွန်တော်နတူးဒူ မေ့ဟူ။ ရောင်းရင်း
ဆန်ခတ်လည်း ဖြစ်ဂေဟူ။

19 အယ်ဘေမဲ့ အယ်နေရာမာ အာရိုပြည်ဟု ယုဒလူ
တချို့ရှိဟယ်။ ကျွန်တော့်ဟို့ စွပ်စွဲမယ် ဆိုဟာ သခင်ရှေ့
မာ သူးနို့ကိုယ်တိုင် လာဘီး စွပ်စွဲသင့်ဟယ်။

20 အယ်မျိုးမူဘဲနေဟာ အယ်မူရိုနေဟူ လူလေဟု
သခင်ရှေ့မာ ကျွန်တော် ကျူးလွန်ဟူပြစ်လေဟို့ ဖော်ပြ
ဘီး စွပ်စွဲသင့်ဟယ်။

21 ကျွန်တော်ဟာ တရားလွတ်တော်ရှေ့မာ ရပ်ဘီး ‘သေ
ဟူးလူလေဟာ ရှင်ပုလန်ထမြော့-က်လေ့မယ် ဆိုဇာဟို့
ယောင်ကြည်ဟူကြောန့် အယ်နေ့ နန်းနို့ရှေ့မာ ကျွန်တော်
ဟာ စစ်ဆေးခံနေရဟယ်’ ဆိုဘီး စကားတခွန်းဟို့ဘဲ
ကြွေးကြော်ဟယ်” ဆိုဘီး ပြောလေဟယ်။

22 ဖေလင်မန်းဟာ အယ်လမ်းစဉ်ကြောန်းဟို့ ကောန်း
ကောန်းဟူး သိဟူလူ ဖြစ်ဟူကြောန့် မူစစ်ဆေးဇာဟို့
အယ်ခီမာ ရွှေ့ဆိုင်လိုက်ဟယ်။ သူဟု “တပ်မှူးလုသိ
ရော-က်လာဟူ ခီမာ အယ်မူဟို့ ငါဟာ စီရင်ချစ်ဒုလမယ်”
ဆိုဘီး သူးနို့ဟို့ ပြောဟယ်။

23 ပေါလုဟို့ စောန့်လေန ထားဟူးဟို့န လွတ်လပ်မူဟို့
နဲနဲပေးဘီး သူမိဆွေလေရဲ့ ပြုစုဇာဟို့ ခွမ်ပြုဟို့ တပ်မှူး

ဟို့ မိန့်ပေးဟူးဟယ်။

ဖေလင်နု ဒြသိလေရှေမာ ပေါလု ဟောပြောဟူကြော
န်း

²⁴ ရစ်နဲနဲကြာဘီးနု ဖေလင်မန်းဟာ သူမယား ဒြသိလေ
နတူးဒု ရော့-က်လာဟယ်။ ဒြသိလေဟု ယုဒလူမျိုးဖြစ်
ဟယ်။ ဖေလင်မန်းဟာ ပေါလုဟို့ ခေါ်ခိုင်းဘီးဟာ ယေရှု
ခရစ်တော်ဟို့ ယောင်ကြည်ရှင်းနု ဆိုင်ဟူကြောင်းဟို့ ပေါ
လုနားဟုနေ ကြားနာလေဟယ်။

²⁵ ပေါလုဟာ ဖြောန့်မတ်ရှင်း၊ ကာမဂေါင်ချောက်တီး
ရှင်းနု ရော့-က်လာမယ့် တရားစီရင်ရှင်း ကြောင်းလေဟို့
ပြောဟူ ခီမာ ဖေလင်မန်းဟာ ကြော့-က်လန့်ဘီး “ခု နန့်
သွားနိုင်ဘီ။ နော့-က်ခွမ်ကြောင်ဟူ ခီမာ နန့်ဟို့ ငါပုလန်
ခေါ်မယ်” ဆိုဘီး ပြောဟယ်။

²⁶ အယ်ခီမာဘဲ ပေါလုဟု သူဟို့ ကပ်ပေးမယ် ဆိုဘီး
မျှော်လင့်နေဟူကြောန့် သူဟာ ပေါလုဟို့ မကြာမကြာခေါ်
ဘီးဟာ စကားပြောဟယ်။

²⁷ နှော့နှစ်လော့-က်ကြာဘီးနု ဖေလင်မန်းရဲ၊ မြို့ဝန်မန်း
ရာထူးဟို့ ပေါကိဖေတုတုဟု ဆစ်ခံဟယ်။ ဖေလင်မန်း
ဟာ ယုဒလူလေဟို့ ကျေးဇူးပြုရှင်ဟူကြောန့် ပေါလုဟို့
ထောန်ခွလဟူးရစ်ဟယ်။

25

မန်းဂီးနားဟို့ ပေါလုယူခံဝမ်ဟူကြောင်း

၁ ဖေတုတုမန်းဟာ အယ်နယ်ဟို့ ရော့-က်လာဘီး သောင်းရစ်ကြာဘီးန ကဲသရိမြို့ဟုနေဘီး ယေရုရှလင် မြို့ဟို့ တတ်ဟူးဟယ်။

၂ အယ်ခီမာ ယဇ်ပုရောဟိတ်ဂီးလေန ယုဒခေါင်းဆာ န်လေဟာ ပေါလုဟို့ ဆန့်ကျင်လွန်ကျူးကြောင်းဟို့ ဖေတု တုမန်းဟို့ စွဲချစ်တန်ဘီး တိုက်တွန်းဟယ်။

၃ သူးနို့ဟာ ပေါလုဟို့ လမ်းမာရှောင်းဘီးဟာ သတ်ဟို့ တွပ် လျှို့ဝှပ်ကြံစည်ဟူးဘီးသား ဖြစ်ဟယ်။ အယ်ကြော န် သူးနို့ဟို့ ကျေးဇူးပြုဟူနေန ပေါလုဟို့ ယေရုရှလင်မြို့ ဟို့ ခေါ်ဆောန်လာပေးဟို့တွပ် ဖေတုတုမန်းဟို့ မြစ်တာရပ် ခံဂေဟယ်။

၄ ဖေတုတုမန်းဟ “ပေါလုဟို့ ကဲသရိမြို့မာ ထောန်ခ လထားရစ်ဟယ်။ ငါကိုယ်တိုင် အယ်မြို့ဟို့ ကြာခန်သွား မယ်။

၅ နန်းနို့ရဲ့ ခေါင်းဆာန်လေဟာ ကဲသာမန်းဂီးနားဟို့ ငါ့ နတူးဒု လိုက်ဘီးဟာ ပေါလုမာ ပြစ်တခုထန်ရှားမယ် ဆို ဟာ စွပ်စွဲချစ်လေဟို့ ငါ့ဟို့ တန်ပြဂေ” ဆိုဘီး ပြောဟယ်။

၆ မြို့ဝန်မန်းဟာ ယေရုရှလင်မြို့မာ ဆယ်ရစ်လော့-က် နေဘီးန ကဲသရိမြို့ဟို့ တွပ်ဟူးလေဟယ်။ နော့-က်တ နေမာ တရားပလ္လင်မာ ထိုင်ဘီးဟာ ပေါလုဟို့ ခေါ်လာဟို့ တွပ် မိန့်ပေးလိုက်ဟယ်။

၇ ပေါလုဟာ ရော့-က်ဟူ ခီမာ ယေရုရှလင်မြို့ဟုနေ ဆင်းလာဂေဟူ ယုဒလူမျိုးလေဟာ သူ့ဟို့ ဝိုင်းဘီးဟာ ရ

ရာတိုင်း ကီးလေးဟူပြစ်လေန စွပ်စွဲဘီး ပြောဂေဟယ်။
အယ်ဘေမဲလည်း သတ်သေဟု ပြနိုင်ဂေဟယ်။

⁸ ပေါလုဟု “ကျွန်တော်ဟာ ယုဒလူမျိုးလေရဲ့ ပညတ်
တရားဟို့ရော၊ ဗိမာန်တော်ဟို့ရော၊ ကဲသာမန်းဂီဟို့ရော
ပြစ်မှုခုလည်း ကျူးလွန်ဟု” ဆိုဘီး ကာကွယ်ဘီး ပြောဟု
ယ်။

⁹ ဖေတုတုမန်းဟာ ယုဒလူမျိုးလေဟုနေ မျစ်နှာသာ ရရှင်
ဟူကြောန့် “နန်ဟာ ယေရုရှလင်မြို့ဟို့ တတ်ဟားဘီးဟာ
ငါ့ရှေ့မာ အယ်မျိုး စွပ်စွဲချစ်လေန ပတ်သတ်ဘီး စီရင်ခံ
ဟို့လော” ဆိုဘီး ပေါလုဟို့ မေးဟယ်။

¹⁰ ပေါလုဟု “ကျွန်တော်ဟာ ခု ကဲသာမန်းဂီးရဲ့
တရားပလ္လင်ရှေ့မာ ရပ်နေဟယ်။ အယ်နေရာမာ ကျွန်
တော်ဟို့ စီရင်သင့်ပါဟယ်။ သခင်ဟာ သိတိုင်းဘဲ ကျွန်
တော်ဟာ ယုဒလူမျိုးလေဟို့ ဖယ်မျိုးလည်း ပြစ်မှားဟု၊

¹¹ ကျွန်တော်ဟာ တရားဥပဒေဟို့ ခုလိုးဖော့-က်ဘီး
သေဒန်ခံရဟူ တရားဘဲဟူပြစ် ကျူးလွန်မယ် ဆိုဟာ ကျွန်
တော်ဟို့ သတ်ချမ်းသာပေးဟို့တွပ် တောင်းခံဟို့ မှဟု။
အယ်ဘေမဲ သူးနှိရဲ့ စွပ်စွဲချစ်လေဟာ မှန်ကန်ဘဲနေဟာ
ဖယ်သူလည်း ကျွန်တော်ဟို့ သူးနှိလတ်ထဲဟို့ အပ်နိုင်ဟု။
ကျွန်တော်ဟာ မြို့ဝန်မန်းမာ ယူခံဝမ်ပါဟယ်” ဆိုဘီး
လျှော့-က်ဟယ်။

¹² အယ်ခီမာ ဖေတုတုမန်းဟာ သူ့ရဲ့ ရာရှိလေန တိုင်ဗန်
ဘီးန “နန်ဟာ ကဲသာမန်းဂီးနားဟို့ ယူခံဝမ်ဟို့တွပ် ကဲသာ

မန်းဂီးနားဟို့ သွားရမယ်” ဆိုဘီး ပြောဟယ်။

ဖေတုတုမန်းဟာ အဂြိုပုပမန်းဂီးဟို့ ပေါလုကြောင်းဟို့ ပြောပြကြန်း

¹³ ရစ်နဲနဲဟား ကြာဟူ ခီမာ အဂြိုပုပမန်းဂီးန မိဖုရား ဗေရနိတ်လေဟာ ကဲသရီမြို့ဟို့ ရော့-က်နေဟူ ဖေတုတု မန်းဟို့ နောက်ဆစ်ဟို့တွပ် ကဲသရီမြို့ဟို့ လာဂေဟယ်။

¹⁴ အယ်မြို့မာ ရစ်ကြာဂီးနေဟူ ခီမာ ဖေတုတုမန်းဟာ ပေါလုရဲမူဟို့ မန်းဂီးဟို့ ပြောပြဟယ်။ ဖေတုတုမန်းဟာ “အယ်နေရာမာ ဖေလဇ်မန်းဟာ ထောန်ထဲမာ ခုလဟားဟူ လူတယော့-က်ရှိဟယ်။

¹⁵ ကျွန်တော် ယေရုရှလင်မြို့ဟို့ ရော့-က်ဟူ ခီမာ ယဇ်ပုရောဟိတ်မန်းလေန ယုဒလူမျိုး ခေါင်းဆာန်ဂီး လေဟာ ကျွန်တော့်ဟို့ အယ်လူဟို့ စွပ်စွဲချစ်တန်ဂေဘီး န သူဟို့ ပြစ်ဒန်စီရင်ဟို့တွပ် တောင်းဆိုဂေဟယ်။

¹⁶ ကျွန်တော်ဟာ ပြစ်တန်ခံရဟူ လူဟို့ ပြစ်တန်စွပ်စွဲဟူ လူလေန တို့ခိုင်းဘီးဟာ သူးနို့လေရဲ စွပ်စွဲဇာဟို့ ချေပဘီး ပြောဟို့ ခွမ်ပေးဘဲန ပြစ်ဒန်စီရင်ဇာဟာ ရောမရဲ ထောင်း ဇီမုဘဲဟူကြောင်း သူးနို့ဟို့ ပြောလိုက်ဟယ်။

¹⁷ အယ်ကြောန့် သူးနို့ဟာ အယ်မြို့ဟို့ ရော့-က်လာဟူ ခီမာ ကျွန်တော့်ဟာ ခီဆွဲဘဲန နော့-က်နေမာ တရားပလ္လင် မာ ထိုင်ဘီးဟာ အယ်လူလေဟို့ ခေါ်ခိုင်းလိုက်ဟယ်။

¹⁸ သူဟို့ မူလောက်ဟူ လူလေဟာ ထဘီးဟာ ပြောဂေ ဘေမဲ့ ကျွန်တော်ထန်ဟူ ပြစ်မှုမျိုးမူဘဲ ဖြစ်နေဟယ်။

19 သူးနို့လေရဲ့ ဘာသာတရားနဲ့ ပတ်သတ်ဘီးရော၊
ယေရှု နာမယ်ရှိဟူသူ ကြောန်းနဲ့ ပတ်သတ်ဘီးရော ငြင်း
ပွားရှင်းဘဲ ဖြစ်ဟယ်။ အယ်ယေရှုဟာ သတ်ရှင်နေဟယ်
ဆိုဇာဟို့ ပေါလုဟာ ပြောနေဟယ်။

20 အယ်ပြဿနာလေဟို့ ဖြေရှင်းဟို့တွပ် ကျွန်တော်ဟာ
နားလည်ဘဲကြောန့် ‘နန်ဟာ ယေရုရှလင်မြို့ဟို့ သွားဘီး
ဟာ အယ်စွပ်စွဲချစ်နဲ့ ပတ်သတ်ဘီးဟာ စီရင်ခံရှင်လော’
ဆိုဘီး မေးဟယ်။

21 အယ်ခီမာ ပေါလုဟာ ကဲသာမန်းဂီးရဲ့ ဆောင်းဖြတ်
ဇာဟို့ ခံယူရှင်ကြောန်းဟို့ ပြောပြလာဟယ်။ သူဟာ သူဟို့
ထောန်ထဲမာဘဲ ထားရစ်ဘီးဟာ ကဲသာမန်းဂီးရဲ့ ဆောင်း
ဖြတ်ဇာဟို့ ခံရှင်ကြောန်းဟို့ တောင်းဗန်ကြောန့် သူဟို့ ကဲ
သာမန်းဂီးနားဟို့ အပ်လိုက်ဟူခီထံ ထောန်ခလဟားဟို့
တွပ် မိန့်ပေးရစ်ဟယ်” ဆိုဘီး ပြောဟယ်။

22 အဂြိုပုပမန်းဂီးဟာ “အယ်လူပြောဇာဟို့ ကျွန်တော်
ကိုယ်တိုင် ကြားရှင်ဟယ်” ဆိုဘီး ပြောဟယ်။

ဖေတုတုမန်းဟ “အယ်လူပြောဇာဟို့ နတ်ကီးတန်ဟာ
ကြားစေရမယ်” ဆိုဘီး ပြောဟယ်။

23 နော့-ကံတနေမာ အဂြိုပုပမန်းနဲ့ မိဖုရား ဗေရနိတ်
လေဟာ ရရာတိုင်း ကြီးကျယ်ခမ်းနားဟူ ဂေါင်သရေလေ
ဟို့ ဆောန်ဘီးဟာ တပ်မှူးလေန၊ မြို့မာနေဟူ ဂေါင်သရေ
ရှိဟူ လူဂီးလေနတူးဒု ကြွလာဘီးဟာ ခန်းမဂီးထဲဟို့ ဝမ်
လာဟယ်။ အယ်ခီမာ ဖေတုတုမန်းရဲ့ မိန့်နဲ့ ပေါလုဟို့ ခေါ်

လာဂေဟယ်။

24 ဖေတုတုမန်းဟု “အဂြိုပုပမန်းဂီးန ကြွလာဟူ လူပေါ
န်းလေ၊ ယေရုရှလင်မြို့န အယ်မြို့မာရှိနေဟူ ယုဒလူမျိုး
လေဟု ‘အယ်လူဟာ သတ်ရှင်သင့်ဟု’ ဆိုဘီး ကျွန်တော်
ဟို့ လျှော့-က်ဟားဂေဟယ်။ အယ်မျိုး လျှော့-က်ခံရဟူ
လူဟု အယ်လူဘဲ ဖြစ်ဟယ်။

25 သူဟာ သေဒန်ခံထိုက်ဟူပြစ် ခုလည်းကျူးလွန်ဟု
ဆိုဇာဟို့ ကျွန်တော်နေန သိရဟယ်။ အယ်ကြောန့် သူ
ကိုယ်တိုင်ဟု ကဲသာမန်းဂီးနားမာ ယူခံဝမ်မယ် ဆိုဘီး
တောင်းဗန်ဘီးဟာ ပြောဟူကြောန့် သူဟို့ မန်းဂီးနားဟို့ ပို့
ဆောက်ဟို့တွပ် ကျွန်တော်ဆောင်းဖြတ် လိုက်ဟယ်။

26 သူန ပတ်သတ်ဘီး မန်းဂီးဟို့ တိတိကုလကုလဟား
လျှော့-က်တန်ဇာ ခုလည်း ကျွန်တော်မာ မှေဟု။ အယ်
ကြောန့် အယ်လူဟို့ ခန်ဗျားလေရှေ့ဟို့ ခေါ်ဆောက်လာ
ဇာ ဖြစ်ဟယ်။ ထူးသဖြင့်ဟု အဂြိုပုပမန်းဂီးရှေ့ဟို့ ခေါ်
လာဇာ ဖြစ်ဟယ်။ အယ်မျိုးခေါ်လာဇာဟာ သူဟို့ သခင်
ဟာ စစ်ဆေးဘီးဟာ ကျွန်တော်ဟာ စီရင်ခံစာရေးဟို့တွပ်
ကြောန်းရာတခုခု ရနိုင်ဟို့တွပ် ဖြစ်ဟယ်။

27 ဖြားဖြစ်ကြောန့်နဲ့ဆိုဟာ ကျဉ်းသားတယော့-က်ဟို့
စွဲချစ်တခုခု ဖော်ပြဘဲန စေလွှတ်ဟို့တွပ် သင့်ဟု ဆိုဘီး
ကျွန်တော်ထန်ဟယ်” ဆိုဘီး ပြောဟယ်။

အပြီပုပမန်းဂီးရှေ့မာ ပေါလုပြစ်ဖြေစကားဟို့ ပြောကြောန်း

¹ အပြီပုပမန်းဂီးဟု “နန်ဟာ ခုပြောနိုင်ဟယ်” ဆိုဘီး ပေါလုဟို့ ပြောဟူ ခီမာ ပေါလုဟာ လတ်ဟို့ ပြဘီးဟာ၊

² “အပြီပုပမန်းဂီး၊ ကျွန်တော့်ဟို့ ယုဒလူမျိုးလေရဲ့ စွပ်စွဲချစ်န ပတ်သတ်ဘီး သခင်ရဲ့ရှေ့မာ လျှော့-က်ဘီး ပြောရဟို့ခွမ်ဟာ ကျွန်တော့်တွပ်ဟု မင်္ဂလာရှိဟူ ခွမ်ရေး ဖြစ်ဟယ် ဆိုဘီး ယူဆဟယ်။

³ သခင်ဟာ ယုဒလူမျိုးလေရဲ့ ဓလေ့ထောင်းဇံလေ န ပြဿနာလေဟို့ သိဟူလူ ဖြစ်ဟယ်။ အယ်ကြောန် လျှော့-က်တန်ဟူဇာဟို့ စိရှယ်ဘီး နားထောန်ပေးပါ။”

⁴ “ကျွန်တော်ဟာ လူပျိုရွယ်ဟုစဘီး ကိုယ်မိုးဟူ ဇာတိ ပြည်မာရော၊ ယေရုရှလင်မြို့မာရော၊ ဖယ်မျိုးနေနူး။ ဆိုဇာဟို့ ယုဒလူမျိုးလေဟာ သိဂေဟယ်။

⁵ ကျွန်တော့်ဟို့ သူးနို့ဟု သိဂေဟူဇာဟာ ရရာကြာဟား ဘီ။ ကျွန်တော့်ဟာ ယုဒဘာသာမာ ရရာတိုင်း ကျဉ်းကျပ် ဟူ စည်းမျဉ်းလေဟို့ လိုက်နာကျင့်သောင်းဟူ ဖာရိရှဲဖွဲ့ဝမ် တယော့-က်နေနလည်း သတ်ရှင်လာဟူကြောန်းဟို့ အယ် လူလေဟု သတ်သေခံရှင်ဟယ် ဆိုဟာ ခံနိုင်ဂေဟယ်။

⁶ ဘုရားသခင်ဟာ ကျွန်တော့်လေ ဘိုးဘေးဟို့ ထား ဟားဟူ ဂဒိတော်ဟို့ ကျွန်တော်ဟာ မျှော်လင့်ဘီးဟာ စော န်နေဟို့တွပ်ကြောန် ခု စစ်ဆေးခံနေရဟယ် —

7 အယ်ဂဒိတော်ဟာ ကျွန်တော့်လေ မျိုးနွယ်ဆယ်နေ့ မျိုးဟာ နေ့ညဉ့်မပြတ် ဘုရားသခင်ဟို့ ဝတ်ပြုကိုးကွယ် ဘီး မျှော်လင့်ဘီးဟာ စောင့်နေဂေဟူ ဂဒိတော်ဘွဲ့ဖြစ်ဟယ်။ မန်းဂီး၊ အယ်မျိုး မျှော်လင့်ဘီးဟာ စောင့်နေဇာကြော န် ကျွန်တော့်ဟို့ ယုဒလူမျိုးလေဟု စွပ်စွဲဘီး ပြောနေဂေ ဇာ ဖြစ်ဟယ်။

8 သေဟားလူလေဟို့ ဘုရားသခင်ဟု ရှင်ပုလန်ထ မြေ-က်ခိုင်းဟယ် ဆိုဇာဟာ ယောင်နိုင်ဇာ မေ့ဟု ဆိုဘီး အယ်နေရာမာ ရှိနေဟူ လူလေဟာ ဖြားဖြစ်ကြောန် စီရင် နေဂေနှိုး။

9 “ကျွန်တော်ကိုယ်တိုင်ဘွဲ့ နာဇရက်မြို့သား ယေရှုရဲ့ နာမတော်န ဆန့်ကျင်ဟူ မူလေဟို့ လောက်သင့်ဟယ် ဆို ဇာဟို့ ယူဆဟားဟယ်။

10 ယေ ရှုရှ လင် မြို့ မာ အယ် မျိုး လော က် ဟု ယ်။ ယဇ်ပုရောဟိတ်မန်းရဲ့ ခွမ့်အာဏာန သန်ရှင်းသူလေဟို့ ထောန်ထဲမာ ကျဉ်းခွလဟားဟယ်။ သူးနို့ဟို့ သေဒန်စီရင် ဟူ ခီမာ ကျွန်တော်ဟု ဘောတူပေးဟယ်။

11 အယ်လူလေဟာ ဘုရားသခင်ဟို့ စော်ကားပြောဆို အောန် ကျွန်တော်ဟာ ဝါလယ်ဇရပ်လေမာ သူးနို့ဟို့ ကံ ဒန်ပေးခိုင်းဘီးဟာ သူးနို့ရဲ့ ယူဝါဒဟို့ စွန်ပစ်ဂေဟို့တွပ် ကြိုးစားဘီး လောက်ဆောန်ဟယ်။ သူးနို့လေဟို့ ဒေါသစိ လေကြောန် ကျွန်တော်ဟာ နိုင်ငံရပ်ခြားမာရှိဟူ မြို့လေ

ဟို့ သွားဘီးဟာ သူးနို့လေဟို့ ညှဉ်းဆဲလာဟယ်။

ပေါလုဟာ ယောင်ကြည်သူ ဖြစ်လာဇာဟို့ ပြောပြဟူ
ကြောန်း

(တမန်တော် ၉:၁-၁၉; ၂၂:၆-၁၆)

¹² “အယ် မျိုး ရည်ရွယ် ချစ် န ကျွန် တော် ဟာ
ယဇ်ပုရောဟိတ် မန်းလေမာ ခွမ့်ပြုချစ် န ခွမ့်အာဏာ
ဟို့ ယူဘီးဟာ ဒမာသက်မြို့ဟို့ သွားနေဟူ ခီမာ

¹³ မွန်းဒဲခီန ကောန်းဂန်ဟုနေ နေထတ်တော့-က်ပဟူ
လန်းရောန်ဟာ ထွန်းတော့-က်လာဇာဟို့ ကျွန်တော်န ကျွန်
တော့် ပတ်လည်မာရှိနေဟူ ကျွန်တော့် ပေါန်းဖော်လေပါ
မြင်ရဟယ်။ အဂြိုပုပမန်းဂီး။

¹⁴ အယ်ခီမာ ကျွန်တော့်လေ ဂူလောင်းဟာ မုလေဂီးမာ
လဲကုလဂေဟယ်။ အယ်ဘီးန ယုဒဘာသာ စကားန ‘ရှော
လု၊ ရှောလု၊ ဖြားဖြစ်ကြောန် ငါ့ဟို့ ညှဉ်းဆဲနူး။ ဒေါက်ရှော
န်ဟို့ ခေနကန်မယ် ဆိုဟာ နန်ဘဲနာလေမယ်’ ဆိုဘီး သံ
တော်ဟို့ ကျွန်တော်ကြားရဟယ်။

¹⁵ အယ်ခီမာ ကျွန်တော်ဟု ‘သခင်၊ ကိုယ်တော်ဟု ဖယ်
သူနူး’ ဆိုဘီး မေးလျှော့-က်လိုက်ဟယ်။ အယ်သခင်ဟု
‘ငါဟာ နန်ညှဉ်းဆဲနေဟူ ယေရှုဘဲ ဖြစ်ဟယ်။

¹⁶ အယ်ဘောမဲ့ ထဘီးဟာ မတ်တတ်ရပ်လိုက်။ နန်ဟို့ ငါ့
ရဲ့* မူတော်ဆောန်နေန ခန့်ဟို့တွပ် နန်နားဟို့ ငါဟု ကြွလာ

* 26:16 ၂၆.၁၆ တချို့ မူရင်းလတ်ရေးမူလေမာငါ့ရဲ့၊ ဆိုဇာဟာ မေ့ဟူ။

ဇာဖြစ်ဟုယ်။ အယ်နေ နန့်မြင်ရဟူ ဗျာဒိတ်ရူပါရောင်
ကြောန်းန နော-က်ခါမလည်း ငါဖော်ပြဟူ ကြောန်းရာ
လေဟို့ နန့်ဟာ တခြားသူလေဟို့ သတ်သေခံရမယ်။

¹⁷ ငါဟာ နန့်ဟို့ ကုသရေလလူမျိုးလေ လတ်ဟုနေရော၊
လူမျိုးခြားလေ လတ်ဟုနေရော၊ ကယ်တန်မယ်။

¹⁸ နန့်ဟာ ခုမြင်ရဟူဇာလေ၊ နော-က်မှ ငါဟာ နန့်
ဟို့ ထန်ရှားဟားဟူ ကြောန်းရာလေ၊ မူတော်ဆော်ဟူသူ၊
သတ်သေခံဟူသူနေန နန့်ဟို့ ခန့်ဟားဟို့တွပ် ငါဟာ န
န့်ဟို့ ထန်ရှားဟယ်။ လူမျိုးခြားလေဟာ မှော်နထဲဟုနေ
လန်းရော်နထဲဟို့ ရော-က်လာဘီး စာတန်ရဲ့ ခွမ်အာဏာ
ထဲဟုနေဘီး ဘုရားသခင်နားဟို့ ပုလောန်းလဲလာဘီးဟာ
ပြစ်လွှတ်ခံရဟို့ကြောန်း၊ ငါ့ဟို့ ယောင်ကြည်လိုက်ဟူန
သန်ရှင်းဇာရဟားဟူ လူလေန မွေခံရဟူကြောန်း သူးနို့
လေရဲ့ မျစ်စိဟို့ ဖွမ်ပေးဟို့တွပ် သူးနို့နားဟို့ ငါ နန့်ဟို့
လွတ်မယ် ဆိုဘီး မိန့်တော်မူလေဟယ်။

ပေါလု သတ်သေခံဟူကြောန်း

¹⁹ “အယ်ကြောန် အဂြိုပုပမန်းဂီး၊ ကျွန်တော်ဟာ ကော
န်းဂန်ဘောင်ဟုနေရဟူ ဗျာဒိတ်ရူပါရောင်ဟို့ လွန်ဆန်နိုင်
ဟူ။

²⁰ ‘လူလေဟာ နော်ဒရဘီး ဘုရားသခင်နားဟို့ ပုလော
န်းလဲရဂေမယ်။ နော်ဒနတန်ဟူ ကျင့်ဟို့လည်း ကျင့်ရ
မယ်’ ဆိုဘီး ဦးဆောင်း ဒမာသက်မြို့၊ အယ်ဘီးန ယေ

ရရှိလင်မြို့ဟုနေ စဘီး ယုဒပြည် တပြည်လောင်းမာရှိဟူ
လူလေဟို့ရော၊ လူမျိုးခြားလေဟို့ရော၊ ကျွန်တော် ဟော
ပြောဟုယ်။

²¹ အယ်ကြောန့် ယုဒလူမျိုးလေဟူ ကျွန်တော့်ဟို့
မိမာန်တော်ထဲမာ ဖမ်းဘီးဟူ သတ်ဟို့တွပ် ကြိုးစာဂေ
ဟုယ်။

²²⁻²³ အယ်ဘေမဲ့ ဘုရားသခင်ရဲ့ ကျေးဇူးတော်ဟို့
ကျွန်တော်ခံရဟူကြောန့် ခုထတ်ထိရှိနေဟုယ်။ မေရှိယ
ဟူ သေခံရမယ် ဆိုဇာဟို့ရော၊ သေဘီးဟူ ဦးဆောင်း
ရှင်ပုလန်ထမြော့-က်ဘီးဟူ ကုသရေလလူမျိုးလေန၊
လူမျိုးခြားလေဟို့ ကယ်တန်ဇာနဆိုင်ဟူ လန်းတရားဟို့
ကြေညာလေ့မယ် ဆိုဇာဟို့ရော မောရှေဟုစဘီး ပရော
ဖက်လေဟု ဟောဘီး ဒိပေးရစ်ဟူတိုင်းဘဲ့ ကျွန်တော်ဟူ
လူဂီးလူငယ်လေဟို့ သတ်သေခံဘီး နေဟုယ်” ဆိုဘီး ပု
လန်လျော့-က်လိုက်ဟုယ်။

²⁴ အယ်မျိုး လျော့-က်ဟူ ခီမာ ဖေတုတုမန်းဟု “ပေါ
လု၊ နန်ဟူ ရှူးဟွားဘီ။ တတ်လွန်ဘီးဟူ ရှူးဟွားဘီ!” ဆို
ဘီး အော်ပြောလိုက်ဟုယ်။

²⁵ ပေါလုဟု “ဖေတုတုမန်း၊ ကျွန်တော်ဟူ ရှူးနေဇာ မူ
ဟု။ သခင်ဟို့ လေးလေးနတ်နတ်န သမ္မာတရားဟို့ ပြော
နေဇာဖြစ်ဟုယ်။

²⁶ အဂြိုပုပမန်းဂီး၊ အယ်မူဇာလေကြောန်းဟို့ သခင်ဟူ

သိဟူကြောင့် ကျွန်တော်ဟာ သခင်ရဲ့ ရှေ့မှာ ရဲရဲရင့်ရင့် ဟား လျှော့-က်ဟားရှင်း ဖြစ်ဟယ်။ အယ်မူဇာလေဟာ ခု လောင်းကြိုခလောင်းကြားလေမာ ဖြစ်လာဇာ မူဟု။ အယ် ကြောန်းရာလေ ဂူလောင်းဟို့ သခင် သိဟယ် ဆိုဇာဟို့ ကျွန်တော် လတ်ခံယောင်ကြည်ဟယ်။

27 အပြီပုပမန်းဂီး၊ သခင်ဟာ ပရောဖက်လေဟို့ ယောင် ကြည်ဘဲ့လော။ သခင်ဟု ယောင်ကြည်ဟယ် ဆိုဇာဟို့ ကျွန်တော်သိဟယ်!” ဆိုဘီး လျှော့-က်လိုက်ဟယ်။

28 အပြီပုပမန်းဂီးဟု “နန်ဟာ ငါဟို့ ရှစ်ဟားဒဲန ခရစ်ယာန်ဖြစ်အောန် သွီးဆောန်နိုင်မယ် ဆိုဘီး ထန်နေ လော” ဆိုဘီး ပေါလုဟို့ ပြောဟယ်။

29 ပေါလုဟု “ခီမြန်ဇာလေ၊ ခီကြာဇာလေဟာ ဓိကမူ ဟု။ သခင်နတူးဒူ အယ်နေ ကျွန်တော်ပြောဇာဟို့ နားထော န်နေဟူ လူလေဟာ အယ်မျိုး တောက်နှောန်ခံရဟူ မူဟု လွဲဘီး ကျွန်တော်မျိုး ဖြစ်လာဂေဟို့တွပ် ဘုရားသခင်ဟို့ ကျွန်တော်ဟာ ဆုတောင်းဟယ်” ဆိုဘီး လျှော့-က်လိုက် ဟယ်။

30 အယ်ခီမာ မန်းဂီးန ဖေတုတုမန်းလေဟာ မိဖုရား ဗေ ရနိတ်န ဖွဲ့ဝမ်လေဟာ ထိုင်နေဟူနေရာဟု ထဟားဂေဟု ယ်။

31 သူးနို့ဟာ အယ်နေရာဟု ထွပ်ဟားဘီးန “အယ်လူဟာ သေဒန် အယ်မျိုးမူဘဲနေဟာ တောက်နှောန်ခံရဟူပြစ်လေ ခုလည်း ကျူးလွန်ဟု” ဆိုဘီး ရှင်းရှင်း ပြောဂေဟယ်။

³² အင်္ဂြိယုပမန်းဂီးဟု “အယ်လူဟာ ကဲသာမန်းဂီးနားဟို ယူခံဝမ်ဟိုတွပ် တောန်းခံဘဲနေဟာ သူဟို လွတ်ပေးနိုင်ဟယ်” ဆိုဘီး ဖေတုတုမန်းဟို ပြောဟယ်။

27

ပေါလုဟာ ရောမမြို့ဟို သန်းဖောန သွားဟူကြောင်း

¹ ဖေတုတုမန်းဟာ ကျွန်တော့်လေဟို ဣတလိပြည်ဟို သန်းဖောန ပို့ဟိုတွပ် ဆောင်းဖြတ်လိုက်ဘီးန ပေါလုန တခြားကျဉ်းသား တချို့လေဟို မန်းဂီးတပ်ခေါ်ဟူ တထောန်တပ်ဟုနေ ယုလိနာမယ်ရှိဟူ တပ်မှူးလတ်ထဲဟို အပ်လိုက်ဟယ်။

² ကျွန်တော့်လေဟာ အာရိပြည် ကမ်းခြေ တရှော့-က် လောင်းမာရှိဟူ သန်းဖောဆိမြို့လေဟို သွားဟိုလောက် နေဟူ သန်းဖောတစင်းထတ်ဟို တတ်ဘီးဟာ သွားဂေ့ဟယ်။ အယ်သန်းဖောဟာ အာဒြေမုတုတိမြို့ဟုနေလာဟူ သန်းဖောဖြစ်ဟယ်။ မာကေဒေါနီပြည် သက်သာလောနီ တ်မြို့သား အာရိတုတာခုဟုလည်း ကျွန်တော့်လေနတူးဒူ ပါလာဟယ်။

³ နှော့-က်တနေ့မာ ကျွန်တော့်လေဟာ ဇိဒုန်မြို့ဟို ရှော့-က်ဟားဂေ့ဟယ်။ ယုလိဟာ ပေါလုဟို သနားဟူစိ ရှိဟူကြောင့် မိဆွေလေနားဟို သွားဘီး လောက်ကျေး ပြုစု ခံဟိုတွပ် ခွမ်းပြုလိုက်ဟယ်။

4 အယ်လူလေဟာ ပေါလုဟို ပြုစုဘီး လောက်ကျွေးဂေဟယ်။ အယ်မြို့ဟုနေ ထွပ်ဟားဂေဟူ ခီမာ လေဆန်န တို့ရဟူကြောန် ကုပရကျွန်းရိဟို ခိုဘီး သွားဂေဟယ်။

5 အယ်ဘီးန ကိလိကိပြည်န ပံဖုလိပြည်ဟု ပန်လယ်ဟို ဖြတ်ကူးဂေဘီးန လုကိပြည် မုရမြို့ဟို ရော့-က်ဟားဂေဟယ်။

6 အယ်မြို့မာ ဣတလိပြည်ဟို သွားဟို့ အာလေဇနဒြီမြို့ဟု ရော့-က်လာဟူ သန်းဖောတစင်းဟို တို့ဟူကြောန် တပ်မှူးဟာ ကျွန်တော့်လေဟို အယ်သန်းဖောထတ်ဟို တတ်ခိုင်းလိုက်ဟယ်။

7 ကျွန်တော့်လေဟာ တဖြေးဖြေးဟားန ရစ်လေကြာဂီး သွားဘီးန နော့-က်ဆောင်းမာ ကနိဒ်မြို့နားဟို ခတ်ခတ်ခဲခဲန ရော့-က်ဟားဂေဟယ်။ လေလာနိုင်ဘဲဟူကြောန် ရှေ့ဟို သွားနိုင်ဘဲဟို ကျွန်တော့်လေဟာ သာလမုန်ငူ နားဟုနေ ဖြတ်ဘီး ကရေတေကျွန်း တောန်ဖတ်ဟုနေ သွားဂေဟယ်။

8 ပန်လယ်ကမ်းန နီးနီးဟားသွားဘီးဟာ ခတ်ခတ်ခဲခဲန လာသဲမြို့နားဟု ဆိကမ်းသာ နာမယ်ရှိဟူ နေရာဟို ရော့-က်ဟားဂေဟယ်။

9 ကျွန်တော့်လေဟာ အယ်နေရာမာ ကြာဂီးနားဂေခီမာ

ပြစ်ဖြေဟူပွဲနေ့* ဟို့ လွန်လာဟယ်။ အယ်ကြောန့် ပန်လယ် ခရီးသွားဟို့တွပ် ဘေးအန္တရာယ် ရှိလာဟူကြောန့် ပေါလု ဟု ဒိပေးဘီး

10 “မိဆွေလေ၊ ခု ပန်လယ်ခရီးသွားမယ် ဆိုဟာ သန်း ဖောန ကူပစ်စီးလေဟို့ဘဲ မှဘဲန ကျွန်တော့်လေ သတ် လည်း ဆောင်းရှောင်းဇာ ရှိဟူကြောန့်ဟို့ ငါမြင်ဟယ်” ဆိုဘီး ပြောလေဟယ်။

11 အယ်ဘေမဲ့ တပ်မှူးဟာ ပေါလု စည်းရောင်းဟူစကား ထတ် ပွဲနန်းန သန်းဖောဇရှင်ရဲ့ စကားဟို့ ပိုဘီး ဟာ ယောင်ကြည့်ဟယ်။

12 အယ်ဆိကမ်းမာ ဆောင်းဒွမ်းလောင်းလောင်း နားနေ ဟို့တွပ် ကောင်းဘဲကြောန့် လူတိုင်းဟု အယ်ဆိကမ်းဟု နေ ထွပ်ရှင်ဂေဟယ်။ ဖြစ်နိုင်မယ် ဆိုဟာ ဖိနိတ်မြို့ဟို့ ရော့-က်အောန်သွားဘီး ဆောင်းကာလမာ နားရှင်ဂေဟယ်။ ဖိနိတ်ဆိကမ်းဟာ ကရေတေကျွန်းမာရှိဘီး နော့-က် တောန်ဖတ်န နော့-က်မြော့-က်ဖတ်†ဟို့ မျစ်နှာလှည့်ဟား ဟယ်။

ပန်လယ်မာ လေမှောန်ဒိုင်းကုလကြောန့်

* 27:9 **၂၇:၉ ပြစ်ဖြေဟူပွဲနေ့၊** စက်တင်ဘာလ ကူခါနီးမာ မှဘဲနေဟာ အောက်တိုဘာလ စမာ ကျင်းပဟူပွဲ အယ်မျိုးခီမာ ရာသီဥတုဟု ရရာတိုင်း ဆိုးဟူကြောန့် သန်းဖောန ဝှပ်လွပ်ဟို့တွပ် ခတ်ခဲဟယ်။ † 27:12 **၂၇:၁၂** နော့-က်တောန်ဖတ်န နော့-က်မြော့-က်ဖတ်၊ အယ်မျိုးမှဘဲနေဟာ ရှေ့မြော့-က်ဖတ်န ရှေ့တောန်ဖတ်။

13 တောန်ဖတ်ဟုလေဟာ စဘီးတိုက်လာဟူ ခီမာ သန်း
ဖောသားလေဟာ သူးနို့ကြံ အောန်လေ့မယ် ထန်ဘီးဟာ
ကလော့-က်ဆူးဟို့နှုဘီး သန်းဖောဟို့ ကရေတေကမ်းခြေ
ဒေါ့-က်ရှော့-က် သွားဂေ့ဟယ်။

14 များများကြာ ဟု မြော့-က်ဖတ်ဟု နေဘီး ရှေ့
မြော့-က်ဟု လေဟုနာမယ်ရှိဟူ မှောန်ဒိုင်းဟာ စဘီးဟာ
ပြင်းပြင်းထန်းထန်ဟူး တိုက်လာဟယ်။

15 သန်းဖောဟာ မှောန်ဒိုင်းတိုက်ခံရဟူကြောန့် အယ်
မှောန်ဒိုင်းဟို့ ခံနိုင်ဘဲဖြစ်ဟူးဟယ်။ အယ်ကြောန့် ကျွန်
တော့လေဟာ လတ်ရှော့လိုက်ဂေ့ဟယ်။ လေတိုက်ဟူ နေ
ရာဟို့ ပါလိုက်ဟူးဂေ့ဘီးနု။

16 ကလောဒေကျွန်းငယ် တောန်ဖတ်ဟို့ ရော့-က်ဟူး
ဟူ ခီမာ လေတိုက်ဟူ ဒန်ဟုနေ နဲနဲဟူး ကာကွယ်ရဂေ့
ဟယ်။ အယ်နေရာမာ သန်းဖောပွဲဖတ်မာ သတ်ကယ်လေ့
လေဟို့ ပျစ်စီးဘဲနေအောန် ခတ်ခတ်ခဲခဲနု ပုလန်ဘီး ထီး
သီးနိုင်ဟူးဂေ့ဟယ်။

17 သန်းဖောသားလေဟာ လေဟို့ဆွဲဒန်ဘီးဟာ သန်း
ဖောဝန်းဟို့ ကြိုးနပတ်ဘီး ခိုင်အောန်လောက်ဂေ့ဟယ်။
သူးနို့ဟာ သုရတိ သောန်ပုလန်မာ သန်းဖောတန်နေမယ်
ဆို့ဘီး စိုးရိမ်ဟူကြောန့် ဝှပ်လေဟို့ ခုလလိုက်ဘီးနု သန်း
ဖောဟို့ လေတိုက်ဟူတိုင် မျောပါဟူးဂေ့ဟယ်။

18 နော့-က်တနေ့မာလည်း လေမှောန်ဒိုင်းဟာ ဆစ်ဘီး
တိုက်နေဟူကြောန့် ကူပစ်စီးတချို့ဟို့ သန်းဖောထတ်ဟု

နေ ပစ်ခံလေ့ဟုယ်။

¹⁹ တတိယနေ့မှာ သန်းဖောနဆိုင်ဟူ ကူပစ်စီးတချို့ လည်း ပစ်ခံလေ့ဟုယ်။

²⁰ ကျွန်တော့်လေဟာ ရစ်ပေါန်းကြာဂီး နေလေ၊ ကြယ် လေဟို့ မြင်ရလေ့ဟု။ လေဟာဆစ်ဘီးဟာ ရှိပြင်းပြင်း ဟား တိုက်ဘီးနေဟုယ်။ နှော့-က်ဆောင်းမှာ ကျွန်တော့် လေဟာ သေဘေးဟုနေလွတ်ဟို့ မျှော်လင့်ချစ် မေ့ဟု ဆို ဘီး စိရော့လိုက်လေ့ဟုယ်။

²¹ လူလေဟာ ရစ်ကြာဂီး စားဇာစားဘဲ နေလေဘီးန ပေါ လုဟာ သူးနို့လယ်မှာ ရပ်ဘီးဟာ “မိဆွေလေ၊ နန်းနို့ဟာ ငါ့စကားဟို့ နားထောန်ဘီး ကရေတေကျွန်းဟုနေ ထွပ်ဘဲ န နေသင့်ဟုယ်။ အယ်မျိုးနေမယ် ဆိုဟာ အယ်မျိုး ပျစ် စီးဆောင်းရှောင်းဇာန ရင်ဆိုင်ရလေ့ဟို့ မှုဟု။

²² အယ်ဘေမဲ့ အားငယ်လေ့န။ နန်းနို့ထဲမှာ ဖယ်သူ လဲ သတ်ဆောင်းရှောင်းရဟို့ မှုဟု။ သန်းဖောဘဲ ဆောင်း ရှောင်းရလေ့မယ်။

²³ ငါ့သခင်၊ ငါကိုးကွယ်ဟူ ဘုရားသခင်ရဲ့ ကောန်းဂန် တမန်ဟာ ပီးဟားဟူ ညဉ့်ခန်းဒူးဟု ငါ့နားဟို့လာဘီး၊

²⁴ ‘ပေါလု၊ ကြော့-က်န။ နန်ဟာ ကဲသာမန်းဂီး ရှေ့ဟို့ ရော့-က်ရမယ်။ ဘုရားသခင်ဟာ နန်ဟို့ ထော့-က်ထား ကြော့န့် နန်နုတူးဒူ သန်းဖောစီးလာလေ့ဟူ လူလေဟာ သေ ဘေးဟုနေဘီးဟာ လွတ်မြော့-က်လေ့မယ်’ ဆိုဘီး ပြော ဟုယ်။

25 အယ်ကြောန့် မိဆွေလေ၊ အားငယ်ဂေ့န။ ငါဟာ ဘုရားသခင်ဟို့ ယောင်ကြည်ဟူသူ ဖြစ်ဟယ်။ အယ် ကြောန့် ငါ့ဟို့ ကောန်းဂန်တမန်ဟု ဖော်ပြဟားတိုင်းဘဲ ဖြစ်ပျစ်လေ့မယ်။

26 အယ်ဘေမဲ့ နို့လေရဲ့ သန်းဖောဟာ ကျွန်းတခုထတ် မာ သောန်တန်လေ့မယ်” ဆိုဘီး ပြောဟယ်။

27 ဆယ့်လေးရစ်လော့-က် ရော့-က်ဟားဟူနေ့ ညဉ့်ခန်း ဇာမာ ကျွန်တော့်လေ သန်းဖောဟာ အာဒြိပန်လယ်မာ လေ မှောန်ဒိုင်းတိုက်ဟူ နေရာထဲဟို့ မျောပါဘီးနေဟယ်။ ညဉ့် နတ်ဟားခီမာ သန်းဖောသားလေဟာ ကမ်းတခုခုနားဟို့ နီးလာဟယ် ဆိုဇာဟို့ ရိမိဂေ့ဟယ်။

28 သူးနို့ဟာ ရေဟို့ တိုင်းဂေ့ဟူ ခီမာ ပေတရာနေ့ဆယ် ရှိဟယ် ဆိုဇာ တွံရဂေ့ဟယ်။ ရှေ့ဟို့နဲနဲဟား သွားဘီးန တ ခါတိုင်းဂေ့ဟူ ခီမာ ပေကိုးဆယ်ဘဲရှိဟယ် ဆိုဇာဟို့ တွံရ ဟယ်။

29 သူးနို့ဟာ ကုလော့-က်ဆောန်န တိုက်မိဟို့ဇာဟို့ စိုးရိ မ်ဟူကြောန့် သန်းဖောပဲ့ဖတ်ဟု ကုလော့-က်ဆူးလေးခုဟို့ ခုလဘီးဟာ “မိုးလန်းပါစေ” ဆိုဘီး ဆုတောင်းဂေ့ဟယ်။

30 သန်းဖောသားလေဟာ သန်းဖောရဲ့ ဦးဖတ်မာ ကု လော့-က်ဆူးဟို့ ခုလဟို့ ဟန်ဆောန်ဘီးဟာ သတ်ကယ် လေ့ဟို့ ရှော့ခုလဘီးဟား ထွပ်ပုလေးဟို့တွပ် ကြိုးစားနေ ဂေ့ဟူ ခီမာ

31 ပေါလုဟာ တပ်မှူးန စစ်သားလေဟို့ “အယ်သန်း

ဖောသားလေဟာ သန်းဖောထတ်မာ နေဟုဆိုဟာ နန်းနို့ ကိုယ်တိုင် သတ်ဘေးဟု လွတ်ဟို့တွပ် မျှော်လင့်ချစ်ရှိဟို့ မှဟု” ဆိုဘီး ပြောဟယ်။

³² အယ်ခီမာ စစ်သားလေဟာ သတ်ကယ်လေရဲ့ ကြိုး ဟို့ ခွတ်ဖြတ်ဘီးဟာ လေဟို့ အော့-က်ဟို့ ခုလလိုက်ဟယ်။

³³ မိုးလန်းခါနီးမာ ပေါလုဟာ အယ်လူလေဟို့ စာစား ဟို့တွပ် တိုက်တွန်းရှင်ကြောန့် “နန်းနို့ဟာ ဖယ်မျိုးဖြစ် မယ် ဆိုဘီး စားငတ်ခံဘီး နေဂေဇာဟာ ဆယ့်လေးရစ် လော့-က် ရှိဟားဘီ။ နန်းနို့ဟာ ဖြားစာဟို့လည်း စားဂေ ဟု။

³⁴ နန်းနို့ဟာ ဆစ်ဘီးဟာ သတ်ရှင်ဟို့တွပ်၊ စားစာဂေ ဟို့တွပ် ငါတောန်းဗန်ဟယ်။ နန်းနို့ရဲ့ ခေါင်းဟု ဆန်းဗန်တ ဗန်လည်း ပျစ်စီးရဟို့ မှဟု” ဆိုဘီး ပြောဟယ်။

³⁵ အယ်ဘီးန ပေါလုဟာ မုဟို့ ယူဘီးဟာ အယ်လူ လေ အားလောင်းရှေ့မာ ဘုရားသခင်ရဲ့ ကျေးဇူးတော်ဟို့ ချီးမွမ်းဘီးန မုဟို့ဖဲဘီး စားဂေဟယ်။

³⁶ အယ်ခီမာ အယ်လူလေ ဂူလောင်းဟာ အားတတ်လာ ဂေဘီးဟာ စားဇာဟို့ စားဂေဟယ်။

³⁷ သန်းဖောထတ်မာ လူလေ ဂူလောင်းဟု ၂၇၆ ယော့-က်[‡] လော့-က်ရှိဟယ်။

³⁸ လူလေဟာ ဝအောက်စားဂေဘီးန သန်းဖောဟို့ ပေါ့

[‡] 27:37 ၂၇.၃၇ ၂၇၆ ယော့-က်၊ တချို့ မူရင်းလတ်ရေးမူလေမာ ၂၇၅ ယော့-က်၊ ဆိုဘီး ပါရှိဟယ်၊ တခြားကျမ်းလေမာ ၇၆ ယော့-က်လော့-က် ရှိဟယ်၊ ဆိုဘီး ပါရှိဟယ်။

စေဟို့တွပ် ရျောင်ဆန်ရှိမျှဟို့ ပန်လယ်ထဲဟို့ ပစ်ခလဂေ့ဟယ်။

သန်းဖောပျစ်ဟူကြောန်း

39 မိုးလန်းဟူ ခီမာ သန်းဖောသားလေဟာ သူးနို့ဟာ ဖယ်နေရာဟို့ ရော့-က်နေမှန်း သိဂေ့ဘဲကြောန်း ပန်လယ်ကွေ့ ကမ်းခြေတခုဟို့ မြင်ရဂေ့ဟူ ခီမာ ဖြစ်နိုင်မယ် ဆိုဟာ အယ်ကမ်းခြေထတ်ဟို့ သန်းဖောဟို့ ထိုးဒန်ဟို့တွပ် ဆောင်းဖြတ်ဂေ့ဟယ်။

40 သူးနို့ဟာ ကုလော့-က်ဆူးကြိုးဟို့ ဖြတ်ဘီးဟာ ကုလော့-က်ဆူးလေဟို့ ပန်လယ်ထဲဟို့ ခလလိုက်ဂေ့ဟယ်။ တခီဒဲမာဘဲ ပဲနန်းလေဟုလည်း ကြိုးလေဟို့ ဖြေလိုက်ဂေ့ဟယ်။ အယ်ဘီးနု သန်းဖောဦးဟုနေဘီး ဝှပ်လေဟို့ တန်ဘီး ကမ်းခြေဖတ်ဟို့ သွားလိုက်ဟယ်။

41 အယ်ခီမာ သန်းဖောဟာ ရေတီဟူနေရာဟို့ ရော့-က်ဘီးဟာ သောန်တန်ဘီးနေဟယ်။ သန်းဖောဦးဟာ သောန်မာစိုက်ဘီးနေကြောန်း လှော်န့်ဟို့မျှဟုမ်း။ သန်းဖောပဲဖတ်ဟုနေဘီး လှိုင်းလောင်းလေရိုက်ကြောန်း ကုလိုးဘီးဟာ ပျစ်စီးလာဟယ်။

42 အယ်ခီမာ စစ်သားလေဟာ ကျဉ်းသားလေ ရေကူးဘီး ထွပ်ပုလေးမာဟို့ စိုးရိမ်ဟူကြောန်း သူးနို့ဟို့ သတ်ဟို့တွပ် ကြံစည်ဂေ့ဟယ်။

43 အယ်ဘေမဲ့ တပ်မှူးဟာ ပေါလုဟို့ ကယ်ရှင်ဟူကြောန်း စစ်သားလေရဲ့ ကြံစည်တိုင်း လောက်ဘဲဟို့တွပ် တား

ဘီးဟာ ဦးဆောင်းပထမ ရေကူးတတ်ဟူ လူလေဟို့ သန်း
ဖောဟုနေ ခုခလခိုင်းဘီး ကူးခိုင်းလိုက်ဟယ်။

⁴⁴ အယ်ဘီးန ကျန်နေဟူ လူလေဟို့ သစ်ပုလားလေန
ရော၊ သန်းဖောပျစ်ဟု သစ်ပိုင်းစလေန စီးဘီးဟာ ကူး
ဂေဟို့တွပ် ပြောလိုက်ဟယ်။ အယ်မျိုးနည်းနဘဲ ကျန်
တော့လေ ဂူလောင်းဟာ ဘေးဟုလွတ်ဘီး ကူးထတ်ဟို့
ရော-က်ဟားဂေဟယ်။

28

မေလိတေကျွန်းဟို့ ရော-က်ဟားဂေကြွန်း

¹ ကျန်တော့လေဟာ ဘေးဟုလွတ်ဘီးဟာ ကူးထတ်ဟို့
ရော-က်ဟားဂေဟူ ခီမာ အယ်ကျွန်းဟို့ မေလိတေကျွန်း
ဆိုဘီး ခေါ်ဇာဟို့ သိရဂေဟယ်။

² ကျွန်းသူကျွန်းသားလေဟာ ကျန်တော့လေဟို့ ထူခြား
ဟူ ရှစ်ရှင်းမြစ်တာဟို့ ပြဂေဟယ်။ မိုးဝါဟူကြောန့် အေး
လာဟူ ခီမာ အယ်လူလေဟာ မီးဖိုလောက်ဘီးဟာ ကျန်
တော့လေဟို့ ဧည့်ခံဂေဟယ်။

³ ပေါလုဟာ ထန်းတင်ဟို့ ယူဘီးဟာ မီးထဲဟို့ ထဲလိုက်
ဟယ်။ အယ်ခီမာ မီးပူရှိကြောန့် ထန်းထဲဟုနေ မွီမွေးတ
ကောန်ဟု ထွပ်လာဘီးန ပေါလုရဲ့ လတ်မာ ပတ်နေဟယ်။

⁴ သူလတ်ဟုနေ တန်းလန်းကုလနေဟူ ဗွီဟို့ ကျွန်းသူ
ကျွန်းသားလေဟု မြင်ဟူ ခီမာ “အယ်လူဟာ လူသတ်မား
ဖြစ်နိုင်ဟယ်။ ပန်လယ်ဘေးဟုလွတ် ဘေမဲ့လည်း တရား

မျှတဇာဟု သူ့တို့ သတ်ရှင်ခွဲမ့်ပေးဟု” ဆိုဘီး ရှင်းရှင်း ပြောနေဂေဟယ်။

⁵ အယ်ဘေမဲ့ ပေါလုဟာ ဗွီဟို မီးထဲဟို ခါဒုလလိုက်ဟယ်။ အယ်ဘေမဲ့ သူဟာ ဖြားလည်းဖြစ်ဟု။

⁶ အယ်လူလေဟု ပေါလုဟာ တကိုယ်လောင်း ရောန် လာလေ့မယ်။ အယ်မျိုးမှုဘဲနေဟာ ခုရှစ်ရှင်းဘွဲ သေလေ့မယ် ဆိုဘီး စောန်နေဂေဟယ်။ အယ်မျိုး ကြာဂီးစောန် ကေဘေမဲ့ ဖြားလည်း ပေါလုမာ ဖြစ်လာဘဲဇာဟို မြင်ဂေဟု ခီမာ သူးနို့ဟာ စီသဘောလေ ပုလောန်းလဲဘီးဟာ “အယ်လူဟု နတ်ဘုရားဖြစ်ဟယ်” ဆိုဘီး ပြောဂေဟယ်။

⁷ အယ်နေရာမာ ပုဗလိ နာမယ်ရှိဟု ကျွန်းလူဂီးပိုင်ဟု မုလေယာလေရှိဟယ်။ အယ်လူဟာ နို့လေဟို လတ်ခံဘီးန သောင်းရစ်လောင်းလောင်း ဧည့်ခံဘီး ကျွေးမွေးဟယ်။

⁸ ပုဗလိရဲ့ ဖဟာ ဖျားနေဘီးဟာ ဝန်းကိုက်ဟု ရောဂါ ဖြစ်ဘီး လဲနေဟယ်။ ပေါလုဟာ သူခန်းထဲဟို ဝမ်ဘီး ဆုတောင်းဘီးန သူ့ကိုယ်ထတ်မာ လတ်တန်ဘီး သူ့တို့ ကျန်းမာစေဟယ်။

⁹ အယ်မျိုးဇာလေ ဖြစ်ပျစ်ဟွားဟူကြောန့် ကျွန်းမာနေဟု၊ နေကောန်းဘဲဟု လူလေဟာ ပေါလုနားဟို လာဂေဟယ်။ ပေါလုဟာ သူးနို့ဟို ကျန်းမာစေဟယ်။

¹⁰ သူးနို့ဟာ ကျွန်တော့်လေဟို လတ်ဆောန်လေပေးဂေဟယ်။ ကျွန်တော့်လေဟု ထွပ်ဟွားဟို လောက်နေဂေခီမာ လိုအပ်ဟု စားဇာရီခါလေဟို သန်းဖောထတ်ဟို ပို့ပေးဂေ

ဟုယ်။

မေလိတေကျွန်းဟုနေ ရောမမြို့ဟို့ ရှေ့-က်ဟား
ကြောန်း

11 သောင်းလလော့-က် ကြာဘီးန ကျွန်တော့်လေဟာ
အယ်ကျွန်းမာ ဆောင်းခိုနေဟူ သန်းဖောန သွားဂေဟယ်။
အယ်သန်းဖောဟာ အာလေဇန့်ဒြီမြို့ဟလာဘီး မွာဘုလူး
နတ်ရောက်ထုပါဟူ သန်းဖောဖြစ်ဟယ်။

12 ကျွန်တော့်လေဟာ သုရကုတ်မြို့ဟို့ သန်းဖောန
ရှေ့-က်ဟားဘီး အယ်မြို့မာ သောင်းရစ်လော့-က် နေ
ဂေဟယ်။

13 အယ်မြို့ဟုနေ ပုလန်ဟားဟူ ခီမာ ရေဂျုန်မြို့ဟို့
ရှေ့-က်ဟားဂေဟယ်။ နော့-က်တနေမာ တောန်လေဟာ
လာဟူကြောန် နှေ့ရစ်လော့-က် ကြာဟူ ခီမာ ပေါတယော
လိမြို့ဟို့ ရှေ့-က်ဟားဂေဟယ်။

14 အယ်မြို့မာ ညီကို မောန်နှမလေ တချို့ဟို့ တိုဘီး သူး
နို့ဟု ခွန်နစ်ရစ်လော့-က် သူးနို့န တူးဒုနေဟို့တွပ် တောန်း
ဗန်ဘီး ပြောဟူတိုင်းဘဲ နေဘီးဟာ ရောမမြို့ဟို့ ပုလန်
ဟားဂေဟယ်။

15 ရောမမြို့မာရှိဟူ ညီကို မောန်နှမလေဟာ ကျွန်တော့်
လေ ရှေ့-က်လာကြောန်းဟို့ ကြားရဂေဟူ ခီမာ အပုပ်
ဆေးနားဟို့ရော၊ တဲခိုရိသာ သောင်းဆောန်နားဟို့ရော၊
ရှေ့-က်လာဘီးဟာ ကြိုဆိုဂေဟယ်။ ပေါလုဟာ အယ်

လူလေဟံ့ မြင်ဟူ ခီမာ ဘုရားသခင်ရဲ့ ကျေးဇူးတော်ဟံ့
ချီးမွမ်းဘီး အားတတ်လာဟယ်။

ရောမမြို့မာ မှုတော်ဆောန်ကြောန်း

¹⁶ ရောမမြို့ဟံ့ ရော့-က်ဟူ ခီမာ ပေါလုဟာ သူဟံ့ စော
န့်ပေးနေဟူ စစ်သားတယော့-က်နတူးဒူ နေရဟယ်။

¹⁷ နော့-က်သောင်းရစ် ကြာဟူ ခီမာ ပေါလုဟာ မြို့မာ
နေဟူ ယုဒလူမျိုးခေါင်းဆောန်လေဟံ့ ဖိခေါ်လိုက်ဟယ်။
အယ်လူလေဟာ လာဘီး စုနေဟူ ခီမာ ပေါလုဟာ “ညီကို
လေ၊ ငါဟာ ကိုယ့်လူမျိုးဟံ့ရော၊ ဘိုးဘေးလေရဲ့ ထောင်း
ဒန်းစဉ်လာလေဟံ့ရော၊ ဆန့်ကျင်ဟူမူလေ ခုလည်းလော
က်ဟူ။ အယ်ဘေမဲ့ ယုဒလူမျိုးလေဟာ ယေရုရှလင်မြို့
မာ ငါ့ဟံ့ ဖမ်းဘီးဟာ ရောမလူမျိုးလတ်ထဲဟံ့ အပ်ဂေဟ
ယ်။

¹⁸ အယ်လူလေဟာ ငါ့ဟံ့ စစ်ဆေးဘီး ငါ့ရဲ့မူမာ သေ
ဒန်ပေးထိုက်ဟူကြောန်း ခုလည်းတို့ဘဲကြောန် ငါ့ဟံ့ လွတ်
လိုက်ဂေဟယ်။

¹⁹ အယ်ဘေမဲ့ ယုဒလူမျိုးလေဟာ ကန့်ကွက်ဂေဟူ
ကြောန် ငါဟာ လွဲရှောန်သာဘဲဟူကြောန် ကဲသာမန်းဂီး
နားဟံ့ ယူခံဝမ်ရဟယ်။ အယ်မျိုး ပြောရဟူဇာဟာ ကိုယ့်
လူမျိုးဟံ့ ပြစ်တန်ဇာ တခုခုရှိကြောန် ပြောဇာ မူဟူ။

²⁰ အယ်ကြောန် ခန်ဗျားလေန တို့ဆောင်ခွံမံဟံ့ တော
န်းရှော့-က်ဇာ ဖြစ်ဟယ်။ ငါဟာ အယ်သံကြိုးန ခယ်ခံရ

ဇာဟာ ကုသရေလလူလေ မျှော်လင့်ဘီး စောင့်နေဂေဟူ သခင်တွပ်ကြောန့်ဘဲ ဖြစ်ဟယ်” ဆိုဘီး ပြောဟယ်။

21 အယ်လူလေဟု “နို့လေဟာ နန့်ကြောန်းဟို့ ယုဒပြည် ဟုနေ စာတစောန်လည်း ရဂေဟု။ နို့လေရဲ့ ယုဒလူမျိုး လေထဲဟုနေ ညီကိုလေတယော့-က်လည်း လာဘီးဟာ နန့်ရဲ့ ကောန်းဘဲဟူ ဒန်းဟို့ပြောဟု။

22 အယ်ဘေမဲ့ အယ်ဂိုဏ်းကြောန်းဟို့ ဆန့်ကျင်ဘီး နေရာတိုင်းမာ ပြောနေဂေဇာဟို့ နို့လေသိရဟယ်။ အယ် ကြောန့် နန့်ရဲ့ ယူဝါဒဟို့ နို့လေဟု ကြားရှင်ဟယ်” ဆိုဘီး ပြောဂေဟယ်။

23 အယ်လူလေဟာ ရစ်ချီးပေးဂေဟယ်။ ချီးလိုက်ဟူ နေမာ ပေါလုနေဟူ နေရာဟို့ လူဘောင်ဂီးဟု ရော့-က်လာ ဂေဟယ်။ ပေါလုဟာ မိုးလန်းဟုနေ နေဒန်ထိ ဘုရားသခင် ရဲ့ နိုင်ငံတော်နဆိုင်ဟူ တရားတော်ကြောန်းဟို့ သွီးဆောန် ဘီးဟာ ရှင်းလန်းဖော်ပြဟယ်။ သခင်ယေရှုရဲ့ ကြောန်း လေ မောရှေရဲ့ ပညတ်ကျမ်းန ပရောဖက်ကျမ်းလေဟို့ ကော့-က်နှုဘီးဟာ အယ်လူလေနားလည် ဘောပေါ့-က် လာဟို့တွပ် ကြိုးစားဘီးဟာ ဟောပြောဟယ်။

24 သူးနို့ထဲဟု တချို့ဟာ ပေါလုရဲ့ စည်းရောင်းဟူ စကားလေဟို့ ယောင်ကြည်လာဂေ ဘေမဲ့လည်း တချို့ ဟု ယောင်ကြည်ဂေဟု။

25 အယ်မျိုး ပေါလုပြောဟူ ခီမာ ယုဒလူမျိုးလေဟာ ရှစ်ရှင်းဘဲ ပြင်းပြင်းထန်းထန်းဟား ငြင်းဂေဘီး ထွပ်ဟား

ဂေဟယ်။ ပေါလုဟု “ပရောဖက်ဟေရှာယဟု နန်းနို့ ဘိုး
ဘေးလေဟို့ သန့်ရှင်းဟူဝိညာဉ်တော် ဖော်ပြဟူးဟူဇာ
ဟာ မှန်ပါဟယ်။ ဖော်ပြဟူးဟူဇာဟု အယ်မျိုးဖြစ်ဟ
ယ်။

²⁶ “အယ်လူမျိုးလေဟို့ ပြောကြားဂေပါ။

“နန်းနို့ဟာ ကြိုးစားဘီး နားထောန်ဘေမဲ့လည်း နားလည်
လေ့မယ် မူဟု။

ကြိုးစားဘီး ကေဘေမဲ့လည်း မြင်ဟို့ မူဟု။”

²⁷ ပြားဖြစ်ကြောနန်းဆိုဟာ အယ်လူမျိုးရဲ့ စိန်လော
င်းဟာ ထိုင်းမိုင်းဘီး၊

သူးနို့နားလေဟု လေးနေဘီး သူးနို့ရဲ့ မျစ်စိလေဟာ
ပိနေဂေကြောန့် ဖြစ်ဟယ်။

တကယ်ဆိုဟာ အယ်မျိုးမူနဘဲ သူးနို့ မျစ်စိလေဟာ မြင်
ဘီး၊

နားလေဟု ကြားနိုင်ဘီး၊ စိန်လောင်းလေဟာ သံဘီး
နားလည်ဂေမယ် ဆိုဟာ

သူးနို့ စိသဘောလေဟု ပုလောန်းလဲလာဂေဘီးဟာ

ငါဟုလည်း သူးနို့လေဟို့ ကျန်းမာစေမယ်။” ဆိုဘီး
ပြောလိုက်ဟယ်။

²⁸ နှော-က်ဆောင်းနေန ပေါလုဟု “အယ်ကြောန့်
ဘုရားသခင်ရဲ့ ကယ်တန်ရှင်းတရားဟို့ လူမျိုးခြားလေဟု
ကြားရဟို့တွပ် ဟောပြောဟို့လူလေဟို့ လွတ်ဘီးဖြစ်ဟ
ကြောန့် သူးနို့ဟာ ကြားရဂေလေ့မယ် ဖြစ်ဟူကြောန်း နန်း
နို့ဟာ သိမှတ်ဟူးဂေ” ဆိုဘီး ပြောဟယ်။

29 *

30 ပေါလုဟာ အယ်မြို့မှာ နေ့နှစ်လောင်းလောင်း သူ
ဌားဟားဟူ အိမာနေဘီးဟာ။ သူနားဟို ရော့-က်လာဂေ
ဟူ လူလေဟို ကြိုဆိုညှိခံဘီး၊

31 ဘုရားသခင်ရဲ့ နိုင်ငံတော်ကြောန်းဟို ဟောပြောဘီး
သခင်ယေရှုခရစ်တော်ရဲ့ ကြောန်းဟို ဆီးတားမွှတ်န ရဲရဲ
ရင့်ရင့်ဟား ဟောပြောဘီးနေဟယ်။

* 28:29 ၂၈.၂၉ တချို့ မူရင်းလတ်ရေးမူလေမာ ခန်းငယ် ၂၉ ဟို၊
အယ်မျိုး ပေါလုဟာ ပြောဘီးန ယုဒလူမျိုးလေဟာ သူးနှိရှင်းရှင်းထဲမာ
ပြင်းပြင်းထန်းထန်းဟား ငြင်းဂေဘီးဟာ ထွပ်ဟားဂေဟယ်၊ ဆိုဘီး
ထပ်ပေါင်းထဲဟားဟယ်။

ဓမ္မသစ်ကျမ်း ထားဝယ်ဘာသာစကား
The Holy Bible in the Tavoyan language of
Myanmar: ဓမ္မသစ်ကျမ်း ထားဝယ်ဘာသာစကား

copyright © 2024 The Word for the World International

Language: (Tavoyan)

Contributor: The Word for the World International

ထားဝယ် ဓမ္မသစ်ကျမ်း

The New Testament in Dawei Language

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

0c63f106-1001-58e4-ad11-6f62c327c4e1